





EX MUNIFICENTIA
FERDINANDI III. M. E. D.
DIE 3. IUNII 1791.

9 . 6 . 268 .

9 E 6







PHILOS

UTILIS ET
TRIBUS TOMIS

QUO.

I. Logicam, Meta

II. Elementa Mathe

III. Physicam, cum

COMPLE

IN USUM STUDIOSÆ JU

A

P. ANDREA

Ordinem S. Benedicti in Pontificio Scotorum
phia in Academia Erfurti

TOM

COMPLE

LOGICAM, METAPH

Cum Permissu

Impensis JOANNIS G

. Pedeponti prope Ratisbonam

PHIA

UCUNDA

MPREHENS,

IM

hyficam; & Ethicam,

latum, &

ppendice de Electricitate
TITUR.

NTUTIS CONCINNATA

GORDON

Monasterio Ratisbonæ professo, Philoso-
Professore Publico.

JS I.

ENS

ICAM, & ETHICAM.

uperiorum.

LT, Bibliopola, 1745.

ulgo Stadt am Hof.





REVERENDISSIMO
PRÆSULI
BERNARDO
STUART,


Ex

ILLUSTRISSIMA APUD SCOTOS
PROSAPIA ORTO,
SCIENTIARUM FAUTORI
MAXIMO

Hujus Disciplinæ quondam Salis-
burgi Professori Primario,
DOMINO ABBATI,
ET SUPERIORI SUO

DIGNISSIMO, AC PATRI
AMANDISSIMO
HOS QUALESCUNQUE LABORES
D. D. D.

Filius Obedientissimus
AUCTOR.





PRÆFATIO.

EA est disciplinarum Mathematicarum jucunditas, ea utilitas, ea methodus, ut omnes qui ipsis seriam impendunt operam, iisdem præ reliquis scientiis palmam deberi mox agnoscant. Enim vero quid magis jucundum, humanum intellectum quid magis delectat, mentem quid magis recreat, quam certa veritas manifeste agnita? Hanc autem omnis propositio Mathematica subministrat; cum scientiæ reliquæ opinionibus dubiis, & probabilitatibus potissimum acquiescant. Mathematicum utilitas ex sola sufficienter patet Arithmetica, ut de cæteris illius partibus, quæ non minus utiles, minus tamen notæ sunt, nihil dicam.

Methodus autem Mathematica est put-
cherrimus doctrinæ ordo, quem in suis
de

dogmatibus exponendis adhibent Mathematici. Hic ordo inchoat a definitionibus, pergit ad axiomata, exin ad theoremata, & problemata, quibus corollaria & scholia, prout res exigit, annectit.

Definitio est rei vel nominis explicatio (Log. N. 102.) e. g. Circulus est spatium lineæ curvæ, quæ equaliter ubique distat a puncto medio, terminatam.

Axioma dicitur, quod immediate ex definitione deducitur, unde probatione non eget, ut omnes radii cujusdam circuli sunt æquales. Propositiones omnes, quas absque demonstratione admittimus, quæve per se notæ audiunt, axiomata vocantur.

Cum axiomatibus sæpe confunduntur experientiæ. Experientia vero est certa rei singularis perceptio, cujusmodi est, quod gravia non impedita deorsum tendant.

Theorema est propositio ex pluribus definitionibus earumque proprietatibus deducta. e. g. Triangulum esse dimidium Parallelogrammi, quod æqualem cum illo basin habet & altitudinem, ex Parallelogrammi, & Trianguli definitionibus ac proprietatibus eruitur.

In

In omni theoremate duo sunt confide-
randa, *Propositio* & *Demonstratio*. Propo-
sitio declarat, quid rei sub certis condi-
tionibus conveniat, aut quid repu-
gnet: Demonstratio vero rationes expli-
cat, ob quas intellectus propositioni assen-
sum præbere cogitur: idque non alio
modo, quam qui in Logica docetur: De-
monstrationes enim Mathematicæ nil aliud
sunt, quam enthymematum logicalium
series: ita tamen, ut ex principiis eviden-
tibus conclusiones semper deducantur.
Certa vero & evidentia demonstrationum
principia sunt definitiones, earumque pro-
prietates, quæ in demonstrationibus Ma-
thematicis citari solent, tum ut pateat, ge-
nuina adhiberi principia: tum ut ignaris
constet, unde eorum certitudo sit petenda.

Problema aliquid faciendum exhibet,
ac tribus constat partibus, Propositione
videlicet, Resolutione, ac Demonstratione.
Propositio indicat quid fieri debeat:
Resolutio singulos actus ordine præscribit,
quibus efficitur, quod fieri debet: De-
monstratio tandem evincit, factis iis, quæ
resolutio fieri jubet, effectum intentum
obtineri? proindeque demonstratio Pro-
blematis illud in Theorema convertit.


Corollarium est propositio, quæ ex The-
oremate aut Problemate vel earum de-
mon-

monstrationibus per pronam deducitur
consequentiam.

In Scholiis tandem, quæ ubique fere
apponi possunt, obscura explicantur, re-
spondetur ad dubia, doctrinæ usus exhi-
betur, fontes & historiæ inventionum
assignantur, & alia scitu jucunda, atque
utilia annectuntur.

Methodus descripta Mathematica dici-
tur, quod a solis Mathematicis adhibita
fuerit, & ab aliis vix adhiberi possit ob ex-
iguam aliarum scientiarum in propositi-
onibus plerisque certitudinem. Hanc me-
thodum servant brevissima quæ cernis
Mathematicum elementa. Cæterum non
omnium disciplinarum Mathematicarum
elementa propono, sed earum solum, quæ
demonstrationibus Physicis maxime ne-
cessaria. His tamen rite intellectis,
reliqua (quæ ad altiorem non spe-
ctant Mathesin) facili nego-
tio discentur.





PHILOSOPHIÆ PROOEMIUM ET OPERIS PRÆFATIO.

Philosophia, si vocabuli etymologia spectetur & origo, latissimam habet significationem: cum enim proprie sit *Amor Sapientie*, illud omne continet, quod sapiens aut doctum audit, omnesque scientias tam Divinas quam humanas vastissimo suo complectitur sinu. Atque hinc est, quod omnes Viri Docti ab Antiquis Philosophi fuerint appellati, postquam Pythagoræ Modestia vanam aliorum jaçantiam, qua Docti seipso *σοφῆς* id est, sapientes nominare non crebuerant,

buerant , coercuit , seque τὸν τῆς σοφίας φίλον sive φιλόσοφον amicum seu cultorem sapientiæ vocavit.

Nunc vero Philosophiam restringimus ad ea , quæ invicta ratione demonstrari possunt , quæve utilem curiositatem plerumque spectant. Unde non male describitur : *certa & evidens rerum naturalium cognitio.*

Definitionem hanc qui rite examinaverit , facile perspiciet , sub Philosophia contineri *Logicam* , sive scientiam bene discurrendi , qua quis ex principiis evidentibus dignoscit , an bene ratiocinetur : *Metaphysicam* , quæ generalia scientiarum principia explicat , & spirituum notitiam subministrat. *Ethicam* , sive moralem , quæ vitam humanam probe ducendam docet : ac *Physicam* , sive notitiam rerum corporearum , quæ sine disciplinis Mathematicis nonnisi manca & imperfecta potest acquiri.

Harum scientiarum brevia sed solida elementa , eaque nova & plana methodo ob oculos pono : neglecta scilicet methodo scholastica , & forma syllogistica , quæ congressibus literariis magis apta comprobatur ,
quam

quam ad scientias addiscendas aut explicandas. Omisi quæstiones inutiles & vanas speculationes, præter paucas quas ad addiscendum disputationis exercitium cap. 4. Log. adduxi. Tempus enim, quod breve nobis concessum, res est adeo pretiosa, ut his consumi sine piaculo vix possit. Quare utilia tantum selegi & jucunda, quæque ad solidam doctrinam, & libros Philosophicos intelligendos faciunt.

Aliorum libros & verba citavi raro (præterquam in Ethica, cujus præcipua capita nituntur auctoritate) Nam instituti mei ratio est, doctrinam Philosophicam ratione solidatam tradere, non librorum notitiam aut eruditionem. Aliorum tamen doctrinam, ordinem, & verba quæ placuere, lubens retineo; cum instruere cupiam, non styli aut ordinis elegantiam ventilare.

Philosophiam equidem meliori forma donatam pluribus jam annis desiderarunt plurimi. Hoc tamen negotium Catholicorum in Germania tentavit quod sciam nemo. Ego itaque ab aliis rogatus, ab aliis quibus obsequi teneor jussus, periculum primus feci,

feci, & aliis quibus plus otii & ingenii, viam pandi, ad majora & perfectiora Philosophiæ Reformatæ opera edenda. Hunc enim prævium qualemunque laborem ego præcipue suscepi in gratiam studiosæ Juventutis, ad quam Philosophicis disciplinis imbuendam pluribus jam annis in Alma Universitate Erfurtensi insudo. Quomodo provincia hac mihi demandata me liberem, judicent alii, quos æquos & benignos esse rogo, & futuros spero; præcipue si perpenderit, discipulis sine scribere, quibus res omnes explicando ampliare decet. Hinc doctrinæ tantum nucleum tradens, paucis complector multa, quæ levi brachio ex traditis colliget, & explicando ampliabit experti Magistri industria. Mea vero scripta omnia, dictaque in Dei unius gloriam cedant, & utilitatem Proximorum.



LOGI-



LOGICÆ PROÆMIUM.

QUoad Etymologiam nominis Λογική
Vox græca est, quæ latine *Rationalis*
audit, quia hæc disciplina mentem
dirigit in ratiocinando. Hæc eadem
facultas dicitur quoque græce Διαλεκτική,
id est, *Disputativa*: non quod Logica multa
contineat incerta, quæ disputationi mate-
riam præbent (hoc enim cum aliis scientiis
commune habet) sed quoniam disputandi
modum & regulas aliis scientiis subministrat:
unde & ὄργανον sive instrumentum Scien-
tiarum dici solet. Breviter autem definiri
potest *Scientia bene cogitandi, vel ratiocinandi,*
aut *discurrendi*, quæ coincidunt.

Alia est *Logica Naturalis*, sive ipsum ra-
tionis lumen, vi cuius ab uno ad aliud natu-
raliter discurrere valemus. Alia est *Artifi-*
cialis, quæ variis regulis & præceptis Natu-
ralem perficit atque ita dirigit, ut in suis ope-
rationibus securè procedat. Ut autem soli-

P. Andr. Gordon Phil. P. I.

A

dam.

dam utriusque ideam quis acquirat , bene ponderanda sunt sequentia :

Dum sensibus res externas & singulares percipimus (velut aperta docet experientia) illarum imago ingeritur menti , & vocatur idea rei perceptæ. Hanc mens ad libitum revocare potest, & sic percipere res absentes ; nam utique idea vel imago hominis à nobis olim visi , quandoque placuerit , quasi ob oculos nobis oberrat. Dum rem ipsam præsentem , vel ejus absentis ideam solum intuemur , simpliciter apprehendere dicimur , ut dum Lunam intuemur in cœlo adinstar disci , vel ejus ideam in mentem revocamus. Hæc prima dicitur mentis operatio. Porro cum ideæ nostræ intra mentem lateant , ad societatem & commercium humanum opus est modo & arte illas manifestandi , & aliis communicandi. Hoc præstant voces Significativæ , quæ à communi plurium hominum aut nationum consensu certas & determinatas res & illarum ideas significant.

Uterius cum duas ideas conjungimus, vel ab invicem separamus , judicare dicimur. Unde habetur secunda mentis operatio , nempe judicium. E. g. ideam *Lunæ* & ideam *lucis* conferimus , cumque utramque ideam bellè convenire deprehendamus , illas conjungimus , & *Lunam lucere* judicamus. Hæc fiunt intra mentem. Quod si judicia nostra aliis manifestare cupimus , illa per propositiones

tiones enunciamus, sive ad extra proferimus. Hinc iudicium & propositio, etsi vulgò promiscuè sumantur, in hoc tamen differunt, quod iudicium sit intra mentem, enunciatio autem sit iudicium manifestatum, ut dum dicitur: *Luna lucet*, manifestatur id, quod prius erat in mente.

Denique cùm ex uno aut pluribus iudiciis aliud inferimus cum ipsis connexum vel in ipsis contentum, discurrere dicimur; unde tertia exurgit mentis operatio, videlicet discursus mentalis, cum mens ab uno iudicio transit ad aliud. Hic discursus mentalis aliis manifestatur per discursum vocalem.

Porro mens actum suum reflexè cogitare potest, & sic cognoscere, an bene vel malè fiat; hinc regulæ Logicales exortæ, cùm in mentis operationibus accurata & sæpius repetita attentione observatum fuerit, hoc modo semper bene, alio semper malè discurri.

Omnis igitur humana cognitio tribus mentis sive intellectûs operationibus perficitur, videlicet *Apprehensione*, *Judicio*, & *Discursu*. *Apprehensio* est actus mentis, quò rem propositam nudo mentis intuitu percipimus, nihil de illa negando, nec affirmando. *Judicium* est actus mentis, quo unum de alio affirmamus, vel negamus, e. g. *homo est doctus*, ubi doctrina de homine affirmatur. *Discursus* est actus mentis, quo ex uno aut

pluribus Judiciis aliud cum ipsis connexum inferimus, e. g. homo est doctus; ergo est æstimandus. Hisce tribus mentis operationibus correspondebunt tria Logicæ capita. Et quidem primum de ideis & terminis, Apprehensioni, ubi quoque de modo sciendi, & methodo agam. Secundum de propositione, Judicio: & tertium denique de argumentatione, Discursui. Quæ autem ab aliis in *Logica*, ut vocant, *Majori* tradi solent, ea partim hisce tribus capitibus immiscebo, partim verò ad addiscendum disputationis modum fusè tradam cap. quarto per modum appendicis.

CAPUT I.

*De iis quæ pertinent ad primam
mentis operationem.*

§. I.

De universalitate, particularitate & singularitate idearum.

N. I.

Idea est nihil aliud, quam *imago rei mente concepta*; vel est ipsa rei perceptio, sive notio; vel denique quævis rei in mente facta repræsentatio. Sic dum hominem cogito, vel illum per cogitationem mihi repræ-

præfento, tunc hominis ideam in mente habeo.

2. Hujusmodi notio, idea vel rei repræfentatio in mente facta est *universalis*, vel *particularis*, vel *singularis*.

3. Idea universalis dicitur, quæ multa ex æquo singularia repræfentare potest, v. g. idea circuli omnes generatim circulos exhibet, & idea hominis omnes homines generatim repræfentat.

4. Idea particularis rem aliquam singularem repræfentat, sed indefinitam & indeterminatam, v. g. aliquem hominem, vel aliquem circulum.

5. Singularis denique exhibet rem aliquam singularem certam & determinatam. v. g. Platonem, Aristotelem, Petrum vel Paulum.

6. Quinque sunt ideæ universalis Species, videlicet *genus*, *species*, *differentia*, *proprium* & *accidens*.

7. Genus est *attributum universale*, quod multis speciebus convenit tanquam pars essentiae communior ad quæstionem factam quid res sit? v. g. *animal* convenit homini & bruto, tanquam diversis speciebus, ut pars essentiae communior ad quæstionem factam, quid res sit. Nam si quærat quid sit homo; respondetur, esse *animal*, quod est illius genus, & pars essentiae communior, quâ cum bruto convenit. Si quærat, quid sit brutum respondetur denuo, esse *animal*, quod

est illius genus, & pars essentiae communior, qua convenit cum homine.

8. Porro genus (idem de Specie & differentia dicendum) dividitur in supremum medium & infimum. Genus supremum est, quod nullum habet aliud supra se ut *substantia* vel *ens*. Genus infimum *contra* nullum infra se agnoscit, ut *animal* respectu hominis & bruti. Genus medium & supra, & infra se alia habet genera, ut *crescens*. Unde sequitur, quod unum idemque v. g. *crescens* possit esse genus & species sub diverso tamen respectu. Sic *crescens* & *non crescens* sub genere *substantiae* continentur ut species; *Crescens* verò erit genus prout sub se continet *Sentiens* & *non Sentiens*.

9. Species est *attributum*, quod multis *individuis* sive *singularibus* convenit tanquam *tota rei essentia ad questionem factam quid res sit*, v. g. *homo* est *attributum*, quod Platoni, Aristoteli, Petro & Paulo, & omnibus reliquis *individuis* convenit tanquam *tota eorum essentia*. Si enim quærat *quid sit Petrus*, *quid Plato*, rectè respondetur, ipsos esse *homines*.

10. Individuum, seu *singulare* dicitur, quod *dividi non potest in plura talia*, quale ipsum est. V. g. *Alexander* *dividi non potest in plures Alexandros*, in plures tamen partes *dividi potest*, v. g. in *manus*, *pedes*, *truncum* & *caput*. Unde aliud est *individuum*, aliud *indivisibile*.

11. Dif-

11. Differentia generatim est id, quo *unum* ab alio distinguitur, sive differt, estque, triplex, videlicet *essentialis*, quæ & *specifica* dicitur: vel *propria*, quæ *proprium*: vel *accidentalis*, & *accidens* nominatur.

12. Differentia *essentialis* & *specifica* est *attributum essentialiale* & *primarium*, quo una species ab alia distinguitur, & per quod respondetur ad quæstionem factam, qualis res sit *essentialiter*. Sic v. g. si quærat^rur quid sit homo: respondetur illum esse *animal*, assignando illius genus sive partem *essentialiæ* communem, qua cum bruto convenit. Dein si quærat^rur, quale sit animal respondetur esse *rationale* assignando illius differentiam per quam à bruto *essentialiter* secernitur, & distinguitur.

13. Differentia generi addita semper constituit speciem v. g. *rationale* additum *animali* constituit *hominem*.

14. *Proprium* est *attributum essentialiale secundarium*, quo una Species ab alia distinguitur, ut *admirativum* respectu hominis. Si enim quærat^rur de homine, quale sit animal, responderi potest, esse *admirativum*; quod quidem hominem ab omni alia specie distinguit; atamen non est nisi *attributum essentialiale secundarium*: nam *essentialiam* jam constitutam quasi consequitur; ex eo enim, quòd homo sit animal *rationale*, sequitur, illum esse *admirativum*. Quare *rationale* est attribu-

tum *primarium*, *admirativum* verò non nisi *secundarium*.

15. *Proprium* quatuor modis dicitur:

Primò quod convenit soli speciei, sed non omni, ut soli homini convenit esse *Medicum* aut *Juridicum*, sed non omni.

Secundò quod convenit omni speciei, sed non soli, ut omni homini convenit, esse *bipedem*, sed non soli; nam pleræque volucres sunt *bipedes*.

Tertiò quod omni & soli speciei convenit, sed non semper, ut actu *sermocinari*, omni & soli homini convenit, sed non semper.

Quartò quod convenit omni & soli speciei, & semper, ut esse *admirativum*, sive *mirari posse*, omni & soli homini convenit, idque semper. Quamvis enim homo non semper actu miretur, semper mirandi potestatem retinet.

16. *Accidens* denique definiri potest id, quod *adesse potest*, vel *abesse salvâ rei essentiâ sive naturâ*. V. g. *figura quadrata* vel *rotunda* respectu *ceræ* accidens dicitur, quoniam *ceræ* *adesse potest* vel *abesse* ita ut semper maneat *cera*; proindèque illius *natura* sive *essentia* *salva* semper conservetur.

17. Hic notandum, omne illud dici *essentiale* sive *necessarium*, aut *naturale*, quod ita rei cuidam convenit, ut ei non possit repugnare, aut non convenire: Sic homo dicitur

tur essentialiter esse rationalis, quia rationalitas non potest non convenire homini.

18. Accidens dividitur in *extrinsecum* & *intrinsecum*.

Accidens extrinsecum rem extrinsecus denominat, & vocatur denominatio externa: ut paries denominatur visus ab hominis visione, quæ est parieti externa.

Intrinsecum dicitur, quod est in ipsa re vel subiecto: cujusmodi sunt *recordatio* vel *amor* respectu mentis: *quantitas*, *motus*, *quies*, *situs* & *figura* respectu corporis.

§. II.

De claritate & distinctione idearum.

19. **D**um idea quam de re quadam formamus, sufficit ad rem illam denuo occurrentem rectè cognoscendam, v. g. quòd hoc vel illo nomine insigniatur, quòd hoc vel illo loco à nobis visa fuerit; tunc idea dicitur *clara*: *obscura* verò vocatur idea dum non sufficit ad rem illam, cujus est idea rite cognoscendam. Sic claras habemus ideas auri, argenti, ferri, plumbi, ligni, lapidis, colorum &c. Ubique enim hæc occurrunt, ea plenè cognoscimus. Econtra multi obscuras tantum habent ideas de plerisque herbis, ita ut non nisi dubitando, & quasi divinando herbas illas appellent.

20. Dum idea rem ab omnibus aliis rite discernit, *distincta idea* dicitur. Sic idea mentis seu substantiæ cogitantis clara est & distincta,

stineta, nec confundi potest cum idea corporis, seu substantiæ in longum, latum, & profundum extensæ: sic idea hominis clara est & distincta, quoniam hominem ab omnibus aliis perfectè discernit.

21. Quod si verò idea rem non perfectè discernat ab omni alio, tunc *confusa* vocatur. Sic multi confusas tantum & obscuras habent ideas de terminis Mathematicis, Philosophicis, Medicis, & Juridicis.

22. Ut verò Logica claritatem, & distinctionem in ideis ponat, ea omnia quæ mente concipi possunt, ad certas classes revocat, quas *categorias* sive *predicamenta* vocamus.

23. Categoriæ igitur sunt *suprema rerum genera, sive classes, aut capita*, quibus omnia substantiæ singularis attributa continentur; & quibus proinde, quidquid animo concipi potest, includitur.

24. Duæ quidem sunt generatim categoriæ, nempe *ens*, seu *res*, aut substantia, & *modus entis*, sive *accidens*. Sed cum *modus entis* sit multiplex, idcirco decem communiter statuuntur categoriæ nempe *substantia, quantitas, qualitas, relatio, actio, passio, quando, ubi, situs & habitus*.

De Substantia.

25. **S**UBSTANTIA est *ens per se subsistens*, id est, absque ope alterius entis creati; secus enim solus Deus esset substantia, cum ille solus

solus per se subsistat, & absque ope omnis alterius entis.

26. Omnis substantia vel extensa est, vel non extensa; nam inter hæc duo non datur medium. Substantia non extensa est spiritus; extensa verò est corpus. Hinc prima substantiæ divisio est in *Spiritualem*, (qualis est Deus, angelus, & mens humana, sive anima rationalis) & *Corpoream*. Corpus vel est *inanimatum*, ut cœlum, terra, lapis, lignum &c. vel *animatum*. Corpus animatum vel sensu caret, & progrediendi vim non habet, & vocatur *non sensitivum*, ut planta; vel progrediendi vi & sensu præditum est, quod *sensitivum* dicitur, ut animal. Rursum animal vel ratione destitutum est, & vocatur *irrationale*, ut brutum, aut bellua: vel ratione pollet, & *rationale* appellatur, cujusmodi est solus homo. Denique homo in sua individua sive singularia dividitur, v. g. in Petrum, Paulum, Platonem, Aristotelem &c.

27. Sex substantiæ proprietates vulgò referuntur, quarum duæ tantum memoria dignæ videntur. Prima, *quod substantiæ nihil sit contrarium, quatenus substantia est*. Secunda, *quod substantia non suscipiat magis aut minus*; nam corpusculum minimum non minus dicitur substantia, quàm res maxima & præstantissima, neque res maxima est magis substantia, quàm minimum corpusculum.

De

De Quantitate.

28. **Q**uantitas est *extensio corporis sive mensura magnitudinis*; ea tamen cum ipsa magnitudine promiscuè usurpatur. Unde

29 Dividitur in quantitatem *discretam & continuam*. Discreta est, cujus partes sunt separatae, ut numerus. Continua est, cujus partes sunt conjunctae: eaque rursus vel est *successiva* vel *permanens*. Successiva dicitur, cujus partes sunt in perpetuo fluxu, ut videre est in tempore & motu, cujus partes sunt in continuo fluxu, & constanter sibi invicem succedunt. Quantitas permanens est cujus partes sunt simul, estque triplex, *linea* nempe, *superficies*, & *solidum*. Linea est extensio in longitudinem tantum: superficies est extensio in longum & latum: non quòd ulla sit longitudo sine latitudine, vel longitudo & latitudo sine profunditate: sed quod spectari possit longitudo corporis cujusdam non attenta latitudine: vel longitudo & latitudo non attenta profunditate. Solidum denique est extensio in longum, latum, & profundum.

30. Tres vulgò recensentur quantitatis proprietates. Prima. *non habere contrarium*; quantitas enim non est contraria alteri quantitati ratione sui, sed solum ratione suarum qualitarum. Secunda, *non recipere magis aut minùs*; nam una quantitas non est magis aut minùs quantitas, quàm altera, licèt major vel minor

minor quantitas esse possit. Tertia, res per quantitatem dici æquales vel inæquales, quæ proprietas omnibus nota est.

De Qualitate.

31. **Q**ualitas in scholis definiri solet, id, quò res denominatur qualis; & communiter dividitur in quatuor species bimbres, videlicet in *habitum* & *dispositionem*, in *potentiam naturalem* & *impotentiam*, in *passionem* & *patibilem qualitatem*, in *formam* & *figuram*.

32. *Habitus* hoc loco dicitur *operandi facilitas repetitis actibus comparata*; ut, si quis per frequens humilitatis exercitium pronus fiat, & facilis ad quævis opera humiliantia & vilia suscipienda, humilitatis habitum acquisivisse dicitur, & in humilitate habitus: si habitus parùm sit firmatus vocatur *dispositio*. Unde pauciores ad dispositionem quam ad habitum requiruntur actus frequentati: hinc facilè patet, quòd habitus & dispositio non differant nisi secundum magis & minus, sive secundum perfectius & imperfectius; nam dispositio est habitus imperfectus & inchoatus, qui accedentibus pluribus actibus transit in habitum perfectum.

33. *Potentia naturalis est vis à natura rebus insita ad agendum, vel patiendum, sive resistendum*. Ejusmodi est potentia equi ad trahendum currum; aut ejusdem equi potentia

tia ad patienda verbera, quæ aliud animal debilius occiderent. Quod si hæc potentia sit infirma, dicitur *impotentia*.

34. Nomine qualitatis patibilis sive sensibilis intelligitur *id, quod est in objecto sensibili*, cujusmodi est calor in igne, quod scilicet vim habeat in se, quæ sensum moveat. Passio verò est eadem qualitas, ut à nobis percipitur.

35. Figura est *externus corporis terminus*: ut rotunditas respectu globi. Sæpe etiam vocatur *forma*: ut forma pilei, forma domûs.

36. Quatuor assignari solent qualitatis proprietates. Prima, *habere contrarium*, ut virtus contraria est vitio. Verùm hæc proprietas non omnibus qualitatis speciebus convenit, ut patet in ultima qualitatis specie, nempe forma & figura. Secunda, *si ex duobus contrariis unum sit in categoria qualitatis, alterum quoque in eadem esse categoria*. Tertia, *intendi & remitti*: sic calor remissus intendi potest in mediocrem, & mediocris in summum; summus verò remitti potest in mediocrem, & hic in remissum; unde varii sunt hujus intensificationis, & remissionis gradus. Quarta, res per qualitatem dici similes & dissimiles.

De Relatione.

37. **R**elatio est ordo seu respectus unius ad aliud. Quod autem talis ordo & respectus

spectus in rerum natura detur, negari minime potest ; palam enim est stupendus ille inter res omnes Universi ordo & consonantia, quæ meritò à sapientibus appellari solet mundi pulchritudo & harmonia, cum nempe res omnes invicem, una cum altera, una cum omnibus, & omnes cum omnibus ordinem & relationem habeant admirabilem. Jam quomodocunque res una refertur ad aliam sive ad illam comparatur, semper prodit relatio.

38. Præcipuè autem duobus modis res una ordinari potest ad aliam, nempe secundum rem ipsam ; vel tantum secundum rationem, & concipiendi modum. Hinc alia est relatio *realis*, alia *rationis*. Realis est ordo, qui rebus ipsis inest : sic effectus ordinatur ad causam, pars ad totum. Relatio rationis est ordo per mentem inter aliqua excogitatus : ut ordo speciei ad genus &c.

39. Relatio realis vel est *increata*, vel *creata*. Increata est ordo seu respectus unius Divinæ Personæ ad aliam : estque quadruplex, nimirum *Paternitas*, quæ est relatio principii generantis ad suum terminum, nempe Filium : *Filiatio*, quæ est respectus termini geniti ad suum principium, nempe Patrem : *Spiratio activa*, quæ est principii spirantis, Patris videlicet, & Filii ad Spiritum sanctum : & *spiratio passiva* Spiritûs sancti, qui à Patre & Filio, ut ab uno principio procedit. Sed hæc

hæc ad Theologos. Relatio Creatæ est ordo naturalis unius rei creatæ ad aliam, vel ad ipsum rerum Creatorem.

40. Relatio creata dividitur in relationem *transcendentalem* & *non transcendentalem*. Relatio transcendentalis est ordo in ipsa rei essentia inclusus, seu ipsa rei absolutæ entitas ex sua essentia & natura ad aliud ordinata: ut anima dicit transcendentalem ordinem ad corpus, pars ad totum, & causa ad effectum; nam hæ res ad illas ex sua essentia ordinantur. Dicitur transcendentalis, sive transcendens, quia transcendit omnia rerum genera: nihil enim ferè est, quod ad aliud ex sua natura non ordinatur. Relatio non transcendens est, quæ non includitur in essentia rei, sed ipsi advenit: ut paternitas respectu hominis. Hæc relatio non transcendens sola pertinet ad hoc prædicamentum, cum illa sola sit accidens. Hæc divisio ab aliis redditur *secundum dici* & *secundum esse*, ita ut relatio secundum dici, sit relatio transcendens: & relatio secundum esse, sit eadem ac non transcendens seu prædicamentalis.

41. Porro in relationibus præsertim prædicamentalibus tria sunt distinguenda, subjectum nempe, quod refertur: terminus ad quem refertur; & fundamentum, sive ratio, cur referatur; sic in relatione Paternitatis Pater est subjectum, quod refertur ad Filium; Filius est terminus, ad quem pater refertur:
& ipsa

& ipsa generatio est fundamentum, sive ratio, cur Pater ad Filium referatur.

42. Relationis proprietates numerantur quinque. Prima, *non habere contrarium*; nam una relatio non pugnat contra aliam; & relationes diversæ in eodem subjecto se patiuntur. Unde non habent inter se contrarietatem, sed solum oppositionem relativam, per quam se mutuò non destruunt, sicut contraria, sed tantum sese mutuò respiciunt. Secunda, *non suscipere magis & minus*; relatio enim non crescit, aut decrescit. Tertia, *invicem converti*, v. g. filius est patris filius; & pater est filii pater; dominus est servi dominus, & servus est domini servus. Quarta, *esse simul naturâ*, id est, simul existere; relata enim ita invicem connectuntur, ut unum sine alio esse nequeat; sic pater nequit esse sine filio, nec filius sine Patre. Quinta, *esse simul cognitione*; nam impossibile est cognoscere unum relativum sine altero, v. g. patrem sine filio, aut vicissim.

De Actione & Passione.

43. **A**ctio prædicamentalis est *accidens*, quo causa constituitur actu causans; passio verò est *accidens*, quo subjectum constituitur actu recipiens effectum ab agente: sic calefactio respectu ignis calefacientis dicitur actio; & respectu manûs calefactæ, passio nominatur.

44. Actionis variz sunt species, & divisiones. Præcipua est in actionem immanentem & transeuntem. *Actio immanens* nihil extra agens producit, ut visio. cognitio, amor, quæ sunt in vidente, cognoscente, & amante. *Actio transiens* autem extra agens aliquid efficit, ut calefactio, illuminatio, generatio &c.

De Ubi & Quando.

45. **U**bi est *præsentia rei in loco*. Quando est *rei duratio*, seu existendi perseverantia. Utrumque nihil est, nisi res ipsa, quatenus locum, aut tempus connotat; neque hæ sunt entitates aut modi à re ipsa distincti. Nam detracta illa entitate, quâ modus rei succrescens fingitur, corpus erit *hicubi*, & in aliquo tempore: adeo ut modus ille additus corpori, quem *ubicationem* vocant, sit penitus inutilis; cum impossibile sit rem esse, & nullibi existere. Cùmque ubi res aliqua sit quærimus, non aliud, quam in quo sit loco, inquirimus: adeo ut *ubi* nihil aliud sit quàm res ipsa, ut locum connotat; nec quidquam absolutum addit corpori, sed relationem duntaxat, aut connotationem loci.

46. Eadem est ratio prædicamenti *quando*; nam rei duratio, per quam respondetur ad quæstionem *quando*, nihil aliud est, quam continuata illius rei existentia: & res quælibet

libet quamdiu à Deo conservatur, tamdiu durat citra ullum modum superadditum.

47. Duratio est triplex: *æternitas* nempe, *ævum*, & *tempus*. *Æternitas* est duratio principio & fine carens, solique Deo propria: *Ævum* est duratio habens principium, sed fine carens, angelis & animabus rationalibus concessa: *Tempus* denique est duratio principium habens & finem, substantiis mixtis competens.

48. Similiter duplex ubi vulgò distinguitur, *definitivum* nempe, quod rei incorporæ convenit; & *circumscriptivum*, quod soli corpori comperit.

De Situ & Habitu.

49. **S**itus est dispositio partium corporis in ordine ad locum ut sedere, stare, jacere. *Habitus* est propriè corporis, quatenus id connotat rem artificialem sibi adjectam, cujusmodi est vestis, & id omne quod corpus humanum ornat, & vestit. Unde has condiciones adhibere solent: ut corpus illud adjacens sit utile, ut ab ipso animali circumferatur, nec sit ei intimè conjunctum. Hinc compedes defectu primæ conditionis: lectus secunda deficiente; pili & plumæ, quibus tertia deest conditio, prædicamento habitûs excluduntur. Quod quidem non magni est usus ad distinctam rerum perceptionem. Si-

tus plus habet utilitatis, præsertim in machinis, ubi magna sitûs ratio haberi debet.

Porro ad categorias memoriæ imprimendas, adhibent sequens dystichon:

Arbor, sex, servos, ardore, refrigerat, ustos.
Sub. quant. Rel. qual. actio. pass.
Cras, rubi, stabo, cum tunicatus ero.
Quand. ubi, situs. Habitus.

De Postprædicamentis.

50. **S**olent prædicamentis præmitti antepædicamenta quædam; uti & postpædicamenta postponi. Verum de utilioribus antepædicamentis videlicet univocis & æquivocis dicam, quantum sufficiet §. seq. De uno autem postpædicamento, videlicet oppositione cap. 2. Hinc solum hic de postpædicamento prioritatis, posterioritatis & simultatis agam.

§ 1. Prioritas est modus, quo res una præcedit aliam. Ejus quatuor numerantur species, nempe *prioritas temporis, ordinis, dignitatis & nature*. Prioritas temporis est modus, quo res una præcedit aliam tempore & duratione: ut pater filium. Prioritas ordinis est, qua unum præcedit ordine: ut numerus primus secundum. Prioritas dignitatis, qua unum præcedit aliud dignitate, ut Rex Principes, Episcopus Sacerdotes. Prioritas demum naturæ est, qua unum præcedit aliud non realiter, sed tantum ex modo concipi-

concipiendi : sic sol dicitur præcedere diem non realiter, cum sint simul, sed tantum ex modo intelligendi.

Posterioritas pari passu cum prioritate ambulat; hinc tot dantur illius species, quot istius. Idem de similitudine dicendum.

§. III.

De Idearum signis, sive terminis Logicalibus.

52. **C**UM ideæ nostræ intra mentem latent, nec per seipsas immediate aliis manifestari possint, signa quædam adhibemus illas indicantia, nempe voces significativas, quibus mediantibus ideæ aliis innotescunt.

53. Signum autem dicimus id, quod in alterius rei cognitionem nos ducit. Hoc vel naturale est, vel arbitrium.

54. Naturale est, quod naturaliter aliquid significat, sive quod per seipsum, ex sua natura, & independenter ab hominum voluntate, atque institutione aliquid indicat sive repræsentat ob naturalem cum illo connexionem, quodque idem significat apud omnes: quale est vestigium hominis vel equi; hoc enim naturaliter significat hominem vel equum ibi transiisse, idque æqualiter in omnibus: item lamentatio dolorem, fumus ignem ex sua natura indicant.

55. Signum arbitrium est, quod non ex sua natura, sed ex libera hominum volunta-

te & institutione aliquid significat. Hoc modo vocabula & nomina sunt signa rerum, quas significant : sic quod *homo* significet potius animal rationale, quàm irrationale v. g. leonem aut equum, provenit à sola quorundam hominum, nempe Latinorum institutione.

§ 6. Porro cum res illæ, de quibus Sermocinari volumus, in idea mentis nostræ sint præsentès, easdem voces, sive vocabula, sive nomina significativa adhibemus ad ideas nostras significandas, & manifestandas; proindeque voces significativæ sunt idearum nostrarum signa. Neque ineptè dicitur, quòd ex voces immediate significant ideas, mediatè verò, mediantibus scilicet ideis, res ipsas. Ideo enim aliquid alicui rei convenire vel repugnare dicimus, quoniam id illi in idea mentis nostræ convenit, aut repugnat. Voces igitur sunt signa idearum & rerum; sed harum mediatè, illarum immediate.

57. Vox autem generatim sumpta est sonus ex animalis ore procedens, & per appulsionem aëris è pulmonibus in fauces incurrentis formatus.

58. Vox significativa est *sonus articulatus ab homine prolatus ad exprimendas animi cogitationes*. Dicitur *articulatus sonus*, id est, per syllabas tanquam per articulos distinctus; in quo distat à confusis animalium vocibus, nempe

nempe à mugitu boum, canum latratu &c. Additur *ad exprimendas animi cogitationes*, ut à vocibus psittacorum, picarum & similium differat.

59. Vox significativa vel instituta est ad exprimendas ideas rerum, vel idearum objecta, sive res ipsas, & dicitur *nomen*: ut *Deus*, *Angelus*, *homo* &c.

60. Vel instituta est ad exprimendum iudicium, sive ad significandam affirmationem vel negationem; & dicitur *verbum*, ut *diligo*, *nescio*, &c.

61. Verbum duplex est, *substantivum* & *adjectivum*. Substantivum est, quod esse tantum significat, cuiusmodi est *sum*, *es*, *est*. Verbum adjectivum significat aliquid additum ad esse: e. g. *ambulo*. Quod idem est, ac *sum ambulans*. Verum hic præcipuè de nomine agendum.

62. Quod si nomen consideratur in ordine ad propositionem (de qua Capit. seq.) componendam, vel prout actu in illa est, tunc dicitur terminus. Ubi faciliè patet, quod terminus non sumatur cum Theologis pro fine ultimo, sive beatitudine æterna: neque cum Geometris pro limite; sed tantum pro *extremo propositionis* juxta communem termini Logicalis definitionem. Jam cum omne nomen possit esse *propositionis extremum*, eodem jure potest esse terminus Logicalis. Nihilominus tamen nomen &

terminus non sumuntur promiscuè ; siquidem terminus *mentalis*, sive qui mente concipitur, non est nomen ; cum nomen utpote vox, ore proferri debeat, si strictè loqui velimus & propriè : vel saltem, si minùs strictè & impropriè loquamur, debet literis exarari.

63. Terminus igitur Logicè sumptus generatim definitur *extremum propositionis*. e g. in hac propositione : *homo est justus* : *Homo* est extremum incipiens : & *justus* est extremum claudens propositionem ; proindeque *homo* & *justus* sunt duo termini.

De Terminorum Divisione.

64. **P**rimò dividitur terminus Logicalis in *mentalem, vocalem & scriptum*. Terminus mentalis est extremum propositionis mente conceptæ ; vocalis est extremum propositionis ore prolata ; & terminus scriptus est extremum propositionis literis exarata.

65. Secundò, in *simplicem & compositum*. Terminus simplex, vulgò *incomplexus*, est, qui unica constat voce, unamque rem significat, ut *homo*. Compositus verò, vulgò *complexus*, vel rem unam pluribus vocabulis significat, ut *Marcus Tullius Cicero* tria sunt vocabula eundem hominem significantia : vel res plures uno vocabulo significat, ut *poëta* significat hominem & poësin.

66. Tertiò in *per se significativum*, vulgò *categorematicum*, & *consignificativum*, vulgò *synca-*

syncategorematicum. Prior se solo aliquid completè significat, ut *homo*, *lapis* &c. Posterior nihil completè significat, nisi additus termino per se significativo, ut *omnis*, *aliquis*. Huc pertinent etiam adverbia, præpositiones, casus obliqui, & omnia adjectiva adjectivè sumpta. Hæc enim omnia significant tantum incompletè, nisi alicui termino per se significativo addantur. Unde patet, quod hæc divisio non malè redderetur per terminum *substantivum* & *adjectivum*.

67. Quartò in terminum *primæ* & *secundæ considerationis*. Terminus primæ considerationis significat rem, prout est in se ante reflexam mentis operationem, ut *homo*. Terminus secundæ considerationis significat rem secundum statum, quem habet ab intellectu, ut *genus*, *species*, *prædicatum*, *subiectum* &c. Dicitur *secundæ considerationis*, quia primò rem consideramus prout est in se, dein reflexa & secundaria cognitione illam disponimus in genus, speciem, subiectum &c.

68. Quintò in *positivum*, *privativum* & *negativum*. Positivus significat aliquid reale: ut *homo*. Privativus significat rei absentiam in subiecto capaci ad rem illam habendam, ut *cæcitas* in homine, hæc enim significat absentiam visûs, ad quem habendum homo capax est. Negativus dicitur, qui significat rei absentiam in subiecto incapaci ad rem illam habendam, ut *cæcitas* in la-

pide; nam lapis ad habendum visum incapax est.

69. Sextò in *finitum*, & *infinitum*. Finitus est omnis terminus, cui non præponitur particula negativa *non*. Infinitus autem dicitur omnis terminus illâ particulâ affectus, ut *non homo*, *non lapis* &c. Dicitur infinitus, quia de omnibus prædicari potest, præterquam de seipso: ut *homo est non lapis*, *leo est non lapis* &c!

70. Septimò in *absolutum* & *respectivum*. *Absolutus* est, qui significat aliquid per se stans absque ordine & dependentia ad aliud, ut *homo*. *Respectivus* significat aliquid cum ordine ad aliud, ut *pater* significat hominem cum ordine ad alium hominem nempe *filium*.

71. Octavò in *abstractum* & *concretum*. *Abstractus* significat formam à subjecto præcisam, ut *pulchritudo*, *albedo*. *Concretus* significat formam in subjecto existentem, ut *pulchrum*, *album*, significant subjectum habens pulchritudinem, albedinem.

72. Nonò in *singularem*, *particularem*, & *communem*, sive *universalem*. *Singularis* est, qui unam determinatè significat, ut *Petrus*, item *hic homo*. *Particularis*, qui unum, sed indeterminatè significat, ut *aliquis homo*. *Communis*, qui plura significat, ut *homo*. *animal*.

73. Decimò terminus communis subdividitur in *collectivum* & *distributivum*. *Collectivus*

vus conjunctim plura significat, ut *civitas* significat simul omnes alicujus urbis cives. Distributivus ita significat plura, ut dici possit de singulis, ut *homo* significare potest omnes homines simul, vel etiam singulos seorsim.

74. Undecimò distributivus dividitur in *univocum*, *equivocum*, & *analogum*. Univocus est, qui sub uno nomine communi unam prorsus rationem pluribus communem significat, ut *homo* unam significat humanam naturam. Æquivocus sub uno communi nomine significat rationem sive naturam diversam, ut *canis* significat animal domesticum, piscem marinum, & sydus. Analogus sub uno communi nomine rationem partim eandem, partim diversam significat, ut *sanum*. Homo enim dicitur sanus, quia est revera & intrinsecè talis: medicina dicitur sana, quia efficit vel potius restituit sanitatem: color vultûs dicitur sanus, quia sanitatem indicat.

75. Duodecimò dividitur terminus in *transcendentem*, & *non transcendentem*. Transcendens de omni re possibili & actuali dici potest: ejusmodi sunt sex, videlicet *res*, *ens*, *verum*, *bonum*, *aliquid*, *unum*, memoriæ causa voce REVBAU contenti, cujus quælibet litera est litera initialis alicujus ex supradictis terminis. Terminus non transcendens de pluribus quidem non tamen de omnibus prædicari potest.

76. De-

76. Decimotertiò denique, dividitur terminus in *antecedentem*, *consequentem*, & *reciprocum*. Terminus antecedens est, ex quo alius sequitur, ut *homo* est terminus antecedens respectu *animalis*: e. g. *est homo*, bene infertur: *ergo est animal*. Terminus consequens est, qui ex alio sequitur, ut *animal* respectu *hominis*. Reciprocus denique terminus est, qui alium infert, & vice versa ab illo infertur, ut sunt *homo* & *rationalis*: sic *est homo*; *ergo est rationalis*: & *est rationalis*; *ergo est homo*.

§. IV.

De terminorum proprietatibus.

77. **A**D perfectam rei notitiam necesse est, proprietates illius habere perspectas. Considerata igitur terminorum definitione ac divisione, ad proprietates eorum progrediendum. Sex communiter numerantur; videlicet *suppositio*, *status*, *ampliatio*, *restrictio*, *alienatio* & *appellatio*. Primò de suppositione utpote præcipua; postea de reliquis.

De suppositione.

78. **S**UPPOSITIO est *usus termini* (n. 63.) *pro suo significato*. Cùm enim res ipsas, de quibus loquimur in medium proferre nequeamus, neque ideas rerum aliis immediate manifestare; earum loco terminos substituimus tanquam signa, res illas, vel ideas rerum indicantia, ad modum ferè eorum,
qui

qui pecuniarum loco calculos æneos in lusu ponunt, cùm non volunt, vel non possunt veras pecunias ponere. Usus igitur termini pro suo significato, sive mediato sive immediato est vera suppositio, quam vulgò *formalem* vocant.

79. Altera suppositio vulgò *materialis* dicta (quando nempe terminus ponitur pro seipso, sive pro nuda voce, ut *homo est vox dissyllaba*) non est vera suppositio; nam suppositio, ut vox ipsa indicat, idem est, ac substitui loco alterius.

80. Prima suppositionis divisio est in suppositionem *propriam*, & *impropriam* sive *metaphoricam*. Suppositio propria est usus termini pro suo significato proprio, ut *homo est rationalis*. Impropria est usus termini pro suo significato improprio & metaphorico, ut dum homo fortis & magnanimus leo dicitur.

81. Secundò dividitur in *suppositionem primæ considerationis*, vulgò *realem* vel *personalem*: & in *suppositionem secundæ considerationis*, vulgò *simplicem*. Prima est usus termini primæ considerationis, (n. 67.) ut Petrus est homo: Secunda est usus termini secundæ considerationis, (n. 67.) ut homo est species.

82. Tertiò dividitur in *communem*, seu *distributivam*, & *collectivam*. Suppositio distributiva est usus termini communis (n. 73.) pro omnibus & singulis suis significatis, ut
homo

homo est animal ; ubi *homo* pro omnibus & singulis hominibus supponit.

83. Suppositio *distributiva* vel est *completa* vel *incompleta*. Suppositio *distributiva completa* descendit ad singula individua , ut *animal est sensitivum*. Ubi vocabulum *animal* supponit non solum pro omnibus speciebus sub animali contentis, sed etiam pro singulis individuis, (n. 10.) quæ unaquæque species complectitur. Unde & suppositio pro singulis generum , nec non absoluta solet nominari. Suppositio *distributiva incompleta* est usus termini communis pro singulis speciebus sub genere contentis, non vero pro singulis earum individuis , ut *omne animal fuit in arca Noë* ; id est, omnis animalium species. Hæc vocari solet suppositio *pro singulorum generibus*.

84. Ab hac suppositione *distributiva incompleta*, sive *pro singulorum generibus*, differt suppositio , quæ accommoda dicitur ; hæc enim est positio termini communis pro omnibus individuis, uno tamen vel altero excepto : ut *omnis homo peccavit in Adam*. Ubi *homo* supponit pro omnibus & singulis ejus individuis, si Christum Dominum & Virgineam ejus Matrem exceperis.

85. Suppositio *collectiva* est usus termini communis pro omnibus suis individuis simul sumptis : ut *omnes Apostoli fuerunt duodecim*.

86. Suppositio *disjunctiva* est usus termini
commu-

communis pro aliquibus tantum significatis, ut *aliquis homo est doctus* : *aliquis oculus est necessarius ad videndum*.

87. Suppositio disjunctiva vel est *confusa*, vel *determinata*. Disjunctiva confusa est usus termini communis pro significato indeterminato & indifferenti, ut *aliquis oculus est necessarius ad videndum* ; non enim inferre licet ; ergo *dexter oculus est necessarius*, nec ergo *sinister est necessarius*, cum non sit major ratio pro uno, quam pro altero. Sed inferri debet : ergo *vel dexter vel sinister est necessarius*. Disjunctiva determinata suppositio est usus termini communis pro significato determinato, ut *aliquis homo est Romanorum Imperator*. Hic enim *aliquis homo* non supponit indifferenter pro quovis homine, sed determinate pro Carolo VII. Has suppositionis divisiones utpote præcipuas sufficere judico.

De Suppositionum regulis.

88. **A**D suppositiones discernendas, bene attendendum est ad quosdam terminos consignificativos, qui & *signa consignificativa* vulgò *syncategorematica* dicuntur. Sunt autem hæc signa vel universalia affirmativa, ut *omnis*, *quivis* : vel universalia negativa, ut *nullus* : vel affirmativa particularia, ut *aliquis* : vel denique particularia negativa, ut *aliquis non*. His præmissis sequentes suppositionum regulas facile erit intelligere.

89. Pri-

89. Prima. Terminus affectus signo universalis (n. 88.) supponit distributivè vel collectivè juxta exigentiam alterius termini, cui adjungitur, ut *omnis homo est rationalis : nullus homo est equus*. Terminus *homo* supponit semper distributivè. In hac verò propositione : *omnes Apostoli fuerunt duodecim*, terminus *Apostoli* supponit collectivè propter terminum numeralem *duodecim*.

90. Secunda. Terminus affectus signo particulari (n. 88.) supponit disjunctivè, confusè scilicet vel determinatè juxta exigentiam alterius termini, cui adjungitur; ut *aliquis homo est Imperator*, determinatè : *aliquis oculus est necessarius ad videndum*, confusè. Porro in discernenda suppositione confusa à determinata plus valet maturum judicium, quàm regularum copia, quæ plerùmque hîc fallacesprehenduntur.

91. Tertia. Subjectum propositionis nullo signo affectum in materia essentiali & necessaria (n. 17.) supponit distributivè, ut *homo est rationalis*, idem est ac, *omnis homo est rationalis*. In materia verò contingenti & accidentali (n. 17.) disjunctivè, ut *homo est doctus*, idem est ac, *aliquis domo est doctus*.

92. Quarta regula generalior est, quòd nempe subjectum nullo signo affectum supponat semper juxta exigentiam prædicati. Unde cùm termini naturales sive essentielles (n. 17.) exigant suppositionem distributivam,

vam, termini numerales collectivam, contingentes disjunctivam; subjectis juncti ea determinant ad tales suppositiones: sic in propositione, *homo est rationalis*, subjectum *homo* supponit distributivè, quoniam prædicatum *rationalis* illi essentialiter convenit. In hac vero, *Apostoli fuerunt duodecim*, subjectum supponit collectivè propter *duodecim*, terminum numeralem. Denique in propositione, *homo est doctus*, terminus *homo* supponit disjunctivè; contingit enim, hominem esse doctum, sive est per accidens doctus, non verò essentialiter; secus omnes homines essent docti, quod tamen manifestè repugnat experientiæ, cum Doctorum numerus longè sit inferior numerò simplicium & rudium.

93. Quinta regula in Syllogismis maximi usus est, quòd nempe prædicatum propositionis affirmativæ, saltem vi propositionis supponit semper disjunctivè, ut *homo est animal*, id est, *homo est aliquod animal*: non verò *homo est omne animal*: nam utique homo est tantum animal rationale.

94. Econtra prædicatum propositionis negativæ supponit semper distributivè, ut in ista, *homo non est lignum*, vel *nullus homo est lignum*. Prædicatum hujus propositionis *lignum* sumitur semper distributivè; nulla enim est ligni species, quæ de homine prædicari potest.

Ultimæ tres regulæ facilius intelligentur,
P. Andr. Gordon Phil. P. I. C post-

postquam de propositione dictum fuerit
cap. seq.

*De statu, ampliacione, restrictione, aliena-
tione, & appellacione.*

95. **S**Tatus est *usus termini pro tempore per
copulam importato*, ut Petrus studet.
Ut status hujus propositionis sit verus, Petrus
in presenti studere debet.

96. Ampliatio est *extensio termini à minori
ad majorem significationem*, ut *mites possidebunt
terram*. Mites ratione statûs supponit tan-
tùm pro futuris; ratione tamen ampliatio-
nis sumitur pro omnibus mitibus etiam præ-
teritis & præsentibus.

97. Restrictio est *coarctatio termini à ma-
jori ad minorem significationem*: ut *homo
pius est estimandus*. Vox homo restringitur
per vocem pius.

98. Alienatio est *usus termini in sensu im-
proprio & metaphorico*, ut dum Christus
Dominus dicitur *sol justitiæ*.

99. Appellatio denique est applicatio unius
termini supra alium: e. g. *Alexander fuit ma-
gnus Philosophus*. Hic magnus appellat supra
Philosophum; unde propositio hunc reddit
sensum; *Alexander fuit insignis in scientia Phi-
losophica*. Hæc appellatio vulgò *formalis* di-
citur. Porro terminus, qui applicatur alteri,
dicitur *appellans*; terminus verò, cui applica-
tur, vocatur *appellatus*. Quodsi terminus
appel-

appellans præponatur copulæ, erit appellatio *materialis* : ut *Alexander Magnus fuit Philosophus*. Sensus est : Alexander aliunde magnus, v.g. animo & virtute fuit etiam Philosophus. Hæc de terminis.

§. V.

De modo sciendi.

100. **C**UM ad omnes cogitationis species, & præprimis ad rectam apprehensionem perficiendam, modus sciendi sit oppidò necessarius, de illo hîc agendum.

Modus sciendi in sensu lato sumitur pro omni eo, quod juvat ad acquirendam scientiam. Hic autem in sensu stricto accipitur, & definitur : *oratio ignoti manifestativa*. Dicitur *oratio*, id est sermo brevis uno aut altero constans vocabulo : dicitur *ignoti manifestativa*, id est, clarioribus terminis obscure cognitum declarans, ita, ut mens clariorem ejus notionem concipiat.

101. Tres recensentur modi sciendi species, videlicet *definitio*, *divisio*, & *argumentatio*. De qualibet enim re non nisi tria ignorari possunt. Primò, *quid* res sit : Secundò, *quotuplex* sit : Et tertio, *qualis* res sit. Primum explicatur per definitionem, secundum per divisionem, & tertium per argumentationem.

De Definitione.

102. **D**EFINITIO est oratio nomen, vel rei per nomen significatæ naturam explicans.

C 2

Unde

Unde patet, duplicem esse definitionem, alteram nominis, alteram rei.

103. Definitio nominis est nihil aliud quam nominis interpretatio : ut dum cosmographia dicitur *mundi descriptio*, definitur & explicatur nomen cosmographiæ: Vel si magis placet, definitio nominis ea est, quâ quis determinat, quid per, nomen aliquod intelligat; ut si dicam per hanc vocem *elaterium* intelligo vim, quâ corpus pressum, v. g. arcus tensus, resilit, sive in pristinum statum restituitur, parùm sollicitus, in quo virtutis illius essentia & natura consistat. Hæc definitio est maximi usûs in disciplinis omnibus, quia vocum ambiguitatem tollit, & controversias minuit. Unde à Mathematicis principii loco usurpatur, ut *triangulus est figura tribus lineis terminata*. Ejusmodi definitiones sunt extra omnem controversiam positæ; id enim ex hominum arbitrio pendet, ut certâ voce certam quoque ideam & notionem designent. Non autem ita se res habet in definitionibus rei, quæ ideo adhibentur, ut magis distinctas & claras rerum notiones & perceptiones efficiant; non enim ab hominum voluntate pendet, ut idea quævis has aut illas rei partes & attributa comprehendat.

104. Definitio rei duplex est, essentialis nempe, & descriptiva. Definitio essentialis est oratio explicans naturam rei per partes essen-

essentiales (n. 17.). Cùm verò partes essentielles duplicis sint generis, *metaphysicæ* videlicet & *physicæ*; duplex quoque est definitio essentialis, *metaphysica* nempe, quæ per partes essentielles metaphysicas, (id est, quæ solo conceptu distinguuntur) ut sunt genus & differentia: e. g. *homo est animal rationale*: & *physica*, quæ habetur per partes essentielles physicas, (hæ vere & proprie sunt distinctæ) ut sunt respectu hominis anima & corpus: e. g. *homo est compositum ex anima rationali & corpore organico*.

105. Definitio descriptiva triplex est. Vel enim naturam rei explicat per proprietates, & vocatur definitio *propria*: ut *homo est animal politicum, scientiarum capax &c.* Vel per causam sive finalem, sive efficientem, sive exemplarem, & dicitur definitio *causalis*: ut *homo est animal ad similitudinem DEI factum*, ut eo frui possit. Vel denique per plura res explicatur *accidentia*, (n. 16) quæ seorsim sumpta rebus aliis convenire possunt, non item si conjunctim, & *definitio accidentalis* appellatur, sic Virgilius definit Polyphemum:

Monstrum horrendum, informe, ingens, cui lumen ademptum;

Trunca manum pinus regit, & vestigia firmat,

106. Optima quidem definiendi ratio ea est, quæ brevis, clara, & quæ constat genere. (§. 7.) proximo atque differentia ultima:

(n. II.) sic enim palam fit, quomodo res definita cum similibus maximè & cognatis conveniat, & simul in quo ab aliis discrepet: tùmque definitio plena est, non diminuta, tantumque patet, quantum res definita.

Sed rarò genus rei proximum, & propria vel specifica differentia nobis innotescunt. Unde nonnunquam tutius est, rem definire per accidentium, aut proprietatum congeriem explicare, quam brevi oratione uti, quæ sæpe falsa est aut ambigua. Idque vel maximè evenit in rebus physicis, ubi genus & differentia nos magna ex parte fugiunt. Hinc si quis v.g. magnetem vellet definire, omnino necesse est, ut plures ejus proprietates simul conjungat, hoc fere modo: magnes est corpus ex lapide & ferro compositum, quod alium magnetem, aut ferrum sibi vicinum ad se rapit; tum aliæ magnetis proprietates afferri possunt, quibus ejus natura fiet apertior, quàm si genus quoddam proximum, aut ultima differentia fuisset excogitata. Dum enim sollicite, anxie & pene superstitiose genus proximum, & ultimam differentiam inquirimus, non tam definitiones, quæ distinctas rerum notiones efficiant, quàm ænigmata ipsa afferimus; cujusmodi passim occurrunt.

107. Tres sunt præcipuæ definitionis regulæ. Prima, ut *fit clarior re definita* secus enim rem non explicabit, neque veritatem involutam

tamevolvet. Et sanè multa sunt, quæ definitionibus magis obscurantur, quàm illustrantur, aut explicantur, quæque per se sunt manifesta & ferè omnibus nota, ut *tempus*, *idea*, sive perceptio mentis, *ordo*, *extensio*, *numerus*, & alia longè plurima.

Adversus hanc regulam peccant qui ad definiendum utuntur metaphoris, præsertim remotioribus aut vocibus inusitatis, vel terminis ambiguis; unde jure merito reprehenduntur hæ, & similes definitiones: *anima est numerus seipsum movens; tempus est numerus motus secundum prius & posterius &c.*

108. Secunda regula est: *definitio non sit superflua, neque diminuta.* Contra hanc legem peccatur additione particulæ alicujus inutilis ut cùm definitur homo *animal rationale mortale*; nam in hac definitione *mortale* superfluum est; siquidem omne animal est mortale.

109. Tertia definitionis regula est, ut *definitio sit reciproca cum re definita.* Quam regulam alii sic proponunt: *definitio debet convenire omni & Soli rei definitæ.* Hinc illa usu trita axiomata: *cui convenit definitio, convenit & definitum; cui convenit definitum, convenit & definitio; cui repugnat definitio, repugnat & definitum.*

Adversus hanc regulam peccant qui definitionem faciunt vel latiore, vel strictiore, quàm est res definita; ut si definiatur

homo *animal bipes* : vel *animal rationale vultu candido* Hæc ultima definitionis regula omnium maximè est necessaria ; definitio enim paululum longior vel obscurior utcunque tolerabilis est ; quæ verò non reciproca , sive ut alii loquuntur , non convertibilis est cum definito , ferri nullo modo potest.

110. Cæterum definitionis cognitio facilis est , praxis verò difficillima ; quoniam difficile est essentialè ab accidentalì ; Commune à proprio secernere ; aut invenire genus proximum & ultimam differentiam. Nec id magni refert , dummodo definitio , qualiscunque sit , claram & distinctam rei notionem , & ideam efficiat. Unde ubi qualitas rei essentialis non occurrit , plures accidentarias commodè asserimus ; ut in plantarum descriptione usuvenire solet.

De divisione.

111. **D**ivisio est *totius in partes distributio*. Illius idem est usus , qui definitionis , nempe ut rem magis distinctè concipiamus. Hoc autem fit , cum res , quæ uno intuitu videri non potest , velut per partes cognoscenda proponitur ; nam universa & generalis totius rei cognitio admodum imperfecta est , atque obscura.

112. Divisio totuplex est , quotuplex est totum ; unde cum triplex sit totum , *actuale* nimirum , *potentiale* & *accidentale* : triplex quo-

quoque est divisio, nempe *actualis*, *potentialis*, & *accidentalis*. Divisio actualis est, quæ dividit totum in partes, quas actu continet. Quod si partes illæ sint essentialis & physicae, (n. 104) divisio vocatur *actualis essentialis physica*: ut *hominis pars una est anima rationalis, altera corpus organicum*. Si partes sint metaphysicae, (n. 105) erit *divisio actualis essentialis metaphysica* ut *hominis pars una est animal, altera rationale*. Si denique partes sint integrantes, id est, ex quibus totum ita constat, ut sine qualibet illarum saltem imperfectè concipi possit, & subsistere, divisio *integralis* nominatur: ut corporis humani partes sunt *caput, manus, pedes &c.*

113. Divisio potentialis est, quæ totum potentiale distribuit in partes, quas sub se continet; sive quæ dividit universale in sua particularia, estque vel *univoca*, quando totum potentiale univocum (n. 73) dividitur in suas partes; ut si animal dividatur in rationale, & irrationale: vel *equivoca*, quæ totum potentiale æquivocum (n. 73.) in sua inferiora dispescit, ut dum *canis* in cælestem, terrestrem & marinum dividitur.

114. Divisio accidentalis est quæ totum distribuit in sua accidentia (n. 16) ut *homo alius est albus, alius niger; alius formosus, alius deformis*.

115. Tres sunt præcipuæ bene dividendi regulæ. Prima, ut *divisio exæquet totum di-*

C 5

visum

visum; ita ut nec plura, nec pauciora membra sint in divisione, quàm in diviso. Adversus hanc regulam peccatur, quoties omititur membrum aliquod necessarium, vel adjicitur extraneum: ut si dividatur animal in *terrenum & aëreum*; vel in *terrenum, aëreum, aqueum & igneum*; in priori enim definitione deest *aqueum*: in posteriori verò redundat *igneum*, cum nullum in igne animal possit vivere.

116. Secunda regula, *divisio sit brevis, quantum fieri potest*, id est, paucis constet partibus, alioqui carebit effectu: nam mentem confundet, & obruet memoriam; cum tamen ad utramque juvandam instituta sit divisio. Unde melius dividitur numerus in parem & imparem, quàm in binarium, ternarium, quaternarium &c.

117. Tertia bonæ divisionis lex est, ut membra divisa se invicem excludant. Si enim pars in alia parte includatur, divisio erit superflua. Hinc malè dividitur terra in *Europam Asiam affricam Americam & Germaniam*; nam Germania continetur in Europa. De argumentatione fusè dicetur cap. 3. hinc pauca de methodo, quæ à plerisque huc reducit, dicenda.

De Methodo.

118. **M**éthodos vox græca latinè describi potest *via brevis & expedita*. Ab hac autem

autem significatione traducitur ad significandum doctrinæ ordinem; nam ut via brevis & aperta cito & tuto nos ducit, quo tendimus: sic apta scientiæ dispositio illam reddit multo faciliorem. Methodus itaque definiri potest *ordo sermonis accommodatus ad illustrationem veritatis*. Est autem varia. Præcipui momenti est methodus *συνθέσεως*, id est *compositionis*: & methodus *ἀναλύσεως*, sive *resolutionis* juxta duplicem modum procedendi in cognitione veritatis; siquidem ad veritatem inveniendam alia opus est via & modo, quàm ad inventam aliis manifestandam, & docendam.

119. Methodus itaque analytica, sive *resolutoria* est modus ordinate procedendi ad veritatem inquirendam. Dicitur resolutoria, quia resolvit quæstiones in sua primâ principia, effectus ad causas, composita ad suas partes. Sic primi auctores Logicæ artificialis advertentes nunc bene, nunc male discurri, moti sunt ad investigandam naturam syllogismi, illumque resolverunt in propositiones, has vero in terminos.

120. Methodus synthetica seu *compositoria* est modus ordinatè procedendi in veritate docenda. Dicitur compositoria, quoniam à partibus ad totum progreditur: sic qui modo docent logicam à terminis inchoant; inde ad propositiones; & ab his denique ad syllogismum.

121. Tres sunt præcipuæ methodi leges. Prima, res tractandæ ita disponantur, ut aliæ ex aliis oriri videantur, & quæ sequuntur, à præcedentibus lucem accipiant.

122. Secunda, omitti debent divisiones rerum minutissimarum, quarum multitudo fastidium parit, discantis ingenium obtundit, & obruit memoriam.

123. Tertia, fugiendæ sunt longæ digressiones à re proposita alienæ: his enim ita nonnunquam abducitur animus, ut errare inchoet nec habeat amplius, unde ad propositum revertatur. De methodo mathematica dicitur alibi.

CAPUT II.

De iis, quæ pertinent ad secundam mentis operationem.

§. I.

De natura judicii & propositionis.

n. I.

I. **D**Um unam ideam cum alia conjungimus, vel ab ea separamus, judicare dicimur. Est igitur judicium, mentis operatio, sive cogitatio, quâ una idea cum alia conjungitur, aut ab ea separatur: vel ut vulgò loqui solent, quâ unum de altero affirmatur vel negatur: v.g. postquam percepi id, quod
voce

voce *Deus* significatur, voce *bonus*, & voce *mendax*; possum de Deo affirmare bonitatem, & negare mendacium judicando, *Deum esse bonum*; *Deum non esse mendacem*.

2. Ut rectè judicemus, tria præcipuè sunt observanda.

Primò ut ad ideas diligenter attendamus.

Secundò, ut præjudicia, seu præjudicatas opiniones exuamus,

Tertiò, ut mentis præcipationem vitemus.

3. Est autem præjudicium: seu præjudicata opinio *judicium anticipatum ex sensum præsertim impressionibus ortum*: hujusmodi sunt plurima infantiae præjudicia, quæ omnia sunt abjicienda, ut sana & vera sint nostra judicia.

4. Præcipitatio mentis est *præceptum & inconsideratum de re ignota, vel non satis explorata judicium*. Cui vitio unicum afferi potest remedium, nimirum si cohibeatur assensus, donec res maturius fuerit explorata.

Porro quemadmodum ideæ nominibus, ita judicia verbis sive propositionibus tanquam signis exprimuntur.

5. Propositio itaque est *oratio, unum de alio enuntians: vel oratio aliquid affirmans, vel negans de alio*. In qua quidem tria sunt considerata, *subjectum* nempe, *predicatum*, sive *attributum* & *copula*.

6. Sub-

6. Subiectum est *id*, de quo aliquid affirmatur, vel negatur.

Prædicatum est *id*, quod affirmatur, vel negatur de alio:

Copula est *vinculum*, quô subiectum & prædicatum conjunguntur. v.g. in hac propositione *Deus est bonus*, Prima vox, nempe *Deus* est subiectum, *bonus* est prædicatum seu attributum; & verbum *est* dicitur copula.

Cùm autem subiectum & prædicatum *terminent* utrinque propositionem, ideo vocantur illius *termini* seu *extrema*. Verùm de his sufficienter dictum est cap. præced.

7. Non refert an propositio tribus constet vocibus, subiecto nimirum, prædicato & copula; qualis est hæc propositio, *mens est cogitans*, quæ vocatur propositio *de tertio adjacente*; an duabus tantùm, ut *mens cogitat*, quæ dicitur propositio *de secundo adjacente*: an denique unica, ut *cogito*, quæ propositio *de primo adjacente nominatur*. Nam verbum quandoque vices supplet prædicati & copulæ, ut *mens cogitat*, idem enim est, ac *mens est cogitans*: aliquando verbum continet subiectum & copulam, ut *cogitans*, id est, *ego sum cogitans*: nonnunquam subiectum, prædicatum & copulam complectitur, ut *cogito*, quod idem est, ac *ego sum cogitans*.

8. Cùm idem de seipso prædicatur, propositio dicitur *identica* & *nugatoria*, ut *ens est ens*, vel *ensis est gladius*. Ubi autem prædicatum

catum aliquo modo differt à subiecto, propositio *formalis* dicitur, ut *virtus est amanda*.

§. II.

De divisione propositionis.

9. **P**ropositio variè dividitur; & quidem primò ratione materiæ circa quam versatur, in *necessariam*, *contingentem*, *possibilem* & *impossibilem*. Necessaria est, cujus prædicatum ità convenit subiecto, ut non possit illi repugnare, ut *homo est rationalis*, Contingens est, cujus prædicatum ita convenit subiecto, ut possit non convenire; ut *Petrus est doctus*. Propositio possibilis est, cujus prædicatum subiecto convenire potest, etiamsi actu non conveniat; ut *omnis homo est albus*. Impossibilis est, cujus prædicatum subiecto repugnat, ut *Petrus est lapis*.

10. Secundò propositio dividitur ratione formæ in *affirmativam* & *negativam*. Affirmativa est, quæ asserit unum de alio; ut *Deus est amandus*; negativa verò unum de altero negat, ut *peccatores regnum Dei non consequuntur*. Ut autem propositio sit negativa requiritur, ut negatio, sive particula negativa copulam afficiat, sive ut copulæ præponatur; hinc ista propositio, *homo est non lapis* vulgo habetur pro affirmativa.

11. Secundò ratione quantitatis seu extensionis dicitur propositio in *universalem*, *particularem*, *singularem*, & *indefinitam*.

12. Pro-

12. *Propositio universalis est, cujus sub-
jectum afficitur signo Universali : (n. 89)
ut omnis virtus est amplectenda : nullus numerus
est infinitus. Particularis est, cujus subjectum
afficitur signo particulari ; ut aliqui homines
sunt probi. Singularis est, cujus subjectum
est terminus singularis (n. 71) ut Petrus est
doctus, vel terminus communis affectus par-
ticula hic, hæc, hoc : ut hic homo est doctus ; nam
hæc est æquè propositio singularis, ac prior.
Indefinita est, cujus subjectum nullo signo
afficitur ; ut luxuriosi sunt prodigi.*

13. *Quartò ratione qualitatis dividitur pro-
positio in veram quæ enunciat rem prout est :
e.g. homo est animal : & in falsam, quæ rem
enuntiat aliter ac est ; ut homo est lapis.*

14. *Quintò dividitur in simplicem & compo-
sitam. Simplex est, quæ uno constat subje-
cto, prædicato & copula, sive unus sive plu-
res termini subjectum aut prædicatum con-
stituunt ; ut avarus est miser : vel inordinatus
pecunie atque divitiarum amor non est modica
hominis ratione præditi miseria.*

15. *Propositio composita est, quæ con-
stat pluribus propositionibus simplicibus ali-
qua conjunctione unitis ; & est quintuplex,
conditionalis causalis, copulativa, disjunctiva,
& discretiva.*

16. *Propositio conditionalis est, cum pro-
positiones simplices connectuntur particula
conditionali si: si quis diligit me, sermonem meum
servabit.*

vabit. Ut vera sit conditionalis, sufficit, unam simplicem sequi ex altera, licet neutra in se sit vera: in propositione enim conditionali non affirmatur aliqua ex simplicibus sed solum eorum nexus.

17. Causalis est, quæ simplices unit particula causali quia, eo quod &c. ut *beati mundo corde, quoniam ipsi Deum videbunt. Ad hujus veritatem requiritur tantum, ut una simplex sit causa alterius.*

18. Copulativa est, quæ simplices necit particula &, atque, vel simili, ut *Alexander fuit Heros Magnanimus, & insignis Philosophus. Uthæc propositio vera sit, omnes simplices propositiones illam constituentes, veras esse oportet.*

19. Disjunctiva est, quæ simplices necit particula vel, aut, & similibus: v. g. *aut doctus est, aut indoctus est: numerus aut par est, aut impar. Ad hujus veritatem sufficit, unam simplicem esse veram; requiritur tamen, ut inter res disjunctas sit immediata oppositio; secus, falsa erit: ut, si quis dixerit, aut pax est, aut bellum, falsa est propositio, cum possint esse induciæ. Sic illa Terentii: aut amat, aut odit mulier, nihil est tertium; absolute loquendo falsa est; nam potest mulier nec amare, nec odisse.*

20. Propositio discretiva est, quæ simplices necit particula discretiva sed, tamen vel simili, ut: *non splendor natalium, sed virtus est.*

ficit nobiles: non est dives, sed tamen est doctus. Ad hujus veritatem requiritur, ut ambæ simplices sint veræ.

21. Sextò dividitur propositio in *exponibilem & exponentem*. Propositio exponibilis vel meliùs *explicabilis* ea est, quæ verbis quidem simplex, sensu tamen composita est, vel saltem obscura. Quapropter exigit, ut exponatur seu explicetur per aliam, quæ idcirco *exponens* nominatur.

22. Propositio exponibilis triplex statuitur, (juxta numerum, & naturam particularum, quæ sensum reddunt obscurum) nimirum *exclusiva, exceptiva, & reduplicativa*.

23. *Exclusiva* est, quæ in se continet particulam quandam exclusivam, qualis est *solum, tantum* &c. ut *solus Deus est æternus*. Hujus exponens habetur per particulas *nihil aliud*. E. g. *Deus est æternus, & nihil aliud est æternum*.

24. Quod si particula excludens afficiat subjectum, excludit omnia alia subjecta à prædicato, ut in dato exemplo, *solus Deus est æternus*. Si vero particula illa prædicatum afficiat, tunc excludit omnia alia prædicata à subjecto, ut, si dicam, *adamus est tantum lapis*.

25. Propositio *exceptiva* ea dicitur, cui inest aliqua particula excipiens, cujusmodi est *præter, & similes*; ut *omne animal fuit in arca Noë, præter pisces*. Cujus exponens hoc modo

do

do reddi potest: *omnia alia animalium genera erant in arca Noë, & pisces ibi non erant.* Eadem ferè est ratio propositionis hujus, quæ prioris, nimirum exclusivæ. (n. 148)

26. Reduplicativa est, cujus subjectum afficitur particula reduplicante, cujusmodi sunt *quatenus, quâ, in quantum &c.* ut *doctus est estimandus.* Ejus exponens sic habetur: *doctus estimandus est, quatenus est doctus.*

27. Septimò denique dividitur propositio in *absolutam, & modificatam* seu modalem. Modalis ea est, in qua exprimitur modus, quo prædicatum affirmatur, vel negatur de subjecto: ut cum dicitur, *necesse est, circulum esse rotundum;* modi enim de quibus hic sermo est, solùm quatuor sunt, nempe *necessarium, contingens, possibile, & impossibile;* qui adverbialiter quoque proferri possunt hoc modo: *necesse, contingenter, possibiliter, & impossibiliter,* ut *homo est contingenter doctus.* Propositio absoluta dicitur, in qua non exprimitur modus, quò prædicatum convenit subjecto, ut dum dicitur, *circulus est rotundus,* ubi non exprimitur an necessario, an tantùm contingenter sit rotundus. Atque hæ sunt præcipuæ propositionis species.

§ III.

De propositionis proprietatibus.

28. **P**roprietates, propositionis referuntur tres, videlicet *oppositio, conversio, & e-*

D 2
quiva-

æquivalentia, seu *æquipollentia*, de quibus *si-*
gillatim agendum.

De Oppositione propositionum.

29. **O**ppositio est *affirmatio* & *negatio* *ejus-*
dem de eodem, seu *repugnantia* in-
ter duas propositiones eodem *subjecto* &
prædicato constantes: estque *triplex*, *contra-*
dictoria nempe, *contraria*, & *subcontraria*.

30. Oppositio *contradictoria* est *repugnan-*
tia inter duas propositiones, quarum una est
universalis, *particularis* altera, (n. 136) vel
utraque *singularis*: utrinque tamen una de-
bet esse *affirmativa*, altera *negativa* (134,) *ut*
omnis homo est justus. & aliquis homo non
est justus. Vel Petrus est justus, Petrus non est
justus.

31. *Lex contradictoriarum* est, quod nun-
quam possint simul esse veræ, nec simul fal-
sæ; secus idem esset, & non esset. Unde ex ve-
ritate unius semper colligitur falsitas alterius,
& e contra.

32. Oppositio *contraria* est *repugnantia*
inter duas propositiones *universales*, quarum
una est *affirmativa*, altera *negativa*; (n.
134 & 136.) *ut omnis homo est justus, nullus homo*
est justus.

33. *Contrariarum* perpetua *lex* est, quod
nunquam possint simul esse veræ; si enim duæ
universales essent veræ, *particulares* etiam
sub illis contentæ essent simul veræ; e. g. si
ista

ista universalis est vera, *omnis homo est justus*, hæc quoque particularis *aliquis homo est justus*, necessario vera est, cum in priori universali contineatur : & si vera est hæc, *nullus homo est justus*, æquè necessario vera erit sequens, *aliquis homo non est justus* ; proindeque duæ contradictoriæ simul essent veræ, quod repugnat. (n. 155) Contrariæ tamen possunt simul esse falsæ, ut in dato exemplo, *omnis homo est justus*, *nullus homo est justus* : utraque est falsa ; dantur enim quidam peccatores, & sic falsa est prima : dantur etiam quidam justi & probi, & per consequens falsa est secunda. Cum enim propositionum contrariarum una affirmet prædicatum convenire omni subjecto, altra verò illud nulli prorsus subjecto convenire asserat ; fieri potest, ut prædicatum quibusdam tantum conveniat, proindeque utraque universalis erit falsa.

34. Oppositio subcontraria est repugnantia inter duas propositiones particulares, quarum una negat, affirmat altera, (n. 134. 136.) ut *aliquis homo est justus*, *aliquis homo non est justus*.

35. Harum regula est, quòd possint simul esse veræ, ut patet in allato exemplo ; nunquam tamen possunt simul esse falsæ : si enim subcontrariæ essent simul falsæ, earum contrariæ simul essent veræ, quod repugnare ostendimus. (n. 157.) En totius oppositionis compendium.

Omnis homo
est justus.

Contrarias.

Nullus homo
est justus.

Contra

torias

dic

Contra

torias

Aliquis homo
est justus.

Subcontrariæ.

Aliquis homo
non est justus.

De æquivalentia propositionum.

36. **Æ**quivalentia vulgò æquipollentia est eadem significatio duarum propositionum ex additione particule (non) proveniens: e.g. hæc propositio, omnis homo est justus idem significabit ac sequens, aliquis homo non est justus, si illi præponatur non, hoc modo: non omnis homo est justus.

37. si particula non præponatur uni contradictoriarum, tunc illa æquivalet alteri: & si postponatur uni contrariarum, tunc illa quoque æquivalet alteri contrariæ, ut examinanti facillè patebit. Verum haud erit operæ pretium.

De propositionum conversione.

38. **C**onversio est mutatio propositionis, quæ manente veritate, ex prædicato fit subiectum, & ex subiecto prædicatum, ut aliquis homo est justus, convertitur, aliquis justus est homo.

39 Con-

39. Conversio triplex est, *simplex* nempe, *per accidens*, & *per contrapositionem*. Conversio simplex est mutatio subiecti in prædicatum eadem quantitate, id est, universalitate, vel particularitate retenta, ut *aliquis homo est justus*, convertitur simpliciter, *aliquis justus est homo*. Conversio *per accidens* est mutatio subiecti in prædicatum variata quantitate propositionis, ita, ut ex universalis fiat particularis, ut *omnis homo est animal*, convertitur, *aliquod animal est homo*. Conversio *per contrapositionem* est mutatio subiecti in prædicatum, & terminorum finitorum in infinitos, ut *omnis homo est animal*, convertitur, *omne non animal est non homo*.

40. Quomodo quævis propositio converti possit, ex sequentibus desumitur versiculis:

fEcI simpliciter convertitur, EvA per accid.

AstO per contrap. sic fit conversio tota.

Vocales enim trium vocabulorum *fEcI*, *EvA*, *AstO* denotant propositiones certas, *E* nimirum universalem negativam, *I* particularem affirmativam, *A* universalem affirmativam, *O* particularem negativam, juxta sequentes versus:

Afferit A, negat E, verum generaliter ambo:

Afferit I, negat O, sed particulariter ambo.

Sensus ergo priorum versuum est, quod universalis negativa, & particularis affirmativa in voce *fEcI*, designata per *E* & *I*, con-

vertantur simpliciter; universalis iterum negativa, & universalis affirmativa, quæ designantur per E & A, in voce EvA convertantur per accidens: universalis denique affirmativa, & particularis negativa, designatæ per A & O, in voce AstO convertantur per contrapositionem. Verùm his missis ad utiliora,

CAPUT III.

De iis quæ pertinent ad tertiam mentis operationem.

N. I.

Tertia mentis operatio, sive species cogitationis est ratiocinatio, quæ definiri potest *cogitatio, quâ unum iudicium ex aliis prioribus infertur*. Hinc Ratiocinatio vulgo *Discursus* appellatur, quòd mens ratiocinando ab antecedentibus iudiciis ad consequens currere, seu *discurrere* videatur.

Dum ratiocinatio verbis exprimitur, dicitur *argumentatio*, quæ in varias species distribuitur, quarum præcipua *Syllogismus* vocatur, qui & ipse in suas species dividi solet.

§. I.

De argumentatione generatim & plerisque illius speciebus.

2. **A**rgumentatio est oratio unum ex alio inferens, vel, est oratio, qua unum iudicium

dicium ex aliis judiciis illatum, distincta propositione exprimitur. Hinc in omni argumentatione reperiuntur hæc tria, nimirum *antecedens, consequens, & consequentia*.

3. Antecedens est oratio ex qua *aliquid* infertur, & modo unam, modo plures continet propositiones, quæ & *præmissæ* nuncuntur,

Consequens est oratio vel *propositio*, quæ ex *alio* infertur.

Consequentia est connexio inter antecedens & consequens: e. g. *Deus est bonus, ergo Deus est amandus. Deus est bonus*, dicitur antecedens; *Deus est amandus*, vocatur consequens: connexio denique inter utramque propositionem designata per particulam *ergo*, est consequentia,

4. Hinc facile patet, quod consequens possit esse verum, etiam si mala sit consequentia. ut si dicam, *Petrus est Erfordia, ergo Carolus VII. est Romanorum Imperator*: Consequens est verum, & tamen nulla est consequentia. Econtra consequentia potest esse bona, & falsum consequens, ut patet in hoc syllogismo, *omne animal est lapis, sed Petrus est animal; ergo Petrus est lapis*, bona est consequentia, quia consequens legitime infertur; falsum tamen consequens, quia infertur ex antecedente falso.

5. Ulterius patet, quod consequens, cum habet duplicem sensum, possit distingui; nunquam verò consequentia, cum nil aliud

denotet, nisi unius cum alio connexionem, quæ semper vel ex integro bona est, & concedenda, vel ex integro mala, proindeque neganda.

6. Argumentationis in genere duæ sunt regulæ. Prima est, *ex vero nunquam sequitur falsum*; quod enim sequitur ex alio, debet in illb alio contineri: falsum autem nullatenus continetur in vero; secus idem esset verum & falsum, sive non verum, quod repugnat; cum *verum & non verum* contradictorie opponantur. (n. 15.) Secunda regula est, *ex falso sequitur falsum*, quoniam falsum in falso continetur.

7. Quod si falsum admittatur ut verum, potest ex illo sequi aliquid, quod aliunde verum est: ut ex hac propositione falsa, *omnes Apostoli sunt damnati*, si ut vera admittatur, sequitur hæc: *ergo Judas est damnatus*, quæ aliunde vera est. Si vero falsum agnoscatur ut falsum, tunc nullo modo exinde sequitur verum, quia nullo modo in illa continetur.

8. Septem communiter numerantur argumentationis species: exemplum videlicet, *inductio, dilemma, sorites, epicherema, enthymema, & syllogismus*. Quæ, sive specie essentiali, sive accidentali inter se distinguantur, non attendimus.

9. Exemplum est *argumentatio, in qua ex uno simili infertur aliud simile. e. g.*

*Adam, Samsonem, Davidem, Loth, Salomonem
Decepit mulier, quis modò tutus erit?*

Hæc

Hæc argumentatio in moralibus potius, quam in physicis probationibus servit.

10. Inductio est *argumentatio*, quâ ex particularibus sufficienter enumeratis infertur universale, vel econtra: ut Europa, Asia, Affrica, America, uti ❧ Borealia ❧ Australia incognita illuminantur a Sole; ergo totus terrarum orbis illuminatur: vel totus terrarum orbis illuminatur à sole; ergo Europa, Asia, Affrica, ❧ America, necnon Borealia ❧ Australia incognita à sole illuminantur.

11. Inductio semper vitiosa est; quando omnes partes non sufficienter enumerantur. Unde iniquissime ratiocinantur illi, qui a quibusdam judiciis injuriam passi, omnia tribunalia corrupta esse conclamant: & qui ob quosdam ecclesiæ ministros vitiis deditos, totum clerum calumniantur.

12. A singularibus ad speciem plerumque deficit inductio, cum aliqua singularia sæpe nobis sint ignota; à speciebus vero ad genus tutior est: omnes quippe species facile enumerantur, e. g. ❧ rationale, ❧ irrationale animal sentit; ergo omne animal sentit.

13. Διλημμα græce, latine reddi potest *bis fortis*. Communiter autem in latino etiam idiomate usurpatur vox *dilemma*, & definitur *argumentatio utrinque premens adversarium*, sive in qua propositionis disjunctivæ utraque pars subsumitur, atque ad propositum concludendum adhibetur, ut cum dicitur. Si
Reipubli-

Reipublicæ administrationem suscipias, vel juste te geres, vel injuste: si primum, homines offendes; si secundum, Deo displicebis. Ergo Reipublicæ administratio non est suscipienda.

Deficit hæc argumentatio, quando inter propositionis disjunctivæ membra datur medium. Estque plerumque magis importuna, quàm valida.

14. Σωρεῖσθς græcè coacervatus, vulgò sorites est argumentatio, qua continuata plurium propositionum serie prædicatum præcedentis semper fit subjectum propositionis sequentis, donec tandem ultimum prædicatum enuntietur de primæ propositionis subjecto, ut: peccatum est transgressio Divinæ legis; transgressio Divinæ legis nos a Deo separat; quod nos a Deo separat, summo privat bono, quod summo privat bono, est omnium malorum maximum. Ergo peccatum est omnium malorum maximum.

Hæc argumentatio non nisi rarò adhibenda est in disputationibus, tum quia mentem onerat verborum copiâ: tum quia tot inter propositiones facillimè irepere potest fallacia.

15. Ενθυμημα græce, latine cogitatio rationalis vulgò enthymema, est syllogismus unâ constans præmissâ, & conclusione, ut, virtus est bona; ergo est amplectenda.,

Hujus argumentationis usus est frequentissimus, & commodissimus.

16. Επιχειρημα græcè, conatus latine vulgò epicherema, est syllogismus explicatus, cuius

jus præmissæ alias propositiones continent, quæ ipsas probant.

Hic argumentandi modus potius ad oratores pertinet, quam ad Logicos sive Dialecticos. Porro cum syllogismus majoris sit momenti, imò argumentationum omnium species nobilissima, de illo seorsim agendum.

§. II.

De natura & divisione syllogismi.

17. **ΣΥΛΛΟΓΙΣΜΟΣ** græce ratiocinatio collecta latine vulgo syllogismus, est argumentatio, quâ duæ idæ (n. 1) vel termini seorsim combinantur, vel comparantur cum aliquo tertio affirmativè, vel negativè; ut inde concludatur eorum convenientia, vel repugnantia inter se. v. g. omne bonum est amandum; sed Deus est bonus; ergo Deus est amandus.

81. Nam cum interpropositionis terminos de quibus ferendum est judicium, vel nulla, vel non nisi obscura sæpe appareat connexio, aut repugnantia; quærendus est tertius terminus, qui illorum connexionem vel repugnantiam illustret. Quod si uterque huic tertio conveniat, bene inferetur illorum convenientia inter se; nam quæ sunt eadem uni tertio, sunt eadem inter se. Si vero unus conveniat termino invento, & alter ei repugnet, bene inferetur illorum repugnantia inter se; nam quorum unum repugnat, alterum vero convenit uni tertio, ea quoque necessario repug-

repugnant inter se. Atque ab his duobus principiis ars syllogistica tota dependet.

19. Porro ex his terminis subjectum conclusionis illatæ dicitur *minus extremum*; prædicatum verò ejusdem conclusionis *majus extremum*, quia plerumque latius patet quam subjectum. Terminus tertius ad illorum convenientiam vel repugnantiam probandam assumptus, *medius terminus* vel *medium* vocatur.

20. Propositio, qua majus extremum comparatur, sive combinatur cum medio termino, quæ potissimum primo loco ponitur, dicitur *major*: illa ubi minus extremum cum eodem medio comparatur, & quæ ut plurimum secundo loco ponitur, vocatur *minor*, nempe *propositio*. Major & minor simul *premissæ* nuncupantur. Ea denique, ubi minus extremum comparatur cum majore dicitur *conclusio*.

Pro doctrinæ hujus exemplo quæritur, *an justus diligat Deum?* Ex terminis propositis neque nexus, neque repugnantia clare colligitur. Invento igitur tertio termino, *custodire mandata*, sic potest fieri illorum combinatio: *qui custodit mandata diligit Deum, sed Justus custodit mandata, ergo justus diligit Deum.* *Justus* est minus extremum, cum sit subjectum conclusionis: *diligit Deum*, est majus extremum, quia est conclusionis prædicatum: *custodit mandata*, est medium prima propositio, *qui custodit mandata, diligit*

ligit Deum est major : altera propositio , *sed justus custodit mandata* , est minor : & tertia denique , *ergo justus diligit Deum* , est conclusio , ut patet . Item termini *justus* , & *diligit Deum* , conveniunt inter se in conclusione , quia in præmissis uterque conveniebat alicui tertio , videlicet medio termino , *custodit mandata* .

21. Jam ut ad syllogismi divisionem progrediamur , duo præcipue in illo consideranda veniunt , *materia* scilicet , & *forma* . Materia duplex est , *remota* & *proxima* . Materia remota sunt termini ; proxima sunt propositiones . (n. 26 & 129 .) Ex terminis enim fiunt propositiones , & ex his syllogismi . Forma syllogismi est artificiosa dispositio terminorum & propositionum , ex quibus constat .

22. Primo itaque dividitur syllogismus ratione materiæ in *demonstrativum* , *topicum* sive *probabilem* , & *sophisticum* sive *fallacem* .

Syllogismus demonstrativus est ille , qui constat ex propositionibus necessario veris , hoc est , vel per se evidentibus , vel per alias propositiones jam probatis , ex quibus necessario vera inferitur conclusio . Demonstratio enim perfecta unico nonnunquam continetur syllogismo , ut si dicam : *hic lapis est durus ; atqui hic lapis est adamas ; ergo adamas est durus* . Aliquando pluribus syllogismis , aut aliis argumentationibus opus est , ut absolvatur demonstratio . Nam demonstratio est *ratiocinatio* , vel *ratiocinationum series*

ries, constans ex propositionibus necessario veris.

23. Duplex autem est præsertim demonstrationis species, altera *a priori*, qua effectus demonstratur per causam, ut si dicam, *ibi est ignis; ergo calor*: nam calor ignis effectus dicitur. Altera demonstrationis species dicitur *a posteriori*, qua causa demonstratur per effectum, ut si ex creaturis visibilibus tanquam effectum demonstraretur existentia Dei, tanquam causæ. His adjungitur demonstratio per absurdum, seu per impossibile qua nimirum res probatur esse, talis ideo, quia sequeretur absurdum, si vel non esset, vel aliter se haberet: v. g. *si Deus non esset omnipotens, non esset ens perfectissimum; atqui Deus est ens perfectissimum; ergo Deus est omnipotens.*

24. Syllogismus topicus sive probabilis est, qui constat propositionibus probabilibus, quæ tantum pariunt opinionem, ut *omnis mater diligit filium; atqui Joanna est mater, ergo diligit filium.*

25. Syllogismus sophisticus, sive fallax constat propositionibus apparenter quidem veris, reipsa tamen falsis, ut si dicam: *quod rationem perturbat, est malum; sed vinum perturbat rationem; ergo vinum est malum*, est syllogismus fallax; nam vinum moderate haustum nec est malum, neque perturbat rationem. Imo Apostolus commendat moderatum vini usum
pro-

propter stomachum. Solus itaque immoderatus vini usus est malus, non ipsum vinum.

26. Ratione formæ dividitur syllogismus in *formatum*, & *informem*. Syllogismus informis est, qui proponitur absque artificiosa terminorum, & propositionum dispositione, ut *peccator cum sis, non potes intrare regnum Dei.* Qui discursus includit hunc syllogismum optime concludentem; *nullus peccator potest intrare regnum Dei; sed tu es peccator: ergo non potes intrare regnum Dei.* Hi syllogismi informes sunt frequentes & grati in colloquiis, sed fallaciis obnoxii, atque ideo ad veritatem eruendam minus idonei. Syllogismus formatus est, cujus termini & propositiones artificiose secundum syllogismorum regulas disponuntur.

27. Syllogismus formatus dividitur in *simplicem* & *compositum*. Syllogismus compositus est, qui ita constat propositione composita, ut major præmissa integram propositionem compositam complectatur; ejus vero unam partem minor, & alteram conclusio. Hic syllogismus frequens est in communi hominum conversatione, atque triplex statuitur, *conditionalis* nempe, *conjunctivus* & *disjunctivus*.

28. Syllogismus conditionalis est, in quo reperitur aliqua propositio conditionalis, quæ duas includit partes, antecedens nimi-

rum & consequens. Fit autem ejusmodi syllogismus posito antecedenti in minori, ut consequens inferatur in conclusione, ut *si est doctus est homo ; sed est doctus : ergo est homo.* Vel negato consequente in minori, ut negetur antecedens in conclusione, v. g. *si est homo , est animal ; sed non est animal : ergo nec homo.*

Hic syllogismus conditionalis tribus modis concludit. Primo ab affirmatione termini antecedentis ad affirmationem consequentis, e. g. *si est homo , est animal , sed est homo : ergo est animal.* Secundo a negatione termini consequentis, ad negationem antecedentis, ut *si non est animal , non est homo , sed non est animal : ergo non est homo.* At non vice versa, nempe, a negatione antecedentis ad negationem consequentis ; nam falsa est hæc propositio, *si non est homo , non est animal.* Tertio in reciprocis valet conclusio ab affirmatione, unius ad affirmationem alterius partis, ut, *si sol lucet dies est ; atqui sol lucet : ergo dies est ;* & a negatione unius ad negationem alterius partis, ut *si sol non lucet , dies non est ; atqui sol non lucet : ergo dies non est.*

Tantus porro est usus syllogismi conditionalis, ut hoc tempore illa in scholis ratiocinandi forma plurimum usurpetur. Cavendum tamen, ne huic argumentationi plus æquo assuescamus ; tum quia varianda
est

est oratio, & argumentandi modus; tum etiam quia consuetudo ista vix probatur artis hujus magistris. Verum in promptu est remedium; nam omnis argumentatio absoluta fieri potest conditionalis, & vicissim: quemadmodum patet in sequenti exemplo; *si omnis homo est rationalis, idem est risivus; sed omnis homo est rationalis: ergo est risivus. Absolute, omne rationale est risivum; sed omnis homo est rationalis: ergo & risivus.*

29. Syllogismus conjunctivus, sive copulativus is est, cujus vis pendet ex conjunctione propositionis copulativæ; sive in quo major propositio est copulativa: cujus quidem propositionis, ut negetur pars una in conclusione, asseritur altera in minore; hinc conclusio hujus syllogismi semper est negans e. g. *nemo potest servire Deo & mammonæ seu pecuniæ, sed avarus pecuniæ suæ servit, eique addictus est: ergo Dei servus esse non potest.* Conclusio nulla est, cum affirmat, hoc est, cum pars una negatur, ut asseratur altera, ut patet in hoc syllogismo, *nemo servit Deo, & pecuniæ addictus est; sed prodigus suæ pecuniæ non est addictus: ergo Deo servit.*

30. Syllogismus disjunctivus est, cujusvis pendet ex conjunctione disjunctiva *vel, aut,* & aliis similibus: fitque hic syllogismus, cum una pars propositionis disjunctivæ aut astringitur in minore, ut altera negetur in conclusione, ut *animal, quod video, vel homo est,*

vel brutum ; atqui est homo : ergo non est brutum. Vel cum negatur pars una in minore, ut astruatur altera in conclusione, quæ argumentatio naturalis est, & magis usitata, ut *omnes improbi aut in hac vita puniendi sunt, aut in altera ; sed multi in hac vita non puniuntur ; ergo in altera punientur.* interdum major propositio est tripartita, tumque duæ partes negantur, ut asseratur tertia, ut *aut dies est, aut nox, aut crepusculum : sed non est dies neque crepusculum : ergo nox est.*

Hujus syllogismi disjunctivi tota vis est in accurata divisione ; nam si minus exacta fuerit divisio, totum argumentum corruet, ut si quis ita ratiocinetur: *aut Christianus est, aut Mahometanus ; sed non est Mahometanus : ergo Christianus est.* Major potest esse falsa, cum plurimæ dentur nationes barbaræ neque Mahometis erroribus, neque Christianæ Religioni addictæ. Proindeque nulla erit conclusio.

31. Syllogismus simplex est, qui constat propositionibus simplicibus, ut *omne bonum est amandum ; sed omnis virtus est bona : ergo virtus omnis est amanda.*

32. Hic dividitur primo in *affirmativum*, & *negativum*. Affirmativus est, cujus conclusio est affirmativa ut in exemplo mox assignato. Negativus vero est, cujus conclusio est negativa, ut *nullum vitium est fovendum ; sed omnis avaritia est vitium ; ergo nulla avaritia est fovenda.*

Divi-

Dividitur secundo in *communem* sive *universalem*, *particularem*, & *singularem*.

33. Universalis est, qui habet conblusionem universalem; & particularis, qui particularem conclusionem habet, medium terminum vero communem.

34. Syllogismus singularis is dicitur, cujus medium est singulare. Dicitur *expositorius* & *sensibilis*, quia rem quasi sensibus exponit, ut patet in hoc exemplo: *Petrus est rationalis; sed Petrus est animal: ergo aliquod animal est rationale*,

35. Neque refert, quod juxta regulas syllogisticas non concludatur ex puris particularibus; nam hujus syllogismi præmissæ non sunt particulares, sed singulares. Magnum autem discrimen est inter propositionem particularem & singularem: illa enim significat quidem rem singularem, sed indeterminate; hæc autem determinate: Unde fit, ut in syllogismo ex puris particularibus sint quatuor termini; in eo vero, qui constat ex singularibus, tres tantum reperiantur: sunt enim certi & determinati.

36. Tertio dividi potest syllogismus simplex in *perfectum* & *imperfectum*. Perfectum dico qui clare concludit, ut *omne bonum est amandum; sed virtus est bona; ergo virtus est amanda*. Imperfectus est, qui nonnihil obscure concludit, ut *omnis avarus est miser;*

sed aliquis avarus est dives ; ergo aliquis dives est miser.

§. III.

De Syllogismi, Figuris & modis.

37. **F**igura syllogistica est artificiosa extremorum combinatio cum medio termino, apta ad inferendam extremorum inter se convenientiam vel repugnantiam. Vel brevius: est dispositio medii cum extremis apta ad concludendum.

38. Ejusmodi figuras numeramus tantum tres. Prima medium subjicit in majore, & prædicat illum in minore, ut *omne animal sentit: sed omnis homo est animal: ergo omnis homo sentit.* Hic medius terminus *animal* est subjectum in majore; in minore vero prædicatum.

39. Secunda figura medium tam in majore, quam in minore prædicat, ut *nullus peccator est beatus; sed aliquis dives est beatus; ergo aliquis dives non est peccator.*

40. Tertia figura medium tam in majore, quam in minori subjicit, ut *omnis avarus est miser; sed aliquis avarus est dives: ergo aliquis dives est miser.*

41. Possibilis est & quarta figura, Galenica dicta, quando nempe medium in majore prædicatur, & subjicitur in minore. Verum hæc figura superflua est, cum sit tantum prima
ma

ma figura inverso præmissarum ordine, & propositione majore loco minoris posita.

42. Porro trium figurarum usitatarum doctrina memoriæ causa sequenti continetur carmine, ubi exprimuntur tres modi usitati, quibus cum exterminis combinatur medius terminus; nam.

*Prima figura prius subdit; post prædicat ipsum:
Prædicat altera bis, bis illum tertia subdit.*

Brevius

Sub. præ. prima, sed altera bis præ. tertia bis sub.

43. Modus syllogisticus est artificiosa præmissarum dispositio secundum universalitatem vel particularitatem, affirmationem vel negationem, apta ad concludendam extremorum convenientiam, vel repugnantiam. Vel brevius, est præmissarum secundum quantitatem & qualitatem dispositio apta ad concludendum.

44. Sedecim in quavis figura dantur modi possibiles, cum toties in cujuslibet figuræ præmissis combinari possint propositiones his vocalibus A E I O indicatæ, ut examinati patebit. Ex iis tamen 48. modis possibilibus quatuordecim tantum reperiuntur utiles juxta sequentes versus, quorum quælibet vocalis propositionem indicat, juxta superius dicta. Modi primæ figuræ sunt:

**bArbArA, cElArEnt, dArIl, fE-
rIO** que vocantur.

2^{dz.} cEſArE, cAmEſtrEs, fEſtInO bArOcO. 3^{tiz.} dArAptI, fElAptOn, dIsAmIs, dAtIsI, bOcArDO, fErIſOn.

45. Omnes reliqui modi poſſibiles ſunt inutilis. vel enim omnino non concludunt, vel inverſo terminorum ordine. Ejusmodi ſunt bArAlIp, cElAntEs, dAbItIs, fApEſmO, frIsEsOm. Qui omnes violenter & inverſo ordine concludunt. Exemplo ſit hic ſyllogiſmus in cElAntEs : *nullum rationale eſt lapis ; ſed omnis homo eſt rationalis : ergo nullus lapis eſt homo.* Naturali ordine ſervato inferri deberet in cElArEnt : *ergo nullus homo eſt lapis.* His igitur, quia mentem potius onerant, & perturbant, quam inſtruunt, omiſſis, modorum utilium exempla claritatis ergo ob oculos hîc ponimus.

46. *Exempla primæ figuræ.*

bAr- Omne bonum eſt amandum ;
bA- ſed omnis virtus eſt bona :
rA. ergo omnis virtus eſt amanda.

cE Nullum peccatum eſt fovendum ;
IA- ſed omnis avaritia eſt peccatum ;
rEnt. ergo nulla avaritia eſt fovenda.

dA-

dA- Omnis doctus est honorandus ;
rI- sed aliquis barbarus est doctus :
I. ergo aliquis barbarus est honorandus.

fE- Nullum turpe est expetendum
rI- sed aliquod lucrum est turpe :
O. ergo aliquod lucrum non est expetendum.

47. *Secundæ Figuræ.*

CeS- Nulla temeritas est virtus :
a- Sed omnis fortitudo est virtus :
re. ergo nulla fortitudo est temeritas.

CaM- Omne corpus est extensum ;
eS- sed nullus spiritus est extensus :
treS. ergo nullus spiritus est corpus.

FeS- Nullum peccatum est licitum ;
ti- sed aliqua delectatio est licita,
no. ergo aliqua delectatio non est peccatum.

Ba- Omnis virtus est laudanda ;
roC- sed aliqua liberalitas non est laudanda,
o- ergo aliqua liberalitas non est virtus.

48. *Tertiæ Figuræ.*

Da- Omne aurum est ductile ;
raP- sed omne aurum est solidum :
ti. ergo aliquod solidum est ductile.

Fe- Nulla avaritia est laudanda ;
 laP- sed omnis avaritia est cupiditas habendi :
 ton ; ergo aliqua cupiditas habendi non est laudanda

DiS- Aliquis Philosophus est doctus ;
 aM. sed omnis Philosophus est homo :
 iS. ergo aliquis homo est doctus.

Da- Omnis avarus est miser ;
 tiS- sed aliquis avarus est dives :
 i. ergo aliquis dives est miser.

BoC- Quædam ira non est peccatum ;
 ar- sed omnis ira est affectus animi :
 do. ergo aliquis affectus animi non est peccatum

Fe- Nullum peccatum est committendum ;
 riS- sed aliquod peccatum est delectabile :
 on- ergo aliquod delectabile non est committendum.

Omnes quidem hi modi sunt utiles, Nihilominus tamen iis ultro accedimus, qui primam figuram non modo perfectissimam, sed unicam pene necessariam existimant. Nam omnia quæstionum genera sive affirmantium, sive negantium ; sive universalium, sive particularium in ea concludi possunt :

sunt : cum in secunda figura tantum negantes ; in tertia non nisi particulares quaestiones concludi possint.

§. IV.

De principiis & regulis syllogismi.

49. **P** Rincipia syllogismorum intrinseca, in quibus nempe omnis syllogismus fundatur, sunt quatuor axiomata notissima.

Primum, *quidquid dicitur de aliquo subiecto, dicitur etiam de quolibet contento sub illo* sic quia dicitur de homine, quod sit rationalis dicitur etiam de quolibet contento sub homine ; consequenter & Viri & foeminae juvenes & senes, pauperes ac divites, & omnia hominis individua sunt rationalia.

50. Secundum est : *quicquid negatur de aliquo subiecto, negatur etiam de quolibet contento sub illo.* Sic quia de homine negatur, quod sit lapis, negatur quoque de quolibet hominis individuo.

51. Tertium : *quae sunt eadem uni tertio, sunt eadem inter se.* Sic si duae lineae seorsim sumptae sunt aequalis longitudinis cum aliqua linea, erunt etiam aequalis longitudinis inter se.

52. Quartum denique : *quorum unum repugnat, alterum convenit uni tertio, ea repugnant inter se ;* sic si ex duabus lineis una sit aequalis longitudinis cum aliqua tertia, & altera

altera sit brevior, vel longior, quam eadem tertia, duæ illæ nequeunt esse æquales inter se.

53. In primo & tertio [axioma]te fundantur syllogismi affirmativi, in secundo & quarto negativi. Quod si ergo negetur conclusio syllogismi legitime formati, & directe concludentis, facillime probari poterit ejus bonitas per prædicta principia.

54. Principiis syllogismi generales ejusdem adjungimus regulas sequentibus versibus contentas.

1. *Terminus esto triplex. 2. medium conclusio vitet.*
3. *Hoc ex præmissis altera distribuat.*
4. *Si præmissa fuit simul utraque particularis,*
5. *Utraque sive negans, nulla sequela venit.*
6. *Particulare præit? sequitur conclusio talis.*
7. *ponitur ante negans? clausula talis erit.*
8. *Dictorum semper servetur debitus ordo,*
9. *Et Complectatur clausula, quanta potest.*

55. Explicantur versus. *Terminus esto triplex*, id, est, in omni syllogismo sint tantum tres termini, & non plures neque pauciores; nam in hoc ars syllogistica tota consistit, ut duorum extremorum convenientia vel disconvenientia colligatur ex comparatione illorum cum aliquo tertio; vitaretur autem ista comparatio, si vel plures vel pauciores adessent termini, quam tres,

tres. Potissimum tamen intelligenda venit hæc regula de terminorum sensu ; hinc contra illam sæpe peccari solet varitatione suppositionis , (n. 79.) aut per terminos æquivocos , (n. 74.) non vero per numerum terminorum simplicium (n. 65.) ad eundem sensum spectantium, ut patet in hoc syllogismo optime concludente : *qui corruptorum & pravorum sequitur consilium, sæpe sæpius errare solet ; sed qui vitiosis animi passionibus obtemperat, corruptorum & pravorum sequitur consilium ; ergo qui vitiosis animi passionibus obtemperat, sæpe sæpius errare solet.*

§ 6. *Medium conclusio vitet.* Hoc est, medius terminus non debet ingredi conclusionem ; secus idem probaretur per idem ; cum medius terminus bis in præmissis positus, sit ratio, cur unum extremum recte prædicetur de altero in conclusione.

§ 7. *Hoc ex præmissis altera distribuat.* Id est medius terminus, si sit communis, debet in una saltem præmissarum supponere distributive ; (n. 83.) nam si semper supponeret disjunctive , (n. 87.) posset in una præmissarum pro hoc, in altera pro alio significato sumi, consequenter peccaretur contra primam regulam, ubi prohibentur plures, quam tres termini : uti & contra illud principium : *quæ sunt eadem uni tertio &c.* Ad hanc regulam reducitur, *quod nullus terminus possit distribui in conclusione, qui non*

non fuit distributus in præmissis; non enim potest inferri amplior convenientia extremorum inter se, quam probat illorum convenientia, vel repugnantia cum medio; cum hæc sit illius causa.

§ 8. *Si præmissa fuit simul utraque particularis, utraque sive negans, nulla sequela venit. Id est ex duabus præmissis particularibus, aut negativis nihil sequitur saltem ratione formæ syllogisticæ. Ratio primi est, quod medius terminus non distribuatur, si ambæ præmissæ sint particulares affirmativæ quod pugnat cum regula præcedenti; si vero una sit negativa, tunc medius terminus potest quidem distribui, sed prædicatum conclusionis (utpote propositionis negativæ juxta sequentem regulam) distribuetur, (n. § 6.) non distributum in præmissis. Non in affirmativa, quia particularis affirmativa nulum terminum distribuit; (n. 4.) neque in negativa particulari, ubi necessario debet esse subjectum signo particulari affectum; nam locum prædicati præmissæ negativæ occupare debet medius terminus, ut distribuatur.*

§ 9. *Particulare præit, sequitur conclusio talis, ponitur ante negans. clausula talis erit. Vel conclusio sequitur debiliorem partem, id est, negativa erit si aliqua præmissarum fuerit negativa; & particularis, si aliqua præ-*
præ-

præmissa fuerit particularis ; secus conclusio foret nobilior præmissis quæ tamen sunt causa conclusionis.

60. *Dictorum semper servetur debitus ordo.* Hoc est, in præmissis major propositio primo loco pondenda est, secundo loco minor ; in conclusione vero majus extremum debet prædicari de minori : at nunquam minus de majori.

61. *Et complectatur clausula quanta potest.* Id est, si conclusio universalis inferri potest, nunquam inferenda est particularis. Per has duas regulas ultimas excluduntur syllogismi indirecti ob rationes supra datas. (n. 44.)

Ut autem facilius advertantur fallaciæ contra hæc regulas generales : illis addimus pro quavis figura speciales.

62. *Regula pro prima figura.*

Sit minor affirmans, nec major sit specialis.

Pro secunda.

Una negans præeat, nec major sit specialis.

Pro tertia.

Sit minor affirmans, conclusio sit specialis.

Dum

Dum harum aliqua non observatur, semper etiam contra generales regulas peccatur; quas cum sufficienter explicuerim, specialium rationes reddere superfedeo.

63. Cæterum qui omnes syllogismorum, necnon supra datas suppositionum regulas expedite noverit, facillime omnes argumentationis fallacias advertet; hinc talibus immorari vix operæ pretium existimo.

§ V.

De syllogismi reductione.

64. **R**eductio duplex est, *ostensiva*, & *ad impossibile*.

Reductio ostensiva est *revocatio imperfecti syllogismi ad perfectum*, in quo evidenter infertur eadem propositio, quæ fuerat conclusio syllogismi imperfecti, aut saltem ejus conversa, ex qua tandem deducitur conver-tenda.

65. Syllogismi autem perfecti, & clare concludentes fiunt tantum in quatuor modis primæ figuræ; omnes vero modi secundæ & tertiæ figuræ (n. 47 & 48.) sunt imperfecti, vel saltem minus clare concludunt, quod hic nomine imperfectionis intelligo.

66. Ut igitur hi ad illos reducantur, attendendum primo ad litteram initialem modi reducendi; modus enim imperfectus semper reducendus est ad illum ex quatuor perfectis, qui simili consonante incipit. Sic
omnes

omnes imperfecti, qui incipiunt a B reducendi sunt ad *Barbara*, a C ad *Celarent*, a D ad *Darii*, ab F ad *Ferio*. Hoc ut fiat, attendendum secundo ad consonantes S P M C in barbaris illis modorum vocibus insertas vocalibus. Nam S indicat propositionem præcedente vocali denotatam, convertendam esse simpliciter; at P vult converti per accidens. (cap.2.n.39.) M indicat præmissas esse transponendas, maiorem nempe loco minoris, & minorem loco majoris. C denique petit alteram reductionem videlicet ad impossibile juxta hos versus:

S vult simpliciter verti; *P* verte per accidens

M vult transponi: *C* per impossibile duci.

Ad hanc doctrinam illustrandam, reducat^r hic syllogismus.

DiS- Aliquis Philosophus est doctus;

aM- Sed omnis Philosophus est homo:

iS. ergo aliquis homo est doctus.

Imprimis cum sit in modo *Disamis*, qui per D incipit, reduci debet ad illum modum perfectum, cujus etiam D est initium, nempe *Darii*. Secundo major propositio vertenda est simpliciter, ut indicat S post vocalem I, quæ primam denotat propositionem. Tertio

P, Andr, Gordon Phil. P. I.

F

pra-

præmissæ debent transponi, ut indicat M. Quarto, conclusio vertenda est *simpliciter*, ut indicat ultimum S. His ita peractis prodibit hic syllogismus in *Darii*:

Da- Omnis Philosophus est homo;
 ri- sed aliquis doctus est Philosophus:
 i. ergo aliquis doctus est homo.

72. Omnes porro modi imperfecti reduci possunt tam ostensive, quam ad impossibile, exceptis illis, ubi habetur C nempe *Baroco* & *BoCardo*, qui solum ad impossibile reduci possunt.

73. Est autem reductio ad impossibile; dum aliquis concessis præmissis, negans bonam consequentiam, cogitur admittere duo contradictoria (cap. 2. n. 30.) esse simul vera. Fit autem hoc modo: assumitur contradictoria conclusionis negatæ, & ita combinatur cum una ex præmissis concessis, ut perfecte concludat contradictoriam alterius præmissæ. Modum combinandi docent sequentes versus:
*Majorem servat, variatque secunda minorem,
 Tertia majorem variat, servatque minorem.*

Sensus est: in secunda figura major propositio servatur, & assumpta contradictoria ponitur loco prioris minoris; in tertia vero figura servatur minor prioris syllogismi, & contradictoria assumpta ponitur loco majoris, c. g.

Baro-

Ba- Omnis virtus est laudanda;
ro- sed aliqua liberalitas non est laudan-
da:

Co. ergo aliqua liberalitas non est virtus.

Si in hoc syllogismo, concessis præmissis negatur conclusio, sumatur ejus contradictoria, *omnis liberalitas est virtus*; & ponatur loco minoris, tunc prodibit hic syllogismus perfecte concludens in *Barbara*.

Bar- Omnis virtus est laudanda;

ba- sed omnis liberalitas est virtus:

ra. ergo omnis liberalitas est laudanda.

Quæ conclusio, cum perfecte inferatur, negari nequit; & prior minor, *aliqua liberalitas non est laudanda*, supponitur fuisse concessa; sed hæc sunt contradictoria (c. 2. n. 30.) nempe *omnis liberalitas est laudanda*, & *aliqua liberalitas non est laudanda*: ergo juxta respondentem contradictoria sunt simul vera, quod tamen est impossibile. (c. 2. n. 31.) Unde taliter negans per *impossibile* ad sanam mentem reduci dicitur.

§. VI.

De inventione medii.

74. **M**ulti multas & varias circa inventionem medii tradunt regulas, & principia: Verum hic omnibus regulis longe præstat maturum judicium, fervens studium,

& disputandi exercitium. Ego igitur brevitati studens duo tantum, eaque generalissima statuo, medium inveniendi principia.

75. Est autem inventio medii ars astruendi aliquod tertium, cui vel ambo extrema convenient; vel unum conveniat, alterum repugnet, in ordine ad inferendam extremorum inter se convenientiam, vel repugnantiam in conclusione. In eo itaque totus difficultatis cardo vertitur, ut, dum aliqua propositio negatur; mox assumatur aliquod tertium probativum, & unum extremum in maiore, alterum in minore cum illo combinetur, & tandem negata prius propositio inferatur in conclusione. His notatis.

76. Primum principium est: ad probandam propositionem affirmativam assumendum est medium, quod utrique extremo illius propositionis conveniat, juxta illud: *quæ sunt eadem uni tertio, sunt eadem inter se*. Sic ad probandam hanc propositionem, *doctrina æstimanda est*, pro medio probativo servire potest utile, quod utrique extremo convenit, hoc modo: *omne utile æstimandum est; sed omnis vera doctrina est utilis: ergo omnis vera doctrina æstimanda est*.

77. Secundum principium est: ad probandam propositionem negativam adhibendum est medium, quod uni tantum extremorum conveniat, alteri vero repugnet, juxta illud: *quorum unum repugnat, alterum vero con-*
venit

venit uni-tertio, ea necessario repugnant inter se: Sic ad probandam hanc propositionem nullus superbus placet Deo tanquam medium assumi potest peccator, & hic formari syllogismus: nullus peccator placet Deo, sed omnis superbus est peccator: ergo nullus superbus placet Deo.

CAPUT IV.

*De modo disputandi, illiusque per
varias quæstiones in Logica contro-
versas exercitio.*

N. I.

Hucusque Logicæ regulas & præcepta tanquam arma ad conflictum Philosophicum & omnem literatum congressum necessaria subministravi: restat solum, ut aptum horum armorum usum & applicationem ostendam. Primo igitur Sophiæ Tyronibus regulas quasdam præscribam, quibus instructi docte, modeste, & apte in arenam literariam descendant. Exinde pro disputationis exercitio singulas quæstiones controversas singulis paragraphis tractabo.

§. I.

De modo disputandi.

2. **D**isputationis Etymologiam desumunt aliqui a *putando*; quoniam sicut *putare* est noxia & inutilia ab arboribus removere, & abscindere: ita *disputare* est inutilia

& falsa a veritate segregare. Unde definiri potest disputatio *discursus cognoscende veritatis gratia susceptus*.

3. Hoc certum est, quod omnis disputatio sit *discursus*, quo unus negat, quod alter asserit, quodque illius finis saltem primarius sit cognitio veritatis in quaestione controversa, sive in tali propositione, cuius opposita, & contradictoria non omni caret probabilitate & fundamento.

4. Itaque in omni disputatione necessario tria sunt, videlicet primo doctrina quaedam controversa tanquam materia disputationi subiecta, quæ græce *ῥέσις*, latine *positio* sive *propositio* dicitur. Secundo unus doctrinam illam defendit, & ad opposita respondet argumenta, diciturque *defendens*, sive *respondens*. Tertio alius doctrinam propositam per argumenta contraria oppugnat, & vocatur *opponens*, vel *argumentans*.

5. Porro cum defendens plerumque sit in arte tyro, illi adiungitur *Præses*, qui in difficilioribus illum sublevare debet. De tribus hisce personis sigillatim pauca dicam.

Regulae defendenti observandæ.

6. **P**rimo defendens, sive respondens nihil aliud propositum habeat, quam ut id, quod asserit, sive quod defendendum suscipit, apte & apposite defendat. Defendere autem non est, argumentis doctrinam propo-

propositam confirmare, vel dilucidare; sed argumenta illa, quæ contra thesin opponuntur, dissolvere.

7. *Secundo* præprimis cavere debet, ut nihil absurdi, nihil contra fidem, nihil contra bonos mores, nihil contra statum Reipublicæ, nihil denique quod sibiipso falsum videtur, propugnandum suscipiat. Quapropter rationes & fundamenta, quibus doctrina propugnanda innititur, oportet habere perspecta, eaque perfecte intelligere; nec non præcipuas saltem contrariæ opinionis objectiones, illarumque solutiones.

8. *Tertio* auditoribus convocatis succinctum & appositum præmittat discursum (nisi præses ipse hoc præstet) de disputatione instituta.

9. *Quarto* discursu finito illum, qui primo loco argumentaturus est, humaniter invitet. Quæ invitatio iis verbis, titulis, & encomiis constet, quibus Opponentem & Auditores sibi conciliet, & benevolentiam captet.

10. *Quinto* argumentum propositum bis est repetendum, idque iisdem verbis (quantum fieri potest) quibus ab Opponente proponebatur. E. g. impugnatur nostra Philosophiæ definitio, qua dicitur *certa & evidens rerum naturalium cognitio*; hoc argumento: *Philosophia multa continet falsa, obscura, & dubia: ergo non est cognitio certa.* Argumen-

to proposito Defendens hoc fere modo respondet: "argumentaturus NN. (hic titulo "competenti appellet Opponentem) contra "theses nostras, selegit sibi thesin primam, "quæ sic sonat: *Philosophia est certa & evidens rerum naturalium cognitio*: & tale placuit ponere argumentum: *Philosophia multa continet falsa, obscura, & dubia*; ergo non est cognitio certa. Quandoquidem sic argumentari placuit resumo, ac respondeo: "Sub argumenti repetitione operam dabit Defendens, ut rite Opponentis mentem intelligat, exacteque expendet, an argumentum servet formam, & regulas argumentationis supra datas.

II. Finitâ prima repetitione mox repetit, sive resumit argumentum, & ad singulas propositiones scorsim respondet concedendo, negando aut distinguendo. Et quidem propositio vera semper concedenda est, falsa vero semper neganda. Quod si autem propositio sit ambigua aut duplicem sensum habeat, ita, ut in uno sensu sit vera, in altero falsa, tunc distinguenda est, sive sensus verus, qui concedi debet, separandus est a sensu falso, quem negare oportet. Sic in allato argumento distinguendum est antecedens: *Philosophia multa continet falsa, obscura, & dubia* distinguo antecedens: *Philosophia continet falsa obscura & dubia tanquam propria* quibus assentitur: nego antecedens; tanquam extranea,
de

de quibus judicat secundum illorum naturam & exigentiam, concedo antecedens & nego consequentiam.

12. *Sexto* sub exordio tamen disputationis nimix distinctiones, quantum fieri potest vitandæ sunt, ne per illas confundatur argumentans. Quod si tamen opus sit, distinguere potiusquam negare præstat.

13. *Septimo*, si in prima repetitione animadvertat syllogismum non esse in debita forma, nec juxta regulas hæctenus traditas, tunc concessis præmissis neganda est consequentia (quod in nullo alio casu licet) & monstrandum syllogismi vitium. Quare attentus esse debet defendens, ut nullum syllogismum regulis conformem arguat vitii.

14. *Octavo*, si nulla propositio sit contra theses propositas (quod sæpius accidit) tunc Respondens totum concedere debet argumentum.

15. *Nono* si argumentum petitum sit ab Autoritate scripturæ, ex conciliorum decretis, ex corpore Juris Canonici, aut Civilis; tunc respondetur *explicando textum citatum*.

16. *Decimo* Si ratio addatur in majori, cur prædicatum subjecto conveniat, & illa ratio non sit sufficiens; tunc respondetur *negando causalem majoris*. Si vero aliquid majori addatur tanquam ipsius consequens; tunc *negatur sequela majoris*.

17. *Undecimo* Si major vel minor plures partes contineat, quarum una est vera, altera falsa, tunc respondetur per partes concedendo unam, alteram negando.

18. *Duodecimo* Si Opponens quæstionem proponat, cujus responsum a Defendente expectat, tunc responderi potest hoc modo: *Dominus Opponens a me querit, utrum &c. ad quod respondeo &c.*

19. *Decimotertio.* Si Opponens fallax argumentum importune urgeat: tunc enervari potest vis argumenti simili fallacia; quod tamen debito humanitatis Signo præstandum erit, ne offendatur Opponens vel Auditores. Huc pertinet *retorsio argumenti*, quando scilicet argumentum propositum æque videtur adversari contradictoriæ thesisi, quam ipsi thesi.

20. Hæc omnia si rite observaverit Defendens, suis poterit firmiter stare principia, neque ullis Adversariorum argumentis movebitur.

21. *Decimoquarto.* Solutis argumentis consultum erit unam vel alteram rationem afferre ad thesin impugnata dilucidandam, æque probandam; sic enim Auditoribus persuadebit, suam sententiam veram esse & justam.

22. *Decimoquinto*, finito taliter argumento grates breviter refert Opponenti; Omniumque ultimo etiam Auditoribus pro illorum præsentia & habita patientia,

Regule

Regulæ quædam Opponentî servandæ.

23. **O**pponens sive Argumentans hodie-
dum raro suum subit officium sine
humana invitatione ; non enim altercationis
ergo, sed amicabilis conversationis cau-
sa, & ad ingenia exercenda disputationes præ-
sertim publicæ instituuntur.

24. *Primo* igitur Opponens pro honore
sibi præstito & humana invitatione ad actum
istum solemnem comiter grates referat, &
Defendentem (Præsidentem quoque, si adsit)
ex solidæ doctrinæ specimine laudare poterit,
ac titulis convenientibus decorare. Quæ
tamen omnia breviter & succinctis verbis
præstanda sunt, ne cæremoniis inutilibus, &
titulis superfluis molestus sit, vel forte etiam
rîsus excitet, & tempus abbrevietur.

25. *Secundo* nihil probandum suscipiat
contra fidem, bonos mores, rectam ratio-
nem, statum Reipublicæ, nisi prius admoneat,
se tantum exercitii gratia similia proferre.
Materiam igitur, de qua disputandum est,
præprimis habeat perspectam ; nam quæ
ignorat, impugnare minime poterit.

26. *Tertio* assumenda est aliqua thesis,
maxime talis, ex qua Auditores aliquid pos-
sunt discere. Hanc Opponens totam legat si
brevior sit, vel solam illius partem, si pro-
lixior, hoc fere modo : "ex propositis au-
tem thesibus selegi mihi primam quæ sic se
habet;

"habet: *Philosophia est certa & evidens rerum naturalium cognitio*; contra quam thesin "tale pono argumentum, &c." Si opponens ex decore diutius argumentari teneatur, tunc duas vel tres theses successive impugnandas eligere poterit. Hoc tamen cavendum est, ne multas & fere omnes theses percurrat unum aut alterum syllogismum contra singulas proponendo. Est enim imperitiæ signum, ac si nempe Opponens de una vel altera quæstione per mediam horæ partem sermones conferre non posset.

27. *Quarto*, contra thesin selectam idoneum proponendum est argumentum ita, ut moralia moralibus; physicis physica urgeantur. Probationes singularum propositionum paratas habeat, easque breves, claras & in forma syllogistica ordinatas. Ab initio autem disputationis præstat mentem suam uno vel altero enthymemate aperire, ut Defendens eo facilius argumentum repetere, & melius intelligere possit. Absint epicheremata, longæque interlocutiones, nihilque probetur, antequam negatum fuerit; inurbanum enim est Defendentem longis & inutilibus sermonibus perturbare.

28. *Quinto* Defendentis responsio patienter audienda est; donec ille finem sermoni imposuerit; nam contra humanitatem peccat, qui alterius loquelam interrumpit. Responsione vero percepta propositionem

nem negatam probare incumbit Opponentī.

29. *Sexto*. Opponens argumentum suum finire debet, antequam Auditoribus tædio esse incipiat.

30. *Septimo* dum argumento finem imponit, Defendenti, & Præsidi si adsit grates referat pro docta argumentorum solutione.

De officio Præsidis.

31. **P**RÆSES sic dictus, quod disputationi præsit, præprimis cavet ut Defendens munus suum rite adimpleat; congrua illius responsa laudare poterit & commendare; imo si opus fuerit, etiam confirmare. Defendenti vero vacillanti aut deficienti succurrit; errantem excusat, ac reducit. Hæc de methodo disputandi dicta sufficiant.

32. Cæterum qui publicis disputationibus utiliter interesse desiderat, materiam, de qua instituta est disputatio, perspectam habeat: argumenta proposita, eorumque solutiones, vel in charta annotet, vel memoriæ altius imprimat, ut domum reversus desuper inquirere possit. Hunc modum qui servant, magnam ex disputationibus percipiunt utilitatem & emolumentum. Nunc pro disputationis exercitio quæstiones præcipuas in logica controversas distinctis paragraphis proponam.

§. II.

De definitione termini logicalis.

IN hoc §. argumentatione posita mox claritatis causa responsionem adjungam, quod tamen in §§. sequentibus non observabo.

Propositio. I.

23. **T**erminus recte definitur *extremum propositionis*.

Probatur propositio, ista definitio termini servat omnes regulas bonæ definitionis; ergo est bona. Antecedens probatur; regulæ bonæ definitionis sunt, ut sit *clara, brevis, & reciproca cum re definita*; atqui omnes hæ regulæ conveniunt huic nostræ definitioni termini; ergo nostra definitio servat regulas bonæ definitionis. Illius porro bonitas melius elucescet ex objectionum solutione.

Solvuntur Objectiones.

24. **O**pponens. Tradita definitio regulas bonæ definitionis non servat; ergo non est bona definitio.

Respondens, nego antecedens.

Opp. Probo antecedens: hæc definitio non est reciproca cum re definita, sive non convenit omni rei definitæ, id est, omni termino. Ergo non servat omnes regulas bonæ definitionis.

Resp.

Resp. nego antecedens.

Opp. probó antecedens. Si dantur termini qui non sunt extrema propositionis tunc ista definitio non convenit omni rei definitæ; atqui dantur termini qui non sunt extrema propositionis; ergo ista definitio non convenit omni termino.

Resp. distinguo majorem: Si dantur aliqui termini etiam *logicales*, qui non sunt extrema propositionis, concedo sequelam majoris; quod nempe nostra definitio non sit bona: Si dantur aliqui termini non *logicales*, nego sequelam majoris. Distinguo pariter minorem: atqui dantur aliqui termini qui non sunt extrema propositionis, termini *logicales* nego minorem: termini *physici*, concedo minorem & nego consequentiam. Terminus autem physicus est extrema pars compositi physici v. g. extremum punctum lineæ. Hujusmodi quidem termini non sunt extrema propositionis; at de his nobis sermo non est, sed tantum de terminis *logicæ*.

Opp. Contra distinctionem, vel contra responsionem: dantur etiam termini *logicales*, qui non sunt extrema propositionis; ergo nulla solutio.

Resp. nego assumptum.

Opp. probó assumptum, termini *physici* sunt termini *logicales*; ergo si termini *physici* non sunt extrema propositionis (sicut con-

concessum est) neque omnes termini logice erunt extrema propositionis.

Resp. nego antecedens.

Opp. prob. antecedens in exemplo: *Finis tabule* est terminus physicus, cum sit extrema pars compositi; atqui *finis tabule* est etiam terminus logicalis: ergo terminus physicus est terminus logicalis.

Resp. distinguo: *finis tabule* est terminus physicus & logicus sub diverso respectu, concedo; sub eodem respectu, nego; in quantum enim *finis tabule* consideratur, ut est pars extrema compositi physici, dicitur terminus physicus; in quantum verò consideratur *finis tabule* ut est subjectum hujus propositionis: *finis tabule* est *ejus extrema pars*, in tantum *finis tabule* est terminus logicalis.

Opp. Contra responsionem, data definitio termini non convenit omni termino logice sumpto; ergo nihil dictum.

Resp. nego antecedens.

Opp. prob. ant. non convenit termino mentali; sed terminus mentalis est terminus logicus logice sumptus: ergo data definitio non convenit omni termino logice sumpto.

Resp. nego Majorem.

Opp. prob. M. terminus mentalis datur tantum in mente; ergo nequit esse extrema propositionis.

Resp.

Resp. concedo antecedens; nego consequentiam.

Opp. probō consequentiam: propositio non datur in mente; ergo quod tantum datur in mente non potest extremum propositionis esse.

Resp. distinguo antecedens non datur propositio *manifestata* in mente, concedo antecedens; non datur in mente propositio *latens* nego antecedens, & distinguo consequens; ergo quod tantum datur in mente, non potest esse extremum propositionis *manifestata* concedo consequens: non potest esse extremum propositionis *non manifestata* sive *latentis* nego consequens & consequentiam. Communiter ergo sumitur propositio pro propositione *manifestata*; nihil tamen vetat illam sumi pro propositione nondum *manifestata*; sed intra mentem latente, quæ proprie iudicium appellatur.

§. III.

De objecto logica.

25. **O**bjectum generatim, est id, circa quod facultas præcipue versatur, sic objectum Philosophiæ est omne naturaliter scibile per causas certas: Metaphysicæ ens abstractum, & immateriale; Physicæ corpus naturale; Mathematicos corpus extensum, vel si magis placet, ipsa extensio sive quantitas: Jurisprudentiæ

actiones hominum externæ ad justitiam dirigenda: & Theologiæ Deus. In omnibus enim hisce scientiis res dictæ præprimis considerantur, & scientiæ circa illas præcipue versantur.

26. Objectum dividitur in *formale & materiale*, sive *subjectum* de quo scientia tractat; nam aliud est *subjectum* in quo scientia residet, videlicet humanus intellectus, vel ipse homo.

27. Objectum materiale sive subjectum est res illa sive materia, quæ ab aliqua disciplina consideratur: sic subjectum Philosophiæ est *omne naturaliter scibile per causas certas* Physicæ, & Medicinæ corpus: Theologiæ Deus. Unde patet, quod subjectum aliquando non distinguatur ab objecto; sic Deus tam est objectum quam subjectum Theologiæ: *naturaliter scibile* tam objectum est quam subjectum Philosophiæ.

28. Objectum formale est ratio, propter quam materiale objectum ab aliqua scientia consideratur, vel est ipsa ratio abstracta, quæ in materiali consideratur; sic objectum formale Philosophiæ est *naturalis scibilitas*. Medicinæ corporis *sanitas* &c.

29. Ex objecto materiali & formali constat objectum, ut vocant, *adequatum & totale*. Nomine objecti simpliciter prolati semper intelligitur objectum adequatum. His præmissis sit.

Pro-

Propositio II.

30. **O**bjectum Logicæ totale, & adæquatum est intellectus ad verum dirigendus.

Prob. Conclusio: illud est objectum Logicæ, circa quod Logica præcipue versatur; sed Logica præcipue versatur circa intellectum ad veritatem dirigendum; ergo intellectus ad verum dirigendus est objectum Logicæ.

Objectum materiale Logicæ est ipse intellectus; nam intellectus est res illa, circa quam Logica versatur.

Objectum vero formale Logicæ est rectitudo, sive veritas; hæc enim est ratio ob quam intellectus a Logica consideratur.

Solvuntur objectiones.

31. *Opponens primo.* Objectum Logicæ sunt operationes intellectus ad verum dirigendæ; ergo non ipse intellectus.

Resp. concesso antecedente nego consequentiam; nam intellectus & illius operationes sunt unum quid & indistinctum. Sic utique apprehensio nihil aliud est, quam intellectus apprehendens, iudicium intellectus iudicans, & discursus nil aliud, quam intellectus discurrens. Melius tamen pro objecto assignatur intellectus, quam mentis operationes, quia objectum quo simplicius, eo melius.

Opponens 2do cum Thomistis, Logica versatur circa entia rationis & secundas intentiones; ergo entia rationis & secundæ intentiones sunt objectum Logicæ.

32. Ante responsionem explicanda est objectio. Per ens rationis hic nihil aliud intelligunt Thomistæ, nisi artificiosam dispositionem, quam ratio sive intellectus facit in rebus cognitis, dum illas ordinat in modum prædicati, subjecti, generis, speciei, definitionis divisionis, syllogismi &c. Hæc dispositio artificiosa dicitur *ens rationis*, quoniam non est in rebus ipsis, sed solum in mente eas apprehendente, & res cognitas taliter ordinante. Dicitur quoque *directivum*, quod intellectum in cognoscendo dirigat.

Hæc ipsa artificiosa dispositio vocatur etiam *secunda intentio*. Est autem hoc loco mentis intentio nihil aliud, quam applicatio mentis ad rem aliquam percipiendam, sive est ipsa rei perceptio, quæ vel prima dicitur vel secunda.

Prima intentio est primaria rei perceptio, qua res illa naturaliter ab omnibus percipitur, ut si ab aliquo pronuntiatur hæc propositio, *Deus est bonus*, mox intelligent omnes ipsi Deo bonitatem attribui, idque primo intentionaliter cognoscere vulgo dicitur.

Secunda intentio est secundaria quædam perceptio, qua quidpiam ipsi rei inesse percipitur, quod ei tantum per mentem competit;

ut

ut si in allato exemplo *Deus* concipiatur esse *subiectum* propositionis, vel *nomen substantivum* &c. *bonus* vero concipiatur esse *prædicatum* propositionis, *nomen adjectivum* &c. Quidquid igitur concipitur esse subiectum, prædicatum, genus, species &c. id omne secundo intentionaliter concipi vulgo dicitur. Porro ipsa mentis conceptio vocatur *intentio formalis*; res vero concepta dicitur *intentio objectiva*.

Occasione dictorum plerique admittunt aliud ens rationis, quod *chimericum* vocant, & describunt, quod sit conceptus illius, quod esse non potest, sive quod esse repugnat, v. g. *bircocervus*, sive animal ex natura hirci & cervi compositum; aptius exemplum est *circulus quadratus*. Tale ens rationis omnino repugnare puto; nam quod repugnat esse extra intellectum, illius quoque idea repugnat in intellectu. His ita explicatis ad objectionem.

Resp. distinguendo antecedens. Logica versatur circa secundas intentiones objectivas, seu circa entia rationis directiva in gratiam intellectus ad verum dirigendi. Consequenter propter ipsas secundas intentiones, aut entia rationis tantum, nego ant. & consequentiam.

Oppon. tertio Illud est objectum logicæ, quod logica præcipue intendit; sed logica præcipue intendit confectionem boni syllo-

gismi præsertim demonstrativi; ergo syllogismus demonstrativus seu demonstratio est objectum logicæ.

Resp. distinguo Majorem, illud est objectum logicæ, quod logica præcipue & ultimo intendit concedo Majorem; quod tantum proxime & immediate intendit, nego Majorem. Minorem pariter distinguo, logica præcipue intendit confectionem boni syllogismi proxime & immediate, concedo minorem, ultimo, nego minorem & consequentiam. Logica ergo proxime & immediate intendit confectionem boni syllogismi, ut hoc mediante ultimo tandem intellectum dirigat ad veritatem.

Opp. quarta. Logica præcipue agit de nominibus; ergo nomina & voces sunt objectum Logicæ.

Resp. distinguendo antecedens. Logica agit de vocibus propter veritatem intellectus, quatenus nempe voces sunt signa cogitationum nostrarum, concedo antecedens: agit de vocibus propter ipsas voces, nego antecedens & consequentiam; hoc enim pertinet ad Grammaticam.

Opponens quinto. Logica instituit categorias, in quibus continentur res omnes; ergo res omnes sunt objectum Logicæ.

Resp. distinguendo antecedens. Logica instituit categorias, in quibus continentur res omnes, ut earum perceptio rite fiat, concedo
ante-

antecedens: ut res ipsas ex professo pertractet, nego antecedens & consequentiam.

Opponens. contra responsionem. Obiectum facultatis bene discurrendi est ipsum obiectum discursus; sed Logica est facultas bene discurrendi; ergo illius obiectum est illud, quod est obiectum discursus: subsumo, sed res omnes cognitæ sunt obiectum discursus; ergo res omnes cognitæ sunt Obiectum Logicæ.

Resp. primo negando minorem subsumptam, nam obiectum alicujus disciplinæ est id, circa quod, facultas illa præcipue & ratione sui versatur; Discursus vero artificialis non occupatur circa res cognitæ propter res ipsas, sed propter veritatem intellectus; quare veritas, non vero res cognitæ sunt obiectum discursus. Unde.

Resp. secundo distinguendo minorem subsumptam. Res cognitæ sunt obiectum discursus *uterius referibile* concedo; res cognitæ sunt obiectum *ultimatum*, nego.

S. IV.

De natura Logicæ.

33. **L**ogicam quidem esse scientiam bene ratiocinandi, dictum fuit in proæmio. Est tamen quæstio antiquissima & vix unquam terminanda, an Logica sit scientia proprie dicta, an ars, an practica, an speculativa?

Ante resolutionem notandum, quod communiter quinque recenscantur virtutes sive munia intellectus, videlicet sapientia, ars, prudentia, intelligentia, & scientia, quarum litteras initiales continet vox S A P I S. Intelligentia est cognitio primorum principiorum, quæ per se nota dicuntur, ut totum est majus sua parte; impossibile est idem esse. & non esse. Sapientia est cognitio rerum altissimarum per causas certas, qualis est Theologia. Prudentia est cognitio rerum agendarum v. g. imperii regendi. Scientia est cognitio certa & evidens per causas certas & evidentes acquisita, quales sunt præcipue disciplina mathematica. Ars est cognitio certarum regularum ad faciendum aliquod opus qualis est musica. His præmissis sit,

Propositio III.

34. **L**ogica est scientia proprie dicta.
Prob. Illa disciplina est scientia, quæ multas habet & efficit demonstrationes; sed Logica multas habet & efficit demonstrationes; multa enim demonstrat circa definitionem, divisionem & argumentationem; v. g. quod definitio debeat constare genere & differentia; quod debeat esse clarius re definita; quod divisio distinctam efficiat rei cognitionem; quod in syllogismo non plures, nec pauciores, quam tres termini esse possint. Ergo Logica est scientia proprie dicta.

Logica

Logica nihilominus ars dici potest, cum sit cognitio certarum regularum ad faciendum aliquod opus v. g. syllogismum.

Solvuntur objectiones.

35. **O**ppon. primo Objectum scientiæ debet esse necessarium, sed objectum logicæ, utpote intellectus ad verum dirigendus, non est necessarium; ergo logica non est scientia.

Resp. primo; Majorem negari posse; objectum enim scientiæ potest esse contingens, dummodo certum.

Resp. secundo distinguendo majorem. Objectum scientiæ debet esse necessarium *quoad essentiam*, seu connexionem subjecti & prædicati, concedo Majorem: *quantum ad existentiam*, nego Majorem. Non ergo requiritur, ut scientiæ objectum existat necessario; cum id soli Deo conveniat; sed satis est ut sit connexio necessaria inter subjectum & prædicata, quæ considerantur in scientia. Sic semper verum est, *nihil unquam concludi ex duabus præmissis negativis*; quamvis tales præmissæ non semper actu existant. Minorem pariter distinguo. Objectum Logicæ non est necessarium *quantum ad existentiam* concedo: *quantum ad essentiam*, nego minorem & consequentiam. Itaque intellectus semper dirigitur ad verum, quotiescunque servat regulas bonæ definitionis, divisionis, aut argu-

mentationis; non tamen requiritur, ut intellectus semper existat, & semper actu per ejusmodi regulas ad verum dirigatur.

Instabis. Si necessitas essentiae in objecto sufficiat ad rationem scientiae, tunc ars aedificatrix, Grammatica, Rhetorica, & omnes aliae artes, nomen scientiae sibi merito assument. Nam ex propriis principiis conficiunt demonstrationes. Sic Architectus parietem ad normam, seu ad lineam perpendicularem constructum rectum esse demonstrat, non inclinatum, & cum libuerit, hanc conficiet demonstrationem: *paries ad normam erectus stat firmus; sed hic paries est ad normam erectus; ergo hic paries stat firmus.* Atqui non potest admitti, quod artes sint scientiae; ergo neque quod necessitas essentiae sufficiat ad rationem objecti scientifici.

Resp. Neg. M. artes enim omnes non tam objecti sui notitiam, quam illius productionem spectant. Neque artifex ullam efficit demonstrationem, ut artifex est, sed forte ut alia scientia superiore utcunque est instructus. Sic demonstratio allata ad Physicam pertinet, cum principio Physico inniatur.

Resp. secundo. Duplicis generis sunt artes, aliae, quarum objecta sunt necessaria necessitate essentiae, cujusmodi sunt Geometria, Architectura, Musica, Logica &c, aliae autem sunt

sunt artes, quorum objecta nequidem necessitate essentiae necessaria sunt, qualis est grammatica; quod enim v. g. *verbum activum regat accusativum*, id ad verbi activi essentiam non pertinet, sed ex arbitrio hominum dependet.

Instabis. Ex hac responsione sequitur, quarundam artium objecta esse necessaria necessitate essentiae; ergo saltem illae artes non discrepabunt a scientiis.

Resp. Conc. antec. dist. cons. Ex artes non distinguuntur a scientiis secundum superiorem sui partem spectatae, concedo: secundum inferiorem partem spectatae, nego consequens & consequentiam. Itaque duae sunt partes considerandae in artibus, quarum objecta sunt necessaria necessitate essentiae, videlicet pars superior, quae est cognitio rei per regulas quasdam certas & immutabiles efficiendae: & pars inferior, quae est executio regularum, seu productio ipsius artefacti. Pars illa superior artis v. g. Geometriae, Architecturae, Musicae, Logicae &c. non discrepat a scientia: imo revera scientia est. Pars autem inferior, quae rei productionem spectat a scientia distinguitur. Unde fieri potest, ut quis habeat superiorem artis partem, videlicet scientiam v. g. theoriam Musicæ sine praxi; vel econtra praxin habeat seu partem artis inferiorem sine superiori; nempe theoria,

Urgebis

Urgebis. Objectum logicæ ne quidem necessarium est necessitate essentia; ergo logica non potest dici scientia. Antecedens probatur. Illud non est necessarium quoad essentiam, de quo dantur præcepta; frustra enim darentur præcepta de rebus necessariis, v. g. de cordis motu & similibus. Atqui dantur præcepta de objecto logicæ, videlicet de intellectu ad verum dirigendo; ergo objectum illud non est necessarium ne quidem necessitate essentia.

Resp. Neg. antec. ad probationem nego Majorem; præcepta enim, quæ de re aliqua conficienda traduntur, istius rei productionem & effectiorem, quæ contingens est, spectant, necessariam vero & immutabilem illius essentiam supponunt. Quod autem dicitur, frustra dari præcepta de rebus necessariis, distingo propositionem. Frustra dantur præcepta de rebus necessariis, in quantum necessaria sunt, concedo: quatenus sunt contingentes, nego. Sic de syllogismo dantur præcepta quoad ejus existentiam, seu quoad effectiorem, & quatenus a nobis pendet, ut fiat, vel non fiat. Sed minime de eo dantur præcepta quoad ipsius naturam, quæ necessaria est; a nobis enim non pendet, ut sint v. g. plures vel pauciores termini in syllogismo quam tres. Unde dum syllogismus male fit, non est syllogismus verus, sed tantum apparens.

Quod

Quod spectat ad motum cordis, a nobis plane non dependet ut fiat, vel non fiat. Quamvis si nimium sit inordinatus, quædam per artem medicam præscribi possint remedia, quibus ad justum modum redigatur, quemadmodum per Logicam regitur intellectus, & ipsius operationes, aut etiam reformatur.

Opponens secundo. Logica agit de fallaciis; ergo non est scientia.

Resp. dist. ant. Logica agit de fallaciis, ut fugiendis, concedo: ut approbandis nego ant. & consequentiam.

Oppon. tertio. Logica est ars; ergo non est scientia.

Resp. Conc. ant. dist. consequens, ergo non est scientia, sub eadem ratione, qua est ars, concedo conf. sub diversa ratione, nego consequens, & consequentiam. Logica igitur est scientia, quatenus aliquid circa suum objectum demonstrat; ars, vero quatenus ejusdem objecti sui productionem aut effectiorem per regulas certas dirigit.

36. Non minus controversitur an Logica sit practica, an vero speculativa. Mihi media placet sententia, qua Logicam rum speculativam tum practicam affirmo. Et quidem Logicam speculativam esse sic probatur: Speculatio est nihil aliud quam scientifica veritatis contemplatio; atqui Logica scientifice contemplatur veritatem & bonitatem suarum regula-

gularum; ergo est speculativa. Quod Logica etiam sit practica, sic potest ostendi: practis est executio regularum, earumque ad opus applicatio; sed Logica exequitur suas regulas, easque ad opus applicat v. g. ad faciendum syllogismum: ergo Logica est practica.

37. Ad hanc conclusionem rite intelligendam, notandum, duo esse distincta logicæ munia sive officia: unum, quo tradit regulas bene ratiocinandi, earumque bonitatem & necessitatem demonstrat, & vocatur *logica docens*; alterum logicæ officium est, regulas traditas exequi, & ad opus applicare, quæ *logica utens* dicitur. Logicam docentem dico *speculativam*; utentem vero *practicam* assero.

Ex his facile colligitur, quod logica docens & utens non sint diversi habitus, sed diversa tantum munia unius, ejusdemque habitus; videlicet logicæ.

§. V.

De utilitate & necessitate logicæ.

38. **L**ogicam ad omnes scientias acquirendas utilissimam esse farentur omnes. Quæstio solum est de illius necessitate, an scilicet sit *simpliciter & absolute* necessaria, ita ut sine illa cæteræ scientiæ addisci nequeant: quo modo navis dicitur necessaria ad mare trajiciendum. An vero sit tantum necessaria, ut

vocat

vocant *secundum quid*, ad melius nempe & facilius alias scientias comparandas, quemadmodum equus necessarius est ad longum iter faciendum.

Propositio IV.

39. **L**ogica artificialis non est simpliciter necessaria ad cæteras disciplinas acquirendas.

Probatur. Quod obtineri potest sola natura duce, ad illud logica artificialis absolute necessaria non est; atqui cæteræ disciplinæ sola natura duce possunt obtineri; nam mens nostra naturaliter cogitat, id est, definit, dividit ac demonstrat: alioqui regulas bonæ definitionis, divisionis & argumentationis nunquam didicisset. Hinc pueri olim Mathematicas disciplinas didicerunt, antequam logicæ præceptis essent informati. Ergo logica ad alias disciplinas non est absolute necessaria, sed tantum *secundum quid*.

Solvuntur objectiones.

40. **O**ppon. primo. Ad scientiam in statu perfecto acquirendam necessariæ sunt bonæ definitiones, divisiones, & argumentationes; sed sine logica artificiali nemo potest efficere bonas definitiones, divisiones & argumentationes; ergo sine logica artificiali nemo potest acquirere scientiam in statu perfecto.

Resp.

Resp. Negando minorem, nam bonæ definitiones, divisiones, & argumentationes fiunt etiam naturaliter, quæ quidem vis naturaliter definiendi &c. dici potest *logica naturalis*, eaque certe omnibus disciplinis omnino necessaria est; non tamen *logica artificialis*.

Probabis minorem. Nemo potest perfectas definitiones divisiones & argumentationes efficere sine scientia illa, quæ tradit regulas bonæ definitionis, divisionis & argumentationis: sed ea disciplina est *logica artificialis*; ergo sine *logica artificiali* nemo potest perfectas efficere definitiones, divisiones, & argumentationes. Major, in qua sola est difficultas, probatur. Sine regulis bonæ definitionis non potest bona fieri definitio; ergo neque sine scientia illa, quæ tradit regulas bonæ definitionis.

Resp. Negando Majorem, ad cujus probationem distinguo antecedens, non potest fieri bona definitio sine regulis bonæ definitionis vel *artificialiter*, vel *naturaliter* cognitis, concedo antecedens: semper *artificialiter* cognitis nego antecedens.

Instabis. Sine regulis *artificialiter* cognitis nemo poteritprehendere errores in ratiocinando irrepentes; ergo nec sine illis scientiam aliquam in statu perfecto acquirere.

Resp. dist. ant. Nemo potest errores ratiocinationisprehendere absque regulis *Logicæ*

gicæ artificialis æque facile, ac si foret ea scientia præditus, concedo ant. nemo potest errores istos ullo modo deprehendere, nego antecedens, & consequentiam. Fatendum igitur, illos, qui Logica artificiali destituti sunt, magno carere adjumento ad deprehendendos ratiocinationum errores, & ad disciplinas in statu perfecto acquirendas. Nihilominus tamen ad illas disciplinas absque hoc adjumento pervenire possunt, licet difficulter.

Quod si quis dicat, eum, qui Mathematicis aut aliis disciplinis studet, continuo præceptorum Logicæ naturalis usu Logicam artificialem sibi comparare, id equidem non diffiteor. Ex eo tamen colligere non licet, Logicam artificialem cæteris disciplinis ita necessariam esse, ut, qui eam non didicerit, ad cæteras disciplinas addiscendas sit ineptus; cum solius Logicæ naturalis auxilio voti compos fieri possit.

§. VI.

De Universali.

41. **N**omen *universalis* nihil aliud significat, quam *unum commune pluribus.*

Quintuplex illius modus vulgo in scholis statuitur. Primo modo aliquid dicitur universale in operando, quo sensu solus Deus

P. Andr. Gordon Phil. P. I.

H

est

est universalis, quia solus est causa & auctor rerum omnium, & omnia operatur in omnibus.

Secundo aliquid est universale *in representando*: ut conceptus aut idea v. g. circuli, quæ quidem ratione sui est singularis, quemlibet tamen circulum nobis exhibere potest.

Tertio, aliquid dicitur universale *in significando*, quod nempe multa significat ut vox *homo*, quæ quemlibet hominem significat.

Quarto, universale dicitur *in essendo* quod multis inest, ut humanitas multis hominibus inesse dicitur. Hoc universale metaphysicum vocant, quoniam abstracto nomine exprimitur.

Quinto, universale dicitur *in predicando*, quod scilicet de multis prædicatur, ut homo de Petro, Paulo &c. Hoc universale logicum appellari solet. His præmissis.

Propositio V.

42. **D**EUS est universalis in operando.

Probatur. Qui operatur in omni operante, est universalis in operando; atqui Deus operatur in omni operante; nihil enim absque auxilio Dei moliuntur creaturæ: ergo Deus est universalis in operando, sive in causando.

Propositio VI.

43. **C**ONCEPTUS aut ideæ sunt universales in representando.

Proba-

Probatur. Illud est universale in repræsentando, quod multa repræsentat; atqui ideæ, seu conceptus multa repræsentant, v. g. idea circuli quamvis in se singularis, omnes tamen circulos exhibet: ergo conceptus aut ideæ sunt universales in repræsentando.

Propositio VII.

44. **V**Oces sunt universales in significando.

Probatur. Quod multa significat est universale in significando; atqui voces multa significant, v. g. vox *homo* omnes homines, vox *circulus* omnes circulos: ergo voces sunt universales in significando.

Propositio VIII.

45. **U**Niversale in essendo & prædicando non existit in rebus, sive a parte rei, id est, ex parte rerum ipsarum.

Probatur. Universale in essendo & prædicando definitur natura una in multis, & apta, ut de iis univoce & divisim prædicetur; atqui talis natura non existit a parte rei. Natura enim humana (idem de cæteris sentiendum) non est una in Petro & in Paulo, ac reliquis individuis; cum natura Petri sit corpus ac mens Petri, quæ non sunt idem, ac corpus & mens Pauli; cumque Petrus dicitur homo, & Paulus homo, non idem homo

de utroque prædicatur, sed alius & alius. Ergo universale in essendo & prædicando non existit in rebus ipsis, sive a parte rerum ipsarum.

Respondent Scotistæ negando minorem, cujus probationem distinguunt. Natura humana non est una *numero* in Petro & Paulo, concedunt: non est eadem specie negant; est enim ejusdem speciei in Petro, Paulo, & cæteris.

Sed contra. Si natura non sit una *numero*, sed tantum una specie in Petro & Paulo, tunc non est una *unitate proprie dicta* & *formali* sed tantum una *unitate improprie dicta*, quæ potius *similitudo*, quam unitas est nominanda. Ut autem Scotistarum responsio valeret, natura humana deberet esse in Petro & Paulo unitate proprie dicta & formali. Quod ut clarius evadat, advertendum, duplicem hoc loco distinguendam esse unitatem, videlicet *unitatem proprie dictam* seu *formalem*, & *unitatem improprie dictam*, seu *fundamentalem*.

46. Unitas proprie dicta est unitas entitatis seu singularitatis, quæ nempe ad singularem entitatem pertinet, diciturque unitas *numerica*, quia ex ea repetita fit numerus. Vocatur etiam unitas *formalis*, quia est unitas proprie dicta secundum formam & ideam unitatis omnibus hominibus ingentam : ac defini-
niri

niri solet *indivisio rei in se*, & *divisio a qualibet alia re*.

Unitas fundamentalis non tam est unitas, quam fundamentum, cur multæ res eadem idea universali exhibeantur. Sive est convenientia aut *similitudo multorum inter se*, per quam eidem exemplari, vel ideæ congruunt. Hoc autem exemplar vel idea spectari potest aut in Deo, aut in nobis: potissimum tamen in Deo; res enim eatenus tantum veræ sunt, quatenus cum isto exemplari consentiunt: v. g. circulus est verus circulus, quia cum idea circuli congruit.

Hæc unitas fundamentalis vel generica dicitur vel specifica, quatenus convenit vel generari vel speciei, sive iis omnibus naturis, quæ vel genere vel specie inter se consentiunt. Itaque per eam unitatem omnes homines dicuntur *unum specie*; quia singuli cum eodem exemplari congruunt. Item omnia entia sive spiritualia sive corporea dicuntur *unum genere*, non quidem proximo sed remoto, quia res omnes sunt substantiæ, sive cum idea, aut exemplari substantiæ conveniunt. Quam autem impropria sit unitas, nemo non videt. His notatis ad objectiones progredimur.

Solvuntur Objectiones.

47. **O**ppon. primo. Universale in essendo & prædicando est natura una in mul-

H 2

tis;

tis ; sed natura v. g. humana est una in multis nempe in Petro & Paulo &c. Ergo natura humana est universalis in essendo & prædicando.

Resp. Distinguendo minorem, natura humana est una in multis unitate fundamentali & impropria, concedo ; unitate proprie dicta, sive formali, nego minorem & consequentiam.

Opponens secundo. Quæ una & eadem definitione explicantur, ea sunt unius & ejusdem naturæ ; atqui omnia ejusdem speciei individua una & eadem definitione explicantur ; ergo sunt unius & ejusdem naturæ.

Resp. dist. Maj. sunt unius & ejusdem naturæ, id est, similis naturæ, quatenus scilicet cum eadem idea consentiunt, concedo maj. id est eandem prorsus habent naturam, & unam unitate proprie dicta, nego majorem ; & concessa minore similiter distinguo consequens. Ergo sunt unius naturæ unitate similitudinis & impropria, concedo conf. Sunt unius naturæ unitate propria, nego consequens & consequentiam.

Instabis. Unitas specifica est unitas formalis & propria ; ergo quæ eadem definitione explicantur, sunt unius & ejusdem naturæ etiam unitate formali & propria.

Resp. dist. ant. unitas specifica in uno & eodem individuo spectata est unitas formalis

lis & propria, concedo: unitas specifica in multis individuis considerata est unitas proprie dicta, nego antecedens & consequentiam; in multis enim individuis non est unitas entitatis sed similitudinis tantum. v. g. Petrus & Paulus non sunt quid unum entitate, sed tantum similia, non unum.

Urgebis, unitas formalis est indivisio in se, & divisio a quolibet alio; sed unitas specifica est indivisio naturæ specificæ in se & divisio a qualibet alia natura: ergo unitas specifica est unitas formalis & proprie.

Resp. concessa maiore distinguendo minorem. Unitas specifica in uno & eodem individuo sumpta est indivisio naturæ specificæ in se, concedo: unitas specifica in multis individuis spectata est indivisio in se, nego minorem, & sic distincto consequente nego consequentiam.

Instabis. Si natura mente concepta sit una unitate entitatis, sequitur, illam esse singularem; sed falsum est consequens; ergo & antecedens.

Resp. distinguendo maj, sequitur naturam esse singularem quantum ad entitatem, concedo: quantum ad representationem, nego, maj, & sic distincta minore, consequentiam.

Instabis. Nulla est huiusmodi natura, quæ multa repræsentare potest, ergo hoc frustra asseritur.

-alug

H 4

Resp.

Resp. dist. ant. nulla est ejusmodi natura in rebus ipsis a parte rei concedo: nulla est in mente, nego antecedens & consequentiam; est enim idea generalis objectiva, quæ multa repræsentare potest.

48. *Opp. tertio.* Naturæ universales sunt objecta scientiarum; sed objecta scientiarum sunt a parte rei; ergo naturæ universales sunt a parte rei.

Resp. dist. majorem. Naturæ universales sunt objecta scientiarum, quatenus ea objecta per mentem sunt abstracta, concedo, quatenus ea objecta sunt in rebus ipsis, nego majorem. Similiter distinguo minorem. Objecta scientiarum sunt a parte rei, cum spectantur in rebus ipsis, concedo: cum spectantur ut abstracta per mentem, nego minorem, & consequentiam. Equidem objecta scientiarum in mente spectata dici possunt universalialia; sunt enim ideæ objectivæ, quæ multa singularia repræsentare possunt; v. g. idea circuli multos circulos exhibet. Si autem objecta scientiarum spectentur in rebus, sunt singularia, cum a rebus ipsis singularibus minime distinguantur.

Instabis. Non datur scientia de singularibus; ergo scientiarum objecta nequeunt esse singularia.

Resp. dist. ant. non datur scientia de singularibus.

gularibus, quantum ad existentiam spectatis, quia non existunt necessario, concedo: non datur scientia de singularibus, quantum ad existentiam spectatis, nego ant. & consequentiam; essentia enim rerum etiam singularium v. g. Petri aut Pauli est immutabilis. Cum ergo dicitur non dari scientiam de singularibus, id eo tantum sensu intelligendum est, quod scientia non spectet unum duntaxat singulare, sed omnibus communis sit; non vero quod de uno esse non possit.

Instabis. Si natura non sit universalis nisi per mentem abstracta, nil aliud est, quam idea vel conceptus.

Resp. distinguendo propositionem. Nil aliud est, quam idea objectiva, vel conceptus objectivus, concedo: nil aliud est, quam idea sive conceptus formalis nego; est enim natura universalis, objectum conceptum, non ipsa conceptio.

Inferes. Ergo non datur scientia realis de naturis universalibus. Prob. Consequentia. Scientia realis habet objectum reale; sed naturæ universales non sunt objectum reale, cum sint tantum in mente: ergo non datur scientia realis de naturis universalibus.

Resp. Negando illatum. Probationis maiorem distinguo. Scientia realis habet objectum mediatum & remotum reale, concedo: objectum habet immediatum & proximum reale, nego maiorem, & concessa minore, nego consequentiam. Objectum igitur proximum & immediatum alicujus disciplinæ etiam realis est tantum per mentem, cum sit idea objectiva, seu objectum mente conceptum; objectum tamen mediatum & remotum, ad quod realis scientia terminatur, reale est, videlicet res ipsa, quæ extra mentem existit.

§. VII.

De substantia.

49. **E**A, quæ de substantia scitu necessaria sunt, jam supra fuerunt adducta capite §. II. n. 25. &c. Hic igitur solum dicendum restat an Deus contineatur sub hac categoria, seu prædicamento: sive quod idem est, an Deus proprie & stricte dici possit substantia. Quare sit.

Propositio IX.

50. **D**eus continetur sub prædicamento substantiæ.

Prob.

Prob. Si nomen & ratio substantiæ sint Deo & creaturis communes, tunc Deus ponitur in prædicamento substantiæ, sicut creaturæ; sed nomen & ratio substantiæ est communis Deo & creaturis: ergo Deus recte ponitur, & contineri dicitur in prædicamento substantiæ. Major patet, minor probatur. Imprimis nomen *substantiæ* Deo & creaturis est commune; cum non solum Deus, verum etiam creaturæ recte dicantur substantiæ. Dein ratio substantiæ communis est; per substantiam enim omnes intelligunt *ens per se subsistens* nec alteri velut subiecto inhærens. Hod ipsum autem sic attribuitur Deo, ut rebus etiam creatis conveniat, ut per se notum est. Adeoque nomen & ratio substantiæ communis est Deo & rebus creatis; proindeque Deus & res creatæ sub prædicamento substantiæ univoce continentur.

Solvuntur Objectiones.

§ I. **O**pponens primo. Ens infinitum, & nullis terminis clausum sub nulla rerum classe seu categoria contineri potest; atqui Deus est ens infinitum nullis terminis clausum: ergo sub nulla categoria contineri potest.

Resp.

Resp. dist. maj. ens infinitum & nullis terminis *Logicis* clausum, sub nulla rerum classe continetur, concedo maj. ens infinitum, & nullis terminis *physicis* clausum sub nulla rerum classe continetur, nego maj. & distinguo minorem, Deus est ens infinitum nullisque terminis *physicis* clausum conced. minorem: nullis terminis *logicis* clausum, nego minorem, & consequentiam. Licet ergo Deus in genere entis & physice sit infinitus; logice tamen est finitus & certo genere, certa idea vel conceptu clausus. Neque hoc ullam dicit imperfectionem, sed magis perfectionem; arguit enim non esse vagum, indeterminatum & potentiale; sed certum determinatum, & actuale in Deo. Nec obest, quod Deus hoc modo contineatur sub genere, tanquam inferius sub superiore; nam ipsa superioritas non est physica, qualis est causæ respectu effectus; neque civilis, qualis est Domini respectu servi; sed est superioritas logica & universalitatis, quomodo superius semper imperfectius est, utpote minus completum, quam inferius; genus enim quo latius patet, & ad plura se extendit, eo minus completum est, magisque potentiale, quia per pauciores differentias contractum.

52. *Opponens secundo.* Tunc Deus non continetur sub prædicamento substantiæ, quando in ratione substantiæ non convenit univoce cum creaturis ; atqui Deus non convenit univoce cum creaturis , cum sit substantia seu ens a se, & independens, creaturæ vero sint substantiæ ab alio dependentes, nempe a Deo. Ergo Deus non convenit univoce cum creaturis in ratione substantiæ.


Resp. Conc. maj. neg. min. probationem distinguo. Deus est substantia a se & independens , creaturæ vero sunt substantiæ independentes , quatenus scilicet substantia per suas differentias contrahitur concedo : ut a suis differentiis abstrahit & præscindit , nego. Quod si igitur substantia generice consideretur, neque dependens est , neque independens.

53. *Opponens tertio.* Prima substantia, quæ omnes alias substantias excedit, non continetur sub categoria substantiæ ; atqui Deus est prima substantia ; ergo non continetur sub prædicamento seu categoria substantiæ.

Resp. dist. majorem. Prima substantia tam prioritate *physica*, sive existentia, & entita-

entitatis præeminentia ; quam. prioritate logica sive conceptus universalitate, conc. major. prima solum prioritate physica neg. major. & dist. minor. Deus est prima substantia prioritate physica, concedo minor. prioritate Logica, nego minorem & consequentiam. Hæc pro disputationis exercitio hic dicta sufficiant.

**Ut in omnibus glorificetur
DEUS.**



ME-

METAPHYSICÆ

PROOEMIUM.

Logicæ subjungimus Metaphysicam; tum propter utriusque disciplinæ connexionem, tum propter dignitatem objecti, quod a Metaphysica spectatur, quodque omnium disciplinarum Philosophicarum objecta longè antecedit. Metaphysica enim circa ens generatim, atque præcipue circa ens spirituale Deum nempe, Angelos, & animas rationales occupatur. Unde *Metaphysicæ* nomen exortum judicant multi, quod in ea tractentur res quasi supernaturales, id est, quæ superant naturam corpoream.

Metaphysica igitur est scientia entis generatim sumpti, & speciatim entis spiritualis. Quocirca illam distinguam in duò summa capita.

Primum continebit *Ontologiam*, sive scientiam entis in genere.

Secundum *Pneumatologiam*, id est, Spirituum notitiam breviter exhibebit.

CA-

CAPUT I.

Ontologiam exhibens.

ENtis notitia maxime universalis est, latissimeque pater, adeo ut omnes fere scientiæ ex ea dependeant, & principia sua generaliora inde desumant. Cum autem nostra conceptuum universalium notitia valde sit exigua, & potissimum imperfecta; ea duntaxat hoc capite proferam, quæ maxime necessaria sunt, & ad alias disciplinas proficua.

§. I.

De ente & modo entis, atque attributis utrique communibus.

N. I.

ENS dupliciter sumitur: aliquando pro participio præsentis temporis, & significat id, quod nunc, seu præsentis tempore existit: aliquando sumitur pro nomine, & significat rem, seu substantiam, quæ aut existit, aut existere potest. Ens hoc modo sumptum idem est ac res seu substantia.

2. *Modus entis, sive accidens, est dispositio seu affectio ipsius entis.* Cum autem duplicis generis sint entia, nimirum spiritualia & corporea, duplicis quoque generis sunt accidentia, seu modi entis, spirituales nempe ut per-

perceptio, desiderium, recordatio &c. vel corporei ut mensura, quies, motus, positura, figura.

3. Porro tam enti, quam modo entis competit *essentia, existentia, entitas, singularitas, potentia, actus* &c. De his igitur, aliisque nonnullis attributis, quæ huc pertinent, pauca dicam.

4. *Essentia* dicitur id, quod primum in re concipitur, sive id, quod respondetur ad questionem factam: *quid res sit*. Unde etiam *quidditas* in scholis nominari consuevit. *Natura* idem significat ac *essentia*, nempe quod primum in re concipitur.

5. *Existentia* est id, quo res acta existit: sive id quod respondetur ad questionem factam, *an res sit*.

6. *Entitas* est non tantum entis, sed & accidentis realitas.

7. *Singularitas* est id, quo res aliqua singularis & individua esse dicitur. Dicitur etiam *hæcitas*, quia res per singularitatem fit hæc, non alia. In Petro dicitur *Petreitas*.

8. *Potentia* hoc loco dicitur tantum facultas, seu capacitas aliquid recipiendi, vel patiendi. Unde *essentia* dicitur *potentia respectu existentia*: *genus respectu differentia*, &c.

9. *Actus* est rei perfectio, aut consummatio ut *existentia respectu essentia*: *differentia respectu generis*.

10. *Unitas*, quæ rei cuilibet convenit, sive
P. Andr. Gordon Phil. P. I. I quæ

quidem res omnis est una res) definitur *indivisio rei in se, & divisio a qualibet alia re.*

11. *Distinctio unitati opposita dicitur identitatis negatio; nam ea distinguuntur, quæ non sunt unum, & idem.*

12. Aliud tamen est, quædam esse *distincta*, quædam esse *divisa*, aliud esse *diversa*. Ea *divisa* sunt, quæ sunt separata: *diversa* vero sunt, quæ *diversas* habent naturas. Quæ igitur *distincta* sunt, ea non sunt semper *divisa*, ut duo globi *media distincta* sunt, non tamen *divisa*. Item *divisa* non sunt semper *diversa*: ut Petrus & Paulus sunt *divisi*, non tamen *diversi*. Petrus autem & Bucephalus sunt simul *distincti*, *divisi*, & *diversi*.

Distinctio duplicis est generis, altera distinctio rationis, altera distinctio realis.

13. *Distinctio rationis est ea, quæ a mente excogitatur in iis, quæ revera non sunt distincta. Rursusque duplex est: scilicet distinctio rationis ratiocinantis; & distinctio rationis ratiocinate.*

14. *Distinctio rationis ratiocinantis ea dicitur, quæ fit sine fundamento in re: qualis esse fingitur inter Marcum Tullium & Cicero-*
nem.

15. *Distinctio rationis ratiocinate dicitur ea, quæ fit cum aliquo fundamento in re: qualis intercedit inter misericordiam & justitiam Dei; hæ namque propter diversos effectus cum legitimo fundamento di-*
stin-

distinctis conceptibus & ideis percipiuntur.

16. Hæc distinctio rationis ratiocinatæ etiam virtualis appellatur, quod hujus beneficio una & eadem res multis virtute æquivalere concipiatur: v. g. justitia & misericordia Dei, etsi sint una & eadem res, nempe Deus ipse, duabus virtutibus distinctis æquivalent.

17. Distinctionem formalem statuit Scotus inter distinctionem rationis, & distinctionem realem, docetque eam esse, per quam quædam distinguuntur non ut alia, & alia *realitas*, sed ut alia & alia *formalitas*. Atque hoc modo distingui putat attributa divinam inter se, tum a Divina essentia. At inutilis est hæc distinctio formalis: sufficit virtualis, (N. 16.) cum hæc satis rem omnem explicet.

18. Gradus Metaphysici sunt plura ejusdem rei attributa, quorum unum continet alterum, & per quæ velut per gradus quosdam vel ascendendi potest ab individuo usque ad supremum genus; vel descendendi a supremo genere usque ad individuum. E. g. a substantia hoc modo descenditur ad individuum speciei humanæ: est *substantia*, est *vivens*, est *animal*, est *homo*, est *Petrus*. Ascensus vero fit hoc modo: Petrus est *homo*, homo est *animal*, animal est *vivens*, vivens est *substantia*.

19. Inter Gradus Metaphysicos (N. 18.)

sola distinctio rationis ratiocinatae sive virtualis (N. 15. 16.) est admittenda. Cum enim animalitatem hominis sive sentiendi principium sine rationalitate seu facultate discurrendi seorsim consideramus, aut rationalitatem absque animalitate, fit tantummodo duplex ejusdem rei videlicet hominis perceptio: & duæ ejusdem rei virtutes seu functiones distinctis attinguntur conceptibus.

20. Atque hinc objectiones opponi solitæ facili negotio solventur: respondendo quod una eademque simplex substantia duo vel plura exercent diversa munia; proindeque pluribus rebus vere distinctis æquivalet, sive sua virtute complectatur. Unde & propositiones contradictoriæ de uno eodemque subjecto sæpe sunt veræ; modo subjectum illud in diverso sumatur sensu. Ut si dico: punctum quoddam *est finis*, quatenus terminat unam lineam; & idem punctum *non est finis*, quatenus aliam lineam inchoat.

21. Distinctio realis est ea, qua multa actu, & nemine cogitante non sunt una & eadem res. Estque duplex, distinctio *realis major*, & distinctio *realis minor*.

22. *Distinctio realis major* est ea, quæ intercedit inter res, quæ vel actu separatæ sunt, vel saltem separari possunt. Eadem admittitur inter personas Sanctissimæ Trinitatis. Distinctio realis, qua duo tota distinguuntur,

ur, dicitur *adequata*: distinctio vero *inadequata* qua totum & pars distinguuntur.

23. *Distinctio realis minor* sive *modalis* est ea, quæ intercedit inter rem aliquam, & ejus modum v. g. inter digitum, & digiti inflexionem.

24. Quærent hic, an ens dicatur univoce de suis inferioribus, videlicet de Deo, & creaturis, de substantia & accidente &c. quod multi negant, ego autem affirmo ens convenire univoce omnibus suis inferioribus. Conceptus enim *entis* nihil aliud exprimit, quam aliquid actu existens, vel aptum ut existat, abstrahendo a modo & perfectione existendi; Hoc autem univoce convenit omnibus substantiis tam creatis, quam Increatæ, tam respectivis, quam absolutis; cum hæc omnia revera existant.

25. Neque obstat, quod Deus existat modo perfectissimo, sitque ipsum esse plenissimum & infinitum; creaturæ vero non nisi finitum & participatum habeant esse: *ens* enim non exprimit modum & differentiam essendi, sed tantum esse in genere, sive illud esse sit finitum, sive infinitum: participatum, aut imparticipatum. Nam hæ sunt entis differentiæ, vide Logic. cap. IV. §. VII. N. 50.

26. Porro cum notio entis sit primum, quod in re ignota apprehendimus, & *ens* sit primum nomen, quod rei ignotæ attribui-
mus, proindeque sit primum cognitum, ali-

qui hic fufe tractant principia cognitionis. Ego breviter de illis dicam.

27. Principium igitur cognitionis est *id*, *cujus cognitio facile ducit in alterius cognitionem*. Estque vel simplex vel compositum. Simplex est aliquid simplici apprehensione (Log. proëm.) cognitum, quod in cognitionem alterius ducit, cujusmodi sunt signa rerum, ideæ (Log. cap. I. §. I. N. 1.) nempe & termini (Log. cap. I. §. III. N. 62.); hi namque ducunt in cognitionem rei significatæ. Principium cognitionis est propositio manifesta, ex qua facile innotescit alia: qualis est hæc: *omne totum est majus sua parte*, ex qua facillime deducitur, quod domus major sit, quam maximus lapis illam componens.

28. Ut autem propositio mereatur nomen primi principii, adeo clara & nota esse debet, ut probatione non indigeat, sed mediocri tantum attentione; unde a nonnullis *propositiones per se notæ* dicuntur. Melius tamen a Philosophis communiter *prima principia*: in Jurisprudencia vero *axiomata*: in Medicina *dignitates*: in practicis *maximæ* appellantur.

29. Cum vero multæ sint hujusmodi propositiones, seu principia, quæ probatione non egent, & quorum ita sumus conscii, ut de illorum veritate serio dubitare non possimus, solícite hic indagari solet, quodnam ex omnibus

bus sit primum tum firmitate, tum certitudine, tum evidentia, tum officio, ita, ut ex eo cætera cuncta profluant; illud ex nullo.

30. Mihi probabilius videtur, primum omnium principium, & in quod cætera omnia saltem indirecte resolvuntur, esse illud vulgatum: *impossibile est idem esse & non esse.* Hoc enim est evidentissimum, omniumque primum: nam qui negat alia manifestè vera, eo tandem adigitur, ut admittat *idem simul esse & non esse.* Hæc de principiis cognitionis.

§. II.

De attributis soli enti seu substantiæ propriis, & præcipue de causis.

31. **S**UBSTANTIA, sive res est *id, quod per se subsistit*, sive est ens: nam quod per se non subsistit, non est ens, sed modus entis.

Substantia vel spiritualis est, vel corporea, vel mixta, nempe compositum ex mente & corpore, ut homo (Log. cap. I. §. I. N. 26.)

32. Rursus substantia vel completa est, & vocatur totum, ut homo: vel est incompleta & dicitur pars, ut manus, pes, &c.

33. Si substantia completa sit, vel est completa in ratione *naturæ*, seu *essentiæ*, ut corpus humanum, & anima rationalis naturam seu

essentiam humanam complent: vel est completa in ratione suppositi aut personæ, & istud complementum *subsistentia*, vel *hypostasis* vocatur.

34. Subsistentia igitur seu hypostasis est ultimum substantiæ complementum eam reddens incommunicabilem alteri tanquam supposito, adeo ut ipsa sit principium totum & integrum suarum functionum, aut operationum, si quas habeat.

35. Suppositum est substantia singularis ultimo completa, quæ nempe est principium totum & integrum suarum operationum.

36. Persona est suppositum mentis particeps. Hinc omnis persona est suppositum; at non omne suppositum est persona. Arbor enim est suppositum, non tamen est persona. Socrates autem est suppositum & persona; at tamen nec sola mens Socratis, neque solum corpus persona dici potest, quia neutrum est totum & integrum operationum Socratis principium; corpus igitur & mens simul ad suppositum constituendum requiruntur.

37. In Christo Domino corpus & mens non sunt suppositum seu persona, sed hypostatice seu personaliter uniuntur verbo Divino. Neque operationes Christi a sola natura humana, sed a verbo simul & a natura humana sunt oriundæ, unde *Theandrice*, hoc est, Divino-humanæ nominantur. In Christo igitur duæ sunt naturæ, scilicet Divina & huma-

humana; sed unica tantum persona, seu suppositum, aut principium totum & integrum operationum Christi. Verum hæc ad Theologos.

38. Substantia singularis sive sit pars, sive totum, vocatur & est subiectum accidentium seu modorum.

39. Subiectum autem triplicis est generis, scilicet subiectum inhesionis, denominationis, & informationis.

40. Subiectum inhesionis est illud, cui inhaeret accidens, ut digitus est subiectum inflexionis: mens est subiectum recordationis.

41. Subiectum denominationis est illud, quod ab aliqua forma, seu perfectione, vel defectu, vel actione, aut affectione denominatur: ut homo denominatur Philosophus a Philosophia. Denominatio enim est totius suppositi.

42. Subiectum denique informationis est illud, in quo recipitur aliqua forma substantialis aut essentialis, a qua informatur ad constituendum aliquod totum physicum: v. g. corpus humanum dicitur subiectum informationis respectu animæ rationalis.

Præterea ex substantiis aliæ sunt cause, aliæ effectus. Quare hic breviter agendum.

§. III.

De Causis.

43. **C**Ausarum notitia maxime utilis est, & delectabilis; unde Poëta hujus vitæ felicitatem in illarum cognitione constituens ita canit:

Felix qui potuit rerum cognoscere causas.

Verum de causis particularibus hoc Poëtæ dictum intelligendum venit, non de generali causarum notitia, quam hic breviter expono.

44. In sensu quidem stricto nihil meretur nomen causæ, quam causa efficiens; unde quod causatur, effectus dicitur: latius tamen sumitur causa pro omni eo, quod juvat ad producendum effectum. Hoc cum multipliciter fieri possit; multiplex etiam est causa.

45. Species causarum præcipuè communiter recensentur quatuor, *materialis* nempe, *formalis*, *finalis*; & *efficiens*.

46. Causa materialis est *corpus*, sive *materia*, ex qua effectus producitur, ut ligna, & lapides sunt causa materialis ipsius domus.

47. Causa formalis est, quæ rem aliquam determinat ad certam speciem. In rebus autem corporeis nihil aliud est, quam *artificiosa dispositio*, quæ in materiam introducitur, illamque determinat ad certam speciem, qualis

lis est forma domus ex ligno, & lapidibus compositæ. Hæc vocatur *formalis intrinseca*, quia remanet in re, cujus est forma. Alia est causa *formalis extrinseca* sive *idealis*, quam res imitatur, sive ad quam respiciens artifex operatur.

48. Causa finalis sive finis est *id, cujus gratia fit aliquid*: vel est motivum operandi; varieque dividitur, ut in Ethica dicam, ubi plura de fine.

49. Causa efficiens est *id, a quo omnis actio, & actionis terminus, nempe effectus dimanat*.

50. Prima illius divisio est in causam efficientem *Primam & Secundam*. Causa prima est, quæ nullam se priorem habet causam, quæve mediante causa secunda producit effectum: cujusmodi est solus Deus, de quo tamquam prima causa dicendum in Pneumatologia. Causa secunda est, quæ aliam causam se priorem agnoscit; cujusmodi sunt omnes res creatæ.

51. Secunda efficientis causæ divisio est in *universalem, & particularem*. Causa universalis seu communis est ea, quæ multos producit effectus specie diversos, ut Sol omnis generis plantas. Particularis est, quæ unam tantum effectus speciem profert: ut ignis ignem.

52. Tertio dividitur in *univocam & equivocam*. Causa univoca est, quæ habet effectum
in

in specie sibi similem, ut equus generat equum. *Æquivoca* est, cujus effectus est alterius speciei, ut sol respectu plantarum.

53. Quarto in *totalem* Sive *adequatam*, & in *partialem* sive *inadequatam*. *Causa totalis* sola totum producit effectum, ut ignis ignem. *Partialis* alterius indiget societate, ut cum duo equi eundem trahunt currum, illorum unus est tantum *partialis* causa hujus tractionis.

54. Quinto in *principalem*, & *instrumentalem*. *Principalis* est, quæ instrumentum ad agendum applicat. *Causa instrumentalis* est ipsum instrumentum, vi cujus producit effectus; sic dum homo fecit lignum, ipse homo est *principalis*, *serra* vero *instrumentalis* causa sectionis.

55. Sexto in *proximam*, & *remotam*. *Causa proxima* ea est, quæ immediate attingit effectum; unde & *immediata* dicitur. *Causa remota*, quæ & *mediata* vocatur, est ea, quæ mediante alia causa, producit effectum: ut avus mediante filio proprio producit nepotem.

56. Septimo in *liberam*, & *necessariam*. *Causa libera* est ea, quæ agit consilio & electione, atque actioni suæ ita dominatur, ut illam pro lubitu ponere possit vel non ponere. *Necessaria* est, quæ solo naturæ impetu agit, ut ignis in materia igni apta rite disposita necessario producit ignem.

57. Octa-

57. Octavo in *physicam*, & *moralem*. *Causa physica* est, quæ actione reali & physica influit in effectum: *moralis*, quæ moraliter. e. g. Petrus suadet Paulo, ut occidat Joannem; Petrus est causa moralis, Paulus vero est causa physica homicidii perpetrati.

58. Porro varii sunt modi, quibus causa moralis influit in effectum, atque memoriae causa sequenti carmine continentur:

Jussio, consilium, consensus, junge recursum,

Participans, reticens, non obstands, non manifestans.

Primus modus fit jubendo, mandando alii ad aliquid agendum. Secundus modus, cum quis alteri consilium suppeditat, quomodo factum perficiat, & effectum producere possit. Tertius modus est *consensus*, cum quis vel expresse consentiendo, aut laudando agentem ad operandum excitat: vel consensu tacito & indirecto, id est, conniventia, blanditiis, aut adulatione. Quartus modus est *recursus*, dum refugium, patrocinium, receptio, aut defensio præstatur. Quintus modus est *participatio*, cum quis participat, vel participare intendit effectum vel ejus commodum. Sextus modus est *reticentia*, quando actus non defertur ad eum, qui futurum impedire potest, aut vindicare præteritum.

tum. Septimus modus est, cum quis actui non obstat, qui absque suo periculo resistere & obstaré potest. Octavus coincidit cum sexto.

59. Nono in *potentialem*, & *actualem*. Potentialis causa est ea, quæ tantum vim habet, & potentiam ad effectum producendum; & dicitur *causa in actu primo*. Actualis est nihil aliud quam exercitium causæ: dicitur quoque *causalitas*, & *causa in actu secundo*.

60. Tandem dividitur causa in *causam per se*, & *causam per accidens*. Causa per se dicitur ea, quæ naturalem habet cum effectum suo connexionem, cujusmodi sunt omnes causæ præfatæ. Causa per accidens illa est, ex qua effectus præter expectationem sequitur: cujusmodi sunt casus & fortuna. Differunt autem casus & fortuna in hoc, quod fortuna proprie locum habeat in causis liberis, casus vero in necessariis, sive naturalibus: dum enim causa naturalis deficit a fine, atque ad effectum nullatenus intentum deflectit, *casus* dicitur; ut dum effusa imbrium copia, intumescunt flumina, agrosque & vicinas domos devastant: finis enim pluvix est humectatio terræ, non agrorum vel domuum ruina. Dum vero causæ liberæ, ut sunt homines deficiunt a fine proposito, & impingunt in alium, sive bonum, sive malum, dicitur *fortuna*, ut cum aliquis inimicum fugiens, & sylvarum tenebras quærens in latrones incidit,

&

& ab illis spoliatur vel occiditur. Interdum fortuna & casus tribuuntur effectui a se relicto, ut dum paulo abhinc magna Erfordix pars conflagravit, dicitur funestus accidisse casus in Thuringia.

61. Plures circa causas agitari solent quæstiones, quarum pleræque aut valent operæ pretium, aut in aliis scientiis pertractari solent. Talis est, quod causæ secundæ vere agant, & aliarum rerum sint effectrices. Hæc enim quæstio multis scripturæ locis evidenter probatur, in quibus actio causis secundis tribuitur: cujusmodi est illud Gen. 1. *Germinet terra herbam virentem facientem semen;* atque infinita prope similia, quibus suffragatur ratio; cum & ignem calefacere, & solem illuminare; & arbores fructus effundere, & animalia ex similibus procreari, & corpora ab aliis moveri nemo inficari possit, nisi omnem experientiam & sensuum testimonia contemnat.

Et sane nihil mihi notius esse potest, quam me cognoscere, dubitare, amare, & alios actus vitales exercere, qui aliunde oriri non possunt, quam a principio virali, & activo. Ergo non solum causa prima sed & secundæ vere agunt.

Nec tantam rerum varietatem producit Deus, ut otiosæ essent & omnino cessarent, cum hujus universi perfectio mutua rerum actione contineatur; atque ut Deus rebus

bus

bus creatis id tribuit, ut Divinæ essentiaē similitudinem acciperent, illud quoque iis benigne impertiit, ut ejus vim activam pro suo quæque modulo participarent. Quin illud potuerit, nullus est dubitandi locus: quod autem voluerit, infinita illius, & in res omnes diffusa bonitas omnino persuadet.

62. Nec obstat, quod motus omnis a Deo proveniat. Ab eo enim provenit motus omnis tanquam a causa prima, & omnium principe, non vero ut a causa proxima. Quæ in contrarium afferri solent, nil aliud evincunt, nisi quod corpora in seipsis non habeant primum sui motus principium, sed quod certis legibus ab Authore naturæ moveantur, quod ultro fateor. Nullatenus tamen evincitur, causas naturales agi duntaxat, non agere, nec vim ullam motus effectricem & actuosam ab Authore naturæ accepisse.

63. Non minus controversi hic solet, an animalia bruta vere & proprie agant propter finem. Ubi potissima litis pars in ambiguo quorundam vocabulorum sensu versatur. Quodsi enim vere ac realiter agere propter finem nihil aliud sit, quam finis bonitatem percipere, objecti convenientiam cum appetitu, necnon mediorum ad finem consequendum idoneorum proportionem cognoscere, apta præ ineptis, meliora præ bonis eligere omnem conatum ad finem consequendum adhibere, illoque obtento quiescere; non

non video, cur belluis vere propter finem agere non competat. Cum prædicta omnia in brutis præsertim perfectioribus observare liceat.

64. Frustra vero a quibusdam opponitur, quod belluæ non possent agere propter finem ex defectu libertatis, quæ in brutis utpote meriti & demeriti incapacibus non reperitur. Nam bruta utique gaudent libertate naturali, vi cujus v. g. equus aquam propositam bibere potest, aut non. Juxta hanc libertatem & sua belluis competunt merita. Sic equus, qui veloci cursu heri vitam liberavit, plus utique meretur alimenti, quam alius, qui tardo gressu herum suum hostium permisit arbitrio. Verum his missis ad alia.

CAPUT II.

Pneumatologiam exhibens.

CUM omnis ferme nostra cognitio mediantibus sensibus acquiratur; spiritus vero minime sub sensus cadant; exigua & plerumque incerta solet esse nostra de spiritibus notitia. Ego itaque certiora dumtaxat proferam, idque potissimum de Deo & mente humana.

§. I.

De Deo.

N. I.

DEi nomine intelligimus ens ab æterno summam in se, & a se habens perfectionem & beatitudinem, a quo tanquam a primo principio cætera cuncta procedunt, atque dependent.

2. Quamvis autem entis hujus perfectissimi & optimi aliqualis notitia hominibus ab ipsa natura sit indita; hanc tamen cognitionem gentes nonnullæ cæcum corruptæ naturæ ductum sequentes, & brutorum instar voluptatibus deditæ in seipsis haud parum opprimunt. Imo inter homines magis excultos eo impietatis & obstinaciæ perveniunt aliqui, ut etiam Deum non esse contendant, ne illum impietatis ultorem, & scelerum suorum vindicem timere cogantur. Hi vocari solent *Athei* id est *sine Deo*. Verum insigne Divinitatis testimonium est; quod non nisi impiissimi hominum illam negare audeant, & cum illius confessione omnem virtutem, & humanitatem exuant. Contra hos existentia Dei variis argumentis efficacissimis tum metaphysicis, tum physicis, tum moralibus demonstrari solet. Ego unicum duntaxat ex quovis genere proponam argumentum, sed fortissimum,

Existen-

Existentia Dei argumento metaphysico demonstratur.

3. **Q**uod non potest non esse, illud dicimus ens necessarium : quod vero potest non esse, ens contingens appellamus.

4. Omnia entia non possunt esse contingentia. Nam si omnia essent contingentia, tunc nulla foret ratio, cur entia modo existant. Ens enim contingens sive possibile sibi ipsi actualitatem dare nequit, multo minus aliis. Cum igitur evidens sit entia existere; non minus evidens est, existere ali- quod ens necessarium (N. 3. supra). Quid- quid autem est necessarium, illud quoque est æternum (Log. cap. I. §. II. N. 47.) quid- quid æternum est, non habet causam; quod non habet causam est a se; quod est a se, est Deus. (N. 1. ut supra.) Ens igitur necessa- rium est Deus; proindeque existit Deus.

Existentia Dei argumento physico de- monstratur.

5. **O**mnes causæ, quæ operari, & effectus producere in rerum natura observan- tur, (ut homo generat hominem, leo leo- nem, planta plantam) ex omnes ab aliqua causa debent adjuvari; cum fieri non pos- sit, ut solus homo alteri homini, vel leo leoni, cujus fabricam, vires, & organorum confor-

mationem penitus ignorat, existentiam largiatur. Ergo illæ causæ ab alia pendent, ut quidpiam operentur.

Jam vero illa, a qua dependent, vel a seipsa est, & operatur; proindeque erit prima, ac independens, quæ Deus est (cap. II. §. I. N. 1.) vel rursus operandi vim ab alia recipit; & tunc vel dabitur processus in infinitum, vel tandem sistendum erit in aliqua prima rerum omnium causa. Processus autem in infinitum dari non potest. Si enim nulla foret causa prima, nulla foret quoque causa secunda, nulla tertia, nulla ultima, sic nullus effectus fieret. v. g. nec homo generaret hominem, nec leo leonem, nec arbor arborem &c. quod omnino falsum est. Sistendum igitur in aliqua prima rerum omnium causa, quæ Deus dicitur, & est.

*Probatur Existentia Dei argumento
moralis.*

6. **Q**ui contra insitam omnibus ideam Deum existere inficiantur, vel in dubium revocant, ii salutem suam absque ulla emolumenti spe in apertissimum discrimen conjiciunt: nam si, ut ipsi stulte opinantur, nullus reipsa existat Deus, certe viri probi & fideles, qui Deum toto corde confitentur, nihil habent, quod timeant, cum ea confessio nocere post mortem nequeat. Sed si existat Deus,

Deus, ut naturalis sollicitudo eorum, quæ post mortem nobis obventura sunt; ut instinctus ille, quo in tribulationibus & angustiis manus & oculos ad cælum tanquam ad miserorum asylum attollimus: ut demum universa natura suadet, quæ alta, ut ita dicam, voce clamat, & suum ubique testatur Auctorem: quam horrendum supplicium atheos manet, qui veritati tam manifestæ ingratum ac perfidum pectus mentemque obstruxerunt. Ipsorum igitur prorsus deploranda est conditio, nisi ad seiplos & ad sanam mentem revertantur, & a prodigioso illo, immanique errore resipiscant.

7. Objiciunt contra hanc doctrinam Athei rem tanti momenti, ut est Deus, absque gravissimo fundamento non debere statui in rerum natura; si enim tantus tamque timendus Dominus & metuendus iudex hominum cervicibus imponeretur, pessime certe illorum libertati prospectum foret. Rationes autem, ajunt, quæ Dei existentiam probant, tametsi sint efficaces, non tamen convincunt; cum aliquo modo solvi possunt. Quapropter consultius iis videtur omnem negare Divinitatem.

Respondeo argumenta Divinam existentiam suadentia esse sane gravissima: nec ulla unquam veritas earum etiam rerum, quibus maxime confidimus, tot, tamque evidentibus ac validis argumentis stabiliri potest ac

Divina exiltentia. Quod autem Athei illorum vim & efficaciam non sentiant, nihil mirum, cum illis nil magis cordi sit, quam omnia motiva Divinitatis existentiam suadentia ab oculis, & animo amoliri, omniaque, quæ illorum obstinaciæ, impietati, ac perfidiæ tantisper favent, summopere extollant, & exaggerent. Certe homines probi & pii, quamvis minus valida forent, quam sunt hæc argumenta, iis libenter acquiescerent; Deus enim talibus minime videtur onerosus, prout calumniantur Athei, sed potius res convenientissima, quæ excogitari vel optari possit, proindeque dignissima, quam omnes boni cupiant, omnibusque votis & viribus amplectantur: nec tam metuendus est Deus ut formidabilis Dominus & iudex, quam amandus ut pater benignissimus & providentissimus. E contra homines pessimi & sceleratæ vitæ, ut sunt Athei, optimi Principis potestatem & censuram metuunt, ut rei iudicem quantumvis bonum reformidant. Quod si & illi ad meliorem frugem sese converterent, brevi sentirent, quam efficacibus rationibus & argumentis nitatur Dei existentia, illamque optarent esse, si per impossibile non esset.

8. *Secundo.* Si Deus, inquiunt, esset summe bonus, summæque perfectus, nulla prorsus admitteret mala. Vel enim tollere illa posset, & non vellet, sicque foret invidus, proindeque imperfectus. Vel mala imper-

dire

dire Deus nequireret: adeoque foret imbecillius, atque impotens. Imbecillitas autem æque ac invidia imperfectionem arguunt, nullumque ens esse perfectissimum demonstrant.

Respondeo: Deus mala tollere potest, at non vult. Non tamen inde sequitur, eum esse invidum; ex iis enim malis, quæ permittit Deus, majora semper redundant bona. Unde nil mirum, si Deus etiamsi optimus non omnia tollat mala.

Sed quidnam, inquiunt, boni exinde sequi potest, quod tot hominum millia æternis erebi flammis in desperatione perpetua crucientur?

Respondeo, hoc exinde bonum provenire, quod Deus manifestet suam justitiam, impiorum delicta justis afficiendo pœnis.

9. *Tertio.* Nemo, inquiunt, prudens injuriam sibi a subditis suis irrogari patitur, quemadmodum Deo a blasphemis, & impiis quotidie inferri cernimus. Deus igitur imprudentiæ erit arguendus: ac proinde nullus (N. 1. superius hoc. cap.)

Respondeo, minime imprudentis esse injuriam pati, quæ nullo modo patienti noceat, sed suo tempore profutura sit. Imo cum homo ex conditione suæ naturæ sit liber libertate defectiva; maxime congruum est, ut sibi paulisper permittatur, suæque fruatur libertate, quamvis illa interdum abutatur in

Dei contemptum, Siquidem contemptus ille minime nocet Deo; sed debito tempore punitus justitiam Divinam commendabit.

10. *Quarto.* Si esset Deus summe justus, perfecta Justitia regeret mundum sibi subditum; adeoque boni & virtute præditi abundarent bonis & divitiis, mali autem afflictionibus & miseriis opprimerentur. Verum sæpe sæpius contrarium experimur, cum piissimi etiam homines maximis obnoxii sint miseriis; homines vero sceleratissimi ducant in bonis dies suos, & probis pro lubitu dominantur.

Respondeo bonos in hoc sæculo relinquit Deus in miseriis, ut illorum patientiam in altera, & beata vita remunerari possit; sceleratis vero magnas divitias felicitatemque tribuit, ne illis ulla bene agendi occasio desit, utque nullus excusationi locus supersit, quod virtute neglecta vitam sceleratam duxerint.

11. *Quinto.* Si Deus esset ens perfectissimum, suo cultui melius provideret, totque religiones contrarias & erroneas, quot experimur, non admitteret.

Respondeo, quod Deus cultui sufficienter provideat per lumen rationis naturale, quod ad Deum agnoscendum & amandum continuo nos admonet: tum per specialem instructionem, quam protoparentibus commisit
postea

posteris tradendam. Hanc sæpius languentem restauravit per suos Prophetas, aliosque ministros in hunc finem electos. Præprimis suo cultui providit Deus, dum ipsum filium suum unigenitum misit, ut humanum genus redimeret, atque ab erroribus & viis suis pessimis revocaret, omnesque unicam & veram religionem doceret. Ex quibus omnibus manifeste patet, quod in Deo nulla sit nec minima negligentiae nota. Sola vero errorum causa in cultu Divino est hominum malitia, qui libertate sua abutentes nolunt amplius regi spiritu veritatis & unitatis, sed alii seducunt & trahunt discipulos perversitatis post se, alii vero trahuntur, & seducuntur. Unde tantum colligitur, quod Deus relinquat hominem *in manu consilii sui*, sive in libertate; minime vero quod Deus genus humanum negligat, aut non curet.

Alia argumenta contra Divinam existentiam ab Atheis proponi solita æque sunt debilia, quam solutu facilia.

S. II.

De Attributis Dei.

12. **A**tributa sive proprietates sunt perfectiones quædam, quæ ex imperfecto nostro concipiendi modo naturam consequuntur. Sic quia Deum ut ens perfectissimum concipimus, sequitur, illum esse bonum,

num, justum, immensum, æternum &c. *Bonitas* ergo, *Justitia*, *Immensitas*, *Æternitas* & similia prædicata *Attributa Divina* nominantur.

13. *Attributum* illud quod omnium primo concipitur, & ex quo cætera omnia velut e radice promanant, dicitur *constitutivum Divinæ naturæ*, aut *essentiæ*: & in eo *natura Divina* metaphysice consistere dicitur.

14. *Constitutivum Dei* est *ens perfectissimum*. Nam hoc solum claram & distinctam illius notionem exprimit, eumque ab omni alio ente sic distinguit, ut omnia quæcunque noyimus ipsius attributa in eo contineri clarissime & facillime intelligantur. Cum enim dicitur *ens perfectissimum*, recte intelligitur esse *ens a se*, *ens necessarium*, *summe bonum*, *summe sapiens*, *omnipotens*, *æternum* &c. Cum vero dicitur *ens a se*, vel *necessario existens*, non tam facile reliqua omnia Dei attributa percipiuntur; non enim per eam definitionem sese menti statim offerunt ipsius *bonitas*, *justitia*, *sapientia* &c. *Constitutivum* igitur *naturæ Divinæ* est *ens perfectissimum*.

15. *Unus* est tantum *Deus*. Cum enim *Deus* sit *ens perfectissimum*, debet esse *ens supremum*, seu omnibus aliis entibus antecellere: nam cæteris præstare & imperare est perfectio; adeoque nullum potest habere
ens

ens sibi æquale. Deinde si duo essent, aliquo certe inter se discrimine differrent; proindeque in uno extarent proprietates, seu perfectiones, quæ in alio desiderarentur; atque ita ambo omnimodam perfectionem non haberent. Enti autem perfectissimo nulla deesse potest perfectio. Restat igitur, ut unum Deum tantum adoremus.

16. Hæc tamen unitas naturæ Divinæ non officit Trinitati Personarum.

17. Deus est simplicissimus, spiritualis, immutabilis, summe verus, summe bonus, summe justus, misericors, infinitus, immensus, æternus &c. Hæc enim omnia ex eo profluunt, quod Deus sit ens perfectissimum.

Alia sunt Attributa, quæ majorem habent ad creaturas relationem, nempe scientia, voluntas, omnipotentia &c. de quibus seorsim agendum, & quidem

§. III.

De Scientia Dei.

18. **S**cientia Dei proprie nihil aliud est, quam Deus, quatenus seipsum, & alia a se percipit.

19. Duplici autem modo Deus alia a se percipit. Aut enim illorum duntaxat essentiam, modosque omnes, quibus fieri possunt, considerat, aut ipsorum existentiam intue-

tur.

tur. Essentiam quidem omnium rerum possibilium, modosque, quibus fieri possunt, intelligit Deus in ideis suis. Existentiam vero rerum videt in suis decretis. Nam ideo res existunt, vel extiterunt, vel existent, quia Deus existentiam illis tribuere decrevit.

20. Quod si agatur de liberis voluntatis creatæ motibus ; eos, si spectentur in statu naturæ innocentis, novit Deus in ipsius voluntatis creatæ determinatione, ad quam voluntas creatæ præmotione quidem indigebat generali, non tamen speciali, neque in ordine naturæ, neque in ordine gratiæ. Quod si actus liberi spectentur in statu naturæ per peccatum lapsæ, tunc vel boni sunt & supernaturales, ac eos videt Deus in decretis suis prædeterminantibus : vel naturæ vires non excedunt, aut etiam sunt mali, eosque Deus in futura voluntatis creatæ determinatione, quæ ipsi in æternitate præsens est, cui sola præmotione generali opus est, cognoscit. Verum de his postea.

21. Essentiæ igitur rerum omnium possibile in idea Divina tanquam in exemplari seu archetypo continentur: quæ idea seu archetypum est ipsamet natura Divina, quatenus *secundum aliquem modum à creaturis est participabilis*. Ut docet D. Thomas, eaque idea dirigit voluntatem Divinam in singularem rerum productione. Quamvis enim possit

possit res singulas producere, vel non producere, quoniam earum existentia, utpote possibilis tantum, & contingens, a libero ipsius decreto pendet. Si tamen eas producere velit, necessario secundum immutabilem, quam habet ideam, seu archetypum ipsas producit. Unde essentia rerum immutabilis est, æterna, & necessaria: quoniam ab immutabili, æterno & necessario archetypo pendet, non a libera Dei voluntate ut existentia, quæ tantum contingens est. Neque enim Deus efficere potest circulum quadratum, aut decernere, ut bis bina sint quinque; sed tantum velle potest circulum efficere vel non efficere, sive dare vel negare existentiam circulo, aut numero quaternario.

22. Archetypam hanc ideam, in qua Deus rerum omnium possibilium novit essentias, appellant Theologi *scientiam simplicis intelligentiæ*, & *scientiam necessariam*, quia liberam Divinæ voluntatis determinationem antecedit.

23. Postquam autem Deus ex infinitis rebus possibilibus, quas in ideis suis intelligit, aliquas producere decrevit, tum illas videt in suo decreto tanquam præsentem, seu æternitati suæ tanquam coexistentes, licet respectu nostri sint futura. Eaque scientia, qua Deus rerum existentiam cognoscit, & videt, dicitur a Theologis *scientia visionis*.

24. Hæc scientia visionis rursus dividitur in scientiam *approbationis* & *improbationis*. Dicitur scientia *approbationis*, cum ad ea fertur, quæ Deus ipse efficit; nam nihil odit Deus eorum, quæ fecit, ex Sap. II. v. 24. Scientia *improbationis* vero vocatur, cum ea spectat, quæ Deus permittit, non efficit, nempe mala.

25. Porro cum nulla necessitate agatur Deus ad res aliquas producendas, sed libere, & pro voluntatis suæ beneplacito eas producat; hinc sequitur, quæcunque præter Deum existunt, aut extiterunt, ea tantum contingenter existere, aut extitisse: quæcunque futura sunt, contingenter tantum, non necessario esse futura.

26. Futura autem illa contingentia duplicis sunt generis; alia enim absolute futura sunt, ut universale iudicium; alia futura sunt sub conditione tantum, a qua omnino pendent, ut vel eveniant, vel non eveniant. Ea-que conditio vel a Deo ipso, quatenus statum a se causarum naturalium ordinem, cum libet, abrumpit; vel a libera voluntatis creatæ determinatione repetitur.

27. Certum quidem est, ea, quæ absolute futura sunt, ad scientiam visionis pertinere. Sed de futuris conditionalibus, quæ non minus certo a Deo cognosci constat, quam futura absoluta, non consentiunt inter se Theologi. . Nam propter ejusmodi futura, non
nulli

nulli tertiam quandam in Deo scientiam ponunt, quam *mediam* vocant, scilicet inter *scientiam simplicis intelligentiæ*, & *scientiam visionis* constitutam. Ego vero cum aliis pluribus tertiam hanc scientiæ speciem superfluum puto, quod futurorum conditionalium notitia aut ad scientiam visionis, aut ad scientiam simplicis intelligentiæ sit revocanda. Etenim si agatur de futuris illis conditionatis, quorum conditio ex voluntate Divina causarum naturalium, cum libet, intervertente deducitur; illa videt Deus in naturæ legibus a se decretis per scientiam visionis, nisi inusitata potestate solitum rerum ordinem immutet. Sic futuram Ezechii mortem ab Isaia lib. 4. Reg. cap. 20. v. 1. prædictam in exhaustis effæti corporis viribus, tanquam in causa proxima cernebat, atque ita præscientiam habebat futuri conditionati nunquam eventuri, quod tamen eventurum fuisset, nisi ipse naturæ cursum mutare ab æterno decrevisset. Intercessit enim morti adventanti, ac vitam, & quindecim annorum inducias pio Regi indulxit.

28. Subversionem quoque Ninives a Jona Propheta prænuntiatam Jon. 3. v. 4. videbat Deus per scientiam visionis in civium peccatis ad cumulum fere perductis, de quibus vindictam erat sumpturus, nisi ipse speciali, gratuitoque beneficio eorum voluntates ad poenitentiam convertere ab æterno decre-

decrevisset. Quamquam hæc Jonæ comminatio ad Ninivitarum animos a prava vivendi ratione deterrendos potius, quam ad futurum prælagiendum erat comparata. Aliunde si credamus S. Augustino reipsa everfa fuit civitas Ninive, dummodo ad spirituales sensum attendamus; sic enim scribit in Ps. 50. v. 11. *Ego autem puto impletum esse, quod Propheta prædixerat: respice, quæ fuit Ninive, & vide quia everfa est: everfa in malo, edificata in bono.*

29. At si quæstio fit de futuris conditionatis, quæ libera vocantur, quorum nempe conditio sita est in libera creatæ voluntatis determinatione, quæ nunquam est ponenda, ea profecto nec a Deo prævidentur, nec ullo modo sunt futura, sed remanent in statu mere possibili, & ad scientiam simplicis intelligentiæ sunt referenda; nam illa futura non sunt, quibus non est ponenda conditio, sine qua non possunt evenire. Quod si futura non sunt, nulla est eorum veritas; nulla scientia, nulla præscientia. Deus enim per suam præscientiam, quæcunque futura sunt, tanquam præsentia & æternitati suæ coexistentia videt aut in decretis suis, aut in voluntatis creatæ determinatione. Hic autem agitur de futuris, quæ pendent a voluntatis creatæ determinatione nunquam futura, quam proinde in sua æternitate præsentem Deus non cernit. Proindeque scientia, quam
mediam

mediam vocant, quæque hujusmodi futurorum exploratrix dicitur, omnino est rejicienda.

30. Ad astruendam autem illam scientiam opponuntur loca quædam scripturæ, quæ facile solves, si adverteris, scripturam sacram a communi hominum loquendi ratione ut plurimum non recedere, nec parcere tropis & figuris, quibus uti solent scriptores profani, ut res paulo aliter quam verbis exprimunt, aliquando significant, v. g. cum ait Christus Luc. 19. v. 40. *Si hi tacuerint, nempe discipuli, lapides clamabunt.* Ibi nec falsitas est, nec mendacium, sed venustas & tropus, non prædictio futuri lapidum clamoris, etiamsi discipuli tacuissent. Quemadmodum pastor ille apud Virg. Eclog. 3. sic loquitur :

Et si non aliqua nocuisses, mortuus esses;

Exprobrabat alteri pastori malam voluntatem, non ad mortem sub conditione futuram animum intendit. Quædam igitur in libris sacris dicuntur futura etiam absolute, quæ tamen futura non sunt, scilicet ad proximam causarum secundarum dispositionem, propensionemve declarandam, vel etiam ad periculum aliquod indigitandum, ut imploretur Divina bonitas, & melior vivendi ratio ineatur, v. g. Lib. 4. Reg. cap. 20. Ezechiz dicitur : *morieris tu, & tamen ipsius vitæ fa-*

Etā est annōrum quindecim adjectio. Item Jon. 3. v. 4. hoc legitur vaticinium, *adhuc quadraginta dies & Ninive subvertetur*, quæ tamen subversa non est. Hæc igitur & alia id genus ad indicandum periculum, ad abjiciendam socordiam, suadendamque vitæ emendationem, & auxilii Divini implorationem, atque etiam ad causarum dispositionem patefaciendam potius, quam ad futurum prænunciandum sunt prolata.

31. Similiter cum ait Christus Matth. 11. v. 21. *Væ tibi Corozain, væ tibi Bethsaida, quia si in Tyro & Sidone factæ essent virtutes, quæ factæ sunt in vobis, olim in cilicio & cinere penitentiam egissent*: Scopus salvatoris non est prophetare, sed duritiem cordis Judæorum urbes illas incolentium objurgare. Ut si amico quidpiam neganti objicerem, id mihi ab ipso non concedi, quod vel ab inimicis obtinuissim. Quo loquendi modo nihil inter homines usitatus. Hoc igitur loco nihil prædicebat Christus, sed præsentem arguebat Judeorum incredulitatem, quos videbat ei gratiæ mensuræ resistere, cui præsentem quoque Tyriorum voluntatem cessuram noverat, ut docet S. Augustinus de dono perseverantiæ cap. 14.

32. Quod si quæras, quare apud Tyrios, & Sidonios non fuerint factæ virtutes, per quas ad penitentiam adduci potuissent: respondet S. Augustinus ibidem, *quia Dei altiore*

tiore iudicio, a perditionis massa non erant gratie prædestinatione discreti.

33. Cum David interrogat Dominum hoc modo lib. 1. Reg. cap. 23. v. 12. *Si tradent me viri Ceila? dixit Dominus, tradent.* Id non futuram proditionem, quæ nulla fuit, denotat, sed præsentem civium hujus urbis voluntatem, qua Davidem prodero meditabantur.

34. Item cum lib. 4. Reg. cap. 13. v. 18. & sequentibus Joas Elisei mandato percussit terram tribus vicibus, posteaque substitit; iratusque vir Dei dixit: *Si percussisses quinques aut sexies, sive septies, percussisses Syriam usque ad consumptionem, nunc autem tribus vicibus percuties eam.* In hoc nihil futuri attenditur; nihil quippe futurum erat, sed Propheta tantum innuit, Joam Regem, quo promptius, fidentius, & perseverantius viri Dei mandato obtemperasset, hoc frequentiores plenioresve meritorum fuisse de hostibus suis victorias reportare.

35. His igitur, & aliis, quæ allegari solent, locis non semper scientia futurorum conditionalium statuitur, sed aliquando tantum connexio, quæ inter rerum causas intercedit, v. g. inter meritum, & præmium, vel inter supplicium & peccatum, accomodatis usui communi locutionibus demonstratur.

Verum his missis, quorum uberior tractatio ad Theologos pertinet, gravissimam il-

lam de præscientia Dei cum libero hominis arbitrio conciliandæ quæstionem, quæ Philosophiæ limites non transgreditur, excutere placet.

36. Deus futura omnia novit, & prænovit. Quoniam omnia quæ fuerunt, sunt, aut erunt, tanquam præsentia seu existentia videt per omniscientiam, quæ una est ex perfectionibus Divinis, qua res omnes in æternitate sua Deus præsentem semper habet, easque quæcunque possunt ratione cognosci, sive in se ipso sive in illis perspicit, alioquin Deus non esset omniscius; proindeque nec ens summe perfectum.

37. Hæc tamen futurorum prævisio nullatenus lædit libertatem humanam. Quamvis enim Deus futura omnia certissime noverit, ac proinde omnia certe & determinate futura sint; nulla tamen liberis voluntatibus exinde vis infertur. Nam longe aliud est, quidquam certo ac determinate esse futurum, quam necessario futurum esse. Illud quippe necessario futurum dicitur, quod ita futurum est, ut non possit non esse futurum: illud autem certo ac determinate futurum dicitur, quod revera est futurum, licet possit non esse futurum. v. g. Certo nunc scribo, ac hæsterna die certo & determinate pronuntiari poterat me hodie esse scripturum; non tamen adeo necessario scribo, quin, si vellem, a scribendo non possem abstinere.

38. Porro duplex hoc loco distingui potest necessitas, absoluta nempe & hypothetica. Necessitas absoluta est ea, qua quidpiam in se absolute, & citra ullam hypothesein est tale, ut alio modo se habere non possit; quamdiu existit, v. g. homo sic constat ex mente & corpore, ut non possit ex his non constare. Necessitas hypothetica vocatur, quæ hypothesein quandam consequitur, sive qua quidpiam, facta quadam hypothesei, non potest alio modo esse, v. g. ex hypothesei quod curram, non possum non moveri.

39. At inquires, si quod determinate futurum est, posset non esse futurum, falli posset præscientia Divina, quod dici nequit.

Respondeo si, quod determinate futurum est, posset non esse futurum in sensu completo, & facta hypothesei, quod prævisum sit a Deo ut futurum, falli quidem posset præscientia Dei. At Divinam præscientiam falli posse non sequitur, si, quod determinate futurum est, posset non esse futurum in sensu tantum diviso & absolute. Quod igitur determinate futurum est, & a Deo prævisum ut futurum, non potest non evenire in sensu composito, & facta hypothesei, quod prævisum sit a Deo ut futurum; quia præscientia rei futuræ componi non potest eum negatione ipsius rei eventus: quemadmodum scientia, qua Petrum actu ambulantem video, cum negatione ambulationis Petri haud quaquam

componi potest. Sed quod certo ac determinate futurum est, quodque a Deo est prævisum, si absolute, & in sensu diviso, ac veluti seorsim a præscientia Divina spectetur, quandoque potest non evenire: quemadmodum etiam si videam Petrum ambulans, potest tamen Petrus ratione sui, & veluti a visione mea divisus non ambulare. Ut igitur cognitio nostra rebus ipsis, quas novimus, necessitatem non infert, sed eas prout in se sunt attingit, sic Dei prævisio, sive scientia visionis circa res futuras, eo modo, quo sunt futuræ, versatur: adeoque quæ libere futuræ sunt, eas novit Deus libere esse futuras, quia prius decrevit causis liberis sese ad agendum determinantibus conveniens auxilium præstare, ut libere operentur: item quæ necessario futuræ sunt, eas necessario eventuras esse videt, quoniam ita a se decretum intelligit. *Hæc de Scientia Divina.*

§. IV.

De voluntate Dei.

40. **C**UM Deus sit ens simplicissimum, nihil aliud est ipsius *intellectus*, quam essentia Divina, sive Deus ipse spectatus, quatenus intelligit: nihil aliud *voluntas*, nisi essentia Divina, prout vult. Quamobrem unica est in Deo voluntas, si proprie, atque, ut

ut res est, loqui velimus: sed propter angustias mentis nostræ multipliciter solet dividi.

41. Primo enim dividitur in voluntatem generalem, & voluntatem specialem.

Voluntas generalis Dei est ea, qua generalem quendam ordinem in rebus constituit, qui semper observatur, nisi speciales causæ obstant, v. g. statuit omnem motum in lineam rectam semper dirigi, nisi quæ circumstant corpora impedimento sint, quod quidem non raro evenire advertimus. Similiter creavit omnes homines propter seipsum; id enim ordo postulat: eosque proinde vult omnes ad se venire, & beatos fieri; sed illorum pravitas ipsius bonitati reluctatur. Hæc igitur voluntas non quidpiam singulare, aut ad pauca tantum pertinet, sed rebus omnibus indiscriminatim est communis.

Voluntas specialis seu particularis est ea, qua Deus quidpiam specialiter ac determinate constituit; eaque rursus dividitur in voluntatem beneplaciti, & in voluntatem signi.

42. Voluntas beneplaciti est ea, qua Deus placet, aliquid esse, v. g. vult voluntate beneplaciti mundum a se productum conservare; voluit Beatam virginem eligere, ut esset mater Christi Domini. Ubi notandum, nos duntaxat optare bonum ei rei vel personæ, quam amamus; at Deus amando creaturas,

ipsisque bonum volendo facit ipsum, seu bonum in illis producit.

43. Voluntas signi proprie non est in Deo, sed est extremum signum, quo Deus aliquid se velle significat. Signum autem voluntatis dicitur voluntas, ut affectus amoris dicitur amor.

44. Huiusmodi signum quintuplex recensetur, scilicet *prohibitio*, & *permissio* respectu mali, *preceptum*, *consilium*, & *operatio* respectu boni: unde versiculus:

Præcipit, & prohibet, permittit, consulit, implet.

45. Voluntas, quam nos *generalem* appellamus, a nonnullis *voluntas antecedens*, & *prima* dicitur: quam nos *specialem* vocamus, ab illis *voluntas consequens*, & *secunda* nominatur.

46. Ex huiusmodi voluntatum in Deo distinctione, quæ non a Deo ipso, sed a rebus externis & ab intelligentiæ nostræ imbecillitate repetitur, explicat S. Thomas 1. parte, quæst. 19. art. 6. ad 1. quomodo verum sit de Deo, quod habetur Ps. 113. v. 11. *omnia, quaecunque voluit, fecit*: & illud quod Apostolo dicitur 1. ad Timotheum 2. v. 4. *Omnes homines vult salvos fieri*, quamvis eorum plurimi salvi non fiant. Etenim vult Deus de se omnium salutem, scilicet voluntate Creatoris, voluntate prima, generali, & antecedente, non ve-

ro voluntate iudicis, voluntate secunda, speciali & consequente: sive Deus vult voluntate generali & antecedente omnes spectatos tantum ut homines a se procreatos salvari; id enim bonitati Dei maxime est consentaneum. Sed voluntate speciali & consequente vult quosdam homines consideratos cum peccato adjuncto, seu homines malos damnari, & penis, quas promeriti sunt, subijci; nam id postulat ipsius iustitia.

Affert S. Thomas exemplum iudicis, qui hominem spectatum ut hominem voluntate antecedente vult vivere, sed eundem spectatum ut homicidam voluntate consequente vult capite puniri.

Itaque quaecunque voluit Deus voluntate speciali, consequente, absoluta, & efficaci, fecit: non item quaecunque voluit voluntate generali, antecedente, conditionali, & inefficaci quia licet hæc vera sit voluntas, conditionibus tamen suspenditur.

S. V.

De Omnipotentia Dei.

47. **O**mnipotentia Dei proprie est vis seu potestas efficiendi, quidquid est possibile. Id autem omne est possibile, quod ordini seu sapientiæ & ideis Divinis non repugnat. Potestas illa seu vis agendi in Deo

L 5

non

non est res aliqua vel entitas ab ejus essentia, sapientia, & voluntate distincta.

Duplex tamen distingui solet Dei potentia: altera nimirum *absoluta*, altera *ordinaria*.

48. Potentia Dei *absoluta* est vis seu potestas Dei ad agendum aliquid præter vel contra consuetum rerum ordinem a se constitutum, ut cum aquas Jordanis convertit retrorsum.

Potentia *ordinaria* est vis agendi in Deo, secundum communem naturæ ordinem a se constitutum.

§. VI.

De Deo Creatore.

49. **C**UM Deus ab æterno omnium creaturarum possibilium essentias in suis ideis per scientiam simplicis intelligentiæ novit; (cap. II. §. III. Nn. 21. & 22.) certum quendam earum numerum secundum æternas & immutabiles ideas suas creare constituit. Atque ita primæ actio, quæ Deo ut primæ rerum causæ tribuitur, ipsa est creatio, qua rebus omnibus existentiam impertit: quæ actio vulgo definitur *productio rei ex nihilo*; sive ut loqui solent, productio tum ex nihilo sui tum ex nihilo subjecti: v. g. mens hominis a Deo producit tum ex nihilo

hilo fui, quoniam antequam producat, nihil est; tum ex nihilo subjecti, quia non fit ex aliquo præjacente subjecto, seu materia, instar lapidis vel arboris, vel aliarum rerum; quæ ex aliqua priori materia quotidie generantur.

50. Solus Deus est increatus. Cum sit ens necessarium (cap. II. §. I. N. 4.) & causa rerum omnium prima (cap. II. §. I. N. 5.)

51. Solus Deus creare potest. Quidquid enim est contingens, hoc nec sibi nec alteri dare potest esse (cap. II. §. I. N. 4.) proindeque nec creare. Præter Deum vero omnia entia sunt contingencia (cap. II. §. I. N. 4. & 15.) Solus igitur Deus creare potest.

Objectionibus contra hanc & præcedentem propositionem utpote solutu facillimis non immoramur.

§. VII.

De Deo conservante.

52. **A**ctio Dei, qua in principio creavit cælum & terram, qua dixit, fiat lux, cæteraque omnia, ex quibus universa hæc mundi compages constat, creatio dicitur, si consideretur primum momentum, quo hæc omnia cœperunt existere. Sed cum Divinæ volun-

voluntatis actus non statim transeat, sed permanentem habeat virtutem; hinc non ad primum duntaxat momentum referri debet, sed ad subsequenter etiam rerum durationem pertinet, tumque *conservatio* vocatur, qua Deus creaturas omnes in esse conservat, ac tamdiu conservabit, quamdiu decretum suum non revocaverit. Itaque conservatio est veluti *continuata quedam, & non interrupta creatio*. Sive potius est idem creationis actus, quatenus non primo, solum momento, sed subsequentibus etiam temporibus viget.

53. Hac Dei conservatione necessario indigent creaturæ omnes. Siquidem creaturæ non possunt in esse permanere sine continuata Dei creatione, id est, sine perseverante Dei voluntate eas in esse continendi: cum enim sint entia per participationem, nec existentiam habeant, nisi a voluntate Divina, ideo tantum esse cæperunt, quia Deus illas primum esse voluit (cap. II. §. III. N. 19.) cum dixit, *fiat lux, fiat firmamentum &c.* Proindeque tamdiu subsistent, quamdiu voluntas illa Divina seu potius Divinæ voluntatis actus perseverat, easque in esse tuetur.

54. Nec dicas, Opus artefactum sine artifice remanet: opus ergo naturale stare poterit citra perpetuum Auctoris sui influxum.

Respon-

Respondeo enim maximam esse disparitatem inter opus artefactum, & opus naturale; nam opus artefactum non habet *esse simpliciter* seu *totum esse* ab artifice, sed tantum *tale esse*, hoc est partium dispositionem; cum partes totius artefacti secundum entitatem prius existerent quam ab artifice disponerentur: nec ab artificis pendebant voluntate, ut existerent. At creaturæ totum esse a Deo acceperunt, suntque tantum entia per participationem, quæ ideo tantum existunt, quia sic Divinæ placet voluntati (cap. II. §. III. N. 19.)

§. VIII.

De Deo providente.

55. **Q**Uæcunque Deus initio condidit, ea perpetuo in omni statu & modo, quo existunt, conservat, ut modo dictum est: & proinde res plane omnes providentia sua regit, ac gubernat. Providentia vero nihil aliud est, nisi *eterna quædam dispositio*, & *ratio*, qua singula in suos fines *peculiares*, & *omnia simul in universalem finem*, nempe *ad Dei ipsius gloriam diriguntur*.

56. Diverso autem modo corpora & mentes in suos fines collineant. Mentis enim sua se libertate movent: corpora vero cum se movere nequeant, a Deo moveri ac determinari

minari debent secundum leges ab ipso præscriptas. Verum de his plura §. & Nn. sequentibus.

§. IX.

De Deo movente, & concurrente.

57. **U**T ad destinatos sibi fines perducantur creaturæ, quas condidit, & conservat Deus, *cujus providentia in sui dispositione non fallitur*, perpetuum ipsius auxilium desiderant, sine quo inefficaces prorsus forent, omnisque motus & actus expertes.

Sed cum duplicis sint generis creaturæ, spirituales, nempe & corporeæ, non eodem modo Deus in utrisque operatur. Etenim creaturæ spirituales vim agendi ab ipso accipere; corpora vero moveri tantum possunt, non se movere. Quare ut evitentur ambages, corpora seorsim spectanda sunt, tum ad mentes veniam. Sed prius definitiones sunt ponendæ.

58. Motionis seu præmotionis aut prædeterminationis nomine intelligitur prævius quidam actus, aut influxus unius rei vel causæ in aliam, quo hæc ad actum seu motum determinatur.

Motio quippe & præmotio, determinatio & prædeterminatio idem omnino significant; nam qui movet seu determinat, prius agit:

agit: qui prius agit, præmovet, seu prædeterminat: igitur qui movet, præmovet; qui determinat, prædeterminat.

59. Motio spectari potest vel respectu corporum, vel respectu spirituum.

Motio respectu corporum consideratur vel in Deo vel in causis secundis.

60. Motio corporum in Deo est continuata corporum creatio, seu conservatio corporis in diversis locis successive (cap. II. §. VII. N. 52.)

61. Motio corporum in causis secundis si-
ve spiritualibus, sive corporeis est actio cau-
sæ secundæ, per quam velut occasionem cor-
pora transferuntur a loco in locum, sive in
diversis locis successive conservantur: v. g.
occasione actus meæ voluntatis pars organi-
ca corporis in diversis successive locis conser-
vatur: occasione impulsione unius corpo-
ris aliud corpus a loco in locum transfertur,
aut alteri applicatur: ut ventorum impul-
sione navis impellitur & ad scopulum alli-
ditur.

62. Motio seu præmotio respectu spiri-
tuum spectatur similiter vel in Deo, vel in
causis secundis.

Præmotio spirituum spectata in Deo vel
generalis est, vel specialis.

63. Præmotio generalis est impressio, aut
inclinatio, seu propensio ab Auctore naturæ
spiritibus omnibus per creationem indita, &
per

per conservationem jugiter continuata, per quam in bonum, seu felicitatem generatim semper feruntur; & malum seu miseriam nunquam non averfantur, v. g. voluntas humana in quovis homine spectata miseriam generatim, quantum potest, refugit, & felicitatem generatim prosequitur; licet ipsam aliquando quæret in iis rebus, in quibus non est posita.

64. Præmotio seu prædeterminatio specialis dicitur, qua quædam causa secunda spiritalis ad actum aliquem specialem a Deo movetur aut excitatur: rursusque duplex est, physica nempe, vel moralis.

65. Præmotio physica specialis ea dicitur, qua causa secunda efficaciter & physice ad actum seu motum specialem a Deo determinatur: eaque considerari potest vel respectu intellectus vel respectu voluntatis.

66. Præmotio physica specialis respectu intellectus creati est illustratio intellectus, qua rerum speciebus a Deo informatur, resque ipsas percipit; non enim alia ratione moveri concipitur intellectus, ut postea patebit.

67. Præmotio physica specialis respectu voluntatis creatæ est actio Dei, qua voluntas creata ad bonum aliquod speciale applicatur, & consequenter a malo retrahitur; si-
ve est actio, qua Deus amorem boni alicujus determinati, & consequenter odium mali
oppo-

oppositi in voluntate, creata producit; non enim Deus aliter movet voluntatem creatam, quam in ea operando boni amorem, ex quo mali odium consequitur. Itaque cum voluntas creata satis determinetur ad bona ordinis naturalis per generalem in bonum universæ præmotionem, vi cujus ipsa voluntas per se in malum sub specie boni spectatum prorumpere potest sine speciali Dei determinatione, ut inferius explicabo; liquet præmotionem illam specialem Dei ad eos tantum actus pertinere, qui sunt ordinis supernaturalis; nec ipsam ullatenus a gratia victrici, & per se efficaci differre; Deus enim per gratiam suam in mente nostra circa verum bonum, & verum malum prius illustrata suavissimam delectationem physice & intrinsece producit, ac simul voluntatem nostram præter ordinem naturalem specialiter movet ad amorem ejus, quod imperat, & odium ejus, quod prohibet. Hac ratione intelligere licet, quod habetur Proverb. 21. v. 1. *Cor regis in manu Domini, quocunque voluerit, inclinabit illud.* Inclinet autem illud semper in bonum, nunquam vero in malum.

68. Præmotio moralis est excitatio quædam voluntatis creatæ facta secundum hominum morem & consuetudinem; nempe exterius alliciendo, blandiendo, terrendo, minitendo, aliave consimili ratione apud homines usurpata, quæ per se non vincit re-

sistentiam voluntatis creata, sed eam tantum excitat. Hac ratione Orator auditores movet, egenus prætereuntes fleat. Deus quidem aliquando movet voluntatem creatam hac ratione, ut postea dicam; causæ secundæ vero non possunt ipsam aliter movere.

69. Superest concursus, quem *simultaneum* vocant, quique vulgo definitur: cooperatio unius causæ cum alia ad eundem effectum producendum, ut cum duo bajuli simul lexicam ferunt. Non eo modo concurrit Deus cum voluntate creata, siquidem unus bajulus non est alteri bajulo subjectus nec ab eo pendet saltem quoad actionem; sed tantum ab illo adjuvatur, ut ambo simul eundem effectum producant; voluntas autem creata Deo subjecta est, & ab eo pendet ut operetur.

Si tamen concursus nomine intelligatur auxilium uni causæ ab alia præstitum secundum illius indigentiam, sive exigentiam; quemadmodum bajulo in terram sparsa, & sub onere anhelanti, opemque imploranti manum tendo, ut auxilio meo adjutus sese erigat: tum nihil obstat, quo minus Deus cum voluntate creata concurrere affirmetur, ut postea probabo. Sed singula sunt ordine pertractanda.

70. Deus corpora omnia physice movet, seu præmovet. Siquidem Deus motum omnem

omnem corporibus tribuit. . . Nam corpus quodlibet, siue crassum siue exiguum, si ratione sui & secundum ideam corporis omnibus hominibus innatam consideretur, omnis actus & motus est expers, nec moveri potest, nisi ab alio moveatur. . . Cumque in motibus & mobilibus progressum in infinitum ratio non admittat, (cap. II. §. I. N. 5.) primum aliquod movens admittere necesse est, a quo motus omnis initium ducatur, & in corpora transmittatur; siue ut clarius loquar, quod corpora successive in diversis locis conservet: non enim aliter corpora moverentur. Deus igitur corpora omnia physice movet & præmovet. . .

71. Hæc autem motio siue præmotio corporis a Deo facta non est actio a creatione & conservatione corporis distincta, ut ex dictis facile colligitur.

72. Deus intellectum creatum physice movet, ac præmovet. . . Nam movere intellectum est ipsum determinare ad intelligendum, seu percipiendum. Deus autem intellectum creatum determinat ad percipiendum, quatenus ipsum indefinenter illuminat; siue per seipsum solum absque causa occasionali; siue occasione motus spirituum animalium secundum legem, quam inter corpus & mentem tulit, ut occasione quorundam corporis motuum quasdam in mente perceptiones excitaret, & vice versa: non

enim intellectus creatus seipsum illuminat. Ergo Deus intellectum creatum physice movet & præmovet.

73. Deus voluntatem quoque creatam physice movet, & præmovet præmotione generali. Nam præmotio generalis est impressio seu inclinatio quædam voluntati creatæ ab Auctore naturæ per creationem indita, & per conservationem jugiter continuata, per quam voluntas ad bonum seu felicitatem generatim semper contendit: quæ quidem impressio non uni aut alteri substantiæ spirituali est propria, sed omnibus est communis. Deus autem hac motione voluntatem creatam movet & præmovet; nam creatura nihil habet a seipsa, & proinde cum hujusmodi nifus aut propensio in voluntate creata semper vigeat; necesse est, ut a Deo jugiter influente conservetur. Unde nisi voluntas creata impressionem illam alio deflecteret, seu potius sisteret, dum in bonis privatis, quæ apparentia tantum sunt, conquiescit, semper recti essent illius motus. Deus igitur voluntatem creatam physice movet, ac præmovet præmotione generali.

74. Deus etiam physice movet voluntatem humanam motione speciali per gratiam ad actus bonos, & supernaturales v. g. ad actus fidei, spei, & charitatis. Nam Deus ut ait Apostolus ad Phil. 2. v. 13. *Operatur in nobis & velle & perficere pro bona voluntate;*
hoc

hoc est, operatur in nobis supernaturalem boni amorem, facitque efficacissima sua gratia, ut sordescant nobis bona sensibilia, æternum vero & incommutabile bonum nos delectet. Hæc autem gratia gratuita est, & speciali Dei beneplacito datur. Unde præmittuntur ab Apostolo hæc verba: *cum metu & tremore vestram salutem operamini*; Siquidem cum de actibus præsertim supernaturalibus agitur, *non sufficientes sumus cogitare aliquid a nobis quasi ex nobis, sed sufficientia nostra ex Deo est.* 2. ad Cor. 3. v. 5. Ergo Deus movet etiam physice voluntatem humanam motione speciali per gratiam ad actus bonos & supernaturales.

75. Deus præterea movet voluntatem humanam motione speciali ac morali. Motio quippe moralis ea dicitur, qua una res aut causa ab alia re aut causa excitatur moraliter, id est, secundum morem & consuetudinem hominum, nempe blandiendo, minitando, exemplis externis provocando, aliisque modis similibus. (cap. II. §. IX. N. 68.) Deus autem hoc modo voluntatem humanam movet ac præmovet; nam modo justæ suæ vindictæ, modo misericordiæ exempla nobis ob oculos ponit, ut a vitiis nos retrahat, & ad virtutes nos extimulet: modo sacrorum verbi sui præconum ministerio ad meliorem vitæ rationem nos vocat, ut nemini ignotum est. Ergo Deus movet etiam ac præmo-

vet voluntatem humanam motione speciali & morali.

76. Deus item dici potest concurrere cum voluntate creata ad omnes & singulos illius actus. Deus enim cum voluntate creata in omnibus & singulis ipsius actibus secundum ipsius exigentiam cooperatur: siquidem ipsam non tantum singulis momentis *in esse simpliciter* conservat; sed etiam in *tali esse*, nempe in *esse operantis*, aut *volentis*. Ergo Deus cum voluntate creata in omnibus & singulis actibus concurrit.

Hic concursus Divinus a continuata rei creatione, seu conservatione distinguendus non videtur; cum nihil aliud sit, nisi continuata rei productio seu conservatio non tantum *in esse simpliciter*, sed etiam in *tali esse*, statu, aut modo, nempe in *esse operantis*, aut *volentis*, aut *aversantis*, idque secundum ipsius rei indigentiam, seu exigentiam; quod vulgari quoque Scholarum axioma significatur: *qui dat esse, dat consequentia ad esse*.

77. Porro concursus Divinus a concursu creato maxime discrepat; nam concursus creatus causam, quam adjuvat, in esse non continet, sed tantum ad eundem effectum cum ea operatur. Sic cum bajulus bajulo fert opem, neuter ab altero dependet, ut in esse agentis conservetur, sed sibi duntaxat mutuam præstant opem, ut aliquid simul efficiant. Deus autem per concursum suum causas

causas secundas in esse agentium conservat, hisque vim omnem, qua prædita sunt, largitur.

781 Opponitur primo contra doctrinam (N. 76. superius) propositam. Agentia corpora ut ignis, & alia ejusmodi vim habent agendi completam & integram. Ergo nullo indigent Dei concursu ad operandum.

Respondeo: Agentia corpora habent completam & integram agendi vim cum dependentia a prima causa; non vero citra hujusmodi dependentiam. Certum quippe est causam secundam non tantum in esse simpliciter, sed etiam in tali esse, nempe in esse agentis a Deo pendere, ut dictum est; ac proinde perpetuo illius auxilio indigere, ut operetur.

791 Opponitur secundo. Si Deus immediate concurreret, ad omnes actiones humanæ voluntatis, concurreret ad actum peccati, idque sciens, ac volens. Deus hoc modo non concurrat ad actum peccati: alioquin illius foret reus, utpote qui sciens ac volens ad id concurreret, quod malum est; quod Deo attribuire nefas est. Ergo Deus non concurrat immediate cum humana voluntate ad operandum.

Respondeo: concurreret Deus ad actum peccati materialiter sumptum, hoc est ad substantiam actus peccati, quæ non est quid di-

stinctum ab ipso agente & termino, aut objecto; non autem concurreret ad actum peccati *formaliter* sumptum hoc est, ad malitiam ipsius actus rectæ rationi pugnantis. Peccati vero reus ille tantum habetur, qui sciens ac volens concurrit ad actum peccati tanquam causa *particularis* ex propria electione & determinatione, non ille qui concurrit ut causa *universalis* per actionem a creatione & conservatione minime distinctam.

Igitur in actu peccati duo distingui debent, primum, id, quod dicitur *materiale peccati* scilicet ipsius actus substantia, quæ est aliquod physicum & reale, quamvis non sit entitas aut res ab agente & termino vel objecto distincta. Secundum id quod vocatur *formale peccati*, nempe malitia ipsius actus, quæ in eo consistit, quod quis in creatura contra rationem & ordinem conquiescat, nec in Deum, in quem tanquam ad finem ultimum dirigi debent omnes voluntatis nostræ motus & actus, contendat: v. g. actus superbix sive amor *inordinatus* propriæ excellentiæ considerari potest, vel quatenus est amor, vel quatenus est *inordinatus*, & hæret in creatura, primo modo spectatur *substantia* ipsius actus, quæ est quid reale ac physicum. Secundo modo spectatur illius *malitia*, quæ est privatio perfectionis, cum nempe hæreat in creatura, nec in Deum tendat. Similiter in occisione hominis potest actus substantia, seu occisio,

cisio, quæ physica est; deinde malitia actionis, qua quis contra rationem hæret in creatura, v. g. in vindicta; proindeque deficit, nec ad finem suum, qui est Deus, tendit; ut explicabo in Ethica.

Deus quidem ad materiale peccatum concurrit: cum sit universalis causa rerum omnium, resque omnes continuata quadam creatione conservet, non tantum in esse simpliciter, verum etiam in tali esse v. g. in esse amantis propriam excellentiam, vel in esse occidentis; sive in eo statu, in quo quis inordinate propriam excellentiam amat; vel quò brachium extendit, ut alterum confodiat. Eoque pertinere potest illa Dei querela, quam legimus Isaia 43. v. 42. ubi secundum vulgatam editionem sic Deus hominem increpat: *servire me fecisti in peccatis tuis* id est, cum te ad nihilum redigere valerem, conservavi te, & sustinui, etiam cum male ageres, legemque meam violares.

Sed cum malitia actionis ab æterna lege discrepantis non sit quoddam ens, vel quidam modus physicus, sed tantum defectus seu privatio perfectionis, aut relatio repugnantia cum ordine seu ratione ut in Ethica probabo; ipsa Deum non potest habere Auctorem; nec cooperatorem seu concurrentem: cum Deus deficere non possit, aut ordini repugnare; sed sola creatura, quam nonnunquam sinit vias suas malas facere; non ta-

men cogit aut impellit ad male agendum, quemadmodum definitum est in Concilio Trid. Sess. 6. Can. 6.

Ad id autem, quod dicitur ille reus, qui sciens ac volens ad actum peccati concutrit; id utique intelligi debet de causa aliqua particulari, v. g. de homine, qui ex propria determinatione ad actum illum concutrit, non de causa prima, & *universali*, seu Deo, qui per eandem actionem conservat hominem in *esse simpliciter*, & in *esse tali* nempe in esse aut statu agentis puta in eo statu, in quo enssem alterius jugulo admovet. Nisi enim concurreret ad hunc actum: certe vel suum concursum plane subduceret homini ad existendum, sicque homo ille non amplius existeret; vel saltem concursum suum ad eum actum, seu statum ipsi denegaret, tumque agendi potestate ipsum spoliaret; quod ab ipso Dei ordine videtur alienum. Deus enim ita condidit hominem, ut eum reliquerit in manu consilii sui, adeo ut quamcunque in partem sit inflexurus voluntatem suam, ei concursum suum a conservatione minime distinctum non sit denegaturus. Qua in re nihil est, quod bonitati ac justitiæ Divinæ derogare videatur.

80. Deus non præmoveri physice præmotione speciali voluntatem creatam in actibus liberis, qui naturæ vires non superant, præferturque in malis. Nam Deus voluntatem

huma-

humanam facit activam, & actuum suorum Dominam, ita ut eos ponere possit vel non ponere ad libitum : hancque facultatem, quotquot sumus, in nobis experimur : v. g. possum me determinare ad scribendum vel non scribendum : sive possum exigere concursum Divinum, quo me non tantum in *esse simpliciter*, sed etiam in *tali esse* nempe in *esse* scribentis conservet : nam concursus, conservatio, & creatio secundum diversam tantum connotationem seu relationem inter se discrepant. Deus igitur non præmoveret physice præmotione speciali voluntatem humanam in actibus liberis, qui naturæ vires non superant.

Secundo. Si Deus physice præmoveret præmotione speciali voluntatem creatam in actibus liberis, qui naturæ vires non superant, eam sane ad actum peccati determinaret, & impelleret; cum ipsa citra præmotionem physicam specialem in eum actum prorumpere non posset. Deus autem voluntatem creatam ad actum peccati non determinat, aut movet: alioquin peccati Auctor dicendus esset, & omnium quæ patrantur, scelerum atrocissimorum reus, quod de Deo cogitare animus exhorrescit. Ergo Deus voluntatem creatam in actibus liberis, qui naturæ vires non superant, præsertimque in malis speciali motione physica non præmoveret.

Nec

Nec valet Adversariorum responsio, qua dicunt, Deum determinare voluntatem creatam ad actum peccati tantum materialiter sumptum : non vero formaliter (cap. II. §. IX. N. 79.) Unde addunt, etiamsi Deus ad materiale peccati concurrat, eum tamen peccati Auctorem a nobis non dici : cur ergo inquirunt peccati Auctor censebitur, si ad materiale tantum peccati præmoveat? Nil inquam juvat hæc responsio. Nam qui determinat ad *materiale* peccati, determinat quoque ad id, quod cum *materiali* peccati conjunctum est. Jam vero *formale* peccati cum materiali conjunctum est, ut in mendacio, in pomi primis Parentibus indicta comestura, cæterisque prohibitis liquido apparet. Nam v. g. elus pomi est actus *materialiter* & quoad substantiam spectatus. Item si consideretur quatenus legi Divinæ repugnat, *formaliter* & *moraliter* sumitur; sive est actus *formaliter* malus. Quocirca materiale actus mali cum formali plane jungitur. Ergo qui præmovet ad materiale peccati, ad formale quoque censetur præmovere.

Ad id quod additur respondeo, diversam esse rationem præmotionis physice specialis, & concursus. Nam Deus per concursum non determinat voluntatem creatam, sed ab ea determinatur, quatenus ipsa exigit, ut in tali esse, v. g. in esse peccantis a Deo conservetur : quocirca Deus solo universalis causæ

causæ nomine cum ea tunc operatur, nec consequenter ipsius peccati malitia in Deum refundi potest. At per præmotionem physicam specialem non determinatur Deus a voluntate creata, sed si eam promoveat ad peccatum, ut volunt Adversarii, ipsam utique determinat ad id volendum, quod æternæ legi & rectæ rationi repugnat v. g. ad furtum volendum, vel homicidium, vel adulterium: uno verbo Deus per concursum permittit hominem peccare, dum eum in esse peccantis conservat secundum ipsius exigentiam: per præmotionem vero seu prædeterminationem physicam specialem ipsum ad peccandum impelleret. Atque ita quantumvis immunis sit a peccato, dum concurrat tantum cum voluntate creata ad ipsius exigentiam: non tamen a peccato liber foret, si voluntatem creatam determinaret ad illud, quod Divinæ legi adversatur, quemadmodum peccato non careret, qui calamus male aptatum ad scribendum applicaret, si vitiositas scripturæ non physicus tantum, sed moralis defectus haberi deberet: cum enim ille determinaret calamus ad scriptionem, certe ipsum determinaret quoque ad defectum, seu vitium scripturæ: siquidem nisi applicaretur calamus ad scribendum, non foret male scripturus.

81. Duobus præcipue argumentis utuntur Adversarii ad sententiam suam stabiliendam.

Pri-

Primum ex eo petunt, quod creatura tum in *esse*, tum in *operari* sit Deo subiecta. Secundo quod voluntas creata sit indifferens, & in potentia ad agendum, vel non agendum, & consequenter prædeterminatione indigeat.

82. Verum sine præmotione physica speciali ad actus liberos, qui naturæ vires non excedunt, concipitur humana voluntas a Deo pendere tum in *esse* tum in *operari*. Et quidem quod in *esse* pendeat, facile intelligitur, cum ab illo creata sit, & continuo conservetur. Deinde pendere etiam concipitur in *operari*. Primo, quia Deus agendi facultatem ipsi concessit, sive eam activam fecit, & actuum suorum Dominam, ut dictum est. Secundo quia præmotione generali ad bonum universæ eam impellit, cuius impulsione seu inclinationis vi ad privata bona se ipsam movet. Tertio, quia ad actus bonos & supernaturales illam determinat vel per se solum, ut cum v. g. pias quasdam cogitationes, aut pia desideria nobis inspirat: vel causarum secundarum interventu, ut cum easdem cogitationes ex occasione rerum externarum in nobis excitat. Quarto denique quia in actibus etiam deliberatis, qui naturæ vires non superant, cum humana voluntate sic concurrat, ut eam non tantum in *esse simpliciter*, sed etiam in tali *esse*, nempe in *esse operan-*

rantis aut volentis secundum ipsius exigentiam conservet.

Porro Deus satis intelligitur esse primus motor, primo quia motum omnem corporibus indidit. (cap. II. §. IX. N. 70.): secundo quia physice movet intellectum creatum (§. IX. N. 72.): tertio quia voluntatem creatam pramotione generali ad bonum universe movet (N. 73.): quarto quia eandem pramotione speciali ad actus supernaturales. evehit, & cum in omnibus alijs actibus sic concurret, ut sine illo concursu voluntas agere non possit.

83. Opponitur secundo, quod per se indifferens est & in potentia, determinate se non potest, nec ad actum reduci, nisi per id quod est in actu; ut lignum quod est ignis tantum potestate reduci non valet ad actum ignis nisi per id quod actu & revera ignis est: alioquin simul esset in actu & in potentia respectu ejusdem; quod absurdum est. Voluntas autem creata est indifferens ad agendum vel non agendum, ac similis est libræ in æquilibrio posite. Ergo seipsam determinare non potest ad agendum, sed a Deo determinari debet.

Respondeo: quod est indifferens *indifferentia passiva* ad aliquid, debet ab alio determinari, sive ad actum reduci per id, quod in actu est, v. g. lapis, qui est in potentia passiva ad motum debet ab alio moveri, lignum, quod

quod est ignis tantum potestate passiva, debet ad actum ignis reduci per id, quod actu ignis est: quod vero indifferens est *indifferentia activa* sive quod habet potentiam agendi, & non agendi ad libitum, non debet ab alio determinari, sive ad actum reduci nisi per pramotionem generalem. Voluntas autem creata est indifferens *indifferentia activa*, non passiva. Quamvis igitur voluntas creata sit indifferens, & in potentia ad agendum vel non agendum, quoniam tamen est libera, potest se ad agendum vel non agendum determinare. Determinatio igitur voluntatis creatae est a Deo pramovente pramotione speciali in actibus supernaturalibus nempe fidei, spei, & charitatis: sed in actibus deliberatis, qui naturae vires non superant, est tantum a Deo pramovente pramotione generali, qua voluntas creata in bonum universae nititur, huiusque nifus vi ad bona privata se determinat, id est, iis immoratur.

84. Ex his tamen minime sequitur, Deum determinari a creatura, ipsique subijci, & necessario cum ea concurrere. Deus enim causas liberas ea lege condidit, ut se ipsas ad agendum determinare, hoc est, Divinum concursum ad operandum, vi pramotionis generalis exigere possent. Neque idcirco dici potest Deus creaturae subijci, quod necessarium illi auxilium praestet; nam potest illud semper negare, si velit. Sed hoc mirum

rum videtur, quod timeant Adversarii, ne Deus, cum extrinsecus & moraliter determinetur a creatura, secundum leges a se constitutas, aliquam necessitatem patiatur, minime vero reformident, ne creatura per præmotionem Divinam, quæ physica & efficacissima est, ad omnes & singulos actus tum bonos tum malos impulsæ libertatis suæ jacturam faciat, quod tamen multo magis pertimescendum.

S. X.

De Angelis.

85. **A** Deo Spiritu Increato ad spiritus creatos descendimus. Horum aliqui sunt ab omni materiæ commercio & conjunctione liberi, & generali *Angelorum* nomine continentur. De his igitur nunc breviter agam. De iis autem, qui ordinem habent ad materiam, postea.

86. Ἀγγελοσ græce, latine *nuncius* dicitur: præcipuum enim Angelorum officium est mandata Divina perferre, ut cum Luc. i. v. 26. Angelus Gabriel ad Mariam Virginem missus dicitur verbi Divini Incarnationem ipsi annunciaturus.

87. Definiri potest Angelus, quod sit *Spiritus creatus ab omni corporis commercio & conjunctione liber.*

88. Satis ex Scriptura saltem constat varios hujusmodi esse spirituum ordines, quibus commune Angelorum nomen tribuitur, sed de hujusmodi ordinum numero non consentiunt inter se Theologi, communior tamen opinio, quæ ex Dionysio petitur, novem hujusmodi ordines in tribus Hierarchiis, seu sacris Principatibus recenset, qui ordines ex scriptura sacra deducuntur.

Prima Hierarchia Seraphinos, Cherubinos & Thronos : Secunda Dominationes, Virtutes, & Potestates : Tertia Principatus, Archangelos, & Angelos specificè sumptos complectitur. Verum hæc fusius tractare Theologorum est. Ego præcipua tantum capita atque ad forum philosophicum plerumque spectantia breviter exponam.

89. Angelorum existentia ad fidem orthodoxam pertinet. Nam eorum frequentissima fit mentio in scripturis sacris tum veteris tum novi Testamenti ; nam Raphael Tobiam juniorem duxisse, & reduxisse legitur in libro Tobie : Gabriel ad Mariam Virginem missus est Luc. 1. v. 26. Angelus pastoribus prope Berthehem excubantibus, & noctis vigiliis super gregem suum agentibus Natum Salvatorem annuntiavit Luc. 2. v. 9. ut cætera omittamus testimonia, quæ passim occurrunt, quæque nemini in scripturis sacris vel parum versato ignota esse possunt. Ergo Angelorum existentia ad fidem Christiana-

stianam pertinet, sive, ut loqui solent, est de fide.

90. Quamvis Angelorum existentia lumine naturali demonstrari non possit, efficaciter tamen suadetur. Nam aliqui exstiterunt, & identidem existunt energumeni, id est a malo spiritu agitati, qui vel motibus extraordinariis aguntur; vel res procul gestas memorant: vel diversis linguis sibi antea ignotis loquuntur. Hæc autem naturam humanam superant; neque in Deum refundi possunt, cum Deus obscænas, & blasphemias voces, quales nonnunquam proferuntur ab energumenis, minime suggerat. Quamobrem a malis angelis necessario inspirantur; atque ita angeli saltem mali existunt, quod si mali, multo magis boni.

91. Quoad tempus creationis Angelorum, probabilius est eos una cum mundo corporali fuisse productos: alioquin Moyses scribere non potuisset, in principio creavit Deus cælum & terram. Attamen Job. 38. v. 7. Cum Deus terram conderet, dicuntur Filii Dei, sive, ut septuaginta verterunt, Angeli Deum laudavisse: quod arguere videtur, illos ante mundum corporeum fuisse creatos.

92. Angelos non in *termino*, sed in *via* fuisse conditos, hoc est, non in statu gloriæ, seu beatitudinis supernaturalis, sed in statu gratiæ & beatitudinis naturalis docet S. Tho-

mas 1. part. quæst. 62. art. 1. & sequentibus; in quo statu cum liberi essent ab omni necessitate tum extrinseca, tum intrinseca, poterant auxilio gratiæ beatitudinem supernaturalem promereri.

93. Licuit autem ipsis unico charitatis actu supernaturalem beatitudinem adipisci, ut homo eam unico quoque charitatis actu consequeretur, si mens illius repente a corpore foret libera. Postquam autem adepti fuere beatitudinem, non remansit in eis potestas peccandi; sed eorum voluntas in bono fuit confirmata, non secus ac beatæ hominum mentes, cum summo Bono fruuntur, male agendi potestatem similiter amittunt.

94. Quemadmodum vero unico charitatis actu beatitudo supernaturalis & confirmatio voluntatis in bono ab Angelis Sanctis obtenta est, ita unico superbæ actu cacodæmonum princeps una cum suis asseclis damnationem æternam, & confirmationem voluntatis in malo fuit promeritus.

95. Diversas Angelorum species a Deo fuisse procreatas vix suaderi potest; Etenim Seraphini, Cherubini, Throni & cæteri ordines non specie, sed officio tantum & dignitate inter se differre videntur: in unoquoque autem ordine plures esse posse Angelos solo numero distinctos nihil verat; nam quemadmodum multæ sunt hominum mentes ejusdem speciei, quæ hoc ipso, quod
existunt,

existunt, singulares sunt & inter se solo numero distinctæ : ita multos Angelos secundum idem exemplar aut ideam productos esse a Deo, ac inter se solo numero distinctos nihil prohibet.

96. Res spirituales, ut sunt Angeli proprie non sunt in loco : cum id corporibus seu substantiis extensis peculiare sit, ut certo loco contineantur.

Nihilominus duo distingui solent in loco essendi modi, scilicet *circumscriptive*, & *definitive* (Log. cap. I. §. II. N. 48.)

97. Illud ajunt in loco esse *circumscriptive*, quod ambitur a loco, seu superficie corporis, in quo continetur ; & cujus una pars uni itidem loci parti respondet, altera alteri : ut corpus humanum sic est in loco, ut caput sit in una parte loci, pes in altera. Hicque modus existendi in loco solis corporibus convenit, non spiritibus.

98. Id vero dicunt in loco esse *definitive*, quod certo ac definito loco est præsens ; sic tamen ut ab eo loco non circumscribatur, aut circumdetur : quo sensu res spirituales sunt in loco : v. g. Angelus Gabriel fuit præsens cubiculo Beatæ Virginis, cum eam Salvatoris Matrem mox futuram salutavit, sed ab aëre istius cubiculi non fuit circumdatus. Melius tamen dicitur aliquid in loco esse *definitive*, cum huic loco certo nimirum ac definito sua cogitatione præsens, non al-

teri, ita tamen, ut ab eo loco non ambiatur.

99. Angeli eodem fere modo moveri dicuntur, quo sunt in loco, id est, possunt per suam cogitationem modo uni loco præsentes esse, modo alteri: ut cogitatio nostra unico temporis momento remotissimis locis sit præsens; ac fortasse secundum propriam substantiam in ea loca momento temporis transferretur, nisi corpori esset alligata.

100. Cum autem Angeli ab uno loco in alium migrant, minime iis opus est per locum intermedium transire: ut cogitatio nostra, si ex urbe Roma Londinum feratur, per loca interjecta transire non debet, sed repente, quæ erat Romæ, sequenti momento præsens erit Londini. Hic quidem motus non fit secundum propriam mentis substantiam, ut diximus, quia corpori est alligata, sed si mens ab omni corpore esset soluta, ut Angelus, tam facile moveretur, quam cogitaret; nec alibi esse videretur, quam ubi cogitaret: unde si de Roma, Londino, & de aliis locis cogitaret, dici posset præsens Romæ, tum Londini, tum alibi; non quod iis locis ritu corporum contineretur, sed quod iis suo modo nempe per cogitationem præsens foret, non aliis, quia mens aut spiritus non alibi a Deo conservari videtur, quam ubi cogitat.

101. Probabile est Angelis multas a Deo naturales notitias tum rerum visibilium, tum invisibilium fuisse concessas; sed Angelos Beatos longe plurimas fuisse adeptos, ubi Deum intuitive, id est, facie ad faciem, & velut defixis mentis oculis præsentem intuendo videre cæperunt. In Deo enim tanquam in lumine quodam intelligibili vident quæcunque Deus iis vult revelare. Ideoque indigentiam nostram & preces intelligunt, quas-cunque ipsis intermediis in Deum dirigimus; bonaque opera nostra cognoscunt, ut Tobie olim testatus est Archangelus Raphael Tob. 12. v. 12. his verbis: *Quando orabas cum lacrymis, & sepeliebas mortuos, & derelinquebas prandium tuum, & mortuos abscondebas per diem in domo tua, & nocte sepeliebas eos, ego obtuli orationem tuam Domino.*

102. Secretas tamen cogitationes nostras Angeli nesciunt, nisi eas ad illos dirigamus; nam solus Deus est scrutator cordium, ut docet Jeremias 17. v. 9.

103. Quod spectat ad malos Angelos seu cacodæmones longe pauciora norunt, quam Beati, nec occultas cogitationes nostras penetrant, nisi ad eos dirigantur: sed illos conjecturis tantum, scilicet ex operibus aut motibus nostris ratiocinando assequi conantur. Angeli quippe non secus ac homines ratiocinantur, seu unum ex alio colligunt, ut satis

constat ex tentatore, qui ad Christum accessit Matth. 4. ut ex ipsius responsis inferre posset, verusne esset Dei Filius, nec ne.

Verum quoad cognitionem, locutionem, & agendi vim Angelorum plurima sunt, quæ vix levibus conjecturis attingimus; quare maximam eorum partem lubens omitto.

§. XI.

De Mente Humana.

104. **M**Entis Humanæ natura non aliunde melius, quam ex ipsius affectionibus, aut operationibus nobis innotescere potest; res enim quælibet per suas proprietates & functiones se prodit. In ipsa autem mente humana seu anima rationali cogitationes advertimus, nimirum *intelligere & velle.*

105. Mens humana est vere spiritualis. Ea enim substantia est spiritualis, quæ est cogitationis, hoc est perceptionis & voluntatis capax; nam corpus quantumvis moveatur, aut figuretur, nec percipere potest, nec velle, idque ab illius idea prorsus excluditur, ut attendentibus manifestum est. Mens autem humana est cogitationis capax, nemo enim negare potest, quin mens percipiat, & desideret seu velit. Ergo mens hominis est
spiri-

spiritualis; proindeque bene dicitur esse spiritus regendo corpori accomodatus, atque ad similitudinem Dei creatus.

Quod autem idea corporis & idea mentis sint omnino distincta, atque sese mutuo positive & complete excludant, facile suadetur. Non enim aliud quidquam concipitur per corpus, quam substantia extensa, quæ dividi, moveri, & figurari potest: cum vero mentem cognoscimus, substantiam cogitantem intelligimus. Porro extensio, figura, & motus positive, ac complete cogitationem excludunt, ac vice versa; siquidem quantumvis corpus extendas, vel dividas, moveas, vel figures, nunquam cogitationem elicies: vicissim, quantascunque cogitationes, seu perceptiones, & desideria congeras, nunquam substantiam extensam efficies.

Et sane nihil absurdius fingi potest, quam tenuissimum pulverem, aut exiguum materiæ portionem esse intelligentem, & amare non tantum res corporeas, & sensibus subiectas, sed etiam spirituales, & a sensuum commercio remotissimas. Non enim res duntaxat materiales percipimus, sed eas etiam intelligimus, quæ nullam cum rebus materialibus connexionem habent, puta Deum ipsiusque attributa v. g. unitatem, pulchritudinem, æternitatem &c. deinde argumentationum leges, æquitatis, & justitiæ regulas, temporum seriem, & discrimina &c. Quis

autem exiguae pulveris portioni tantam vim tribuere audeat, ut calorū motus metiatur, dierum, noctiumque vicissitudines & inæqualitates, temporumque periodos inito certo calculo definiat? ut cæteras taceam demonstrationes metaphysicas, & mathematicas, quæ omnium admirationem movent, quæque longe nobilius arguunt principium, quam rudem crassamque materiam, quocunque illa motu, quacunque tenuitate, & figura sit donata.

Jam ut de voluntatis actibus dicamus, an ii substantiæ corporeæ sunt tribuendi? an materia justitiam, fidem, constantiam, cæterasque animi virtutes diligit? ut revera a voluntate nostra diliguntur. *Quid enim in Sanctis, quid in Martyribus amamus*, inquit S. Aug. tract. 3. in Joan. *membra laniata a feris? quid scèdus, si oculos carnis interrogas? quid pulchrius, si oculos cordis interrogas? quid tibi videtur adolescens pulcherrimus fur? quomodo horrent oculi tui? nunquid oculi carnis horrent? si ipsos interrogas, nihil illo corpore compositius, nihil ordinatius, & parilitas membrorum, & coloris delectatio illicit oculos: & tamen cum audis, quia fur est, fugis hominem animo. Vides ex alia parte senem curvum baculo innitentem, vix se moventem, rugis undique exaratum: quid vides, quod oculos delectet? audis quia justus est, amas, amplecteris. Ex quibus recte infertur substantiam cogitantem, &*

sub-

substantiam extensam, & mentem & corpus esse prorsus diversas; nec substantiam corpoream cogitationis, nec substantiam spirituales extensionis esse participem.

106. Anima rationalis non potest generari, sive per traducem propagari, sed necessario creari exigit. Siquidem quod nullas habet partes physicas, generari nequit; de conceptu enim essentiali generationis est esse secundum aliquid sui ante generationem: nam *ex nihilo nihil fit* viribus creatis. Anima rationalis vero nullas habet partes physicas, cum sit substantia spiritualis, simplex & inextensa (§. hoc N. 105.) Ergo anima rationalis generari nequit,

Dein homo generans hominem, vel dat illi animam totalem, vel partialem, sive partem animæ: neutrum potest dici; non totalem, secus in generatione deberet exspirare generans, cum non habeat nisi unicam totalem animam: non partialem, hoc enim repugnat animæ simplicitati. Ergo anima rationalis non potest generari.

107. Dices, homo generat hominem, secus nemo posset dici parens filii sui: anima vero rationalis est pars hominis. Ergo homo generat animam rationalem; nam qui generat totum, generat etiam partem.

Respondeo primo, propositionem in sensu stricto esse omnino falsam. Quod autem

rem communi modo loquendi homo dicatur generare hominem, inde provenit, quod communis & vulgaris cognitio, sicut acquiritur per sensibilia, ita etiam plerumque in sensibilibus sistit, nec ulterius discurrere curat; hinc quia sensu iudice homo generat hominem, mos obtinuit, ut communiter ita loquamur. Quodsi tamen æqua rationis trutina rem melius ponderemus, contrarium certo patebit juxta prius dicta. Itaque in generatione humana homo nihil animæ, sed solum corpus attingit; unde

Secundo responderi potest, propositionem sic intelligendam esse: homo generat hominem, id est, generat quidquid in homine est generabile videlicet solum corpus; & ideo unus recte dicitur generare alterum. Anima vero cum generari nequeat, in generatione minime attingitur, sed a Deo creata ex nihilo infunditur corpori juxta Leges a Deo statutas.

108. Quamvis enim mens humana sit spiritualis, incorporea, & ingenerabilis, cum corpore tamen organico ex Conditoris instituto ad hominem constituendum conjungitur: quapropter hominis forma merito dicitur.

109. Præterea cum mens humana, utpote spiritualis, sit substantia cogitans, seipsam existere certo cognoscit, cum suæ
cogi-

cogitationis sibi sit conscia, seque cogitare sentiat.

§. XII.

De immortalitate animæ.

110. **M**Entis humanæ, non secus ac rerum omnium spiritualium vita in cogitatione consistit: non enim aliter vivunt spiritus, quam per cogitationem, nec proinde interire possunt, nisi cogitare desinant. Quamdiu autem existunt, cogitationis compotes esse intelliguntur: atque ita tamdiu vivere censendi sunt, quamdiu existunt.

111. Cum ergo quæritur, utrum mens hominis sit immortalis: status quidem illius quæstionis est, utrum vita ei semper competat: sed cum vivere non possit, nisi existat, prius est videndum, an ipsa postquam est a corpore sejuncta, pergat existere: si enim existat, vivere ipsam necesse est; cum ipsius vita, utpote quæ in cogitatione consistit, ab ejus existentia separari nequeat.

112. Illud autem fide certum est, imo fidei Christianæ fundamentum est, animas nostras non interire, ubi corporis carcere liberantur, sed immortales esse. Hinc Christus Dominus Matth. 10. v. 28. *nolite, inquit, timere eos, qui occidunt corpus, animam, autem non possunt occidere: & Joan. 12. v. 25. Qui*
odit

odit animam suam in hoc mundo, in vitam eternam custodit eam.

113. Cum autem non sola autoritate, sed etiam ratione hoc loco agendum sit; cumque Lateranense Concilium sub Julio II. & Leone X. celebratum Philosophos omnes sessione octava exiter, ut ad istam capitalem in Christiana Religione veritatem demonstrandam omnes ingenii vires & industriam adhibeant; ego ex innumeris pene rationibus, quas veteres & recentiores Philosophi attulerunt, efficaciores in medium proferam. Verum ante omnia in mentem revocandum est, quod (N. 106.) fuit demonstratum, scilicet mentem humanam esse spirituales, & a corpore revera distinctam. Hac enim doctrina rite stabilita multis argumentis demonstrari potest humanæ mentis immortalitas.

Argumentum primum.

114. **I**lla substantia immortalis est, quæ a corpore sejuncta subsistit, & vivit. Mens autem humana a corpore sejuncta subsistit, & vivit. Primo quidem subsistit, cum sit substantia a corpore prorsus distincta, (N. 106.) quæ proinde nec corpore ad subsistendum indiget, nec aliunde per se in propriam perniciem ruit. Secundo vivit: nam cum semper cogitet, ejusque vita in cogitatione

tionē sit posita, minime subsistere potest, quin vivat. Ergo mens humana est immortalis.

Argumentum secundum.

115. **M**ens humana non est deterioris conditionis, quam alia inferioris ordinis substantia, nempe corpus aut pars corporis. Corpus autem a mente relictum, ut pars corporis a sua comparte separata subsistere postulat: v. g. certum est certitudine physica ramum a trunco avulsum etiam combusto aut in pulverem comminuto trunco debere remanere: ac demum certitudine metaphysica constat, rem creatam per se ipsam deficere non posse, sed tantum si Deus concursum suum ad existendum ipsi subduxerit: Deus vero hunc concursum non subducit uni parti pereunte altera, a qua minime pendet: Unde Eêcles. cap. 3. v. 14. hæc ait, *didici, quod omnia opera, quæ fecit Deus, perseverent in perpetuum.* Ergo soluto corpore Deus menti concursum non denegat ad subsistendum; sed tam mentem ipsam, quam corpus conservat, cum hoc tamen discrimine, quod corpus utpote ex partibus constans varias mutationes subeat, seu variis speciebus aut formis afficiatur: mens vero quæ simplex est non composita ex partibus, integra semper & incorrupta remaneat.

Hinc

Hincque omnibus hominibus ingenta est illa opinio immortalitatis animæ rationalis, quam a natura hausimus, ex qua sequitur

Argumentum tertium.

116. **H**Oc argumentum ex omnium, quotquot sunt, sanæ mentis hominum consensu reperitur. Nam ut Tullii, Senecæ, Platonis, Aristotelis, ac cæterorum Philosophorum auctoritates omittam, negari non potest, huic universo tanquam reipublicæ bene constitutæ summum aliquem præesse Gubernatorem, a quo singula regantur, qui justas criminibus pœnas, debitamque virtuti mercedem rependat. Hoc vero fieri non potest, nisi mens post mortem superstes remaneat: nam hic videmus insontes sæpius indigere, & opprimi, improbos vero dominari, ac deliciis affluere: quod quidem a Christo Domino in paupere Lazaro, & epulone divite expressum est Luc. 16. v. 25. *Fili recordare, quia recepisti bona in vita tua, & Lazarus similiter mala: nunc autem hic consolatur, tu vero cruciaris.* Ergo mentem humanam immortalem esse necesse est.

117. Denique eandem adhibere possumus ratiocinationem, qua jam usi sumus ad existentiam Dei demonstrandam. Eorum quippe deploranda est amentia, qui sine ullâ emolumenti spe salutem suam in certissimum discri-

discrimen adducunt. Sed qui mentem humanam immortalem esse inficiantur, hac dementia & cæcitate animi laborant. Nam etsi mens interitui foret obnoxia ut falso sibi persuadere conantur, nulla tamen ipsos tam stultæ confidentiæ merces remaneret: quandoquidem omni sensu & vita essent orbati. At si ea mortem non oppetat, ut demonstravimus, quantas & quam horribiles perviciæ suæ pœnas sunt daturi, qui non modo religionem omnem abjecerunt, sed ipsi etiam naturæ interius, & exterius pulsanti obstinato animo resistunt, donec instanti jam mortis puncto remora erroris nebula amentem suam impietatem velut apertis oculis conspicere cæperint. Ergo ab eorum hominum insania recedendum, totisque viribus in eorum sententiam eundum, qui alteram vitam expectant, suamque vivendi rationem illius intuitu componunt.

118 Opponunt primo, unum esse interitum hominis & jumentorum ex cap. 3. Eccl. v. 19.

Respondeo explicando locum Scripturæ. *Unus interitus est hominis & jumentorum & æqua utriusque conditio*, quantum ad moriendi necessitatem; sicut enim moritur homo, & illa moriuntur: similiter spirant omnia animalia, & nihil habet homo jumento amplius, quoad vitam nempe corpoream omnibus animantibus communem: quoad

P. Andr. Gordon Phil. P. I.

O ani-

animam vero homo multa habet jumento amplius. Neque textus sacer ullam intendit similitudinem ponere inter animas hominum, & jumentorum.

119. Opponunt secundo ex Apostolo 1. Timoth. 6. v. 16. *Deus solus habet immortalitatem.* Ergo mens hominis non est immortalis.

Respondeo explicando textum. Solus Deus habet immortalitatem à seipso, quia solus est increatus, & in seipso summe perfectus. Mentis tamen Angelicæ, & humanæ etiam immortalitatem participant, non quod eam sibi ipsæ concefferint, sed quod a Deo illam acceperint.

120. Opponunt tertio. Quod oritur, id interire, ac finire debet; siquidem omnis substantia creata limitata est, & suæ durationis terminos habet. Anima vero rationalis oritur, & incipit cum corpore. Ergo cum illo quoque interibit.

Respondeo quod omnis substantia creata sit limitata, & interire debeat, si quoad se spectetur; nam omnis creatura etiam spiritualis subtracto concursu Divino, sive decreto Dei de creaturæ existentia conservanda, necessario in suum nihilum redibit: secus si creatura spectetur una cum decreto Dei de illius existentia conservanda.

Nec dicas: Anima sui corporis sortem subit; in pueris crescit, viget in juvenibus; in

in senibus languescit: corporis infirmitatibus subiecta est; in deliquio enim deficit, in ebrietate & amentia oberrat. Ergo corpore moriente & ipsa morietur.

Respondeo enim his & similibus tantum evinci, quod anima in statu conjunctionis, a corpore & sensibus, velut a ministris quibusdam, quorum mediatione cum rebus externis negotiatur, plerumque dependeat. Unde his ministris vitiatis, commercium quoque illorum ministerio exercitum vitatur; anima tamen in seipsa minime læditur. Hoc inde patet, quod anima non afficiatur iis morbis, qui corpus, & organa corporea corrumpunt. Imo in deficientibus mens nonnunquam melius sapit, ut videre est in plurimis morientibus.

§. Ultimus.

De humano intellectu & voluntate.

121. **D**UO præsertim in substantia cogitante occurrunt munera, scilicet *intelligere & velle*; duas proinde in ipsa facultates præcipuas distinguere necesse est, nimirum intelligendi vim, & volendi; prior *intellectus* dicitur, posterior *voluntas*. Has facultates ab ipsa mente reapse distinctas negant contra Thomistas reliqui omnes Philosophi:

loſophi : & quidem merito. Etenim nihil nos cogit hujusmodi facultates a mente re-
ipſa ſecernere , cum mens ſola citra realem
illam diſtinctionem , intellectus & volunta-
tis muneribus deſungi poſſit. Mens enim
per ſe cogitat ; cogitare autem eſt intellige-
re & velle. Adeoque intellectus & vo-
luntas reali diſtinctione a mente ipſa non
debent ſecerni ; nec entia citra neceſſitatem
ſunt multiplicanda.

De modo intelligendi & volendi multa
opinari poſſumus , pauca demonſtrare aut
efficaciter probare ; quare brevitati ſtudens
plura de mente humana dicere ſu-
perſedeo.

Metaphyſicæ Finis.



ETHI-



ETHICÆ

Sive

PHILOSOPHIÆ

MORALIS

PROOEMIUM.

Tanta est Philosophiæ Moralis dignitas, ut cæteras Philosophiæ partes præceptorum utilitate & excellentia facile antecedit. Hujus gratia studium omne Philosophicum suscipi debet, in eamque desinere, cum alias non tantum non profuturum, sed sæpissime nociturum esse videatur. Quid enim nos juvat rerum extraneos positarum scientiam adipisci, aut quid ex ea percipimus emolumenti, si, quæ propius nos contingunt, quæ officii nostri sunt propria, & sine quibus viros probos esse nobis non licet, aut negligamus, aut penitus ignoremus? Nam hic demum humanæ sapientiæ scopus est propositus, non ut in sterili, nudaque rerum contemplatione quiescamus,

O 3

mus, sed ut ad proprias ægritudines, quæ multæ, ac variæ sunt, curandas, vitamque pulchre atque honeste transigendam animum adjungamus. Eo quippe solo melior, præstantiorque Philosophorum, quam cæterorum hominum futura est conditio, si animi perturbationibus mederi, mores componere, beatam, denique, hoc est, honestam, Deoque acceptam vitam ducere longo studio & meditatione addiscant. Bene autem beateque vivendi præcepta unde haurire possunt, nisi ex ea disciplina, quæ circa mores ad honestatis regulas conformandos occupatur?

Quamvis autem Ethica apud veteres Ethnicos inculta non jacuerit, ut intelligimus ex iis, quæ tum a Socrate dicta sunt, tum a Platone, Aristotele, Cicerone, Plutarcho, Seneca, aliisque sive Latinis sive Græcis, imo & a Confucio Sinarum Philosopho literis sunt consignata & ad nos transmissa: suum tamen complementum non habuit hæc scientia, nisi a Religione Christiana, quæ sola docet *inimicos diligere, nulli malum pro malo reddere, pro persecutoribus suis orare* &c. quæ a primis Christi sectatoribus summo rei Christianæ bono constanter & perseveranter præstita non sine admiratione legimus.

Itaque scientiam moralem non ex profanis solum scriptoribus, sed ex sacris quoque tum veteris, tum præcipue Novi Testamenti codicibus tradere est animus. Inter Christianos

stianos enim degimus, eosque erudiendos suscipimus, qui morum scientiæ studere debent; non ut vanum duntaxat virtutis nomen cum Ethnicis admirentur, aut magnificis verbis extollant, sed ut mores suos ad regulas componat summi illius Legislatoris, qui e cœlo descendit, naturamque nostram, ut perfectum exemplar nobis ob oculos poneret, assumere non alienum a sua majestate judicavit, quemque unum omnes sapientiæ ac virtutis Magistrum agnoscimus, & adoramus.

Antequam autem morum regulas exponere aggrediar, quædam de natura Ethicæ sunt præmittenda.

DISCURSUS PRÆLIMINARIS.

De natura Philosophiæ moralis.

Hic græce latine *Moralis*, a *moribus* quos dirigit, nomen accepit. Mores autem sunt propensiones quædam in bonum, aut in malum morale, quæ vel nobiscum nascuntur, vel usu ac repetitis actibus sunt comparatæ, quæque proinde actibus humanis sive bonis, sive malis originem præbent.

Actum *humanum* vocant eum, qui fit ab homine *humano modo* agente, id est, ex consilio & deliberatione; in quo homo a beluis secernitur, ut cum v. g. animum ad studium

dium consulto adjungimus. Sunt enim aliqua actiones hominis, quæ non sunt *humane*, nimirum eæ actiones, quæ fiunt quidem ab homine, sed non fiunt humano modo nempe ex consilio, & deliberatione: v. g. cum aliquis sine attentione pedem aut manum mover. Hæc actio dicitur *hominis*, non humana.

Circa actiones humanas tantum versatur Ethica, non circa eas, quæ sine consilio aut deliberatione fiunt; nam solæ actiones humanæ ad honestatis regulas conformari, & ad æternam felicitatem dirigi possunt.

Materia igitur Ethicæ subjecta, siue, ut vocant, *objectum materiale* Ethicæ sunt *actiones humane*. Ratio vero, qua materia illa ab Ethica spectatur, siue *objectum formale* Ethicæ exprimitur his verbis: *quatenus actiones humane ad honestatis regulas intuitu finis ultimi sunt conformandæ*.

Quare definiri potest Ethica, *scientia practica, quæ circa actus humanos, ad honestatis regulas eterne felicitatis intuitu conformandas occupatur*.

Primo dicitur *scientia*, quia conclusiones certas ex principiis certis deducit: v. g. ex hoc principio: *quod tibi non vis fieri, alteri ne feceris*, colligit, non esse furandum, non calumniandum, non occidendum &c. Hoc autem principium adeo clarum est, ut mediocri attentione percipiatur.

Secun-

Secundo Ethica dicitur *scientia practica*, quia non quiescit in sola objecti contemplatione, sed ad praxin tendit : non enim is Ethicæ scopus est, ut morum regulas tantum cognoscamus, sed ut actus nostros ad eas conformemus.

Tertio versatur circa *actus humanos*, ist est, circa actus hominis humano modo sive consulto agentis.

Quarto, actus illos spectat prout *ad honestatis regulas intuitu beatitudinis æternæ conformandos* ! ad hoc enim instituta est Ethica, ut bene vivendi regulas intuitu finis ultimi tradat.

Regulæ autem morum, sive honestatis moralis sunt *Lex æterna*, & *recta Ratio*, legesque omnes, quæ ab iis profluxere, de quibus suo loco dicam. Quarum quidem legum observatione homines ad æternam felicitatem, sive Summi Boni fruitionem, tanquam ad ultimum finem perducuntur. Nam ea deum summa prudentia est, ut a Summo Bono nunquam oculos deflectamus ! sed singulis actibus, quocunque in rerum statu positi, aut quamlibet vitæ rationem amplexi fuerimus, in ipsum contendamus.

Cum vero tria sint præcipua vivendi genera, nempe : vel in solitudine, vel in familia, vel in civitate ! hinc scholastici triplicem distinguere solent moralis speciem : *monasticam* nempe, quæ solitarium hominem regit, *æcon-*

O 5

omicam,

nomicam, quæ familiæ, & *politicam*, quæ reipublicæ curam suscipit.

Sed profecto triplex moralis species pro triplici vivendi ratione non videtur esse distinguenda, cum una eademque morum disciplina cuilibet homini sive in familia, sive in civitate degenti conveniat! nempe ea, quæ circa actus humanos prout ad honestatis regulas intuitu finis ultimi conformandos occupatur: quæ cum objectum suum, nempe *actus humanos* sub eadem ratione formali nimirum quatenus ad honestatis regulas intuitu finis ultimi conformandos consideret, non potest esse specie multiplex! nam omnis scientia per objectum formale specificatur; ut omnes norunt, proindeque nulla disciplina est specie multiplex nisi objectum illius formale sit multiplex. Nemo autem non videt, quemlibet hominem, in quocunque vitæ statu sit positus, debere actus suos ad eandem moris & honestatis regulas conformare: Deum supra omnia diligere, & cætera tantum propter Deum: in altero non admittere, quod ab alio in se admissum doleret. Ergo moralis in triplicem specie scientiam non est distinguenda.

Œconomica, igitur & Politica, quatenus circa bona physica procuranda versantur, sunt peculiæ disciplinæ, quæ *naturali quadam ingenii vi* ac prudentia, rerumque peritia & usu magis, quam doctrina obtinentur.

Quare

Quare si quis vel mercatura vel agricultura, vel alia quavis arte res familiares promoveri velit, huic non alia adeunda est schola, quam vel mercatoris Officina, vel agricolæ villa, vel alterius cujuslibet artificis domus.

Simili ratione, qui rempublicam in regnis vel provinciis administrandam suscipiunt, magnum quidem ex librorum, præsertim historicorum lectione adjumentum capiunt, ut ex iis, quæ bene vel male olim accidisse norunt, quid facto sit opus in iisdem fere rerum circumstantiis intelligant: at præcipuæ politicæ partes in politici ipsius sagacitate & experientia sunt positæ: nam quæcunque aut ex diversorum populorum usibus, aut ex magnorum virorum factis desumi possunt vel politicæ vel œconomicæ regulæ, non ita sunt perpetuæ ac constantes, quin ubi ad singulares eventus & casus applicantur, mutationem quamdam subeant, cum non eadem stet rerum facies, hominum ingenia mutantur, consuetudines & usus obsolescant.

Hæc de Ethica generatim, quam in quinque summa capita distribuam.

Primum erit de Summo hominis Bono, sive de actuum humanorum fine.

Secundum de ipsis actibus humanis.

Tertium de actuum humanorum regulis.

Quartum de virtutibus & vitiis.

Quintum denique de variis vitæ officiis, quibus homines tum erga Deum, tum erga seipso, tum erga alios homines tenentur. PHI-

PHILOSOPHIÆ MORALIS

CAPUT I.

*De Summo hominis Bono, sive de ultimo
actu humanorum fine.*

A Summi Boni consideratione ideo in-
choandam puto Ethicam, quod mo-
rum institutio fine potissimum meti-
enda sit, nec ulla possit iniri certa honeste vi-
vendi via, nisi, quo ea ducere debeat, prius
fuerit exploratum. Hinc prodit vulgare
illud effatum, *finem esse primum in intentione,
ultimum in executione, seu asssecutione.* Hoc
igitur capite de fine ultimo agam: prius ta-
men, quid sit bonum generatim, dicendum;
tum quid sit finis, ut facilius decerni possit,
quid tandem sit ultimus actuum humano-
rum finis.

§. I.

De bono generatim.

N. I.

Bonum morale, id est, morum probita-
tem, aut actionum honestatem explicare
hoc loco nondum aggredior: id quippe in-
ferius

ferius prætabo ; ubi de bonitate & malitia actuum humanorum disputandum ; sed bonum metaphysicum aut physicum specto , quod vel Deus est , vel res creata : quodque proinde vel summe perfectum est , vel saltem suo modo completum , & absolutum ; hæc enim est boni metaphysici vel physici notio ; e contrario malum metaphysicum vel physicum , cuiusmodi sunt ignorantia , cæcitas &c. dicitur id , quod imperfectum est , & mancum.

2. Huiusmodi bonum & malum sive metaphysicum sive physicum spectare licet vel *absolute* , & quatenus unum in se bonum est , ac suo modo perfectum ; aliud vero malum & imperfectum : vel *compare* seu *relative* , quatenus nempe aliquid aliis bonum est & conveniens ; aliis vero ingratum & inconveniens , proindeque malum : e. g. cibus famelico bonus est & gratus , at saturo ingratus est & noxius , proindeque malus. Bonum *compare* , seu *relative* sumptum vulgo definiri solet , id quod omnia appetunt : non quia res quælibet bonum quodlibet appetit ! sed quia unumquodque ad id , quod sibi conveniens est , nititur , quemadmodum ait poëta

Torva leana lupum sequitur , lupus ipse capellam ,

Florentem cythisum sequitur lasciva capella ,

Te Corydon ô Alexi : trahit sua quemque voluptas.

3. Appe-

3. Appetitus ille, quo res quælibet in id, quod sibi bonum est, nititur, triplex distingui solet: *naturalis* nempe, *sensitivus* & *rationalis*.

Appetitus naturalis vulgo dicitur, insita rei cuilibet etiam sensu destitutæ ad suum bonum propensio: sic gravia corpora naturali appetitu in terræ centrum niti, levia vero ab illo recedere dicuntur. Verum id non nisi improprie dicitur, cum res sensus & cognitionis expertes nihil proprie appetere possint, neque inclinatione aliqua donari. Cum igitur plantæ quædam humidis locis, quædam siccioribus aut lapidosis delectari dicimus, locutio metaphorica est, & ab hominum indole translata, non naturalis & propria.

Appetitus sentiens dicitur, qui sensuum perceptiones sequitur.

Appetitus denique rationalis, qui cum mentis perceptione conjunctus est, *voluntas* nuncupatur. Hic appetitus rationalis, quatenus generali quadam præmotione in bonum generatim ab Authore naturæ dirigitur (Metaph. c. II. §. 63.) *appetitus naturalis* recte nominatur; omnes enim appetitu innato bonum generatim, seu felicitatem nostram invicte & necessario expetimus. Ex eoque summi boni seu felicitatis nostræ appetitu quivis bonorum privatorum amor in nobis exoritur. Nam cum nos ipsos amamus, non semper habet amor noster pro objecto proprias

prias naturæ nostræ dotes, ut cacodæmonum principi contigit, qui propriæ excellentiæ fuit amantior : sed aliquid aliud expetimus, quo nos juvari, seu aliquo modo beari posse confidimus : sive, sumus *subjectum* cui aliquid cupimus ; non vero semper sumus *objectum*, in quo tanquam in summo bono nobis complaceamus. Sin autem amor noster naturalis a scopo suo sive summo bono liberratis vi non deflecteret, nec in rebus creatis hæreret, semper bonus foret, nunquam malus : sed sæpissimè in veritum nefas ruimus ! idque quasi bonum amplectimur, quod externa tantum boni specie nos deludit, cum intrinseca boni ratione sit destitutum.

4. Itaque bonum relativum sive bonum quod nobis conveniens videtur, quodque ideo a nobis appetitur, quia nos juvat, aut suaviter afficere potest, id vel summum bonum est, sive bonum per essentiam ; vel est bonum per participationem, seu bonum privatatum a summo & infinito bono derivatum, & externa duntaxat boni specie sæpius vestitum.

Bonum *per essentiam* est unicum nempe Deus, qui solus proprie & per se bonus est, ut testatur Christus Dominus Luc. 18. v. 19. *nemo bonus, nisi solus Deus.*

Bonum *per participationem*, est bonum creatum ! idque vel est res aliqua, seu substantia, quæ nobis bona est, ut sunt aliment-

ta,

ta. Vestes, &c. vel est rei modificatio aut affectio, quæ nos etiam juvat, sive ipsa ad corpus, sive ad mentem referatur. Hinc bona vulgo distribuuntur in *bona corporis*, cujusmodi sunt sanitas, robur, pulchritudo &c. in *bona animi*, ut sunt scientia, & virtus; & in *bona fortunæ*, qualis est domus, fundus, pecunia &c.

5. Hæc autem omnia appetimus, vel quia utilia, vel quia jucunda tantum, vel quia honesta. Unde celebris quoque est divisio boni in *honestum*, *jucundum*, & *utile*. Bonum honestum vocamus, quod rectæ rationis regulis congruit, ut probitas seu virtus. Jucundum est, quod nos delectat, aut suaviter afficit: v. g. quosdam delectant ludi, spectacula, aliorum hominum consortium; alios artium liberalium, & virtutum praxis, alios nummorum contemplatio &c. Utile denique vocatur id, quod ad aliud bonum conducit, sive quod alterius duntaxat boni gratia est expetendum, ut potio amara utilis est ad sanitatem recuperandam.

Hæc autem boni divisio non est generis in diversas species, sed potius ejusdem rei in diversos ipsius respectus, & modos; primo enim omne bonum aliquo sensu jucundum est, quatenus voluntatem nostram allicit. Deinde accidit etiam quandoque, ut idem bonum sit honestum, jucundum, & utile: v. g. vitæ integritas & virtus semper est honesta,

nesta, cum rectæ semper rationis regulis sit consentanea : jucunda quoque est, & mentem suavissima delectatione perfundit, ut norunt viri probi in praxi virtutum exercitati : imo quibusdam, licet rarius ad res suas promovendas fuit utilis, ut in Abdolonymo, cujus nota est historia ex Quinto Curtio. Hic enim sydoniorum regnum ab Alexandro propter virtutis famam accepit, cum victus gratia suburbanum hortum exigua stipe coleret. Sed hujusmodi exempla rara sunt, ac communiter *probitas laudatur & alget*.

Occasione præcedentis definitionis ac divisionis boni, nonnulla quæri solent, quibus breviter faciendum satis.

6. Quærunt igitur primo, utrum bonum sit ita experibile, ut a voluntate odio haberi nequeat.

Respondeo, bonum vel *absolute* vel *comparate* esse spectandum.

Si spectetur bonum *absolute*, nimirum quatenus duntaxat in se bonum est, & suo modo perfectum sine ulla ad nos *convenientie* relatione, id existimationem quidem nostram vel admirationem, non tamen amorem excitat. Etenim ut a nobis ametur, ipsum ad naturam nostram accommodatum esse oportet, cum aliter bonum nobis non videatur.

Quod si ergo bonum spectetur *comparate* ad nos, sive quatenus nobis actu *conveniens*

P. Andr. Gordon Phil. P. I.

P

est,

est, sic a nobis expetitur, ut odio haberi non possit. Nam voluntas nostra non potest odisse id, quod eam suaviter afficit: cum ea sit voluntatis nostræ natura, ut in id quod sibi gratum est, amore propendat. Atqui bonum spectatum, prout actu nobis conveniens est, voluntatem nostram suaviter, grateque afficit: quippe convenire hoc loco nihil aliud est nisi juvare, gratumque sensum excitare. Ergo bonum comparate ad nos spectatum sic expetitur, ut odio haberi non possit.

Hinc est, quod voluntas nostra ad amorem Summi Boni necessario sit determinata: quia summum bonum summe semper conveniens est, nec unquam potest esse disconveniens, aut ingratum. At cum bona privata sint mutabilia, ac modo grata nobis videantur, modo ingrata: v. g. cibus & potus esurientem ac sitientem delectant, saturum vero offendunt: hinc fit, ut rem eandem alias amore, alias odio prosequamur, prout vel bona, vel mala nobis apparet. Quod si neque bona, neque mala nobis videatur, tum illius respectu plane sumus indifferentes. Sicque unicum est bonum incommutabile; nempe Deus optimus maximus, cujus fruitio, ut inferius dicam, æterno purissimarum voluptatum torrente citra satietatem ullam nos inebriabit.

7. Quærunť secundo, utrum voluntas malum

lum sic oderit, ut ipsum, quatenus malum est, amare nequeat.

Respondeo, malum non secus ac bonum spectari posse, vel *absolute*, & quatenus in se malum est, sive imperfectum, & mancum: vel *compare*, & quatenus nobis est malum, seu noxium, molestum, vel quacunque ratione disconveniens.

Si primo modo spectetur, nihil vetat, quominus id, quod malum est, amari possit a voluntate creata: quoniam ea sæpissime amamus, quæ in se mala sunt, & imperfecta, dummodo nobis, ut talia, non appareant; sed si malum secundo modo consideretur, hoc est quatenus tale est respectu nostri, sive quatenus actu nos lædit vel offēdit, fieri non potest, ut ab humana voluntate expectatur.

Etenim non potest humana voluntas id amare, quod nullum habet illicium, quo ipsam ad se pertrahat: nam cum amor sit propensio in id, quod actu delectat, aut placeat, aut græte afficit: ea est illius natura, ut sine illicio quodam excitari non possit. Malum vero quatenus malum est respectu nostri, seu quatenus malum nobis apparet, nullum habet illicium, quo voluntatem nostram ad se ducat: cum hoc modo sumptum minime sit conveniens, aut gratum! sed potius ingratum, & disconveniens judicetur. Ergo voluntas non potest amare malum sub

ratione mali consideratum. Unde S. Aug. lib. 2. confess. docet neminem peccare, nisi aliqua boni specie moveatur.

Si quis igitur opponat, quædam esse peccata, quæ ex *pura malitia* oriuntur, atque hinc concludat, malum quatenus malum est, in iis appeti a voluntate: neganda est omnino consequentia: peccata quippe ex *pura malitia* dicuntur, quæ neque ex *ignorantia*, neque ex *infirmirate* fiunt; unde nullam habent excusationem: sed tamen, qui ea admittunt, ii semper aliqua boni saltem apparentis specie ducuntur: ut cum quis v. g. de culpæ impunitate præsumens, propria sponte, ac citra ullam causam plagis alterum onerat: vel immaturos fructus ex arbore decerpit, aut ipsam arborem eradicat; vel aliud quid simile ex *pura malitia* committit, is aliqua saltem ferina delectatione movetur, sine qua non esset hæc omnia factururus.

Simili modo cum desperati appetunt *non esse*, id non tanquam sibi *malum* sed tanquam malorum suorum finem, ac quoinde ut *bonum* considerant. E diverso damnatæ mentes Deum, qui summe bonus est, refugiunt: quoniam ipsum, ut malum, si non absolute, saltem relative, & respectu sui, id est, ut sibi infensissimum, suorumque scelerum vindicem severissimum intuentur.

8. Quærunt tertio, an bona utilia & jucunda sint vere bona; an vero solum bonum

num honestum, seu *virtus*, boni nomen mereatur.

Respondeo primo, bona utilia & jucunda per se neque bona esse, neque mala *moraliter* seu comparate ad mores humanos considerata. Nam bona utilia & jucunda vel sunt bona animi; vel corporis, vel fortunæ. Ea vero bona neque proprie bona sunt neque mala *moraliter*; sed eorum duntaxat usus bonus est, aut malus; sive bona sunt tantum bene utentibus, mala vero male utentibus. Ergo ratione sui neque bona sunt, neque mala *moraliter*.

Itaque sola *virtus moraliter* bona est, dummodo tamen virtutis nomine non intelligatur superba stoicorum jactantia, qua sapientem sibi ipsi sufficientissimum esse, nec ulla re indigentem prædicabant: nam tantum abest, ut vana illa virtutis gloriatio in bonis numerari debeat, ut potius malorum omnium causa & origo esse videatur.

Respondeo secundo, bona jucunda, & utilia dici posse bona physica, aut metaphysica. Nam quæcunque hominem juvant, ea profecto dici possunt bona, saltem physica, aut metaphysica: siquidem boni physici, aut metaphysici essentia in eo posita est, quod in se suo modo perfectum sit & alteri conveniat, sive adjumento esse possit, ut diximus. Jam vero bona jucunda & utilia, sive fortunæ, hominem juvant ad certa munia facilius ob-

cunda : etenim qui præditus est scientia, v. g. vel robore, vel opibus, quæ sunt bona jucunda & utilia, is multa præclara gerere potest, quæ alius iis destitutus præstare nequit, ut experientia notum est. Ergo non id solum physice, aut metaphysice bonum est, quod est honestum ; sive non sola virtus, aut virtutis actio est bona physice vel metaphysice ; sed id omne, quod jucundum est, & utile ; in iis etiam bonis est annumerandum.

9. Quærent quarto, an aliquid dici possit utile, quod minime sit honestum ?

Respondeo primo *utilis* nomen ambiguum esse & incertæ significationis. Nam si sumatur pro eo omni, quod ad aliud obtinendum conducit, qualecunque sit ; non video, cur id, quod minime honestum est, non censeatur aliquando utile. Nam v. g. nihil minus honestum est quam calumnia, hæc tamen utiliter adhibetur a nonnullis, ut alios e statione sua dejiciant, & opprimant, ac ipsi in eorum locum intrudantur. Similiter opibus male partis utuntur plurimi, ut munera & dignitates acquirant, atque ita de cæteris.

Quod si utile sumatur duntaxat pro eo, quod nobis moraliter prodest, sive quod nos meliores efficit, & ad summum bonum consequendum nos præparat ac disponit : nullum certe inveniri potest bonum utile, quod cum honestate pugnet ; cum omne hujusmodi
bonum

bonum (si modo bonum vocari possit) præcipuam hominis partem, qua Deo similis est, nempe rationem graviter lædat, malumque potius, quam bonum sit æstimandum. Unde

Respondeo secundo, id proprie ac simpliciter utile dici non posse, quod cum honesto non est conjunctum. Quod enim magis nocet, quam prodest, illud proprie utile dici non potest; sed quod dicitur utile se-junctum ab honesto, illud magis nocet, quam prodest; cum nihil afferre possit æquale ei, quod detrahit: nam in hac vita gratiam cœlestem, in altera felicitatem æternam nobis eripit. *Quid enim prodest homini, inquit Servator Matth. c. 16. v. 26. si mundum universum lucretur, animæ vero suæ detrimentum patiatur? aut quam dabit homo commutationem pro anima sua?* ergo nihil proprie est utile, quod idem non sit honestum.

Quapropter etiam si plurimi facta quædam judicent utilissima, quæ minime tamen sunt honesta, ut *furtum, mendacium &c.* ii licet multitudine nonnunquam superiores existant, nullatenus tamen hoc in negotio sunt audiendi! nam pauci admodum vera bona a falsis secernere norunt, ut recte observat juvenalis initio satyræ decimæ: *Omibus in terris, quæ sunt a Gadibus usque Auroram & Gangem, pauci dignoscere possunt vera bona, atque illis multum diversa, remota erroris nebula &c.*

§. II.

De Fine.

10. **Q**ui sunt fines proprii singulis rebus a Deo præstituti v. g. quis sit planetarum & aliorum corporum cœlestium finis proprius, cui bono tot insecta etiam nobis ignota, tot plantæ & animalia sive in terra, sive in mari, sive in aëre progenita sint, magna ex parte nos latet, cum tamen hæc omnia in rerum natura Creatoris duntaxat beneficio subsistant, qui non temere ac fortuito sed constanter & sapienter operatur, iis certos fines assignatos esse, nemo sanus negaverit. Imo peculiare multarum rerum fines seu functiones ita in omnium conspectu versantur, ut a solis Epicureis ignorari posse videantur. Cur enim v. g. concessi sunt animalibus pedes, nisi ut ambulent, cur aures, nisi ut audiant: cur oculi, nisi ut videant? sic arborum radices in terram sparguntur, ut alimentum excipiant; tubuli in trunco disponuntur, ut succum vehant, ac revehant &c.

Itaque res omnes corporeæ sive cœlestes sive sublunares, ipsæque belluæ, quibus nulla ratio concessa est, in certos fines ab omnipotente Deo diriguntur, ac moventur, velut sagitta a sagittario. At creaturæ ratione præditæ, ut Angeli & homines propria se libertate in fines suos agunt, & vias eligunt, quæ
ad

ad eos fines conducunt. Unde alliciuntur a fine, nec fine fine in actum unquam prorumperent; sed sponte, & ex prævia intellectus cognitione in eum finem se movent, eumque apprime, quatenus finis est, cognoscunt.

11. Finis autem communiter dicitur *id, cujus gratia aliquid fit*. Et duplex est, scilicet finis *qui* expetitur, & finis *cui* aliquid expetitur, e. g. finis *qui* expetitur ex ædificatione domus, est commoda habitatio: finis vero *cui* hæc habitatio commoda expetitur, est persona, nimirum ipse habitator, in cujus commodum cedit domus.

12. Rursus alius est finis *operis*, alius *operantis*. Finis operis sive operationis est id, ad quod opus quoddam per se refertur: ut finis studii est cognitio veritatis, nam propter veritatis cognitionem omne studium suscipi debet.

Finis operantis est id, quod operans intendit, ut finis ejus, qui discit, aut docet Philosophiam, esse potest vel amor veritatis, vel vana curiositas, vel quiddam aliud.

13. Denique finis operis sive operantis alius est *proximus*, qui proxime intenditur: alius *intermedius*, qui medio loco expetitur: & alius tandem *ultimus*, ad quem cæteri omnes referuntur, qui nihil aliud est, quam ipse Deus, a quo profluxerunt omnia, & in quem omnia redeunt.

Finis hic ultimus communiter dicitur id, quod expetitur propter se tantum, & propter quod cætera omnia expetuntur, finis autem ille verus vel est proprius, & naturalis rerum omnium finis, id est, ad quem ultimo res omnes natura sua referuntur; vel est tantum arbitrarius, & ex animi levitate, imperu, affectu, aut cupiditate electus, qualis est pecunia respectu avari; voluptas respectu voluptuarii &c. De vero duntaxat fine sollicitos nos esse oportet. Quare sit.

Propositio.

14. **F**inis ultimus verus, proprius & naturalis non tantum hominis; sed etiam rerum omnium creaturarum est ipsemet Deus.

Probat. Finis ultimus verus rerum omnium creaturarum est ille, ad quem ultimo res omnes creatæ re ipsa, & physice referuntur; sed referuntur ultimo ad solum Deum; nullus enim alius est finis ultimus, quem Deus in rerum creatione sibi proponere potuerat, præter suam ipsius gloriam, unde Prov. c. 19. v. 4. sic loquitur sapiens: *Universa propter semetipsum operatus est Dominus.* Ergo finis ultimus verus rerum omnium creaturarum est ipse Deus.

Quocirca naturalem rerum ordinem invertit; quisquis præpostero vel sui ipsius, vel alterius rei creatæ amore aut ad se ipsum, aut ad

ad rem ullam creatam , tanquam ad finem ultimum refert omnia , cum id unicuique animo infixum esse debeat , quod Sanctus Augustinus docet lib. de moribus Ecclesiæ: *Bonorum summa Deus nobis est. Deus est nobis summum bonum. Nec infra remanendum nobis est, neque ultra querendum; alterum enim periculosum, alterum nullum est.* Equidem summus finis, cui Deum expetimus , quia Deus bonorum summa nobis est : sed non sumus finis qui ultimo a nobis expetitur, cum nobis ipsis summum bonum esse nequeamus. Aliter sumus subjectum cui possessionem Dei exoptamus; non vero sumus objectum quod tanquam summum bonum a nobis exoptatur, quia non nos ipsi beare possumus; sed solus Deus est nostra beatitudo.

15. Opponet aliquis, actiones malas non referri ad Deum, cum ab ipso potius defleant; ergo Deus non est ultimus rerum omnium finis.

Respondeo: actiones malæ non referuntur ad Deum ex consilio nostro, & si moraliter spectantur, prout nempe a libero hominis arbitrio promanant; referuntur tamen re ipsa, & si physice spectentur. Actiones igitur malæ ex consilio quidem nostro in Deum non tendunt, quoniam de Deo in illis minime cogitamus; imo ab ipso, quantum in nobis est, recedimus: sed tamen in Deum revera collimant, quia Deus æternum eas puni-

puniendo , gloriam suam quam violarunt splendide vindicat.

16. Cum igitur Deus sit solus rerum omnium ultimus finis , in nullo alio bono quam in ipso solo ponenda est nostra felicitas ; quæ definiente Boëtio est *status bonorum omnium congregatione perfectus*. Dicitur status, id est, vitæ conditio stabilis & permanens : secus non foret beatus. Secundo est *omnium bonorum congregatione* expulsiis malis omnibus *perfectus*.

Hæc quidem est vera beatitudinis notio, sed tamen duplex illius species vulgo distinguitur ; altera dicitur *beatitudo naturalis* & imperfecta, seu *beatitudo viæ*; altera *supernaturalis*, & perfecta, seu *patriæ beatitudo*. De utraque distinctim agendum.

§. III.

De beatitudine naturali.

17. **C**UM de felicitate naturali agitur hoc loco, non ultimus actuum humanorum finis proprius ac physicus intelligitur, ut superius; sed eam duntaxat beatitudinem, quam propriis naturæ humanæ viribus in hac vita mortali comparari posse asseruerunt Philosophi; quæque adeo imperfecta est, ut vix felicitatis nomine digna videatur. Atque id fortasse in causa fuit, cur in ea constituenda tamdiu laboraverint veteres Philosophi.

sophi. Nam cum nullam in rebus creatis explendi humani desiderii vim agnoscerent, singulas incassum perlustrabant; aliorumque opinionibus confutatis nihil omnino in quo quiescerent, inveniebant. Quod innumeras propemodum opiniones non mediocriter inter se discrepantes peperit. Nam S. August. lib. 19. de civitate Dei 288. ex Varrone refert, Philosophorum de beatitudine sententias: adeo verum est, quod ait Seneca initio libri de vita beata, vivere omnes beate velle, sed ad pervidendum, quid sit, quod beatam vitam efficiat, caligare.

Cum autem earum opinionum pars longe maxima cum primis rationis humanæ principiis parum consentiret, eas pene omnes ex hominum memoria delevit tempus. Nos itaque paucas tantum, quæ a præcipuis Philosophorum sectis propugnabantur, breviter recensebimus, magis ne a Philosophis Christianis ignorentur, quam ut ex iis magnum emolumentum percipiant. Ab Epicureis incipiendum.

Epicurei.

18. **C**irca sententiam Epicuri de felicitate hominis ambigunt inter se, tum veteres tum recentiores Philosophi, cum enim ille beatitudinem in gratissimo voluptatis sensu, & doloris absentia repositam esse dixerit;

xerit; aliis quidem voluptati corporis, aliis animi tranquillitati primas tribuere visus est. Priorum opinio multitudine vicit, iique Epicuri famam tam foeda labe aspersam ad posterios transmissere, ut jam ablui & expurgari vix possit. Alii tamen & olim, & nostris etiam temporibus ipsum ab hac infamia vindicare sunt conati, ut Torquatus, Seneca; Diogenes, Laerrius, & Erasmus. Porro ii omnes Epicurum sancte vixisse, & recta præcepisse, nec aliam voluptatem, quam quæ ex virtutis actibus ducitur, animo conceptam habuisse argumentis non contemnendis persuadere conantur.

19. Quod ad Cyrenaicos attinet, quorum Dux fuit Aristippus Cyrenensis, in confesso est apud omnes, nullam aliam ipsis propositam fuisse felicitatem, quam quæ in turpi sensuum voluptate consistit.

Ab eadem opinione non dissentit impurus *Mahometes*, sive ut nos loquimur *Mahometes* in *Alcorano*, id est, in libro præceptorum, quem scilicet ad Musulmanos id est, ad eos, qui se dicunt per Antonomasiam Deo devotos, conscripsit. Nam ubi de paradisi, quem scētatoribus suis pollicetur, deliciis agit, capitibus *de vacca*, *de fæminis* &c. corporeas præsertim voluptates inculcat, eaque potissimum mercede ad suæ legis observationem illos accendit.

Quidquid sit, si voluptates corporis quasi sum-

summum bonum habuerit Epicurus cum Cyrenaicis & Mahometanis, cumque vilissima turpissimorum hominum fæce pecudis certe potius quam hominis felicitatem est prosecutus. At si intelligendus sit Epicurus de animi voluptate, qua fruuntur, qui pie & caste vivunt, negandum erit cum Seneca invitis pluribus sectam Epicuri *flagitiorum esse Magistram*, licet ad ipsius nomen advolent quidam homines, perditī, ut libidinibus suis patrociniū ac velamentum quærant. Nulla quippe alia felicitas naturalis obtineri potest, quam quæ in animi nullius sibi criminis conficii, omni virtutum comitatu stipati tranquillitate, & jucunda bonorum operum exercitatione est constituta.

Solvuntur Objectiones.

20. **O**bjiciunt Cyrenaici. Voluptas corporis propter se ipsam appetitur; ergo summi boni loco haberi debet.

Resp. primo eam non appeti ab omnibus ut summum bonum, sed tantum ab iis, qui nimium carnalibus voluptatibus dediti oblectationem non sapiunt spiritualement. Deinde non continuo aliquid summum bonum censerī debet, quod immerito a quibusdam propter se ipsum appetatur; alioquin divitias & honores, quæ ratione sui ab avaris & ambitiosis appetuntur, summum bonum appel-

appellare oporteret. Sed illud tantum Summi Boni nomine donandum est, quod appetitum hominis complere potest, & sine fastidio ac satietate possideri. Cum corporearum voluptatum appetentia plena sit anxietatis, illarum vero satietas poenitentiae.

Instant. Cyrenaici. Summum malum consistit in doloribus; ergo Summum Bonum in voluptate.

Resp. Summum malum consistit in doloribus, tum animi, tum corporis; non vero in doloribus corporis solius. Sic Summum Bonum consistit in voluptate, animi non in voluptate corporis, id est, in ea voluptate, quam ex occasione rerum sensibilibus & corporearum percipit animus. Præterea dum fatemur Summum Bonum in voluptate animi positum esse, intelligimus beatitudinem *formalem*, quæ est jucunda mentis affectio, qua perfundimur, dum Summo Bono adheremus; non vero beatitudinem *objectivam*, seu ipsum Summum Bonum, cujus fruitio beatos nos efficit, designamus.

Stoici.

21. **S**TOICI Cyrenaicis e diametro oppositi felicitatem hominis in sola virtute animi, quam *sapientiam* appellabant, collocatam esse voluere; sicut miseriam in sola malitia, quam *stultitiam* dicebant, consistere judicaverunt.

Hanc

Hanc Stoicorum opinionem clare exponit Seneca stoicæ sectæ vindex acerrimus his verbis : *Beatus non est is , quem vulgus appellat , ad quem pecunia magna confluxit : sed ille , cui bonum omne in animo est , erectus & excelsus , & mirabilia calcans : qui neminem videt , cum quo se commutatum vult : qui hominem ea sola parte æstimat , qua homo est : qui natura magistra utitur , ad illius leges componitur , sic vivit , quomodo illa præscripsit : cui bona sua vis nulla excutit , qui mala in bonum vertit , certus judicii , inconcussus , intrepidus : quem aliqua vis movet , nulla perturbat : quem fortuna , cum in eum quod habuit telum nocentissimum , vi maxima intorsit , pungit , non vulnerat , & hoc raro : cætera ejus tela , quibus genus humanum debellatur , grandinis more dissultant , quæ incussa tectis , sine ullo habitatoris incommodo crepitat , & solvitur .*

Sed quamvis hæc magnifice a Stoicis jaçtentur , suadere tamen viris cordatis non poterunt , omnem omnino felicitatem solo ista vanæ virtutis splendore sic contineri , ut neque morbis , neque egestatē , neque aliis vitæ incommodis interturbetur . Nam nec vera virtus , quæ a superba Stoicorum ostentatione longe diversa est , dici potest beatitudo , sed viâ duntaxat ad beatitudinem : cum ipsa per se reddere nequeat hominem beatum , sed ei tantum auxilio esse possit , ut Summum Bonum , ad quod perpetuo nititur , tandem aliquando consequatur .

P. Andr. Gordon Phil. P. I.

Q

Quo

Quo circa sapienter omnino Sanctus Augustinus Stoicos arguit his verbis : *Unde in errorem absurdissimum lapsi sunt, ut cum asseverant etiam in Phalaridis tauro beatum esse sapientem, cogantur fateri vitam beatam aliquando esse fugiendam ; Exaggeratis enim malis corporis cedunt, atque in eorum molestiis gravissimis, abscedendum ex hac vita esse decernunt . . .* & infra. *O nimium superba jactantia ! si beata vita est in cruciatibus corporis, cur non in ea manet sapiens, ut fruatur ? si autem misera est, quid, obsecro te, nisi typhus impedit, ne fateatur.*

Peripatetici.

22. **C**UM felicitatem judicent omnes rem optimam & perfectam, atque adeo talem, ut hominis appetitum expleat ; hinc Peripatetici non in sola corporis voluptate cum Epicureis, nec in sola virtute cum Stoicis beatitudinem sitam esse voluerunt ; sed in eo, quod quis *secundum naturam vivat*, sive secundum naturam undique perfectam, & nihil amplius requirentem.

Ut autem natura sit perfecta multa virtuti sunt adjungenda : ac primo quidem requiruntur bona interna tum animi, nempe scientia, prudentia &c. tum corporis, ut pulchritudo, sanitas, robur, sine quibus nemo omni ex parte beatus esse intelligitur : quia hæc semper erunt optanda, si defuerint.

Secun-

Secundo necessaria sunt bona externa, five bona fortunæ, quibus veluti instrumentis aut adminiculis uti solet virtus, ideoque opus est divitiis ad magnificentiam: potestate ad votorum executionem, amicis ad auctoritatem & existimationem.

Præterea requiruntur nobilitas, five generis claritudo; gloria, id est, clara cum laude notitia; & ipsa laus, ac honor, id est, testimonium excellentiæ verbis aut factis exhibitum: nam honor in honorante potius, quam in honorato versatur.

Denique hæc omnia debent esse diuturna: nam sicut *una hirundo non facit ver*, sic nec una dies beatum.

Atque hæc est Aristotelis, & Peripateticorum de beatitudine sententia: in qua quidem nullam summi boni seu Dei mentionem facit Aristoteles, imo nec alterius vitæ; cum tamen nulli proprie beati sint homines, quamdiu mortalem hanc vitam trahunt innumeris calamitatibus obnoxiam. Quomodo enim stabit felicitas cum eo malorum agmine, quo propter primi hominis peccatum undique obsidemur? Audiatur divina spiritu afflatus Job. *Homo, inquit cap. 14. v. 1. natus de muliere brevi vivens tempore, repletur multis miseriis.* Neque vero has ærumnas amovere possunt ea, quæ ab Aristotele requiruntur vitæ commoda. Nam dum quis sanus est, metuendus est illi morbus: si opi-

bus polleat, vel honoribus aut potestate, invidiam declinare non poterit: unde ipsi peritescendi erunt sicarii, fures, incendia, & quæcunque beatam, securamque esse vitam non sinunt. *An tu potentem censes, inquit Boërius lib. de consolatione Philosophiæ, quem videas velle, quod non possit efficere? Potentem censes, qui satellite latus ambit? Qui quos terret, ipse plus metuit? Et intra de amicis loquens, an presidio sunt amici, quos non virtus sed fortuna conciliat? sed quem felicitas amicum fecit, infortunium facit inimicum. Ac perlustratis hoc modo bonis omnibus creatis, quæ nimium imperfecta sunt, ut mentem nostram expleant, tandem concludit, nullam nos in hac vita manere felicitatem: sed eam in altera tantum vita, ubi Deo satiabitur animus, esse expectandam. — Hinc præclare Solon:*

ultima semper

Expectanda dies homini, dicique beatus.
Ante obitum nemo, supremæque funera debet.

Platonici.

23. **I**Nter Philosophos Ethnicos nulli propius ad veritatem accesserunt, quam Platonici? unde Divus August. sic eos alloquitur: *Videtis utcunque, etsi de longinquo, etsi acie caligante patriam, in qua manendum est, sed viam, qua eundum est (nempe incarnationem*

nem incommutabilis filii Dei qua salvamur)
non tenetis.

Plato enim tametsi aliquam in hac vita felicitatem utcumque agnoscere videtur, cuius participes fiunt, qui Deo sunt amici, quique virtutibus moralibus, & disciplinis speculativis, præsertimque Arithmetica mentem excolunt; veram tamen & solidam beatitudinem alterius esse vitæ tum multis locis, tum maxime in Gorgia & Phaedone docet; licet sub aliorum & maxime sub Socratis persona id agat.

Itaque omnes homines, dum e vivis excesserunt, æquissimo Judici sisti affirmat, a quo sententiam indeclinabilem audiunt. Unde si animi in corporibus inclusi cupiditatibus resistierint, Deoque per sapientiam & virtutem adhaeserint, iis bonam spem in ipso mortis puncto concipiendam putat: ipsos quippe suarum virtutum præmia reportaturos, & ab hisce terrenis oris ad altiorem regionem transferendos, ibique summo & incommutabili bono æternum esse fruituros. Si vero in hac vita sese voluptatum illecebris permiserint, nec supremum Numen oraverint, ut suis vitiis, & erroribus modum imponeret; ipsos a Demonibus suæ vitæ custodibus ad suppliciorum locum rapiendos, scelerumque suorum pœnas luituros: ita ut si eorum scelera expiari possint, tandem purgati suarum virtutum præmia sint relaturi, sed si eorum crimina ablui nequeant, æternis cruciatibus sint addicendi.

Porro in hoc erravit Plato, quod animas hominum in corpora tanquam in carceres ob crimina quædam in priore vita commissa detrusas esse putaverit.

Sed jam a Platone, quo nullus mortalium solo luminis naturalis subsidio fretus magnificentius ac verius de Deo & humana felicitate sentire visus est, ad id, quod Christiana fides nos docet, animum convertamus.

§. IV.

De Beatitudine supernaturali.

SI hominis felicitas in bonis creatis consistere nequit, hoc est, neque in bonis externis & fortunæ, nempe divitiis, honoribus, dignitatibus &c. Neque in bonis corporis, puta sanitate, pulchritudine, robore; neque denique in bonis animi, scilicet in scientia & virtute, cum hæc omnia bona imperfecta sint, & ad excellentius bonum ordinata: Dicendum cum S. Augustino lib. ultimo de civit. Dei C. ultimo, *premium virtutis futurum esse illum, qui virtutem dedit, ei-que seipsum quo melius & majus esse nihil possit, promisit. Quid est enim aliud, quod per Prophetam dixit: ero illorum Deus, & ipsi erunt mihi plebs; nisi, ego ero quæcunque ab hominibus honeste desiderantur, & vita, & salus, & victus, & copia, & gloria, & honor, & pax. & omnia bona?*

Hæc

Hæc verò felicitas recte *supernaturalis* dicitur, quoniam non solis naturæ humanæ viribus, sed tantum adjuvante divina gratia obtineri potest. Naturalem tamen eam appellare licebit, si naturalis nomine id intelligamus, quod homini secundum naturam maxime convenit. Nam superius ostensum est, Deum solum esse revera finem ultimum, naturalem & physicum rerum omnium, quia res omnes propter ipsum ultimo factæ sunt: præsertim verò dici potest finis ultimus *naturalis* hominis, quoniam humana natura sic eo solo completur, ut nulla alia re possit satiari. Quare nulla est alia beatitudo ut vocant *objectiva*, seu nullum aliud est objectum felicitatis humanæ nisi Deus ipse, cui dum intime conjungimur, beati tandem efficimur. Sit ergo

Propositio I.

25. **I**N solo Deo posita est hominis felicitas, siue *beatitudo objectiva*, vel objectum beatitudinis nostræ est solus Deus ter Optimus, maximus.

Prob. in eo solo posita est hominis felicitas, quod potest solum hominis animam ita satiari, ut nihil ipsi amplius desiderandum sit; sed solus Deus ita hominis animam satiari potest, ut ipsi nihil ulterius desiderandum sit; anima enim rebus terrenis occu-

pari quidem potest, fatiari nequit. Quomodo enim, quod Deo minus est, animam Dei capacem implebit? Ergo in solo Deo posita est hominis felicitas.

Solvuntur Objectiones.

26. **O**pp. primo. Illud solum est hominis summum bonum, siue beatitudo objectiva, quod naturali instinctu ab ipso appetitur; Deus autem, instinctu naturali expeti nequit; cum viribus naturalibus obtineri non possit, sed solis viribus gratiæ.

Resp. Quod Deus ab homine expetatur instinctu etiam naturali, cum Deus sit summum hominis bonum & proprium humanæ voluntatis objectum, maximeque naturæ humanæ conveniat, cum homo sit ad imaginem & similitudinem Dei formatus & ad ipsum cognoscendum atque amandum creatus. Neque obstat, quod viribus naturæ non possit obtineri; sufficit enim quod ad eum pervenire possit, quibuscunque demum id fiat viribus.

27. *Opp. secundo.* In eo non consistit beatitudo objectiva, quod non possumus possidere; Deum vero possidere non possumus: ergo beatitudo objectiva in Deo non consistit.

Resp. Quod Deum possidere possimus, nam tunc Deum possidere dicimur, cum in

eo viso & amato suavissime conquiescimus; nihil enim aliud hoc loco possessionis nomine intelligitur, quam gratissima creaturæ mentis cum Summo Bono suo conjunctio.

Inst. Ut Deum etiam possessione explicata, quæ *vitalis & adhesionis* dicitur, possidere possemus, deberet esse quædam habitudo seu proportio inter humanam mentem possidentem, & Deum possessum; nulla vero est talis proportio: finiti enim ad infinitum proportio nulla est. Ergo Deum possidere non possumus etiam possessione adhesionis, sive vitali & fruitiva.

Resp. Inter ea est quædam habitudo, proportio, seu relatio, quorum alterum cognoscere potest, & amare, alterum cognosci & amari. Mens autem humana cognoscere potest & amare, Deus vero cognosci & amari. Ergo inter Deum & humanam mentem aliqua intercedit proportio sive habitudo.

Quod spectat ad probationem, responderi potest hoc modo; finiti ad infinitum nulla est proportio, quoad infinitionem ipsam; est autem proportio, quoad naturam aut spiritualitatem. Nam etiam mens humana spiritualis est.

Urgebis. Objectum infinitum attingi non potest, nisi per actionem infinitam, & modo infinito: ergo mens creata, quæ finita est, non potest circa objectum infinitum versari.

Resp. Hoc argumentum nimium probat, nimirum quod solus Deus se ipsum cognoscat & diligat, quod falsum est.

28. *Opp. tertio.* Appetitui finito sufficere debet bonum finitum; sed appetitus hominis est finitus; ergo ipsi sufficere debet bonum finitum; nec proinde bono infinito ipsi opus est.

Resp. Appetitus hominis est finitus intrinsece, & quoad substantiam; non vero extrinsece, & quoad objecta, quæ prosequitur; versatur enim circa omne bonum, proindeque etiam circa bonum infinitum.

Inst. Saltem menti creatæ sufficere debet omnium bonorum creatorum collectio.

Resp. Falsam esse propositionem, primo quia frui non potest tota collectione creaturarum simul, cum iis simul omnibus adhærere ac præsens esse non possit.

Secundo, si grate a quibusdam creaturis afficeretur, ab aliis certe læderetur, ac proinde beata dici non posset.

Tertio, cum propter creatorem, non propter creaturas sit condita; etiamsi universum hunc mundum possideret, non posset eo satiari.

Constat igitur mentem humanam ne omnium quidem bonorum creatorum collectione fore contentam, sed eo solo satiari posse, qui ut ait Rex Propheta Ps. 102. *Replet in bonis desiderium nostrum; & Gen. 17. v. 2. dicitur*

dicitur *merces nostra magna nimis*. Qua quidem mercede nihil nos ad rectam morum nostrorum institutionem, virtutumque omnium exercitationem potentius accendere debet. Eoque argumento usus est Apostolus ad Rom. C. 8. v. 18. his verbis: *Existimo enim, quod non sunt condignæ passionēs hujus temporis ad futuram gloriam, quæ revelabitur in nobis.* & ad Cor. c. 2. v. 9. *oculus non vidit, nec auris audivit, nec in cor hominis ascendit, quæ præparavit Deus iis, qui diligunt illum.*

Hæc de beatitudine objectiva, circa quam satis consentiunt Philosophi, quod sit Summum bonum, sive Deus ipse. De beatitudine autem formali magnopere dissentiunt.

29. Est autem beatitudo formalis *status creatæ mentis, quo in summo suo bono viso & amato tanquam in suo fine ultimo omni modo satiata suavissime & jucundissime conquiescit.*

Alii aliter describunt beatitudinem, illiusque essentiam constituunt Thomistæ in *visione Dei intuitiva*: Scotistæ vero in *amore fruitivo*: multi in solo gaudio collocant.

Visionem intuitivam vocant eam, per quam objectum præsens, & facie ad faciem, ut ait Apostolus I. ad Cor. 13. v. 12. *intuemur.*

Amorem fruitivum nominant, quo summo & incommutabili bono tanquam fini ultimo præsentem, ac possessio adhaeremus.

Gaudium beatificum appellant intimum ac
suavis-

*suavissimum mentis creatæ sensum, quo summo suo bono conjuncta sic afficitur, ut nihil ultra expetat; sed in ea tanquam in immenso deliciarum pelago velut absorpta conquiescat. Hoc gaudium, quo a Deo præsentī ac possessō perfunduntur beati, dicitur *primarium* & *beatificum*; est enim aliud gaudium *secundarium* & *accessorium*, quod est tantum beatitudinis appendix, quo nempe beati gaudent se esse beatos.*

Ex quibus facile colligitur, quod visio intuitiva discrepet a visione seu cognitione idealī; visio enim idealis objectum absens per ideam tantum repræsentat: visio autem intuitiva objectum præsens exigit.

30. Triplex igitur in nobis est cognitionis status, sive triplex luminis genus a Deo in mentes nostras infunditur. Primo *lumen naturæ*, quo Deum ipsum, multaue alia naturaliter sive naturalibus ideis novimus; secundo *lumen gratiæ* seu fidei per Jesum Christum, quo mysteria Divina Trinitatis Personarum Divinarum in unitate naturæ, Verbi Incarnatio &c. nobis innotescunt; denique *lumen gloriæ*, quo Deus revelatā facie se ipsum beatis in gloria conspiciendum exhibet. De primo lumine agit Rex Propheta Psal. 4. v. 7. cum ait, *signatum est super nos lumen vultus tui Domine.* De secundo loquitur Simeon Luc. 2. v. 32. his verbis *lumen ad revelationem gentium.* De tertio communiter intel-

intelligitur versus 10. Psalmi 45. *in lumine tuo videbimus lumen.*

31. Triplici lumini triplex respondet amor: scilicet amor naturalis, seu inclinatio naturæ, qua in nostrum Summum Bonum propendimus: *Amor supernaturalis*, sive charitas, quam spiritus sanctus per Christum Dominum nobis infundit, ut terrenis omnino despectis cœlestia tantum sapiamus: & denique *amor fruitionis*, quo Deo præsentī & possessō tanquam Summo Bono, a quo ineffabili voluptate perfunduntur, arctissime adhærent beati. Amor noster, quo Deum sive naturaliter, sive etiam supernaturaliter diligimus, est tantum *amor viæ*, seu amor desiderii, qui non reipsa, sed tantum spe salvos nos facit: amor autem *adhæisionis* seu *fruitionis* est *amor patriæ*, quo beatæ mentes arctissime Deo in patria cœlesti adhærescunt.

Deum igitur videbunt beati, visione intuitiva, ipsum amabunt amore fruitivo, in eoque viso & amato delectabuntur. Quare sit.

Propositio II.

32. **B**eatitudo formalis consistit in visione intuitiva, amore fruitivo, & gaudio sive delectatione beatifica: vel visio intuitiva, amor fruitivus, & gaudium beatificum sunt de essentia beatitudinis.

Prob.

Prob. Omne illud est de essentia rei, sine quo res illa nec esse, nec concipi potest; beatitudo vero formalis nec esse nec concipi potest sine visione intuitiva, amore fructivo, vel gaudio beatifico; cum beatitudo formalis sit status creatæ mentis, quo in summo suo bono viso & amato, tanquam in suo fine ultimo, omni modo satiata suavissime conquiescat; Ergo beatitudo formalis consistit in visione intuitiva, amore fructivo, & gaudio beatifico.

Solvuntur Objectiones.

33. **O**pp. primo Thomistæ, essentiam beatitudinis in sola visione beatifica consistere. Primo, quia visio est prior amore, imo omnium primum, quod in beatitudine concipitur. Secundo quia visio intuitiva est actio præstantissima. Hinc Philippus Apostolus eam omnino sufficere persuasum habuit, cum dixit Christo Domino: *Domine ostende nobis Patrem & sufficit nobis.* Et Psaltes regius, *ostende, inquit, faciem tuam & salvi erimus.* Imo Christus Dominus ipse, cum ait Joan. 17. v. 3. *Hæc est vita æterna, ut cognoscant te solum verum Deum, vitam æternam in sola Dei visione constituit.*

Resp. Quod essentia beatitudinis inadæquata in sola visione consistat; non vero essentia beatitudinis adæquata & integra. Sic
inte-

integra hominis essentia non in sola anima, quæ est corpore præstantior neque in solo corpore, quod est prius anima, sed in utriusque partis conjunctione posita est. Interdum solius visionis mentio fit in scripturis, & in sanctis patribus, quia visio clara & intuitiva Summi Boni cum illius amore frutivo, & gaudio beatifico necessario conjungitur.

Inst. Miseria damnatorum in sola privatione visionis Dei est collocata; ergo beatitudo formalis in sola visione Dei est posita.

Resp. Quod miseria damnatorum etiam in pænæ positivæ augmento consistat. Si enim in sola privatione visionis Dei posita esset, ii forent omnes æqualiter miseri, utpote Dei visione privati: quod tamen falsum est, cum alii aliis magis torqueantur, prout testatur Christus Dominus Matth. II. v. 22. *Verumtamen dico vobis: Tyro & Sidoni remissius erit in Die judicii, quam vobis.*

34. *Opp. secundo.* Amor Dei est actio hominis præstantissima; cum odium Dei sit actio omnium pessima: ergo beatitudo formalis in amore Dei consistit.

Resp. Beatitudo formalis non consistit in amore solo, sed in amore, visione, & gaudio; si enim aliquod ex his tribus deesset, homo perfecte beatus dici non posset.

§. V.

Satisfit quibusdam quæstionibus cum tradita doctrina de beatitudine connexis.

MUltra exponenda supersunt, quæ partim ad pleniorẽ doctrinæ de beatitudine traditæ intelligentiam conferunt, partim cum ea naturalem habent connexionem, quæ ut facilius & brevius conficiantur, distinctis quæstiunculis proponentur, & subjunctis responsionibus explicabuntur.

35. Quæres igitur primo, an statim post solutionem animæ a corpore incipiat beatitudo, & quid doctrina Christiana verbo scripto & tradito ad nos transmissa de diverso hominum statu post mortem nos doceat?

Resp. Ad solutionem quæstionis, primo distinguendos esse fideles ab infidelibus: secundo distinguenda tempora ante & post Christi adventum: Tertio distinguendum judicium primum & privatum, a secundo & universali judicio.

36. Primo igitur infideles, id est, qui neque habuerunt fidem in Christum Redemptorem, antequam veniret neque nunc habent postquam venit, sive qui neque ad novum, neque ad vetus testamentum pertinent, ad gloriam civitatis Cœlestis, sanctorumque splendorem non admittuntur: sed in tenebras exteriores, *ubi erit fletus & stridor dentium*, amandantur. Non enim est distinctio: omnes

omnes homines peccaverunt, omnes nascuntur filii iræ, nec aliter quam per fidem in Christum Dominum ab hominibus obtinetur salus.

37. Secundo. Qui sub lege vel veteri vel nova vixerunt, si legem violaverint, nec poenitentiam egerint, eandem habent sortem, ac infideles; imo sunt infidelibus deteriores.

38. Tertio. Qui fidem habuerunt in Messiam seu Christum venturum, quique bonis operibus pleni ante ipsius adventum obierunt, quales non tantum erant veteris testamenti Patriarchæ, sed etiam nonnulli inter gentiles, quibus *Divinitus revelatus fuerat unus Mediator Dei & hominum*, ut docet Sanctus August. quique credebant in ipsum, & proinde ad spiritualem Jerusalem pertinebant, ut Melchisedech, Job, & alii fortasse, quos ignoramus; ii in loco quietis, qui *sinus Abrahæ* in scripturis nominatur, Christi resurrectionem expectabant. Christus autem post mortem suam descendit ad inferos, ubi erant ipsi, non quidem in profunda cum damnatis, sed in *limbo*, seu parte summa, ut ait Divus Thomas, quæ pars summa ex ejusdem S. Doctoris opinione nihil aliud est, quam sinus Abrahæ; aliter tamen sentit S. Augustinus. Utcunque se res habeat, Abrahæ sinus a loco damnatorum longo distabat intervallo, ut discimus ex Lucæ cap. 16. v. 26,

P. Andr. Gordon Phil. P. I.

R

Indo

Inde vero Patriarchas & qui cum ipsis erant, liberavit Christus, apertisque cœli foribus ad æternam felicitatem perduxit. Nam ipse est caput corporis Ecclesiæ: qui est principium, primogenitus ex mortuis, ut sit in omnibus ipse primatum tenens, quia in ipso complacuit omnem plenitudinem inhabitare, & per eum reconciliare omnia in ipsum, pacificans per sanguinem crucis ejus, sive quæ in terris, sive quæ in cœlis sunt. Epist. ad Coloss. 1. v. 18. 19. 20.

39. Quarto. Nunc vero post Christi adventum, quoniam Christus resurrexit a mortuis primitiæ dormientium, ut loquitur Ap. ad Cor. 15. v. 20. & aditum ad cœlum devicta morte reſeravit, quicumque inter fideles ex hac vita migrant, si puri sint, & sine macula, si in charitate radicati & fundati, proindeque digni, qui ad Dei conspectum admittantur, ii sine mora cum Christo, membra scilicet cum capite fiunt æternæ gloriæ participes.

Hæc est constans Ecclesiæ Christianæ & Catholicæ doctrina a Christo & Apostolis accepta, perpetuaque Patrum traditione ad nostrum usque sæculum conservata, ac in posterum conservanda.

Cur enim Apostolus ad Philippenſes 1. v. 23. cupiebat dissolvi & esse cum Christo, nisi ut justitiæ coronam statim acciperet, ac in Deo viso & amato summis deliciis frueretur? Christus enim præsentibus Apostolis cœlum ascendit Act. Ap. c. 1, v. 9. eumque Divus Stepha-

Stephanus vidit *stantem a dextris Dei* Act. Ap. c. 7. v. 56. Ergo quicumque in Christo moriuntur, quique cum S. Stephano Divinæ charitatis ardore inflammati exclamant: *Domine Jesu suscipe spiritum meum*, ii omnes statim cum Christo regnant in cœlis, ac simul cum eo felicitatis æternæ præmium consequuntur.

40. Hæc tamen Ecclesiæ doctrina contradictiones identidem invenit. Nam qui græce *Chiliastæ* latine *Milliarii*, seu *Millenarii* sunt appellati, cum male Apostolorum scripta & sermones interpretarentur, sibi in animum induxerunt, futurum quoddam mille annorum spatium, post generalem hominum resurrectionem, quo fideles cum Christo essent in terris regnaturi, antequam ad cœlestem civitatem, Deique conspectum extollerentur; & horum duplex fuit secta.

41. Alii quippe cum impio Cerintho hoc tempus in carnalibus ventris deliciis, & omnis generis libidinibus traducendum esse fabulati sunt, ut refert S. Augustinus libro de hæresibus a quibus non tantum sana Christianorum doctrina, sed etiam morum sanctitas prorsus abhorret. Addebant ex Judæorum commentis, unde hunc errorem profluxisse monet frequenter D. Hieronymus, Davidis regnum tunc temporis splendidius instaurandum a Messia, innovandam legem Mosaicam, templumque & sacrificia

longe magnificentius quam olim esse restituenda.

42. Alii cum Papias puras duntaxat, maximeque spirituales delicias in hoc mille annorum regno percipiendas esse sunt opinati. Fuit autem Papias Episcopus Hierapolitanus in Syria, & quemadmodum S. Irenæus ac S. Hieronymus testantur, auditor D. Joan. Evangelistæ: quamquam hunc alterius Joannis Presbyteri discipulum fuisse memorent alii. Utcunque illud sit, refert Eusebius hist. Eccles. lib. 3. c. 39. ipsum *mediocri admodum ingenio fuisse præditum*, & ex male intellectis Apostolorum narrationibus, cum ea, quæ arcano quodam sensu & exempli causa ab illis dicebantur, non satis pervidisset, occasionem erroris dedisse quibusdam sequentium, temporum scriptoribus, nempe S. Irenæo, Tertulliano, & aliis, qui regnum Christi per mille annorum spatium post corporum resurrectionem in orbe terrarum corporaliter constitutum esse crediderunt. Juxta quam opinionem animæ defunctorum statim in invisibilem locum abire dicuntur, ubi ad resurrectionem usque generalem sint commoraturæ. Quo tempore corporibus redditæ per mille annos mansuræ sint in terra cum Christo, antequam ad cælum evehantur.

43. Ii porro nituntur præsertim capite 20. Apocalyp. Beati Joannis Apostoli, ubi, quæ allegorice dicuntur (ut tum variis scripturæ locis,

locis, quibus millenariorum doctrina clarissime rejicitur tum perpetua sæculorum omnium traditione constat) ad verbum non ad sententiam accipiunt; sic enim scribit Auctor sacer: *Et vidi Angelum descendentem de cælo Et apprehendit draconem, serpentem antiquum, qui est diabolus, Et sathanas, Et ligavit eum per mille annos: id est per universum tempus; quod a Christi mortē ad Antichristi dies intercedit, posito nempe finito tempore loco indefiniti, ut Deuteronomii c. 7. v. 9. & I. Paralip. c. 16. v. 15. & Psal. 104. v. 8. sumitur numerus finitus pro indefinito his verbis: In mille generationes.*

Et misit eam in abyssum, sive in infernum Et clausit, Et signavit super illum, ut non seducat amplius gentes: id est, ut non tam facile, quam antehac in homines grassetur, nec electos ad Ecclesiam Dei venturos impediat, donec consumantur mille anni, hoc est, donec veniat Antichristus. Et post hæc oportet illum solvi modico tempore, scilicet tribus annis cum dimidio, quod est tempus regni Antichristi.

Et vidi sedes, Et sederunt super eas, quibus potestas judicandi populos cum Christo concessa est, Et judicium datum est illis: Et vidi animas decollatorum, sive securi percussorum, propter testimonium Jesu, Et propter verbum Et vixerunt Et regnaverunt cum Christo mille annis. Hæ porro anime

decollatorum propter testimonium JEſu; a corporibus ſunt ſecretæ. Itaque ſi cum Chriſto vivere, ac regnare dicuntur mille annis, ubi, niſi in cœlis regnant? Non ergo hic exprimitur regnum terreſtre Millenario- rum, quod poſt corporum duntaxat reſurre- ctionem futurum perhibent. *Hæc eſt reſurre- ctio prima*, qua beatæ mentes ſine corporis conſortio cum Chriſto vivunt, & regnant.

Ceteri mortuorum, ſcilicet reprobi & dam- nati, *non vixerunt*, nempe beata illa vita; ſed in mortem primam traditi ſunt, hoc eſt in damnationem animæ extra corpus tor- quendæ.

Beatus & ſanctus, qui habet partem in reſur- rectione prima: in his ſecunda mors, nempe damnatio animæ ſimul & corporis in gene- rali judicio *non habet poteſtatem*; ſed erunt ſa- cerdotes Dei & Chriſti; quia ſemper ſeipſos ut hoſtias viventes in laudis ſacrificium Deo offerent; & regnabunt cum illo mille annis, ſive uſque ad reſurrectionem generalem.

Et cum conſummati fuerint mille anni, ſolve- tur ſathanas de carcere ſuo, & exhibet & sedu- tet gentes, ſcilicet tempore Antichriſti. Et poſtea cum ipſo ac reprobis omnibus in ſta- gnum ignis, & ſulphuris æternum crucian- dus mittetur. *Hæc eſt mors ſecunda*; Juſti ve- ro reſumptis corporibus in cœlum transfe- rentur, & erit *reſurrectio ſecunda*.

Hæc ſane omnia cum millenariorum opi-
nionæ

nione non cohærent, cumque hæc opinio innummeris sacre scripturæ testimoniis clarissime proscribatur; mirum non est, si universa traditio Ecclesiastica in conciliorum decretis, in patrum sententiis, in summorum pontificum rescriptis, in precibus publicis, ac liturgiis, quæ fusiùs a sacre Theologiæ Doctoribus recensentur, consignata millenariis omnino repugnet.

44. Millenariorum errori affinis est alius *de dilata animarum visione beatifica*, cui Joannes XXII. summus pontifex aliquamdiu favisse memoratur; In hoc consistit, quod animæ justorum, quantumvis ab omni peccatorum inquinamento purgatæ sint, non tamen ante extremum judicium, & generalem corporum resurrectionem Divinæ essentiæ conspectu censeantur fruituræ.

Verum is ipse Pontifex scriptis ad Philippum VI. Galliarum regem literis, declaravit, se quæstionem *de retardata visione beatifica* Theologis tantum agitandam proposuisse, nulli vero parti immobiliter adhæsisse. Quin etiam morti proximus expresse declaravit, animas puras statim post obitum ad claram Dei visionem admitti.

Benedictus item XII. Joannis XXII. successor damnavit errorem *de dilata visione beatifica*, retinuitque doctrinam, quam ante ipsum promulgaverant Romani Pontifices, & nominatim Innocentius III. lib. 3. decret.

cret. Gregorii tit. 43. *de presbytero non baptizato. c. 2.*

✓ Sed nihil in ea re dubii reliquit Concilium Trid. Sess. 25. ubi de invocatione Sanctorum agit. Docet enim aperte tam contra Millenariorum, quam contra aliorum errores, regnare nunc Sanctos cum Christo, & orationes suas ipsi Deo pro hominibus per Christum Dominum offerre. Idem antea definierat Concilium Florentinum. Non igitur expectant homines iusti ultimum iudicium, ut Deo fruantur: sed quicumque in ipsa morte reperiuntur ab omni peccati labe immunes, ad claram & intuitivam Dei visionem citra dilationem admittuntur.

45. Quinto. Quod si quid ipsis eluendum super sit, vel ex culpis lethalibus, quarum poenitentiam propter vitæ brevitatem non absolverint; vel etiam ex erratis venialibus (a quibus nec ipsi iusti sunt immunes) si modo in fide & charitate Christi usque ad extremum vitæ spiritum permanserint, purgatorii ignibus post mortem mundantur, ut ab omni inquinamento puri coelestem aulam tandem ingredi mereantur. Hæc doctrina colligitur ex Matth. c. 12. v. 32. ubi Christus Dominus sic loquitur: *Quicumque dixerit verbum contra filium hominis, remittetur ei, qui autem dixerit contra Spiritum sanctum, non remittetur ei, nèque in hoc seculo, neque in futuro.* Ergo sunt quædam peccata, quæ remittuntur in

in sæculo futuro. Neque enim inquit Sanctus Augustinus lib. 1. de civit. Dei c. 24. de quibusdam veraciter diceretur, quod non eis remittatur neque in hoc, neque in futuro sæculo, nisi essent, quibus, etsi non in isto, tamen remittitur in futuro.

Quamobrem idem sanctus Doctor Sermone 172. de verbis Ap. docet orationibus Ecclesiæ, sacrificio salutari & eleemosynis adjuvare mortuos, ut cum eis misericordius agatur a Domino, quam eorum peccata meruerunt. Hoc enim a Patribus traditum universa observat Ecclesia, ut pro eis, qui in corporis & sanguinis Christi communione defuncti sunt, cum ad ipsum sacrificium loco suo commemorantur, oretur, ac pro illis quoque afferri commemoretur. Quemadmodum lib. 2. Machab. de Juda Machabæo legitur, quod 12000. Drachmas argenti miserit Jerosolymam, ut offerretetur pro peccatis mortuorum sacrificium. Ubi Auctor sacer addit: Sancta ergo & salubris est cogitatio pro defunctis exorare, ut a peccatis solvantur. —

46. Sexto. Post universale iudicium, quo Christus Dominus in secundo suo adventu vivos & mortuos iudicaturus est, non erit amplius locus medius, sive purgatorius; sed duæ tantum erunt partes; altera ad dexteram, nempe eorum, qui æternam beatitudinem fuerint consecuti; altera ad sinistram, scilicet eorum, qui ad supplicium æternum

R s.

fuerint

fuerint damnati. Id constat ex Matth. c. 25. v. 31. & sequent. Cum autem venerit filius hominis in maiestate sua & omnes Angeli cum eo, tunc sedebit super sedem maiestatis sue; & congregabuntur ante eum omnes gentes, & separabit eos ab invicem, sicut pastor segregat oves ab hœdis: & statuet oves quidem a dextris suis, hœdos autem a sinistris. Tunc dicet Rex his, qui a dextris ejus erunt; venite benedicti Patris mei, possidete paratum vobis regnum a constitutione mundi. . . . Et his qui a sinistris erunt: discedite a me maledicti in ignem æternum, qui paratus est diabolo & angelis ejus. . . . Et ibunt hi in supplicium æternum, justi autem in vitam æternam.

47. Hanc divisionem in ipsa cruce præmonstravit Christus secundum Sanctum Augustinum tractatu 31. in Joannis Evang. Ipsa Crux, si attendas tribunal fuit: in medio enim Judice constituto unus latro qui credidit, liberatus: alter, qui insultavit, damnatus est, jam significabat quod facturus est de vivis & mortuis, alios positurus ad dexteram, alios ad sinistram: similis ille latro futuris ad sinistram, similis alter futuris ad dexteram.

48. Igitur ut beatitudo Sanctorum nullum habebit finem, sic pœnæ damnatorum futuræ sunt æternæ. Frustra itaque, inquit idem S. Doctor in Enchirid. de Fide, Spe, & Charitate. Nonnulli, imo quam plurimi æternam damnatorum pœnam & cruciatus sine intermissione

fione

sione perpetuos humano miserantur affectu, atque ita futurum esse non credunt; non quidem scripturis divinis adversando, sed pro suo motu dura quæque moliendo, & in leniorem flectendo sententiam, quæ putant in eis terribilius esse dicta, quam verius. Non enim obliviscetur, inquiunt, misereri Deus, aut continebit in ira sua miserationes suas. Hoc quidem in psalmo legitur sancto: sed de his sine ullo scrupulo intelligitur, qui vasa misericordiæ nuncupantur, quia & ipsi non pro meritis suis, sed Deo miserante de miseria liberantur. Aut si hoc ad omnes existiment pertinere, non ideo necesse est, ut damnationem opinentur posse finire eorum de quibus dictum est, & ibunt isti in supplicium æternum: ne isto modo putetur habitura finem quandoque felicitas etiam illorum, de quibus e contrario dictum est, *justi autem in vitam æternam.*

Ut vero inæqualis erit gloria pro meritorum inæqualitate, ut postea dicam, sic pœnæ pro varietate meritorum erunt inæquales: idque tradit laudatus jam Ecclesiæ Antistes lib. citato. *Mitissima sane omnium pœna erit eorum, qui præter peccatum, quod originale traxerunt; nullum insuper addiderunt: & in ceteris, qui addiderunt, tanto quisque tolerabiliorem ibi habebit damnationem, quanto hic minorem habuit iniquitatem.*

49. Ex quibus verbis constat parvulos juxta mentem Divi Augustini non tantum puniendos esse pœnæ damni, ut vocant, quam
nempe

nempe a regno cœlorum excluduntur ; sed etiam pœna sensus æternum esse cruciandos. Id autem multo apertius aliis locis declarat.

Docent tamen multi Theologi , solam damni pœnam originali peccato tribui , pœnam vero *sensus* soli peccato actuali. Quæ de re nihil est ab Ecclesia definitum.

50. Septimo. Quod spectat ad corporum resurrectionem , fide certum est , in secundo Christi adventu mortuorum corpora ad vitam esse revocanda , & cum humanis mentibus denuo conjungend. Creditur & carnis resurrectionem , inquit D. Augustinus lib. de fide & symbolo , non tantum , quia reparatur anima , quæ nunc propter carnales affectiones caro nominatur ; sed etiam hæc visibilis caro , quæ naturaliter est caro , cuius nomen anima non propter naturam , sed propter affectiones carnales accepit ; non hæc ergo visibilis , quæ proprie dicitur caro , sine dubitatione credenda est resurgere. Videtur enim Paulus Apostolus eam tanquam digito ostendere , dum dicit , oportet corruptibile hoc induere incorruptionem , cum enim dicit , hoc , in eam quasi digitum intendit ; & lib. 22. de civitate Dei cap. 20. Absit autem , ut ad resuscitanda corpora , vitæque reddenda non possit omnipotentia creatoris omnia revocare , quæ vel bestie vel ignis absumpsit , vel in pulverem cineremve collapsum , vel in humorem solutum , vel in auras est exhalatum. Et postea. Unde jam
etiam

etiam quaestio illa solvenda est, quæ difficilior videtur cæteris: ubi quaeritur cum caro mortui hominis etiam alterius sit viventis caro, cui potius eorum in resurrectione reddatur? si enim quispiam confectus fame, atque compulsus vescatur cadaveribus hominum, quod malum aliquoties accidisse, & vetus testatur historia, & nostrorum temporum infelicia experimenta docuerunt; num quisquam veridica ratione contendet, totum digestum fuisse per imos meatus, nihil inde in ejus carnem mutatum atque conversum, cum ipsa macies quæ fuit, & non est, satis indicet, quæ illis escis detrimenta suppleta sint; jam itaque aliqua paulo ante præmissi, quæ ad istum quoque nodum solvendum valere debebunt; Quid enim carniū exhaust fames, utique in auras est exhalatum: Unde diximus omnipotentem Deum posse revocare, quod fugit. Reddetur ergo caro illa homini, in quo esse caro humana primitus cepit; ab illo quippe altero tanquam mutuo sumpta deputanda est: quæ sicut es alienum ei redhibenda est, unde sumpta est. Sua vero illi, quem fames exinanierat, ab eo, qui potest etiam exhalata revocare, reddetur. Quamvis, & si omnibus periisset modis, nec ulla ejus materies in ullis naturæ latebris remansisset, unde vellet, eam repararet omnipotens. Sed propter sententiam veritatis, qua dictum est, capillus capitis vestri non peribit, est absurdum, ut putemus, cum capillus hominis perire non possit, tantas carnes fame depastas atque consumptas perire potuisse.

potuisse. Adde S. Thomam in supplemento summæ Theologicæ, quæst. 75. art. 1.

§ 1. Quæres secundo, quid præcise sit lumen gloriæ, quod ad Dei visionem necessarium esse asseruimus.

Respondeo. Lumen gloriæ spectari posse, vel in Deo, vel in mente creata; si spectetur in Deo, nihil aliud esse videtur quam Deus ipse, quatenus mentem creatam supernaturaliter illuminat, eamque ad intuitivam sui visionem, ad quam naturæ viribus pervenire non potest, evehit; si vero spectetur in mente creata, non male definiri videtur, *supernaturalis illustratio mentis create, qua Deus ipse revelata facie præbet se videndum.*

§ 2. Quæres tertio. Utrum beatitudo futura sit in omnibus æqualis?

Respondeo, non fore; scriptura enim sacra sæpe testatur Deum redditurum unicuique secundum opera ejus, quia beatitudo præmium est, & merces. Sed opera non sunt in omnibus æqualis meriti; qui quondam fuit error Stoicorum inter Philosophos, & postea Joviniani inter hæreticos. Ergo non reddet Deus unicuique parem gloriam, sive, quod idem est, beatitudo non erit in omnibus æqualis.

Objectum quidem beatificum, sive Deus ab omnibus & singulis possidebitur, idque significat denarius, qui singulis operariis distribuitur, Math. cap. 20. v. 9. ut diserte explicat

plicat S. Augustinus lib. de Sancta Virginitate, cap. 26. sed quilibet ab eo non æqualiter illuminabitur nec æquali gaudio perfunderetur; Nam sicut *stella a stella differt in claritate* ut ait Apostolus 1. ad Cor. c. 15. v. 41. Sic & *resurrectio mortuorum*, in qua scilicet multæ erunt mansiones, & in multis mansionibus alius alio beatiore futurus est.

Neque tamen ulla hinc nascetur invidia inter beatos; quoniam inferiores in beatitudine omnino sua sorte contenti erunt, nec quidquam ultra expetent: sicut in convivio unusquisque pro fame sua, & stomachi capacitate cibos sumit ad satietatem; nec qui minus edax est, alteri invidet, quod plus manducet, quoniam uterque est satiatus. Quare idem S. Augustinus cap. ult. lib. ult. de civit. Dei. *Id, inquit, etiam beata civitas illa magnum in se bonum videbit, quod nulli superiori ullus inferior invidet . . . sic itaque habebit donum alius alio minus, ut hoc quoque donum habeat, ne velit amplius.*

53. Quæres quarto. Utrum beatitudo obtenta possit amitti?

Respondeo, non posse; nam primo æterna est, ut testatur Christus Dominus. Matth. cap. 25. v. 46. Deinde cum ipsa sit summum bonum: debet excludere omne malum; sed si posset amitti, non excluderet omne malum; siquidem posse amitti est malum, ergo felicitas obtenta non potest amitti.

54. Quæ-

54. Quæres quinto. Utrum amor in Dei possessione sit præstantior visione, aut vicissim?

Respondeo. Visionem & amorem in beatitudine ejusdem esse fere dignitatis. Præit quidem visio; succedit & perficit amor.

Hæc ultima quæstio & alia id genus, quæ paulo curiosius a Philosophis & Theologis inquiruntur, scientiam humanam nec amplificant, nec exornant.

Ad alia igitur utiliora pergimus.

CAPUT II.

De actibus humanis.

Quisnam sit finis ultimus, Summumque Bonum, declarari statim oportuit, ut in ipsum omnes actus humani dirigerentur: nunc spectandi sunt ipsi actus humani, quatenus certis regulis in eum finem ab Ethica sunt dirigendi.

Primo igitur dicendum, quid sit actus humanus, & quoduplex. Secundo an omnis actus humanus sit voluntarius. Tertio, an omnis actus sit liber. Quarto de bonitate & malitia actuum humanorum agendum.

§. I.

Quid & quotuplex sit actus humanus.

N. I.

Actum humanum cum S. Thoma appellamus cum ; qui fit ab homine humano modo operante, id est, agente cogitato, & consulto : ut actus *humanus* secernatur ab eo actu, qui *hominis* dicitur, quique ab homine fit citra mentis attentionem.

Ex actibus vero humanis alii sunt interiores, qui *elicti* vulgo nominantur ; alii sunt exteriores, qui dicuntur *imperati*.

Actus *interiores* seu *elicti* dicuntur ii, qui eliciuntur a voluntate, in eaque consummantur : ii que revocari possunt ad amorem, & odium.

Actus *exteriores* seu *imperati* vocantur, qui a voluntate quidem imperantur, sed viribus corporeis exercentur, quales sunt ambulatio, locutio, scriptio, &c.

Actus interiores voluntatis.

2. **U**T actuum interiorum numerus inea-
tur, unumquemque nostrum ad id,
quod in seipso fieri sentit, attentum esse oportet. Primo enim bonum generatim seu beatitudinem expetimus ; malum vero seu

miseriam refugimus, ut jam sæpius dictum est. Unde primus voluntatis actus est *amor boni generatim*, seu felicitatis nostræ, & odium mali, seu miseriæ. Bonum ergo generatim, seu felicitas nostra, si spectetur quatenus nobis est conveniens, recte dicitur *primarium voluntatis nostræ objectum*. Si vero consideretur quatenus desideria nostra terminat, aut sistit, vocatur *finis ultimus*. Si denique prout sui possessione nos efficit beatos inspicatur, felicitas nostra nominatur.

Secundo, ut bonum assequamur, & malum devitemus, media quædam usurpanda sunt, seu viæ & rationes incundæ; quare secundus voluntatis actus est *consultatio* vel *deliberatio*, seu mediorum ad nostrum finem ducentium inquisitio.

Tertio, ex iis mediis unum post illam consultationem eligimus: atque ita tertius voluntatis actus est *electio*, quæ non male desinitur *assumptio unius medii præ alio ad consequendum finem*.

Quarto denique, ubi per medium illud adepti sumus finem, in eo gratè conquiescimus, & ipso fruimur, si modo nihil nobis ulterius desiderandum videatur. Unde postremo loco posita est *fruitio*. Quod si aliquis in malum finem perductus esset, in eo doleret, & angeretur, præsertim si ab eo expedire se non posset.

Actus

Actus exteriores & imperati.

Actus imperatos appellamus eos, qui a voluntate imperantur & ab aliis facultatibus exercentur. Cujus definitionis occasione multa quæri solent in scholis, quæ ut committi à nobis non debent, sic longius quam par est, non sunt protrahenda.

4. Quærent primo, quid sit imperium, & ad quam facultatem pertineat?

Respondeo, imperium esse actum alicujus superioris aliquid *intimantis*, ut loquuntur Canonistæ, id est aliquid denunciantis, seu ad mentis *intima* deducentis, & ad illud exequendum compellentis. Quare & intellectum, & voluntatem includit: intellectum quidem, quia id quod *intimatur*, seu denunciatur in mentis *intima*, sic penetrare debet, ut intelligatur, nec ejus prætendi possit ignorantia; voluntatem vero, quia impulsio cum autoritate, seu jussio est ipsius voluntatis actio, non intellectus. Cumque autoritas illa & impellendi vis præcipua sit in imperio; hinc imperium præcipuo jure voluntati tribuendum videtur, præsertimque hoc præfenti loco, quo nihil aliud est, quam actus voluntatis inferiores potentias, hoc est, subiecta sibi sensuum & motuum organa secundum conditoris legem, inter mentem & corpus constitutam moventis & applicantis; omnes enim imperium per actum volunta-

tis designare volunt : Unde illud notissimum,

Sic volo, sic jubeo, sit pro ratione voluntas.

5. Quærent secundo, an voluntas moveat intellectum, & vicissim ab intellectu moveatur?

1. *Resp.* Neque intellectus voluntatem, neque voluntas intellectum proprie movet, cum sint una eademque res, nempe mens ipsa, quæ quatenus rem nude & simpliciter percipit, *intellectus* : quatenus vero in eam tanquam bonam & sibi convenientem fertur, *voluntas* aut *appetitus* nominatur ; sed cum nihil appeti possit aut amari, saltem explicite, nisi sit cognitum ; hinc fit, ut voluntas ab intellectu moveri, seu determinari dicatur, non tantum *quoad specificationem* actus, hoc est, ad hanc vel illam actionis speciem, v. g. ad rei cujusdam determinatæ amorem vel odium ; sed etiam *quoad exercitium* actus, hoc est, ad agendum vel non agendum ; quia voluntas sine prævia cognitione non agit, hoc est, nihil appetit nec averfatur, saltem explicite & determinate.

Intellectus vero a voluntate non semper movetur quoad exercitium actus, dum percipit, quia sæpius contra inclinationem nostram perceptiones, seu idæ in intellectu excitantur. Aliquando tamen voluntas applicat intellectum ad percipiendum, v. g. ad studium, eoque sensu voluntas dici potest move-

movere intellectum : melius tamen mens ipsa sese ad intelligendum determinare dicitur.

6. Quærunt tertio, utrum voluntas motibus appetitus sentientis impèret?

Respondeo. Voluntas merito dicitur politicam habere imperium in varios appetitus sentientis motus, quatenus motus illos quodammodo sedare potest, si maximam adhibeat attentionem ad res aliquas, quæ aliis motibus occasionem præbeant; sed tamen iis motibus despotice non imperat, nec absolute impedire potest, quo minus ii ex varia objectorum occasione, vel corporis dispositione nonnunquam in organis corporeis excitentur. Unde Apostolus ad Romanos 7. v. 23. *Video autem, inquit, aliam legem in membris meis repugnantem legi mentis meæ, & captivantem me in lege peccati, quæ est in membris meis.* Potest tamen voluntas nostra corporeis motibus, qui nunc post humanæ naturæ lapsum nobis invitis in nobis excitantur, non obtemperare, & assensum suum sustinere. In statu innocentie motus omnes corporis omni modo rationi erant subiecti.

Quærunt quarto, an voluntas imperet sensibus internis, nempe imaginandi vi, & memoriæ?

Respondeo, non imperare, quia plurimæ, etiam invita voluntate in nobis excitantur.

species, aut imagines. Deinde non recordamur, nec obliviscimur rerum singularum, cum volumus.

8. Quærunt quinto, utrum voluntas sensibus externis & vi motrici imperet?

Respondeo, eam imperare sensibus externis, quatenus illorum organa, quamdiu sana sunt, continere potest, v. g. quatenus vel claudit, vel aperit oculos ad libitum; sed si oculi, vel aures pateant, impedire non potest, quo minus & luminis, & colorum, & sonorum sensus in nobis excitetur.

Item virtuti motrici imperat in iis motibus, qui dicuntur voluntarii, cujusmodi sunt motus brachii, pedis, &c. alijs vero, qui necessarii sunt, qualis est motus cordis & articularum, non imperat: soli autem proprie motus voluntarii inter actus humanos recensentur.

§. II.

An omnis actus humanus sit voluntarius.

9. **V**oluntarium dicitur id, quod a voluntate proficiscitur, ut spontaneum, quod fit sponte ac nullo cogente. In hoc autem spontaneum & voluntarium inter se discrepant, quod omne voluntarium sit spontaneum, non vice versa: spontaneum quippe tum belluis, tum rebus inanimatis tribuitur; nam

nam equus ad aquam sponte currere, & aqua sponte diffluere, dicitur : voluntarium solis agentibus ratione præditis convenit.

Objectum actionis est id, circa quod actio versatur. *Finis*, id propter quod fit. *Circumstantiæ* denique sunt ea omnia, quæ actionem comitantur.

Voluntarium definiri potest, id quod fit cum cognitione intellectus, & propensione voluntatis. Duo enim maxime voluntario sunt opposita, scilicet *vis* seu *coactio*, & *ignorantia*. *Vis* autem a Jurisconsulto Paulo l. 2. dig. tit. quod metus causa &c. definitur *majoris rei impetus, qui repelli non potest* : addendum, & voluntatis propensioni est contrarius : ignorantia vero est *absentia cognitionis*.

Hinc sequitur, involuntarium recte definiri, id quod fit *vel vi, vel ignorantia*. Sic igitur.

Propositio I.

10. **V**is tollit omnino voluntarium ; seu quæ fiunt per vim, sunt involuntaria.

Prob. Voluntarium dicitur id, quod sponte fit, & cum propensione voluntatis : sed quæ fiunt per vim, non fiunt sponte & cum propensione voluntatis, v. g. cum quis truditur in carcerem, is non sponte, sed invitus carceris ostium subit. Ergo quæ fiunt per vim, sunt involuntaria.

Cum autem duplicis generis sint voluntatis actus; ut superius (N. 1. & 2. huj. cap.) explicatum est, scilicet actus interiores & proprii, quos elicitos vocant, ut amor & odium; & actus exteriores seu imperati ut ambulatio, locutio &c. videndum quinam proprie eogi possint, seu externæ vi nonnunquam subjici. Sit ergo.

Propositio II.

II. *Vis inferri non potest voluntati quoad actus interiores & proprios.*

Probat. Vis non potest inferri voluntati quoad ejus actus, qui semper cum voluntatis propensione fiunt: nam violentum dicitur, quod fit contra inclinationem voluntatis; actus autem interiores & proprii voluntatis fiunt semper cum ipsius propensione: nam amor v. g. nunquam esse potest contra voluntatis inclinationem, ut nemo diffitetur. Ergo vis inferri non potest voluntati quoad actus interiores & proprios.

Enimvero si vis Physica & cogens posset inferri voluntati, tum ea veller & nollet simul: veller quidem ex hypothesi; nollet vero, quia sibi ipsi volenti repugnaret, quod absurdum est, ergo voluntas cogi non potest quoad actus interiores & proprios.

Dices. Deus est potentior humana voluntate; ergo movere potest voluntatem humanam

manam etiam invitam: sive potest eam quoad actus interiores cogere.

Resp. Licet Deus potentior sit voluntate nostra, non tamen eam cogere potest, sed tantum potest eam mutare, & ex nolente volentem efficere. Nam ut modo dictum est, cogere voluntatem quoad actus interiores & proprios, est eam movere contra ipsius inclinationem, adeo, ut velit invita, sive ut velit nolens, cupiat refugiens, quæ manifestam involvunt contradictionem. Deus igitur voluntatem creatam per gratiam mutat, non cogit.

Propositio III.

12. **V**is inferri potest voluntati quoad actus exteriores & imperari solitos.

Prob. Actus exteriores & imperati sunt ii, quos voluntas imperat, quique viribus corporis exercentur (N. 3. supra). Sed iis actibus vis inferri potest, siquidem potest quis alterius brachium impellere contra ipsius inclinationem: ergo vis inferri potest voluntati quoad actus externos & imperari solitos.

13. Ad vim proxime accedit Metus, id est, *instantis vel futuri periculi causa mentis trepidatio juxta legem, ait prætor ff. quod metus causa gestum erit.* Intelligendus est autem metus non vani hominis, sed qui merito, & in ho-

minem constantissimum cadit, ut loquitur lex 6. ejusdem tit. sive *majoris mali* ut ait Labeo l. 5. eodem tit. Hic metus ex varia eorum, qui metuunt, indole gravis, aut levis censeri debet; sed semper gravis est metus mortis, mutilationis, & ejusmodi. Sit igitur

Propositio IV.

14. **Q**Uæ fiunt ex metu gravi aliquo modo sunt involuntaria, nempe quatenus in se spectantur; non vero quatenus comparate ad aliud majus malum.

Prob. Quæ fiunt repugnante voluntate, ea in se spectata sunt involuntaria; sed quæ fiunt ex metu gravi, ea repugnante voluntate fiunt; v. g. qui sicario mortem intentanti crumenam porrigit, invitus id agit; unde contractus, qui ex metu gravi pacti sunt, leges declarant irritos: sic enim ait Prætor Romanus lege 1. tit. modo allegato: *Quod metus causa gestum est, ratum non habebo.* Ergo quæ fiunt ex metu gravi, ea in se spectata sunt involuntaria.

Probatur secunda propositionis pars. Ea censeri debent voluntaria, quæ fiunt a principio intrinseco seu voluntate cum cognitione eorum omnium, in quibus consistit actio. Sed quæ fiunt ex metu, si spectentur comparate ad majus malum, sive verum, sive apparens, quod aliquis declinare cupit, ipsa
oriun-

oriuntur a principio intrinseco, seu voluntate, cum cognitione eorum omnium, quæ ad actionem pertinent: v. g. dum mercator adversa tempestate merces suas imminenti periculi metu ad evitandam mortem, & vitam conservandam in mare projicit, voluntatem habet determinatam ad hunc mercium jactum, omnesque hujus actionis circumstantias novit. Ergo quæ fiunt ex metu, spectata comparate ad majus malum, sive verum, sive apparens, quod vitandum est, censeri debent voluntaria.

Atque eam ob causam, si quis metu mortis religionem Christianam abnegaret, is gravissimæ in Deum offensæ reus habendus esset, quod vitam religioni præponeret: cum tamen religionem nostram ad extremam usque sanguinis guttam profiteri debeamus, ut intelligi potest tum ex Matth. cap. 10. v. 33. tum Luc. c. 9. v. 26. legatur etiam 62. Canon Apostolorum cum notis Balsamonis.

15. Quæres. Quid sit agere *ex metu*, & quid agere *cum metu*.

Respondeo, illum agere *ex metu*, qui propter metum sic agit, ut sine metu non esset acturus: illum vero agere *cum metu*, cujus actionem comitatur metus, non tamen est illius causa: sic fur cum metu furatur, non ex metu, quia sublato metu libentius adhuc furaretur. Unde quæ fiunt cum metu, voluntaria esse nihil verat.

16. Nunc

16. Nunc quærendum, quid, & quotuplex sit ignorantia; quæve illa sit, quæ voluntarium impediât.

Ignorantia est *absentia* seu *carentia cognitionis*, quæ si cum aliquo errore sit conjuncta, vocatur ignorantia *prave dispositionis*, aut *pravi habitus*, quia *error* est prava mentis dispositio, vel *pravus habitus*: si cum errore conjuncta non sit, tum vel est ignorantia ejus rei, quam homo naturæ suæ conditione scire non debet; v. g. quantus sit hujus mundi aspectabilis ambitus, & vocatur ignorantia *purae negationis*, quia naturæ nostræ denegata est a Deo scientia huic ignorantiae opposita; vel est ignorantia ejus rei, quam scire nos oportet & dicitur ignorantia *privationis*, seu *privatio cognitionis*, qua debemus esse informati.

17. Hæc ignorantia spectari potest, vel ratione ejus, qui ignorat; vel ratione rei, quæ ignoratur; vel demum ratione ipsius actionis, quæ fit ex ignorantia.

Si spectetur ratione ejus qui ignorat: vel est *vincibilis*, ut ajunt, seu *superabilis*, vel *invincibilis* seu *insuperabilis*.

Ignorantia *vincibilis* est ea, quæ adhibita morali diligentia vinci potest: & duplex est; vel *affectata*, ut cum quis de industria aliquid ignorare affectat, nempe præceptum aliquod, ut liberius illud transgredi possit; vel est *crassa*, vel *supina*; cum quis eam saltem indirecte

recte velle videtur; nempe tum adeo supinus est, ut nullo modo ipsam expellere & dissipare curet: v. g. si quæ officii sui sunt, addiscere negligat.

18. Cujuscunque autem sit rationis ignorantia illa *vincibilis*, nunquam tollit voluntarium, nec proinde excusat a peccato.

Ea quippe ignorantia non excusat a peccato, quam quis inculpatus obtendere non potest, nemo autem inculpatus potest obtendere ignorantiam *vincibilem*, cum in ea manere voluerit, vel eam expellere neglexerit. Ergo ignorantia superabilis non excusat a peccato, nec actum reddit involuntarium.

19. Ignorantia vero *invincibilis*, seu insuperabilis ea est, quæ adhibita humana diligentia superari nequit, & quæ proinde culpa vacat; sed ea locum habere nunquam potest in *juris naturalis* præceptis, ut postea ostendam.

20. Si vero ignorantiam ratione rei, quæ ignoratur, consideres; alia est *juris*, qua nempe ignoratur jus ipsum, seu res, quæ sciri debet, ut si quis ignoret dogmata suæ religionis, vel leges suæ civitatis; alia est *facti*, qua factum aliquod ignoratur: ut si quis probe tenens codicillos deficiente testamento in usu fuisse apud Romanos, ignoret hunc usum imperatoris Augusti auctoritate obtinere cepisse, quod patet ex titulo ultimo libri secundi institutionum Juris Civilis Romani,

21. Si

21. Si denique spectetur ignorantia ratione ipsius actus, alia est *antecedens*, alia *comitans*, alia *subsequens*.

Ignorantia *antecedens* ea est, quæ determinationem voluntatis antecedit, & qua sublata non fieret actio: seu, quæ est conditio, sine qua quis non esset acturus: ut cum apud Ovidium libro 7. Metamorphoseon Cephalus occidit uxorem suam Procrin inter dumos latitantem, putans esse feram bestiam, hujus ignorantia erat antecedens, & conditio sine qua uxorem non occidisset. Hæc ignorantia, si vinci nequiverit, impedit quominus actus sit voluntarius.

Id enim voluntarium non est, quod citra ignorantiam non fieret, quodque dolor, & pœnitentia sequitur.

Sed quod fit ex ignorantia antecedente & insuperabili, est huiusmodi: non enim fieret, si adesset cognitio, & postquam factum est, dolori ac pœnitentiæ materiam præbet. Ergo est omnino involuntarium.

Ignorantia comitans ea est, quæ comitatur actionem, non vero est illius causa, vel occasio: ut si quis capitalem hostem, cuius mortem quærit, pro fera inter venandum occideret, hæc ignorantia comitaretur quidem actionem sed non esset illius causa: siquidem etiam remota ignorantia fieret actio, ut ferunt de eo, qui cum inopinato novicam læsisset, *euge inquit, nec hoc male*: hæc
igno-

ignorantia neque impedit, neque facit voluntarium.

22. Ignorantia comitans nec facit, nec tollit voluntarium. Primo non facit voluntarium: quia voluntarium fieri debet cum cognitione. Deinde non tollit: quia quamvis adesset cognitio tamen actus fieret, ut paret exemplo hominis hostem suum pro fera occidentis, quem etiamsi cognosceret, ab eo tamen occidendo non abstineret. Unde huiusmodi actiones nec *voluntarie* dicuntur, nec *involuntarie*, sed *non voluntarie*, ex quo non ex ignorantia fiunt, sed cum ignorantia.

Ignorantia demum *consequens* ea dicitur, quæ vel *explicitam* vel *implicitam* voluntatis determinationem sequitur, seu quam vel directe vel indirecte quis voluit, v. g. fieri potest, ut quis ignorare velit, quo die indictum sit ieiunium, quo liberius gulæ indulgeat, hæc proprie est ignorantia affectata, quæ adeo non excusat a peccato, ut illud potius augeat: adeoque non tollit voluntarium.

23. Ignorantiæ affinis est *concupiscentia*, quæ tenebras menti affundit, rationemque conturbat, & a vero percipiendo non parum avertit. Unde illud quoque intuendum, an, & quatenus ea voluntarium impedire possit: quod ut facilius assequamur,

24. Observandum primo, *Concupiscentiæ* nomen

nomen vel pro corrupta hominis natura, vitiatoque, ut ita dicam fundo usurpari, id est pro ingenita nunc omnibus hominibus ad malum propensione, quæ a Theologis dicitur *sensualitas, fomes peccati, lex carnis, lex membrorum* &c. vel pro actu ipso seu motu appetitus sentientis seu partis corporeæ adversus spiritum rebellantis; quæ posterior acceptio propria est hujus loci. Nam corporeos motus & insultus post primi parentis peccatum voluntati rebelles esse novimus, & invita voluntate plerumque in organis corporeis grassari in pœnam rebellionis ipsius voluntatis humanæ, quæ legi divinæ non fuit obtemperans.

25. Observandum secundo. Concupiscentiam posteriori hoc modo sumptam duplici ratione debere considerari, nempe vel quatenus antecedit, vel quatenus sequitur voluntatis actum seu consensum.

Tum concupiscentia antecedit voluntatis consensum, cum spirituum animalium motus ob solam corporis affectionem, vel objectorum præsentiam in organis corporeis, nihil conferente imo repugnante voluntate excitatur: tum vero concupiscentia sequitur actum seu motum voluntatis, cum ei voluntas occasionem præbet.

Iraque si voluntatis actum sequatur concupiscentia, voluntariam eam esse certissimum est: imo quæ ex ea fiunt actiones, ad
pure

pure malitiæ peccata revocantur ; cum tunc voluntas *infirmi*ti, ut ajunt, & concupiscentiæ non cedat ; sed potius concupiscentiam ipsam sollicitet ac provocet.

Dubitatio igitur tantum est de concupiscentia antecedente, quæ ut solvatur, sit

Propositio V.

26. **C**oncupiscentia, etiam antecedens voluntatis consensum, non tollit voluntarium.

*Probat*ur. Illud voluntarium non tollit, quod nec voluntatis propensionem, nec intellectus cognitionem penitus adimit. Concupiscentia vero etiam antecedens nec propensionem voluntatis, nec intellectus cognitionem prorsus adimit : nam potius voluntas majori inclinatione fertur in obiectum, cum agit ex concupiscentia ; nec omnino per concupiscentiam prohibetur intellectus percipere ea omnia, quæ ad actionem spectant. Ergo concupiscentia etiam antecedens voluntarium non tollit. Imo ratione propensionis illud augere videtur, licet ratione cognitionis ipsum imminuat.

Solvuntur Objectiones.

27. **O**pp. primo. Concupiscentia antecedens prævertit voluntatis consensum : ergo tollit voluntarium.

P. Andr. Gordon Phil. P. I.

T

Resp.

Resp. Concupiscentia antecedens prævertit voluntatis consensum, ita tamen ut voluntas possit ei resistere. Nam ut ait Jacobus Apostolus Ep. Cath. c. 1. v. 15. *Concupiscentia cum conceperit, parit peccatum: peccatum vero cum consummatum fuerit, generat mortem.* Tametsi ergo concupiscentia antecedit voluntatis consensum, ei tamen voluntas semper resistere potest; nihilominus voluntas adeo illi quandoque non obstitit, ut vehementius in id, ad quod ex concupiscentia movetur, propendeat.

28. *Opp. secundo.* Quæ fiunt contra inclinationem voluntatis, sunt involuntaria; sed quæ fiunt ex concupiscentia antecedente, fiunt interdum contra inclinationem voluntatis, ut patet in iis, qui vulgo *infirmi* dicuntur, quique libidinibus non indulgent, nisi cum aliqua repugnantia. Ergo quæ fiunt ex concupiscentia antecedente sunt involuntaria.

Resp. Quæ fiunt ex concupiscentia antecedente sunt involuntaria, si fiant contra absolutam & efficacem inclinationem: non vero si fiant contra inclinationem inefficacem. *Infirmum* igitur hoc loco vocant Theologi eum, qui adhuc aliquam experitur voluntatis in peccando repugnantiam, in quo a *perverso* differt, qui sine ulla repugnantia peccat, ut inferius dicetur. Sed tamen ista infirmi resistentia non tam oritur ex ipsa actione

actione mala, quam ex effectu, qui pravam actionem subsequitur: nam poena displicet, non actio, quæ fit magna voluntatis propensione.

Non inficiamur tamen, eam esse posse concupiscentiæ antecedentis vim, ut omnem fere mentis rationem obnubilet: quo casu voluntarium minuitur, & peccatum facilius excusari debet. Sic qui ab aliquo laçessitus & irritatus in eum, ira fervente atque ad ulationem impellente sævit, levius peccat, quam si ultro, ac nullo instigante affectu ipsum verberibus oneraret. Unde etiam *motus*, qui vulgo *primo primi* vocantur, involuntarii a Theologis æstimantur.

29. Etenim primi concupiscentiæ motus duplicis generis distinguuntur a Theologis, scilicet *primo primi* & *secundo primi*.

Motus *primo primi* sunt ii, qui omnem prorsus voluntatis consensum & deliberationem sic antecedunt, ut potius a corporis machina, quam a ratione proficiscantur, qualis est motus ejus, qui ab aliquo percussus, repente conversa facie in eum insilit, priusquam ipsum, aut patrem, aut herum, aut alium sibi honorandum virum esse animadvertat: hujus generis motus minime sunt voluntarii.

Motus *secundo primi* vocantur, qui plenum duntaxat, & perfectum voluntatis consensum anteverrunt, non vero consensum in-

choatum, atque ut vocant *semi-plenum*: qualis est motus ejus, qui postquam causa cecidit, judicem diſterius inſectatur. Licet ipſius favore & authoritate opus adhuc ſibi deinceps futurum agnoſcat. Hi motus voluntarium omnino non tollunt, ſed tamen imminuunt.

Ex his patet reſponſio ad quaſtionem, quæ titulo capitis continetur: nam omnis actus humanus ſemper voluntarius eſt, niſi cum vis homini inferitur, aut metus gravis incutitur, aut ipſe ex ignorantia inſuperabili operatur.

§. III.

An omnis actus humanus ſit liber.

30. **A**ctum liberum vocamus eum, vel qui nullo cogente fit, vel etiam qui ſic exercetur ut omitti poſſit ad libitum. Nam duplex in actibus voluntatis diſtingui ſolet libertas a Theologis, ſcilicet libertas a neceſſitate externa ſive a coactione, & libertas a neceſſitate intrinſeca ſeu naturali.

31. Libertas a coactione ſive libertas ſpontaneitatis dicitur a Theologis, quæ omnem vim externam, id eſt, ab externo principio contra voluntatis propenſionem illatam remouet; qua libertate voluntas bonum generatim amat, & malum generatim odit; qua item beati Deum amare dicuntur; quia nul-

lo cogente, sed libentissime per amorem Deo adhærescunt:

Liberum igitur a *coactione* idem prorsus est, ac *voluntarium* seu *libens*, aut *spontaneum*; quod nempe fit a voluntate citra coactionem: adeoque omnis actus *voluntarius* est *liber a coactione*.

32. Libertas vero a *necessitate*, seu libertas *electionis* & *indifferentiæ*, quæ & *liberum arbitrium* & *libertas* simpliciter dicitur, ea est, quæ omnem necessitatem tam interiorem seu naturæ, quam exteriorem seu coactionis excludit. *Necessitatem naturæ*, seu *naturalem*, aut *naturalis propensionis* vocamus *determinationem* seu *propensionem* quandam voluntati a natura inditam ad aliquid necessario prosequendum, vel fugiendum v. g. ad bonum generatim necessario, non ex electione amandum, & malum odio habendum. *Necessitatem coactionis* seu uno verbo *coactionem*, appellamus, vim aliquam alicui contra propriam inclinationem illatam, ut cum truditur quis in carcerem.

33. In hoc igitur *coactio* a *necessitate naturali*, seu *naturalis propensionis* discrepat, quod *coactio* sit a principio extrinseco contra voluntatis inclinationem, & proinde tollat tum liberum, tum voluntarium; *necessitas vero naturalis inclinationis* fit a voluntate ipsa, nec proinde *voluntarium* tollat, sed solummodo

liberum stricte sumptum, quod nempe ex electione fit.

Quod si agendi vel non agendi necessitas sit tantum hypothetica, & consensum, seu electionem voluntatis sequatur, ea liberum arbitrium, seu libertatem *indifferentie* & *electionis* minime lædit: v. g. ex hypothese, quod me ad loquendum determinaverim, necessario loquor! sed hæc necessitas minime obstat, quominus possim loqui, vel a loquendo abstinere; unde liberum arbitrium in me remanet, cum eligendi potestas remaneat, quæ in eo maxime consistit, ut quis actum exercere possit vel omittere.

34. Quamobrem libertas *electionis* seu liberum arbitrium recte definitur a D. Thoma, *vis electiva*, id est, facultas eligendi unum præ alio.

Cum autem electio alia sit *ad agendum vel non agendum*; alia vero *ad agendum hoc vel illud, hoc vel illo modo*; duplex distinguitur libertas arbitrii, seu electionis & indifferentiæ, altera ad agendum, vel non agendum, quæ vocatur *libertas contradictionis*, quia *agere* & *non agere* sunt contradictoria; altera ad agendum hoc vel illud, hoc vel illo modo, v. g. ad amandum, vel odio habendum; ad loquendum, vel scribendum, quæ *contrarietatis*, vel *diversitatis* appellatur, quia *amare* & *odisse* sunt contraria seu opposita, *scribere* & *loqui* sunt diversa.

35. Definiri etiam potest *liberum arbitrium*, vis sui ipsius determinatrix:

Ex quo inferre licet, libertatem arbitrii non versari circa finem ultimum, seu beatitudinem nostram generatim, quia beatitudinem nostram non possumus non expetere. Sed nec versatur circa ea, quæ cum summo nostro bono necessariam habent connexionem, & sine quibus summum bonum obtineri non posset, cujusmodi sunt *esse & vivere*, saltem ipsius mentis: quia hæc quoque necessario amamus, ut docet S. Thomas 1. 2, quæst. 10. arr. 2. ad tertium. Quod autem S. Thomas de iis statuit, quæ cum summo bono necessario sunt connexa, id etiam de iis sentiendum, quæ necessariam habent cum summo vero connexionem, cujusmodi sunt axiomata communia, seu propositiones, quarum attributum in idea subjecti clare & distincte continetur; nam iis non potest nostra voluntas non assentiri.

Superest igitur, ut libertas circa ea tantum versetur, quæ *media* sunt ad finem, nec tamen cum eo sunt necessario connexa, seu quæ possunt modo videri bona, modo non bona, ut ait ibidem S. Thomas in corpore articuli.

36. Quamvis autem liberum arbitrium in hominibus adeo conspicuum sit, ut sine incredibile amentia in dubium revocari non possit, ipsum tamen a multis sublatum novimus. Nam ut omittam eos Philosophos,

qui omnia fato tribuunt (quales erat Democritus, & ejus affectæ) & Astrologos, qui omnia astrorum potestati subjiciunt; certum est exstitisse hæreticos tum veteres, tum novos, qui liberum arbitrium evertere sunt conati; quos omnes anathemate percussit Concilium Tridentinum Sessione 6. Canone 6. his verbis. *Si quis liberum hominis arbitrium post Adæ peccatum amissum & extinctum esse dixerit, aut rem esse de solo titulo, imo titulum sine re, figmentum denique a sathana inventum in Ecclesiam; anathema sit.* Neque aliud hoc loco Concilium definivit, quam quod scriptura sacra passim inculcat; quod Auctores sacri & profani testantur; quodque ipsa in nobis loquitur natura; etenim in libris sacris, Geneseos cap. 4. v. 7. ita Deus Cainum alloquitur: *Sub te erit appetitus . . . & tu dominaberis illius.* Ecclesiastici cap. 15. v. 14. *Deus ab initio constituit hominem, reliquit illum in manu Consilii sui.* Et v. 17. *Apposui tibi aquam & ignem, ad quod volueris, porrige manum tuam.* Et S. Augustinus in Psal. 91. *Aures tuæ posite sunt inter monentem Deum, & suggerentem serpentem.* Quare huc flectuntur, hinc avertuntur? non cessat sathanas suadere malum; sed nec Deus cessat suadere bonum. Sathanas autem non cogit invitum: in tua potestate est consentire, & non consentire.

Verum adeo hominum animis hæc inolevit persuasio, ut rationes & testimonia ad illius

Ius confirmationem congerere supervacaneum sit. Si enim nullum sit hominis arbitrium, vita humana omnino subvertitur; frustra dantur leges, adhibentur objurgationes, laudes, vituperationes, & exhortationes; neque ulla iusta bonis præmia, nec malis supplicia constituta sunt, si nequeamus, cum libet, agere, & ab agendo abstinere.

Quæ cum adeo vera sint, ut, qui iis resistere velit, *verberibus potius quam verbis* convincendus sit; dubium non est, quin extet in homine libertas a coactione.

37. Porro cum nullus sit merito locus, nisi ubi quis ex electione agit, sequitur, libertatem a coactione seu vi externa non sufficere ad merendum siue præmium, siue pænam; sed ad id necessariam esse libertatem a necessitate etiam intrinseca & naturali, qua quis agere possit, vel non agere ad libitum.

Eaque merendi ratio nobis in statu præsertim naturæ per peccatum lapsæ positæ convenit; quo quidem in statu omne nostrum meritum inde dicitur, quod auxilio Divino adjuti *abstineamus a malo*, quod penes nos est admittere; & *faciamus bonum*, quod omittere possumus, juxta illud Ecclesiast.

31. v. 8. *Beatus dives, qui inventus est sine macula, & qui post aurum non abiit, nec speravit in pecunia & thesauris. Quis est hic & laudabimus cum! fecit enim mirabilia in vita sua*

qui potuit transgredi, & non est transgressus, facere mala, & non fecit.

Non tamen ad essentiam libertatis a necessitate intrinseca & naturali pertinet ut quis vel per *commissionem*, vel per *omissionem* peccare possit, seu deficere. Nam Deus, qui liberissimus est, deficere utique non potest. Hoc ergo, tantum requiritur, ut pro lubitu agere queat, vel non agere. De hac libertate sit.

Propositio I.

38. **E**Xtat etiam in homine libertas a necessitate intrinseca & naturali quæ liberum arbitrium seu libertas electionis & indifferentiæ, seu simpliciter libertas nominatur.

Prob. Libertas electionis, seu liberum arbitrium est vis electionis, seu facultas eligendi unum præ alio, & consequenter necessitatem omnem tum extrinsecam, tum intrinsecam excludit. In homine autem est vis electiva; nam homo præditus est intellectu, quo res cognoscit, & voluntate, qua ex multis rebus, quæ non sunt summum bonum, unam potest assumere, aut relinquere ad libitum, ut omnes experiuntur, ergo homo est natura sua liber, seu existit in homine liberum arbitrium.

Solvun-

Solvuntur Objectiones.

39. **O**pp. primo. Quicquid liber est libertate electionis, potest velle & non velle, operari & non operari. Sed homo hoc non potest secundum testimonium Ap. ad Rom. 9. v. 19. *Igitur non volentis, neque currentis, sed misipientis est Dei.* Ergo homo non est liber, saltem libertate electionis.

Resp. Multa operamur, a quibus abstinere possumus. Ad auctoritatem autem Apostoli sic respondet D. Thomas non est volentis neque currentis solius, concedit: non est volentis neque currentis a Deo adjuti, negat. Licet enim homo solus absque auxilio divino nihil possit, omnia tamen potest *in eo, qui ipsum confortat.* Quare negat consequentiam.

At certum est hoc loco non agi de libertate nostra a D. Paulo, sed de hominum electione ad gloriam, quæ *non ex merito bonæ voluntatis, aut boni operis seu conversationis præcedentis aut prævisæ pendet, sed ex solo ac libero beneplacito Dei misipientis*: ut post Cajetanum scribit Estius in hunc locum.

40. Oppones secundo, qui libertatem habet electionis, facit quod vult; sed homo non facit, quod vult, ut ait Apostolus ad Romanos c. 7. v. 19. *Non enim quod volo bonum, hoc facio, sed quod nolo malum, hoc ago.* Ergo homo non habet libertatem electionis.

Respon-

Respondeo: qui libertatem habet electionis, facit quod vult, dummodo nihil velit, quod suas vires excedat. Sæpe autem vult homo id, quod non est in sua potestate: v.g. S. Paulus ad Corinthios c. 7. v. 7. Voluisset omnes homines ad quos scribebat, sibi esse similes, nempe continentes, quod quidem ab ipsius voluntate non pendeat.

Textum autem Apostoli, tum versu allegato, tum versu 15. ejusdem capituli sic explicat Estius cum ipsomet Apostolo v. 25. Non quod volo bonum *mente*, hoc facio *carne*; sed quod nolo malum *mente* hoc ago *carne*: nam volo non concupiscere, seu concupiscentiæ motibus non conflicari, sed id non præsto, non assequor.

Itaque Apostoli verba de iis intelliguntur concupiscentiæ motibus, qui non sunt in nostra potestate, quique nobis non imputantur tanquam peccata. Unde subjicit Apostolus, *si quod nolo illud facio jam non ego operor illud, sed quod habitat in me peccatum*, hoc est concupiscentia in nobis manens, quæ cum ex primo hominis peccato ortum duxerit, & ad peccatum nos impellat, idcirco *peccatum* ab Apostolo nominatur. Admonet quidem Apostolus Christianos, ut hujusmodi peccatum seu concupiscentiam in suis corporibus regnare non patiantur, scilicet Ep. ad Romanos c. 6. v. 12. his verbis: *Non ergo regnet peccatum in vestro Mortali*

tali corpore, ut obediatis concupiscentiis ejus: sed non præcipit, ut exinguatur omnino in iis concupiscentia: siquidem viget ipsa etiam in justis, quamdiu mortalem hanc vitam agunt, ut testatur idem Apost. ad Rom. 7. v. 23. Video autem, inquit, aliam legem in membris meis repugnantem legi mentis meæ. Quare, ad finem capitis subnectit: Infelix ego homo, quis me liberabit de corpore mortis hujus? Hoc est a duro concupiscentiæ jugo. Et statim responderet ipse sibi, gratia Dei per Jesum Christum Dominum nostrum. Igitur ego ipse mente servio legi Dei, carne autem legi peccati.

41. Quod si qui varia Sanctorum patrum loca opponant, quibus homo dicatur male utendo libertate & se & ipsam perdidisse.

Respondendum, hominem non omnino amisisse *libertatem electionis*, sed duntaxat *libertatem equilibrii*, ut vocant, hoc est eam libertatem, qua sic inter bonum & malum erat constitutus, ut non magis in malum propenderet, quam in bonum: nam post peccatum Adami cæperunt proni esse sensus hominis ad malum. Dici etiam potest amisisse libertatem *a concupiscentia*, vel *a miseria*; nam cum libertas sit immunitas aut solutio ab omni eo, quod obesse potest, recte quis dicitur *liber a peccato*, cum justus est, *liber a miseria*, cum beatus: *liber a vinculis*, cum est expeditus: *liber a concupiscentia*, cum minime concupiscentiæ motibus urgetur, unde S. Augustinus

stinus libro I. contra duas Epistolas pelagian. ad Bonifacium: *Quis autem nostrum dicat, quod primo hominis peccato parierit liberum arbitrium de genere humano? libertas periit per peccatum; sed illa quæ in paradiso fuit, habendi plenam cum immortalitate justitiam.*

Itaque per primi parentis peccatum amisimus libertatem a concupiscentia, & a miseria, quia & concupiscimus, & miseriis obnoxii sumus: amisimus etiam libertatem *habendi plenam cum immortalitate justitiam*, quia peccato & morti sumus obnoxii: non tamen amisimus libertatem a necessitate naturali circa bona privata, cum ea libertas ab ipsa hominis mente seu anima rationali divelli nequeat; nam anima rationalis non ita ad unum aliquod privatum ac finitum bonum restringitur, quin vel ab eo abstinere, vel ad alia determinare se valeat.

42. Ex dictis colligitur I. quod origo liberi arbitrii ab animæ rationalis amplitudine repetenda sit; nam cum ipsa sit omnibus bonis creatis major, a nullo prorsus completur, sed sic perlustrare potest, ut quolibet neglecto ad aliud se convertere queat: in quo liberi arbitrii vis consistit.

43. Colligitur II. subjectum liberi arbitrii esse proprie mentem ipsam, quæ quatenus intelligit *intellectus*, quatenus vult, *voluntas*, ac demum quatenus eligit, liberum arbitrium nominatur.

Propo-

Propositio II.

44 **Q**Uamvis indifferentia non sit essentialis libertati generatim sumpta, quatenus nempe includit tum libertatem spontaneitatis tum libertatem electionis: non tamen potest libertas electionis seu liberum arbitrium citra indifferentiam intelligi.

Prob. Liberum arbitrium est vis electiva; sed hæc citra indifferentiam intelligi nequit, cum ibi nulla sit electio, ubi necessitas incumbit. Sic libenter quidem & voluntarie, non libere, id est libertate electionis bonum generatim prosequimur: sic beati Deum amant libenter, non libere sive ex electione, cum ab eo, quem Summe Bonum percipiunt, diligendo non possint abstinere. Ergo liberum arbitrium citra indifferentiam, intelligi nequit.

Indifferentia autem duplex est: altera ad patiendum, ut cera est indifferens ad multas formas recipiendas; altera ad agendum, qua aliquod agens est indifferens vel ad actum, vel ad speciem actus. Unde hæc indifferentia rursus duplex distinguitur; altera *contradictionis*, scilicet ad agendum, vel non agendum: quoniam agere & non agere sunt contradictoria; altera *contrarietatis*, seu *diversitatis* scilicet ad agendum hoc vel illud, hoc vel illo modo: v. g. ad sumendum alimentum
cali-

calidum vel frigidum ; ad venandum , vel piscandum ; ad ambulandum aut pedibus , aut equo , aut cūriu ; nam hæ actuum species sunt vel contrariæ , vel diversæ . De hac indifferentia sit

Propositio III.

45. **I**ndifferentia contrarietatis ad agendum scilicet hoc vel illud , hoc vel illo modo non prorsus requiritur ad essentiam liberi arbitrii.

Prob. Sine indifferentia contrarietatis & esse & concipi potest liberum arbitrium , seu vis electiva , cum ad electionem sufficiat potestas agendi , vel non agendi , seu indifferentia contradictionis . Nam v. g. cui unicum in mensa appositum est ferculum , is liber est libertate electionis , quia potest ex eo edere , vel non edere , tametsi non possit unum ferculum præ alio assumere . Ergo indifferentia contrarietatis seu diversitatis ad rationem liberi arbitrii non est prorsus necessaria . Aliter sentiendum de indifferentia contradictionis . Quare sit

Propositio IV.

46. **I**ndifferentia saltem contradictionis , scilicet ad agendum vel non agendum ad essentiam liberi arbitrii requiritur.

Prob.

Prob. Sine indifferentia saltem contradictionis, nec esse nec intelligi potest liberum arbitrium: tum enim liberum arbitrium concipitur in aliquo, cum vim habet electivam, seu potestatem in proprios actus, ita ut eos ad libitum ponere possit vel non ponere, quod citra indifferentiam saltem contradictionis intelligi nequit. Ergo indifferentia saltem contradictionis ad agendum vel non agendum, ad liberi arbitrii essentiam requiritur.

Corollarium.

47. **D**atur quidem aliqua *omissio* libera, seu peccatum omissionis, quod in se nullum actum includit: quia ommissio actus non est actus, ut ommissio Sanctificationis Sabbati non est Sabbati sanctificatio. Sed tamen omnis ommissio, si modo libera sit, semper ex aliquo voluntatis actu, saltem inferiore proficiscitur; quo voluntas se ad hanc omissionem determinavit. Nam facultas activa, & indifferens aliquo actu se determinat ad agendum, vel non agendum. Sed liberum arbitrium est facultas activa & indifferens: activa quidem, quia per eam possumus agere vel non agere, indifferens vero, quia sic nos efficit actuum nostrorum Dominos, ut eas ad libitum ponere possimus vel suspendere; imo aliquando varias actio-

P. Andr. Gordon Phil. P. I. **U** num

num species edere. Ergo liberum arbitrium se ad agendum, vel non agendum aliquo actu determinat:

Solvuntur Objectiones.

48. **O**pp. Ad voluntarium non requiritur indifferentia, sed omne voluntarium est liberum, ut confirmari solet innumeris prope sanctorum Patrum, imprimisque S. Augustini testimoniis, quibus dicimur libere beatitudinem expetere, & beati libere Deum amare dicuntur. Ergo ad liberum arbitrium non requiritur indifferentia.

Resp. Omne voluntarium est liberum a coactione, sive liberum libertate spontaneitatis; non vero liberum est a necessitate naturalis inclinationis, sive liberum libertate electionis. Atque hoc modo explicandi sunt Sanctorum Patrum textus, quibus vel dicimur beatitudinem libere expetere, & beati dicuntur Deum libere diligere. Nam beatitudinem expetimus, & beati Deum amant libere, id est, libenter & voluntarie, non coacte: vel libere ea libertate, quæ immunis est a coactione: non ea libertate, quæ dicitur immunitas a necessitate naturalis inclinationis, quæque est vis electiva; nam ea semper indifferentiam requirit, ut ostensum est.

Inst. Si indifferentia requiratur ad liberum arbitrium, vel antequam voluntas agat, vel

vel quando agit, vel postquam egit; atqui nullum horum dici potest: ergo indifferencia non requiritur ad liberum arbitrium, nec proinde ipsa ad merendum nobis est necessaria.

Resp. Voluntas nostra est indifferens, antequam agat, quia dominium habet in actus proprios, nisi circa bonum generatim, seu felicitatem, aut circa id, quod cum felicitate necessario conjunctum est, versetur. Est etiam indifferens cum agit, quia potest, ab agendo abstinere, imo postquam egit, remanet semper indifferens ratione sui, licet non sit amplius indifferens ratione actus, quem posuit.

Urgebis. Si res ita se habeat, libertas nostra non differt ab ea, qua præditus erat Adamus in statu innocentie; atqui falsum consequens: ergo & antecedens.

Resp. Non differt essentialiter, sive quoad substantiam; differt autem accidentaliter, sive quoad statum. Libertas igitur nostra differt a libertate, qua præditus erat Adamus in statu innocentie, quod in nobis non sit perfectum, ut ajunt, æquilibrium circa bonum & malum, ut erat in Adamo: quandoquidem magis propendimus in malum, quam in bonum; sed tamen libertas nostra ejusdem est rationis, ac libertas, quæ erat in Adamo ante ipsius peccatum, si spectetur libertatis essentia; quemadmodum enim ille suorum

actuum Dominus erat, ita in nobis est verum in proprios actus dominium ac potestas.

Corollarium.

49. **O**Mnes actus humani, qui a voluntate proficiscuntur cum cognitione objecti, finis, & circumstantiarum, voluntarii sunt, seu liberi a coactione, quia sunt ab omni vi externa & cogente immunes: sed iidemtaxat sunt liberi a necessitate naturalis inclinationis: qui ita fiunt, ut possint omitti, & non fieri: quod erat inquirendum.

§. IV.

De bonitate & malitia actuum humanorum.

50. **A**ctiones humanæ cum regulis morum comparatæ, *morales* appellantur: eæque si cum istis regulis consentiant, bonæ; si ab iis deflectant, malæ judicantur; adeo ut *moralitas*, ut vocant, actus humani nihil aliud sit quam ipsius *respectus*, seu *relatio ad suam regulam*, per quam vel bonus vel malus moraliter esse decernitur.

Regulæ autem morum saltem primariæ, quibus expendi debet actus humanus, sunt *ordo æternus*, sive *lex æterna*, & *recta ratio*, de quibus proximo cap. dicendum. Cum iis autem

tem conferendus est actus humanus tum ratione *finis*, tum ratione *circumstantiarum*: nam objecto, fine, & circumstantiis actus quilibet humanus continetur, ut vulgo notum est.

51. Objectum actus humani est id, circa quod actus ille versatur, quod quidem spectari potest vel secundum materiam, vel secundum formam.

Secundum materiam spectatum objectum, quatenus est materia cuidam actui subjecta, circa quam alii complures etiam specie diversi actus morales possunt exerceri: ut idem homo potest esse objectum amoris vel odii, adulationis, vel objurgationis & occisionis, &c. objectum hoc modo spectatum semper bonum est bonitate entis! cum si vel Deus, qui summe bonus est, vel res creata, quæ est bona per participationem: sed nullam habet bonitatem vel vitiositatem moralem; quia neque cum morum regulis consentit, neque iis adversatur; nullam proinde speciem bonam vel malam in genere morum actui tribuit.

Quoad formam vero spectatur objectum, cum ob rationem sive physicam sive moralem, propter quam ab actu attingitur, consideratur: tumque speciem actus sive physicam sive moralem constituit; ac prout cum principiis sive physicis sive moralibus convenit, aut pugnat, bonitatem quoque vel vi-

tiolitatē live phylicam live moralem actui communicat; etenim fieri potest, ut objectum sit bonum secundum speciem physicam, malum vero secundum speciem moralem & vice versa. Exempli causa, si pictor figuras turpes & aspectu fœdas eleganter pingat, objectum erit bonum *physice* & malum *moraliter*: atque ita bonus erit actus secundum speciem physicam, & comparate ad executionem præceptorum artis pingendi; sed malus erit secundum speciem moralem, nempe si cum regulis morum conferatur; e contrario si res pias, & ad erudiendum aptas male exprimat, objectum bonum erit *moraliter*; malum *physice*, & consequenter actus secundum speciem moralem bonus erit; secundum physicam malus. Quodsi objectum principiis physicis nec congruat, nec adversetur: v. g. si quis collyrium præparet, quod ægrotanti cuidam humani corporis parti applicatum nec prosit nec oblit, id *physice* seu sub *forma* & ratione physica spectatum, & comparate ad *physicæ* seu artis medendi principia est omnino indifferens. Similiter si objectum nec conveniat, nec pugnet cum morum regulis, tunc actus qui circa illud versabitur, in specie sua, seu sub forma & ratione morali & comparate ad regulas morum consideratus, neque bonus erit *moraliter*, neque malus, ut pingere flores, ædificia, sylvas, fluvios &c. id in specie sua, siue in genere

genere (nempe genere pro specie accepto, eo loquendi modo, quo dicimus humanum genus totam humanam speciem) neque malum *moraliter* seu comparate ad morum regulas, sed indifferens. Quam ob rem actus hujusmodi, quorum objecta sunt moraliter indifferencia, bonitatem aut malitiam moralem a fine & circumstantiis sumunt.

§2. Finis actus humani est id propter quod fit actus: isque ibidem spectari potest vel *physice* vel *moraliter*: v. g. si quis potionem medicam sumat propter sanitatem, hujusmodi finis bonus est *physice*. Sed neque bonus est neque malus *moraliter*, nisi cum morum regulis comparetur. Itaque bonus est finis *moraliter*, si quis sanitatem expetat, ut ea bene ac propter Dei gloriam utatur; malus vero, si quis eam ad explendam libidinem exoptet.

Hic observa, objectum formale actus humani dici etiam quandoque motivum v. g. bonitas Dei seu convenientia, quam Deus habet cum nostra natura multorum indigente, nempe ut eam juvet ac perficiat, dicitur esse *motivum*, seu ratio, qua ipsum amamus: nonnunquam *motivum* sumitur pro fine; ut cum sanitas dicitur esse *motivum*, quo quis ad sorbendam potionem medicam determinatur. Denique *motivum* aliquando, sed rarius pro causa efficiente accipitur, ut consilium, quo quis alterum ad bonum vel ad

malum opus impulit, dicitur esse *motivum* ejus quod factum est.

53. Circumstantiæ denique actionis vocantur, ea omnia, quæ actionem committantur, ut sunt locus, tempus, modus, auxilium, eæque una cum objecto, sine ❧ causa effectrice hoc versiculo comprehenduntur,

Quis, quid, ubi, quibus auxiliis, cur, quomodo, quando.

Quis, personam denotat, seu Causam effectricem. *Quid*, objectum quod fit, aut id in quod causa effectrix agit. *Ubi*, locum; *quibus auxiliis*, auxilium; *cur*, significat rationem, propter quam aliquid fit, *quomodo*, modum quo fit; *quando*, tempus, quo fit.

Propositio I.

54. **B**onitas & malitia moralis actus humani ab objecto moraliter spectato, tum etiam a fine & circumstantiis est replenda.

Prob. Ab eo bonitatem & malitiam moralem desumit actus humanus, a quo suam habet perfectionem aut vitiositatem, tum essentialem, tum accidentalem. Sed actus humanus perfectionem suam vel imperfectionem seu vitiositatem tum essentialem tum accidentariam ab objecto moraliter spectato & a fine ac circumstantiis deducit.

Primo

Primo quidem essentialem habet perfectionem, vel imperfectionem ab objecto moraliter spectato: quoniam ab eo tanquam termino speciem, sive specificationem moralem accipit, ut omnes Theologi ac Philosophi morales fatentur. Quamvis enim objectum materialiter sumptum minime speciem moralem actui tribuat: cum possit multis specie diversis actibus moralibus subjici, ut dictum est de homine, qui vel amari potest, vel odio haberi, sive bene sive male: objectum tamen formale morale speciem actus moralem constituit, quomobrem actus dicitur bonus, vel malus, vel indifferens moraliter, ratione objecti, cum objectum ejus formaliter sive sub ratione formali & morali consideratum, nempe quatenus cum regulis morum comparatur, vel bonum est, vel malum, vel indifferens. Moralitas quippe sive habitudo ad regulas morum est formalitas quædam seu ratio formalis moralis.

Secundo. A fine quoque perfectionem vel imperfectionem essentialem repetit actus humanus. Etenim proprium interioris actus voluntarii objectum est finis: ideoque ut actus exterior censeatur humanus, ipsum propter finem fieri necesse est; sive quod idem est, ex finis intentione species ejus moralis deducitur, juxta illud,

Quidquid agunt homines, intentio judicat omnes.

U

Ter-

Tertio. Idem actus humanus a circumstantiis recipit perfectionem vel vitiositatem accidentariam: v. g. si quis preces Deo funderet, dum oratio ad docendum apta ad concionem in Ecclesia habetur, in circumstantia temporis deficeret: nam tunc audiendus est concionator, non preces fundenda.

Idque adeo verum est, ut circumstantia nonnunquam mutet speciem actionis. Ut recte admonet S. Thomas 1. 2. Quæst. 18. Art. 10. Nam etiamsi locus sit tantum actionis circumstantia, mutat tamen illius speciem: siquidem furari aliquid de loco sacro est sacrilegium, quod alibi esset tantummodo furtum. Est autem sacrilegium *rei vel personæ sacræ violatio*, qua res vel persona sacra profanatur.

Ergo actus humanus suam bonitatem vel malitiam moralem tum ab objecto moraliter spectato; tum etiam a fine, & circumstantiis repetit.

Solvuntur Objectiones.

15. **O**pp. primo. Potest actio bona objectum habere malum: v. g. odium peccati habet objectum malum, nempe peccatum; vicissim actio mala potest habere objectum bonum: v. g. odium Dei habet objectum bonum, nempe Deum. Ergo bonitas

nitās & malitia moralis non desumitur ab objecto.

Resp. Objectum odii peccati non est peccatum simpliciter, sed peccatum ut detestandum: peccatum autem ut detestandum, est objectum moraliter bonum. Simili modo objectum odii Dei non est Deus simpliciter, sed Deus spectatus ut malus, quod est objectum moraliter malum, cum adversetur rectæ rationi, quæ negat Deum esse malum vel injustum, vel crudelem, vel alia ratione iniustum; hoc enim loco objectum spectari debet non tantum physice, sed præcipue moraliter.

56. *Opp. secundo.* Finis est extrinsecus humanæ actioni; ergo bonitas essentialis actus humani a fine non est replenda.

Resp. Finis est extrinsecus humanæ actioni, ita tamen, ut relatio actionis humanæ ad finem sit actioni intrinseca; nam nihil magis intrinsecum est actioni morali, quam finis intentio, cum sine intentione finis non sit actio moralis. Quare si prava sit intentio, nunquam actus potest esse bonus: non enim tantum requiritur ut bonum fiat, sed ut bonum bene fiat, id est, cum recta finis intentione, quæ a Christo Domino per oculum simplicem, ut ipsa actio per corpus designatur Matth. 6. v. 22.

57. *Opp. tertio.* Sunt quædam circumstantiæ, quæ actionem non spectant, ut si quis

quis hominem occidat manu dextra, vel sinistra, id ad rem non pertinet. Ergo bonitas vel malitia actus humani ab iis non dependet.

Resp. Concedendo totum argumentum. Sunt enim quædam circumstantiæ, quæ ad actionis bonitatem aut malitiam moralem respectum non habent, qualis est ea, quæ in opposito argumento proponitur: sed sunt aliæ, quæ bonam actionem magis illustrent, aliæ quæ peccatum aggravant, aut minuunt; e. g. quempiam ab imminente periculo liberare pulchrum est; hostem capitalem, heroicum. E diverso hominem occidere malum est; patrem vero, barbarum. Sed patriæ hostem in bello justo, licitum, ideoque ut actus sit moraliter bonus, non tantum debet habere objectum bonum, & finem bonum, sed etiam bonas circumstantias; *Bonum* quippe est ex integra causa, id est ex omnium perfectionum sibi debitarum concursu; *malum* vero ex quocunque defectu.

Natura boni & mali moralis.

§8. **A**ctus bonus nullum speciale nomen habet, actus malus, vel etiam omisio actus boni peccatum appellatur; illa peccatum Commissionis, hæc peccatum omissionis.

In utroque actu tam bono quam malo, ut
modo

modo de objecto dixi, duo sunt accurate consideranda: primum *substantia*, ut ita dicam, *ipsius actus*, id est, actus ipse physice & secundum rem inspectus, qui ab agente seu principio, quatenus agit, & termino seu objecto actionis non secernitur: secundum *bonitas moralis*, seu *Convenientia*, aut consensio actus boni cum regulis morum; & *malitia moralis* seu discrepantia actus mali ab iisdem morum regulis. Primum dicitur a Theologis materiale ipsius actus moraliter spectati; secundum dicitur formale ejusdem actus.

Materiale actus humani sive boni sive mali esse quid *positivum*, nemo diffitetur, est enim ipsius actus substantia; quæ nil aliud est, quam agens, quatenus vim suam in terminum seu objectum exerceat. *Formale* quoque actus boni, sive *bonitas ipsa*, quæ est *convenientia actus boni cum regulis morum*, est positiva quædam relatio actus boni ad easdem regulas tum ratione objecti, tum ratione finis, tum ratione circumstantiarum; adeoque censi debet aliqua moralis perfectio. Sed de *malitia morali*, quæ est *disconvenientia actus humani cum regulis morum*, sive ratione objecti, sive ratione finis, sive ratione circumstantiarum, dubium est inter Philosophos ac Theologos, utrum sit *positivum quid*, an potius *carentia* aut *privatio perfectionis* hujusmodi actui debita; sit igitur,

Propositio II.

§9. **M**alum morale formaliter sumptum, sive malitia tum actus humani, tum omissionis actus, non est res aliqua, nec modus physicus realis & positivus.

Prob. Malitia moralis est nihil aliud, quam disconvenientia, seu discrepantia actus cum regulis morum; sed discrepantia ista non est quid positivum: ergo malitia moralis non est quid positivum aut reale.

Deinde si malitia moralis foret entitas aut modus physicus aut realis, Deum haberet auctorem, cum nulla res vel modus physicus & positivus absque Deo produci possit. Deus autem peccati auctor esse nequit; siquidem odio sunt Deo impius & impietas ejus, ex Sapientiae 14. v. 9.

60. Dices. Quod prohibetur a Deo, & committitur a causa reali, illud est quid reale; atqui malum morale prohibetur a Deo, & committitur a causa reali, nempe ab humana voluntate. Ergo est quid reale ac positivum.

Resp. Quod prohibetur a Deo, & committitur a causa reali, seu voluntate creata, est reale & positivum, si spectetur sola natura actus non attenda malitia; sola vero malitia, quæ dicitur forma peccati, nihil plane positivum est aut reale, sed ad summum vera relatio.

Propo-

Propositio III.

61. **M**alitia moralis spectata quatenus per ipsam hæremus in creatura, recte dicitur defectus seu privatio boni.

Prob. Illud merito dicitur defectus seu privatio boni, per quod actus humanus privatur sua perfectione seu complemento; per malitiam vero spectatam, quatenus est adhæsiō ipsi creaturæ, privatur actus humanus sua perfectione seu complemento: nam omnis actus humanus tendere debet in Deum, ad quem voluntas humana perpetuo movetur, saltem præmotione generali; non vero debet hære in creatura. Idem dicendum de actus omissione, ergo malitia moralis, prout hæremus per eam in creatura, dici potest privatio poni.

62. Dices. Si malitia moralis sit tantum privatio boni, nullum erit discrimen inter peccatum omissionis, & peccatum commissionis.

Resp. Discrimen inter utrumque in eo consistere, quod peccatum commissionis adversatur præcepto negativo, v. g. *Non furaberis, non occides* &c. peccatum vero omissionis præcepto positivo repugnet, nempe: *Deum tuum adorabis; honora patrem tuum, & matrem tuam* &c. Quare utrumque diverso modo hæret in creatura.

Inst. Privatio est absentia formæ in sub-
jecto

jecto apto ad eam recipiendam, ut vulgo definiunt scholæ, sed quidam sunt actus, qui nullam possunt perfectionem moralem recipere, nimirum ea, quorum objectum est malum moraliter, ut mendacium, blasphemia, idololatria, &c. non enim possunt hæc ad Deum referri. Ergo malitia moralis non est privatio boni, seu perfectionis moralis.

Resp. Privatio subtiliter, & scholastico more sumpta, est absentia formæ in subjecto apto ad eam recipiendam; non vero privatio latius accepta pro omni defectu, seu carentia perfectionis; sive ea perfectio recipi possit in subjecto, ut fit cum actio mala est ratione finis, aut alicujus circumstantiæ tantum; sive non possit, ut cum actio mala est ratione objecti.

Deinde cum humana voluntas creaturam pro Deo colit per idololatriam; vel cum veritatem lædit per mendacium; aut alia quavis ratione cupiditatibus suis indulget; proindeque in rebus creatis hæret; certe potest iis non inhærere unde quamvis mendacium, vel idololatria referri nequeat ad Deum, voluntas tamen ipsa suos motus in Deum dirigere potest: atque ita privatur perfectione sibi convenienti, dum in creatura conquiescit, nec in Deum tota vi contendit.

Malitia tamen moralis præter boni privationem, quam includit, adjunctam insuper
habet

habet relationem oppositionis, seu repugnantia, cum lege æterna, quæ relatio termino positivo est exprimenda. Nemo enim dubitare potest, quin idololatria, blasphemia, mendacium, furtum, adulterium, & quilibet actus prohibitus, non secus ac quælibet omis-
sio actus imperati legem æternam violent, eique reipsa opponantur; licet ista oppositio dici non debeat res aliqua, vel modus phy-
sicus, sed tantum relatio.

Præterea non una est malitiæ moralis spe-
cies, & ex peccatis alia aliis sunt longe gra-
viora. Ea vero multiplex malitiæ & pecca-
torum species, non alia commodiori ratione
definiri potest, quam per diversam ad diver-
sas leges relationem & oppositionem. Nam
v. g. idololatria, quæ huic præcepto adversa-
tur, *Deum tuum adorabis, & illi soli servies*,
multo gravior est, quam rei alienæ deside-
rium, quod alteri præcepto, *non concupisces
rem alienam*, est oppositum.

*Origo mali moralis, & omnium vitæ nostræ
calamitatum.*

63. **M**Alorum omnium radix est primi pa-
rentis nostri peccatum. Ex eo enim
concupiscentia mala, morbi, labores, cæteræ-
que calamitates, imo & ipsa mors oriuntur.

De concupiscentia quidem prava nullus
esse potest dubitandi locus. Ipsa quippe
P. Andr. Gordon Phil. P. I. **X** aliud,

aliud, quam Deum, habere debet principium: neque in Adamo adhuc innocente vigeat. Nam ordo postulat, ut pars superior dominetur inferiori; unde si caro adversus spiritum insurgat, id non opus Dei est, sed ipsius hominis, qui adversus conditorem suum rebellavit. *Princeps & domina carnis naturaliter anima est, quæ domare carnem debet. & regere, ut ex S. Ambrosio refert & approbat S. Augustinus lib. 2. contra Julianum.* In belluis quidem, in quibus non est ratio, ii motus, quos concupiscentiæ attribuimus, non adverſantur ordini, sed secundum naturam fiunt: in homine autem sunt defectus seu vitia. Unde S. Augustinus lib. 2. contra Pelagium & Cœlestium de gratia & peccato originali. *Tantæ namque excellentiæ est in comparatione pecoris homo, ut vitium hominis natura sit pecoris.* Et lib. 4. contra Julianum, *hæc autem libido, inquit, ideò malum non est in belluis, quoniam non repugnat rationi, qua carent.* Quocirca erubescimus de libidine nostra, non item belluæ. *Hujus nos pudet ait idem Ecclesiæ Doctor lib. 2. de nuptiis & concupiscentia, & merito pudet. Nam si hoc non esset, quid nobis esset ingratius, quid irreligiosius, si in membris nostris non de vitio, vel de pœna nostra, sed de Dei confunderemur operibus?*

64. Et vero quid fingi potest absurdius aut horribilius, quam Deum Authorem esse illius

illius effrænationis animi, quæ feruntur homines in ea, quæ ipse tanto studio vetuit, nempe in furtâ, cædes, veneficia, adulteria, & in omne scelerum genus, quæ rationem humanam tam graviter offendunt?

Hoc solummodo invenisse se Sapiens testatur Ecclesiast. 7. v. 30. *Quod fecerit Deus hominem rectum.* Idque verissimum; nec tantum de rectitudine corporis intelligendum, verum etiam de rectitudine animi, quæ est a gratia & charitate; sed homo per peccatum ab illa rectitudine recessit; & gratia, qua exornatus fuerat, repente excidit, ut discimus ex Concilio Tridentino Sess. 5. in decreto de peccato originali his verbis. *Siquis non confitetur primum hominem Adam, cum mandatum Dei in Paradiso fuisset transgressus, statim sanctitatem & justitiam, in qua constitutus fuerat, amisisse . . . anathema sit.* Nec vero sibi duntaxat soli, sed nobis etiam omnibus, qui ex eo sumus progeniti, sanctitatem illam ademit, ut ibidem scripturarum sacramentorum autoritate, & perpetua Patrum traditione definit Concilium. Omnes enim via seminali per carnis concupiscentiam nascimur. Quam concupiscentiam non regit ratio, etiamsi ipsam tantisper moderetur, sacri nexus conjugalis continentia. Unde omnes ex immundo concepti sumus semine, ut loquitur Job c. 14. v. 4. Hincque trahitur peccatum originale secundum S. Augustinum.

Id igitur in confesso esse debet, concupiscentiam pravam, hoc est, rebellionem carnis adversus spiritum, qua mens corpori quodammodo subjicitur, & a Creatore ad res creatas & corporeas devocatur, non esse opus Dei, sed effectum peccati, in quod lapsus est primus hominum parens, unaque posteros omnes in eandem secum ruinam traxit. *Non est*, inquit S. August. lib. de dono perseverantiae, *ista natura instituti hominis, sed poena damnati.*

65. Deinde ut ad eam, quæ terris post primorum parentum peccatum incubuit, cohortem miseriarum veniemus, legimus Gen. 2. v. 16. & 7 latam a Deo legem, per quam (si Beatam Virginem exceperis, in qua de spiritu Sancto sine carnis concupiscentia est conceptus Filius Dei) mulieres omnes sub Evæ persona ad partus doloris plenos, ad ærumnas multas, viri quoque sub Adami persona ad labores perpetuos damnentur. Sic enim Deus mulierem allocutus est. *Multiplicabo ærumnas tuas & conceptus tuos, in dolore paries filios* Adæ vero dixit: *Quia audisti vocem uxoris tuæ, & comedisti de ligno, ex quo præceperam tibi ne comederes, maledicta terra in opere tuo: in laboribus comedes ex ea cunctis diebus vitæ tuæ.* Sententia clara est, & intellectu facilis. Audiamus nunc S. August. de hujus peccati effectibus contra Manichæos & Pelagianos disputantem.

tem. *Malorum omnium nostrorum causa peccatum est.* Serm. 240. de tempore. *Non enim sine causa homines mala ista patiuntur. Justus est Deus, omnipotens est Deus; nullo modo ista pateremur, si non mereremur.*

66. Denique quod spectat ad mortem, ei prius homo non subjacisset, si a peccato mansisset liber. Nam ex Sapientiæ capite 2. v. 23. & 24. *Deus creavit hominem inextinguibilem invidia autem diaboli mors intravit in orbem terrarum.* Et Epist. ad Rom. c. 5. v. 12. *Per unum hominem peccatum intravit in hunc mundum, & per peccatum mors, & ita in omnes homines mors pertransiit, in quo omnes peccaverunt.*

67. Quamvis autem baptismus auferat peccati originalis reatum; non tamen concupiscentiam, nec moriendi necessitatem, aliaque præsentis vitæ incommoda, seu poenalitates, cujus rei rationem reddit S. Augustinus lib. 2. de peccatorum meritis; minueretur enim fortitudo fidei, quia plures ad fidem accederent spe declinandæ mortis, aliarumque vitæ miseriarum, quam æternæ vitæ consequendæ desiderio. *Quid enim inquit magnum erat, videndo non mori eos qui crederent, credere se non moriturum? quanto est majus, quanto fortius, quanto laudabilius ita credere, ut se speret moriturus sine fine victurum.* Alias rationes affert S. Thom. 3. part. quæst. 69. Artículo 3.

CAPUT III.

De regulis actuum humanorum.

Perspecta humanorum actuum natura, nunc de eorum regulis agendum, & quidem Primo de actuum humanorum regulis in genere, Secundo de lege æterna & naturali, Tertio de conscientia, Quarto de lege divina, Quinto de legibus humanis, Sexto denique selectas juris notiones ex Imperatoris Justiniani Institutionibus referentur.

§. I.

De actuum humanorum regulis in genere.

N. I.

Duplicem actuum humanorum regulam statuit D. Thom. 1. 2. quæst. 71. art. 6. Alteram primam & remotam, scilicet *legem eternam*, quæ est summa Dei ratio, vel ordo quo cuncta sapienter disponuntur; alteram derivatam & propiorem, nempe rationem humanam, quæ est veluti quædam summæ istius ac divinæ rationis participatio: utraque tamen *legis naturalis* nomine comprehenditur, ac cæteris legibus *positivis* tum *divinis* tum *humanis* præbet originem.

2. Lex

2. Lex quippe generatim est regulā quādam actuum humanorum, per quam ad id quod rectum est, agendum, & quod pravum est, omit-tendum dirigimur: vel brevius, est regula a-gendorum & omittendorum, quæ comparate ad Legislatorem definiri potest recta ratio im-perandi atque prohibendi, ut habet Tullius L. i. de legibus: vel ordinatio rationis imperans ho-nesta, prohibens contraria. Nam præcepta le-gis sunt duplicis generis; alia quæ bonum imperant, quæ dicuntur *positiva* seu *affirma-tiva*, ut *diliges Dominum*; alia quæ malum prohibent, quæ *negativa* vocantur, ut *non oc-cides*: utraque duobus verbis comprehendit Rex Propheta Psal. 36. v. 27. *Declina a malo, & fac bonum.*

3. Lex autem omnis vel *naturalis* est vel *positiva*: illa est immutabilis; hæc mutationi obnoxia.

Lex autem naturalis vel in Deo spectatur, vel in nobis: in Deo quidem *lex æterna*, vel ordo æternus dicitur, in nobis vero vel *recta ratio* vel etiam *lumen naturale* vocatur, aut *legis naturalis* simpliciter nomen retinet.

Lex positiva dicitur ea, quæ a libera legis-latoris voluntate posita est: unde illa non instat legis æternæ & naturalis semper ma-net, sed mutari aut aboleri potest: illiusque mutationes variæ propriis appellationibus a Jurisconsultis designatæ sunt. Apud eos quippe *rogatur lex* cum fit, quia non fiebat

lex apud Romanos, nisi apud populum rogata: *abrogatur*, cum omnino tollitur: *derogatur legi*, cum pars detrahitur: *subrogatur*, cum illi aliquid additur: *abrogatur*, cum aliquid mutatur. Vide legem 102. ff. de verborum significatione.

4. Lex positiva vel divina est vel humana; prior a Deo; posterior ab hominibus est lata.

Lex divina veteri & novo testamento continetur; unde vel *vetus* est vel *nova*.

Lex *vetus* dicitur, quæ populo Judaico data est per Angelos internuntio Moyse, sive ut loquitur Apostolus Ep. ad Galat. cap. 3. v. 29. *Fuit ordinata per Angelos in manu mediatoris.*

Lex *nova*, lex *Evangelica*, seu novi testamenti dicitur, quæ omnibus hominibus lata est a Christo Domino omnium Salvatore. *Euntes*, inquit, Apostolis suis Cap. ultimo Evangel. secundum Marcum, *in mundum universum, prædicate Evangelium omni creature qui crediderit & baptizatus fuerit, salvus erit; qui vero non crediderit, condemnabitur.*

5. Lex *humana* dicitur, quæ ab hominibus lata est; eaque vel est *Ecclesiastica* vel *Civilis*.

Ecclesiastica sacris Conciliorum, præsertim generalium Canonibus, sanctorum Patrum sententiis ac Pontificum constitutionibus, ut vocant, decretalibus comprehenditur.

Civi-

Civilis in reipublicæ constitutionibus, vel in Imperatorum aut Regum edictis consistit: quibus accedunt Senatusconsulta, plebiscita, responsa prudentum, & longa consuetudo populi consensu approbata. Atque hæc esse videtur generalis legum omnium divisio.

6. Jam materia legibus subjecta *jus ipsum* est, seu id quod justum est, vel quod juste agitur, aut omittitur: quodque adeo in omnibus nostris actibus sectari nos oportet. Quanquam jus etiam pro ipsa arte aut ipsa scientia juris sumitur: eoque sensu definitur a Celso L. 1. ff. t. 1. L. 1. *Ars boni & equi.*

Quocirca jus pro materia legi subjecta usurpatum eodem prorsus modo dividitur ac lex ipsa: nempe aliud est *jus naturale*, quod natura nos docuit; quodque est immutabile; aliud est *jus gentium*, quod non male forsan *jus naturale secundarium* dici possit; quodque apud omnes saltem moratiores populos custoditur: aliud est *jus positivum*; idque vel *divinum* est vel *humanum*, quod rursus vel est *Ecclesiasticum* vel *civile*.

Quæritur hoc loco, utrum lex generatim sit actus intellectus, an voluntatis. Deinde utrum ei essentialis sit promulgatio, seu publica denuntiatio.

Quoad primam quæstionem, non valet operæ pretium illi immorari, cum intellectus & voluntas sit una eademque res, ut sæpius dictum est. Quoad secundam sit

Propositio I.

7. **L**ex æterna & naturalis non indiget promulgatione.

Prob. Lex æterna & naturalis omnium animis insita est; ideo enim naturalis vocatur, quod omnibus naturaliter nota sit. Ergo lex æterna & naturalis non indiget promulgatione.

Propositio II.

8. **U**T lex positiva obliget, debet esse promulgata.

Prob. Ut lex positiva obliget debet esse nota; non vero fit nota nisi per promulgationem, seu dehuntiationem publicam, qua legislator voluntatem suam significat, & intimat iis, a quibus est observanda; Ergo ut lex positiva obliget, debet esse promulgata.

9. Dices promulgatio non fit nisi post conditam legem; Ergo promulgatio ad illius essentiam non spectat.

Resp. Promulgatio non fit, nisi postquam lex est condita; ita tamen ut non obliget lex nisi postquam est promulgata. Nam lex proprie & complete non dicitur lex, nisi actum obliget; seu obliget.

§. II.

De lege naturali & æterna.

10. **L**egem æternam cæterarum fontem esse, primamque actuum humanorum regulam, unanimi omnium consensu receptum est. Ipsa quippe nihil aliud est, nisi *ordo æternus*, sive summa ratio primæ & sapientissimæ mentis, quæ, quæ facienda, vitandave sunt, immutabiliter continentur. Igitur lex æterna est ratio immutabilis, cui, quæ recte fiunt, consentanea sunt; quæ præve dissentanea. Quocirca S. Augustinus lib. 1. de libero arbitrio hæc habet. *Jubet igitur æterna lex avertere amorem a temporalibus, & eum mundatum convertere ad æterna.* Nec aliter peccare homines existimat, quam ubi avertuntur a Deo & convertuntur ad creaturas, scilicet ut iis adhæreant, sive ut iis fruantur. Nam creatum omne *utendum* duntaxat, nunquam est fruendum; imo eatenus tantum creaturis uti licet, quatenus ad obtinendam nobis Summi Boni fruitionem conducere videntur. Boni inquit idem S. Doctor lib. 15. de civitate Dei cap. 7. *Ad hoc utuntur mundo, ut fruantur Deo; mali autem contra, fruuntur mundo, uti volunt Deo.*

11. Lex naturalis, quæ & recta ratio, & *lumen naturale*, & *ordo naturalis* appellatur, est ipsa lex æterna, sive participatio quædam legis

legis æternæ in rationali creatura, per quam boni & mali secernendi fit capax, ut habet S. Thomas 1. 2. quæst. 91. art. 2. ubi allegat Regis Prophetæ verba Psal. 4. v. 6. *Sacrificate sacrificium iustitiæ, & sperate in Domino, & quasi quibusdam quærentibus, quæ sint iustitiæ opera, subjungit psalter Rex, multi dicunt, quis ostendit nobis bona?* cui quæstioni respondens, hæc ait: *signatum est super nos lumen vultus tui Domine*, id est lumen rationis naturalis, quo bona & mala discernimus; quodque *lex naturalis*, aut *recta ratio*, aut *ordo* dicitur.

Talem legem naturalem in nobis extare, sive mentibus nostris impressam esse nullus dubitare potest. Nam unusquisque apud se intelligit, *quid sit bonum, & quid malum* ut habet glossa ordinaria in v. 14. 15. capitis secundi, Ep. ad Romanos.

12. Dices. Si hominum animis insita esset lex naturalis qua bonum & malum discernent, frustra datæ fuissent leges positivæ a Deo: quoniam officium suum naturaliter quisque tenuisset. Sed datæ sunt a Deo leges positivæ; v. g. Lex qua fructus arboris scientiæ boni & mali Adamo interdicebatur; leges Decalogi, & aliæ, quas frustra latas a Deo nemo dixerit. Ergo legis naturalis notitia non est animis nostris ingenita.

Resp. Etiam si lex naturalis dicteret, quæ sunt agenda & omittenda; tamen admonendi fuerunt

fuerunt homines officii, & ad illud scripta lege revocandi, cum a recta via deflecerent, nec ad insitam sibi legis naturalis notitiam attenderent, ut advenit S. Augustinus in Psal. 57. *Ne sibi homines aliquid defuisse quererentur, scriptum est ❧ in tabulis quod in cordibus non legebant. Non enim scriptum non habebant, sed legere volebant.* Quod spectat ad primum hominum parentem Adamum, docet idem S. Augustin. lib. 14. de civitate Dei cap. 12. præceptum de non edendo fructu arboris scientiæ boni & mali ipsi fuisse impositum, ut daretur locus obedientiæ merito. Nam esca non erat mala nec noxia, nisi quia prohibita. *Neque enim Deus quidquam mali in illo tantæ felicitatis loco, crearat atque plantarat; sed obedientia commendata est in præcepto, quæ virtus in creatura rationali, mater quodammodo est omnium custosque virtutum: quandoquidem ita facta est, ut eis subditum esse sit utile; perniciosum autem suam, non ejus a quo creata est, voluntatem facere.* Hoc itaque de uno cibi genere non edendo, ubi aliorum tanta copia subjacebat, tam leve præceptum ad observandum, tam breve ad memoriam retinendum, ubi præsertim nondum voluntati cupiditas resistebat, quod de pena transgressionis postea subsequutum est, tanto majore injustitia violatum est, quanto faciliore posset observantia custodiri.

Prope-

Propositio I.

13. **P**rimaria legis naturalis præcepta in amore Dei supra omnia, & proximi propter Deum sunt constituta.

Prob. Primaria legis naturalis præcepta in eo consistunt; quod *ordo æternus* primum præscribit; & a quo omnia prorsus hominum officia derivantur.

Sed *ordo æternus* primum præscribit amorem Dei supra omnia, & proximi propter Deum; atque ab iis præceptis omnia prorsus hominum officia descendunt. Et quidem, quod amor Dei supra omnia, & proximi propter Deum æterno ordine præcipiatur, nemo adeo stupidus est & obtusus, qui id ignoret, si ad id advertat animum. Nam mediocri mentis attentione agnoscere potest, & se & alios, quos sibi similes videt, ab aliquo præpotenti conditore fuisse procreatos; adeoque ordinem postulare.

Primo, ut Deum tota mente, & proinde supra omnia diligat, eique pro innumeris quibus quotidie ab ipso afficitur beneficiis, perpetuas gratias agat. Non enim satis est Deum instigante interius conscientia, exterius clamante natura, hujus universi opificem fateri; sed tota propensione voluntatis continuæ gratiarum actiones ipsi habendæ; tum quod e nihilo, cum minime essemus, nos
eduxe-

eduxerit; tum quod nos conservare, quæque ad vitam nostram necessaria sunt, nobis suppeditare non desinat. Ideoque *inexcusabiles* pronuntiat Apostolus ad Rom. cap. 1. v. 20. eos, qui cum cognovissent Deum, non sicut Deum glorificaverunt, aut gratias egerunt, sed evanuerunt in cogitationibus suis, & obscuratum est insipiens cor eorum.

Secundo, si Deum, ut par est, diligamus, quia id ordo postulat, a quo recedere ratio naturalis citra culpam non potest, homines quoque nobis similes, & ab eodem Auctore productos, propter ipsum diligemus; ac singulis quod suum est tribuimus. Quare subiecti erimus, ut jubet D. Petrus Epist. 1. cap. 2. v. 13. *Omni humane creature propter Deum: sive Regi quasi præcellenti, sive Ducibus, tanquam ab eo missis ad vindictam malefactorum, laudem vero bonorum; cæteros vero homines nobis æquales, aut etiam inferiores, tanquam fratres complectemur: nec modo nullum ipsis dānum inferemus, sed potius omnibus pietatis ac necessitudinis officiis ipsos devincire conabimur. Non ergo falsum testimonium dicemus; non furabimur, non occidemus.* &c. quia hæc ordini, adeoque amoris Dei & proximi sunt contraria.

Quapropter omnia hominum officia moralia his duobus præceptis continentur, sive ab iis deducuntur. Idque testatus est ipse Christus Dominus Matth. cap. 22. v. 37. & sequen-

sequentibus, ubi quærenti Pharisæo legis Doctori, quodnam esset mandatum magnum in lege; ita respondit: *Diliges Dominum Deum tuum ex toto corde tuo, & in tota anima tua, & in tota mente tua: hoc est maximum & primum mandatum. Secundum autem simile est huic; diliges proximum tuum sicut te ipsum. In his duobus mandatis universa lex pendet, & Prophete.*

Ergo primaria legis naturalis præcepta in amore Dei supra omnia & proximi propter Deum sunt constituta.

Corollarium.

14. **L** Ex naturalis impleri prorsus a nobis non potest solis naturæ viribus; sed charitatem requirit, quæ supernaturalis est, quæque in nobis præstat, quod lex naturalis monstrat, ut inferius dicetur, ubi de lege divina.

Propositio II.

15. **P**rimaria legis naturæ præcepta invicte ignorari nequeunt.

Prob. Ea invicte ignorari nequeunt, quæ naturaliter omnibus hominibus innotescunt; primaria vero legis naturæ præcepta omnibus hominibus naturaliter innotescunt; nam unusquisque naturaliter ordinis, seu æternæ legis

legis ideam habet, qua novit summum sibi esse debere amorem erga Deum; a quo omnia accepit, deinde erga homines sibi similes propter Deum, a quo sunt procreati: & proinde intelligit non esse faciendum alteri, quod sibi factum ab alio doleret: ex quo sequitur, non esse furandum, non esse occidendum &c. Ergo primaria legis naturæ præcepta invicte ignorari nequeunt.

Nonnullæ quidem nationes facta quædam primariis naturæ præceptis contraria quandoque pertulisse leguntur, ut Germani olim apud Cæsarem lib. 6. de bello Gallico latrocinia infamia non putabant. Verum hoc ex naturæ corruptela; & populi barbarie oriebatur.

Refert quoque Aulus Gellius, furta apud Ægyptios & Lacedæmonios licita fuisse atque impunita, verum id patiebantur non quod lex naturalis, cui furtum adversatur, foret iis ignota, sed quod maximum ex ea licentia commodum in rempublicam emergere arbitrarentur. Cum enim, ut Diodorus Siculus lib. 1; Bibliothecæ Historicæ commemorat, Ægyptiorum Legislatori persuasum esset nunquam futurum, ut omnes a furto abstinerent, viam quæsit, qua Domini res sublatas statim & sine magno damno recuperarent. Itaque qui furtis operam dare vellent, hos Legislator jussit nomen suum profiteri apud furum principem, atque ad

cum res surreptas e vestigio deferre, quæ deinde Dominis ita restituerentur, ut prius taxatione facta quartam partem pretii earum pro redemptione persoluerent, quasi poenam negligentiae.

Licurgus autem, qui Lacedæmoniis leges tulit non promiscue omnium rerum furta permisit, teste Xenophonte libro de republica & legibus Lacedæmoniorum, sed tantum edulium; neque omnibus furari concessit, sed junioribus duntaxat, quos furtim alimenta sibi comparare voluit, ut acuerent industriam, discerentque a pueris noctu vigilare, interdiu fallere, insidias struere, exploratores habere, quoniam deprehensos verberibus cædi jubebat; eaque ratione adultos bello utiliores olim fore existimabat. Sed his missis, quæ doctrinam expositam minime labefactant, cum apud ipsos etiam Christianos multa tolerentur, quæ non approbantur, sit.

Propositio III.

16. **P**Ræcepta Juris naturalis primarii immutabilia sunt, nec ab iis observandis immunitas præstari potest.

Prob. Ea immutabilia sunt, quæ rectæ rationi sic consentiunt, ut ei repugnare nequeant; sed præcepta Juris naturalis primarii rectæ rationi ita consentiunt, ut ei repugnare non

non possint : Nam v. g. *Amare Deum & proximum, cuique suum tribuere, innocentem non opprimere, oppresso succurrere*, nunquam possunt rectæ rationi repugnare. Ergo præcepta Juris naturalis saltem primarii sunt immutabilia, & variari non possunt.

Probatur secunda pars. Ab eorum præceptorum observatione immunitas præstari non potest, quæ ita sunt secundum rationem, ut nec omitti possint, nec mutari; præcepta vero Juris naturalis sunt talia. Quomodo enim creatura ab amore Dei solveretur, aut frater fratrem opprimeret sine manifesta rationis naturalis, atque ordinis violatione? Ergo præstari non potest immunitas ab observandis primariis legis naturæ præceptis.

17. Dices. Lex naturalis vetat homicidium, furtum, & adulterium. Atqui Deus hæc omnia permisit; primo cum præcepit Abrahamo ut filium innocentem sibi in holocaustum offerret, Gen. 22. Secundo cum præcepit Hebræis, ut quæ ab Ægyptiis utenda acceperant, vasa argentea secum auferrent Exod. 12. v. 35. Tertio cum præcepit Oseæ, ut uxorem fornicariam duceret; ergo præcepta legis naturalis possunt mutari.

Resp. Furtum, homicidium aut adulterium licitum esse minime probant allata exempla; Primo enim homicidium dicitur, quod ab homine propria & privata autoritate committitur: idque lex naturalis vetat, nec un-

quam nuntiatum fuit. Quod si quis hominem occidat auctoritate publica, v. g. in bello iusto, homicidium non vocatur. Unde multo minus dici potest homicidium, si iubente Deo, qui Dominus est omnium, mors alicui ab alio inferatur; ut enim ait S. Thomas 1, 2. quæst. 64. art. 5. ad 2. *Naturali morte moriuntur omnes communiter tam nocentes, quam innocentes, quæ quidem naturalis mors Divina potestate inducitur propter peccatum originale.* Ideoque secundum mandatum Dei potest infligi mors cuicumque homini; vel nocenti vel innocenti; neque id legi naturali adversatur.

Secundo furtum quoque, siue rei alienæ contrectatio, ut loquitur Jurisconsultus, non fit nisi invito Domino. Sed cum contrectatio rei alienæ fit iubente Deo, qui omnium Dominus est, non fit invito Domino. Ergo tum non fit furtum. Neque enim lex naturalis dicitur, ea, quæ penes nos sunt, non posse absque iniustitia ad alios volente Deo transferri: tantum prohibemur id Auctoritate nostra nobis attribuere, quod alterius esse novimus. Merito igitur Sabbatho sancto canit Ecclesia: *O vere beata nox, quæ spoliavit Ægyptios, ditavit Hebræos, quia id omnium Dominus mandavit.*

Tertio adulterium est alieni thori violatio, sed cum Propheta Oseæ iubente Domino, fornicariam duxit, alienum thorum non viola-

violavit; Ergo adulterium non admisit. Insuper illius uxor non dicitur postea fornicata: ac si fornicata esset, nulla ipsum coëgisset ratio id pati. Quod autem fornicariam duxit, id mysterium continet, quo Synagogam a vero sponso nempe Deo per idololatriam defecisse ostendit: Unde Judæis captivitatem interminatur. Postea tamen veros Israëlitas adventu Christi, cujus meminit, consolatur.

Inst. Deus permisit in veteri testamento plures uxores ducere, quod est contra jus naturale.

Resp. Plures uxores ducere esse contra jus naturale secundum, non vero primum. Jus naturale secundarium vocatur, quod non adeo cum primis rectæ rationis principiis connexum est, quin ab iis divelli possit, cujus rei exempla vulgo afferuntur, *plures uxores ducere, liberos ejicere &c.* sed quæ sunt juris naturalis primarii, mutari nunquam possunt. Nunc pauca de conscientia dicendum, quoniam, si certa sit, tuta humani actus est regula.

§. III.

De Conscientia.

18. **C**ONSCIENTIA est judicium, quo quis novit se licite vel illicite, bene vel male acturum, agere, aut egisse. Nam conscientia ad

omnes temporis differentias sese extendit.

Conscientia igitur, quæcunque agimus vel omittimus, arguit aut probat: eaque etiam si in obsecatis, & impiis quodammodo sopita sit, non tamen omnino, ne in damnatis quidem, extinguatur, secundum illud Isaiaæ capite ultimo v. 24. *Vermis eorum*, (id est laniatus conscientia) *non morietur*. Unde juvenalis Satyra 13.

*Pœna autem vehemens, ac multo scior omni,
Nocte, dieque suum gestare in pectore testem.*

19. Conscientia varie dividitur. Nam ea vel vera & certa est; vel probabilis, vel dubia, vel errans seu falsa.

Conscientia vera & certa dicitur, cum clare distincteque quid præceptum & prohibitum sit, & proinde quid agendum vel omitendum, intelligimus: v. g. clare distincteque norunt omnes, non esse aliis faciendum, quod sibi quis fieri non vult, quoniam ea lex omnium animis est insculpta.

Conscientia probabilis est ea, quæ probabilibus nititur argumentis. Quod si ex utraque parte occurrant argumenta æqualis fere roboris, dubia fit conscientia. Unde

Conscientia dubia vocatur; qua incertus hæret animus, an & quid agere debeat, nec plenam habet securitatem.

Huic affinis est conscientia scrupulosa, quæ etiam si recte procedat, scrupulo tamen aliquo

aliquo retardatur. Est autem scrupulus proprie lapillus asper lædens pedem, gressumque impediens: Metaphorice vero est anxietas animi, vel ex vera & iusta, vel ex vana & futili ratione orta.

Conscientia errans sive falsa ea est, quæ dictat faciendum, quod lex vetat, vel omit-tendum, quod lex præcipit. His explica-tis sit.

Propositio I.

20. **Q**UOD sit contra conscientiam, semper malum est moraliter; quod vero secundum conscientiam fit, non semper est bonum.

Prob. Prima pars. Illud semper est ma-lum, quod perversitatem animi, & peccandi voluntatem semper includit; sed quod con-tra conscientiam fit, id animi perversitatem, & voluntatem peccandi semper includit: si-quidem qui ita agit, male se putat agere, ut clarum est; ergo quod contra conscientiam fit, semper est malum.

Prob. Secunda pars. Illud non est semper bonum, quod legi & ordini aliquando ad-versatur; quod vero secundum conscientiam fit, id aliquando legi seu ordini adversatur, nempe cum errante conscientia fit, ut patet in iis, de quibus ad Apostolos suos Sermo-nem habebat Christus Dominus Joan. 16. v. 2.

Venit hora, ut omnis qui interficit vos, arbitretur obsequium se prestare Deo. Ergo quod secundum conscientiam fit, non semper bonum moraliter est judicandum.

Corollarium I.

21. **C**onscientia generatim dici non potest tutissima morum regula: sed tantum cum vera & certa est; sive cum consentiens est legi, cui nempe quodcunque convenit, bonum est; quod repugnat, malum est.

Corollarium II.

22. **C**onscientia errans excusat quidem a peccato, cum error ex tali oritur ignorantia, quæ involuntarium facit: (Cap. II. §. II. N. 9. & 19.) sed si profluat ex ignorantia, quæ non est causa involuntarii, minime a peccato est immunis.

Ignorantia autem, ut ante dictum est, (N. 19.) alia est *facti*, qualis fuit ignorantia Jacob, dum Liam pro Kachele accepit; quod enim factum erat ignorabat: hæcque ignorantia citra culpam est, dummodo ab ea omnis negligentia absit. Alia est *juris*, qua jus aliquod ignoratur; rursusque vel est juris positivi, quod consistit in legibus, quæ a libera Legislatoris voluntate pendent, nec æternæ sunt & immutabiles; eaque itidem ab omni culpa

culpa libera est, dummodo vinci nequiverit; vel est juris naturalis, quod scilicet lege naturali stabilitum est, quodque invicte ignorari non posse ostendi.

Corollarium III.

23. **C**onscientia probabilis eatenus in praxi tuta videtur, quatenus argumenta, quibus suffulta est, solida sunt, & moraliter certa, nec ulla, vel auctoritate, vel ratione contraria æquali vel fortiori impugnantur.

Corollarium IV.

24. **C**um conscientia dubia est, ea regula utendum, quam præscribit Apostolus Epist. 1. ad Thessalon. cap. 5. v. 21. *Omnia probate, hoc est, expendite: quod bonum est, tenete; ab omni specie mala abstinete vos.* Et consequenter, si paria hinc inde rationum momenta occurrant; vel ab agendo abstinendum, si fieri potest; vel ad eam partem est accedendum, quæ legi magis consentanea est, minusque favet cupiditati: nam ea pars, quamvis forte non videatur probabilior, seu validioribus rationibus munita; est tamen tutior, & a periculo magis remota.

Corollarium V.

25. **E**X præcedente Divi Pauli regula facile eruitur, rejiciendam esse doctrinam

probabilitatis, quam priori sæculo in scholis natam testantur eruditi. In eo autem consistit, quod opinio probabilis, hoc ipso, quod probabilis est, etiam si cum probabiliore & tutiore concurrat, tanquam tuta morum regula proponatur. Ideo autem rejicienda est hæc doctrina, quoniam in iis, quæ salutem æternam spectant, incertum & periculosum certiori & tutiori anteposit.

§. IV.

De lege divina.

26. **L** Ex divina illa est, quæ a Deo ipso immediate lata fuit. Ejusmodi fuerunt variae, quas inter præcipuum obtinent locum leges sive præcepta Decalogi, quæ Deus populo Israëlítico in Monte Sinai cum tonitru ac fulguribus, clangore buccinarum vehementius præstrepente annuntiavit, ut refertur Exod. 20. & Deuteron. 5.

Est autem Decalogus nihil aliud, nisi lex naturalis scriptis consignata, continens decem præcepta moralia, sive quæ ad regendos mores sunt comparata; ubi, quæcunque ad legem naturalem & immutabilem pertinent, breviter, comprehenduntur. Sunt autem præcepta hujusmodi.

Primum. Ego sum Dominus Deus tuus, qui eduxit te de terra Ægypti, de domo servitutis, non habebis Deos alienos coram

ram me. Non facies tibi sculptile, neque omnem similitudinem . . . non adorabis ea, neque colēs . . .

Secundum. Non assumes nomen Domini Dei tui in vanum . . .

Tertium. Memento, ut Diem Sabbati sanctifices . . . qui Dies Sabbati in Diem Dominicam a Christianis est commutatus.

Quartum. Honora Patrem tuum, & Matrem tuam, ut sis longævus super terram, quam Dominus Deus tuus dabit tibi.

Quintum. Non occides.

Sextum. Non machaberis.

Septimum. Non furtum facies.

Octavum. Non loqueris contra proximum tuum falsum testimonium.

Nonum. Non concupisces uxorem proximi tui.

Decimum. Non domum, non agrum, non servum, non ancillam, non bovem, non asinum, & universa quæ illius sunt.

Quæ omnia memoriæ causa his versibus solent includi.

Unum crede Deum, nec jures vana per ipsum.

Sabbata sanctifices, habeas in honore parentes.

Ne sis occisor, machus, fur, testis iniquus.

Alterius nuptam, nec rem cupias alienam.

27. Multas alias leges & præcepta populo Judaico tradidit Deus per Moysen, quemadmodum patet ex Lib. Exodi. Verum hæc omnia in mercedem duntaxat terrenam & tempo-

tempo-

temporalem collineabant, non in æternam felicitatem: neque ex amore Dei, sed ex timore pœnæ perficiebantur. Unde lex vetus in hoc erat imperfecta, quod circa res externas duntaxat versaretur; quod umbras tantum proponeret futurorum bonorum, nec mentem intrinsecus afficeret. Quapropter indicabat quidem malum: sed non afferebat remedium. Vulnerata & ægra natura indigebat Medico, ut sanaretur. Indigebant homines terræ adhærentes cœlesti duce, qui viam ipsis ad cœlum, veram nempe illorum patriam, aperiret. Hunc expectabant in limbis non tantum Abrahamus, & qui ex eo secundum carnem erant prognati, quique sub lege Mosâica vixerant; sed & ipse Adamus primus omnium parens, & alii, qui licet ortum non ducerent ex Abrahamo, tamen humani generis salvatorem, aliquando venturum divinitus acceperant, in eumque crediderant ac speraverant.

28. Eundem prænuntiabant identidem Prophetæ; multa & ante legem, & sub lege, apud Hebræos gesta præfigurabant.

Primo enim Moyses; traducto per mare rubrum populo, figura fuit Christi Domini, non secus ac Successor ipsius Josue, qui eundem populum superato Jordane in terram promissam deduxit. Nam Christus verus Moyses & verus Josue per lavacrum regenerationis; salutareque Baptismi aquas ex pecca-

peccati servitute in libertatem filiorum nos
afferit, & in beatam mansionem ac quietis
sedem traducit.

Secundo. Quæ contingebant, tum sub
Hebræorum judicibus, tum etiam sub Regi-
bus, res prænotabant futuras; ac vel ipsum
Christum, vel ipsius sponsam Ecclesiam ad-
umbrabant: Id patet in Gedeone, Samsone
aliisque judicibus; id etiam maxime in Da-
vide, Salomone, aliisque Regibus cuilibet
scripturas sacras attente legenti, & vetus cum
novo Testamento conferenti, erit perspi-
cuum.

29. Tertio. Multi ex Prophetis clare &
aperte absque ulla figura Redemptorem hu-
mani generis annuntiarunt. Nam vatici-
nium Jacob Gen. 49 v. 10. *Non auferetur Scep-
trum de Juda, & Dux de femore ejus, donec
veniat qui mittendus est, & ipse erit expecta-
tio gentium*, clare indigitat tempus Christi
venturi.

Reipsa enim Christus Messias natus est
tempore Herodis magni, qui, cum esset alic-
nigena, nempe Antipatri Ascalonitæ filius,
Regnum Judææ a Senatu Populoque Roma-
no petiit, & accepit, circa autumnum anni
Juliani 6. Periodi Julianæ 4674. mundi 3964.
A quo tempore regnavit annis 37. ex Jose-
pho lib. 6. antiquit. Judaicarum, cap. 10.
ita ut Diem obierit supremum Mense No-
vembri An. 42. Juliani; Mundi 4001. hunc
primum

primum Judæi Regem externum habuere.

Dein Isaias cap. 7. v. 14. *Ecce virgo concipiet & pariet filium, & vocabitur nomen ejus Emanuel.* Peperit autem Maria Virgo Sanctissima, Beato Joseph desponsata, formarum in se Spiritus sancti virtute Salvatorem JESUM Christum, tempore Herodis magni Judæorum Regis; qui mortuus est circa 25. Novemb. diem anni 42. Juliani: adeo ut Christi nativitas tardius evenire non potuerit, quam 25. die Decembris anni 41. Juliani, a mundo condito 4000. Ex quo sequitur, dudum completam fuisse Isaïæ prædictionem.

Item Daniel ab Archangelo Gabriel ita est edoctus, Dan. cap. 9. v. 24. *septuaginta hebdomades annorum, quæ faciunt annos 490. abbreviatæ sunt, (id est breves: & paucæ decretæ sunt) super populum tuum & super urbem sanctam tuam, ut consummetur prævaricatio, & finem accipiat peccatum, & deleatur iniquitas, & adducatur justitia sempiterna, & impleatur visio & Prophetia, & ungatur Sanctus sanctorum, scito ergo & animadvertite: ab exitu sermonis, ut iterum edificetur Jerusalem, id est, ab eo tempore, quo ab Artaxerxe Longimano Rege Persarum exhibit edictum, quo Concedet Nehemiæ & aliis Judæis, ut Jerusalem instaurent; quod edictum latum est Mense Nisan, qui Martio nostro fere respondet anni 20. Re-*

20. Regni Artaxerxis Longimani, ut legitur Esdræ lib. 2. cap. 2. qui annus incidit in annum Periodi Julianæ 4250. Mundi 3550: *Usque ad Christum Ducem hebdomades septem & hebdomades sexaginta duæ erunt, id est hebdomades 69. quæ continent annos 483. qui si addantur numero 3550. quo notatur annus edicti Artaxerxis, dabunt annum mundi 4033. quo Baptizatus fuit Christus, completo ætatis anno 33. & inchoato anno 34. Ducisque ac Legislatoris officio defunctus est. Et rursum, non completis, sed currentibus illis annorum hebdomadibus, edificabitur platea & muri in angustia, seu difficultate temporum, propter obstantium vicinorum incursum populorum, & post hebdomades sexaginta duas, additis septem memoratis, id est, post hebdomades 69. occidetur Christus, scilicet circa medium hebdomadæ septuagesimæ, quæ nempe sicut edictum Artaxerxis exiit Mense Nisan, incipere debuit ab eodem Mense hujus anni mundi 4033. Æræ Christianæ 30. hoc est, a primo Paschate, quod Christus post Baptismum suum celebravit. Et non erit ejus populus, qui eum negaturus est: id est, Judæi qui clamabunt Pilato, non habemus Regem nisi Cæsarem: crucifige, crucifige eum, non erunt amplius ipsius populus. Et civitatem & sanctuarium dissipabit populus (Romanus) cum duce venturo, (Tito Vespasiani filio) & finis ejus vastitas, & post finem belli statuta desolatio, id est*

est, decreta desolatio populi Judaici carentis templo, & Prophetis virisque doctis destituti, ac per orbem vagi & contempti, nec unquam ad pristinum statum restituendi. *Confirmabit autem pactum multis hebdomada una, nimirum septuagesima, qua Christus novam legem promulgabit. Et in dimidio hebdomadis, scilicet anno ejus quarto mundi 4037. ipsius Christi 37. Æræ Christianæ 33. Die 3. Aprilis, Feria 6. in solennitate Paschæ, hora more Judaico nona, nostro vero tertia Pomeridiana, deficiet hostia & sacrificium, seu per mortem Christi abrogabuntur sacrificia & Hostiæ veteris seu Mosaicæ legis. Et erit in templo abominatio desolationis, sive postea templum polluetur ab impiis Judæis, qui se Zelotas nominabunt, quorum facinora & urbis & ipsius templi Vastationem, quæ accidet anno Æræ Christianæ 70. provocabunt. Et usque ad consummationem & finem perseverabit desolatio, id est, hæc desolatio erit perpetua, sive usque ad sæculorum consummationem perseverabit.*

30. Hujus prædictionis veritatem non solum adventu suo, & morte, sed etiam nova prædictione confirmavit Christus Dominus Matth. cap. 24.

Nec omnino de ea dubitare finit populi Judaici status & conditio. Nam eorum civitas eversa est, templum dirutum, dispersa gens, ubicunque degunt, ibi tolerari magis quam

quam admitti videntur. Nullum habent ducem aut principem, nulla sacrificia, nullam reipublicæ formam. Remota, plerumque muris vicina iis assignatur regio in urbibus, ut a reliquis incolis omnino segregentur. Ad munera civilia vocantur nunquam; nullos gerunt Magistratus, nullam habent administrationis partem in Republica, & quasi forent diversa hominum species, a cæterorum consortio penitus excluduntur. E contrario in immensum crevit Ecclesia Christi, tum miraculis, quæ fecit ipse, cum adhuc in terris viveret, tum iis, quæ ipsius nomine ab Apostolis & Martyribus toto orbe terrarum sunt patrata. Viles, abiectique homines, sine opibus, sine armis, sine ullo humano præsidio; relictis retibus aggressi sunt prædicare Christum crucifixum, *Judeis quidem scandalum, gentibus autem stultitiam.* Horum inceptis Judæi gentilesque junctis viribus obstiterunt: atque ut eos prorsus attererent, omnem humanam sapientiam, omnem sæculi potentiam advocarunt, sed frustra: Nam *quæ stulta sunt mundi elegit Deus, ut confundat sapientes: & infirma mundi elegit Deus, ut confundat fortia: & ignobilia mundi, & contemptibilia elegit Deus, & ea quæ non sunt, ut ea quæ sunt destrueret: ut non gloriatur omnis caro in conspectu ejus.*

31. Itaque potestas humana Divinæ concessit, ac gentiles Judæorum testimonio, Ju-
P. Andr. Gordon Phil. P. I. Z dxi

dæi vero confessione gentilium a Christianis sunt debellati. Nam fatebantur quidem gentiles completas esse Prophetias, quæ proferebantur de Christo, si modo essent veræ, sed eas falsas esse contendebant, & a Christianis confictas. Verum Judæi, quorum testimonium, quasi plus æquo favens Christianis recusari non poterat, Prophetiarum veritatem, tanquam illarum custodes perpetui, propugnabant. Unde S. August. in Psal. 57. v. 22. & alibi sæpe, *per omnes gentes, inquit, dispersi sunt Judæi, testes iniquitatis suæ, & veritatis nostræ. Ipsi habent codices, de quibus Prophetatus est Christus, & nos tenemus Christum, & si quando forte aliquis paganus dubitaverit, cum ei dixerimus Prophetias de Christo, quarum evidentiam obstupescit, & admirans putaverit a nobis esse conscriptas; de codicibus Judæorum probamus, quia hoc tanto ante prædictum est. Videte, quemadmodum de inimicis nostris alios confundimus inimicos, nimirum gentiles testimonio Judæorum, & Judæos Confessione gentilium.* Ergo tandem vicit veritas, Regesque & Imperatores aurea sua sceptrâ ligno crucis subjicere magno duxerunt honori. *A Domino factum est istud, & est mirabile in oculis nostris; Christus orbem terrarum inspirata dilectione, non incusso terrore domuit. Lex ejus lex gratiæ est, quæ non servis datur, sed filiis; quæ non indicat tantum, quid agendum sit, sed ad illud imple-*

implendum voluntatem viresque tribuit. Hanc legem solus poterat ferre, qui solus poterat concupiscentiam nostram vincere, & eximere nos a tyrannide peccati, scilicet Christus homo Deus, qui infinito sanguinis sui pretio abundantem pro nobis omnibus satisfactionem Patri obtulit, & gratiam medicinalem, qua languores nostri sanarentur, & mala vinceretur cupiditas, obtinuit. Hæc est gratia salvatoris, qua non tantum velle possumus, sed qua volumus bonum, illudque sancto amore perficimus.

32. Igitur lex gratiæ, lex nova, lex Evangelica multo potentior est & efficacior, quam lex vetus & Mosaica, tametsi utraque ab eodem principio nempe Deo sit profecta, nec differat a lege naturali renovata & inculcata, quæ docente Christo Domino Matth. 22. v. 37. duobus his præceptis comprehenditur: *Diliges Dominum Deum tuum ex toto corde tuo, & ex tota anima tua, & ex tota mente tua diliges proximum tuum sicut te ipsum*: Sed lex vetus per Moysen servum accepta fuit, lex nova per Christum Dominum lata. Lex vetus terrena duntaxat pollicebatur, exteriores tantum regebat actus, interiores non attingebat: Lex nova æternam felicitatem promittit; homines non exterius modo, sed etiam interius ad præceptorum observationem disponit. *Ibi in tabulis lapideis*, inquit S. August. lib. de spiritu, & lit.

Digitus Dei operatus est, hic in cordibus hominum. Ibi ergo lex extrinsecus posita est, qua iniusti terrerentur: hic intrinsecus data est, qua justificarentur.

Hoc discrimen in Epistolis suis passim inculcat D. Paulus. *Quoniam autem, inquit ad Galatas c. 3. v. 11. in lege (scilicet Mosaica) nemo justificatur apud Deum, manifestum est, quia justus ex fide vivit. Deinde v. 19. quid igitur lex? propter transgressionem (declaran- das) posita est: donec veniret semen (seu Chri- stus) cui promiserat Deus, se in ipso homines esse justificaturum. Declarandæ autem erant per legem transgressionem, ut homines superbi peccata sua agnoscentes Christi gratia sibi opus esse ad legem implendam faterentur: atque ita lex tacite homines ad Christum transmitteret. Quod docet idem Aposto- lus ibidem v. 23. Prius autem, quam veniret fides, sub lege custodiebamur conclusi, in eam fi- dem, quæ revelanda erat. Tandem cap. 4. v. 4. At ubi venit plenitudo temporis, misit Deus Fi- lium suum factum ex muliere, factum sub lege, ut eos, qui sub lege erant, redimeret, ut adoptionem filiorum reciperemus.*

Lex igitur vetus, non secus ac lex natura- lis, Deum summo amore diligendum doce- bat: sed eam dilectionem non præstabat. Unde per solam legem veterem aut natura- lem impleri non poterant legis præcepta, cum ad id opus sit charitate, quæ non est a
natura,

natura, sed a gratia sive a spiritu sancto, ut docet Apost. ad Rom. 65. v. 5. *Charitas Dei diffusa est in cordibus nostris per Spiritum Sanctum, qui datus est nobis.* Non tamen legis naturalis, vel Mosaicæ præcepta erant impossibilia : sed per ea monebantur homines, & facere quod possent, & petere quod non possent.

Itaque legis veteris & naturalis complementum est in lege nova, ut testatur ipse Christus Matth. cap. 5. v. 17. *Nolite putare, quoniam veni solvere legem, aut Prophetas, non veni solvere, sed adimplere.*

33. Quoniam tamen triplicis erant generis præcepta in lege veteri, scilicet *moralia*, quæ nempe ad mores spectabant, quæque Decalogo continentur; *cæremonialia*, quæ ad ritum divini cultus, ad festa, ad sacrificia, ad altaria, ad varias purificationes, &c. pertinebant; ac demum *judicialia*, quæ Jus Civile Judæorum, & Judiciorum formam inter eos observandam præscribebant. Sola præcepta moralia in nova lege remanserunt; Judicialia vero, quoniam Judæis solis erant posita; & cæremonialia, quoniam adumbrabant Ecclesiæ Sacramenta, Christumque venturum significabant, novo fædere, quod umbras & figuras veteris legis destruit, sunt abrogata.

34. Quo vero tempore lex vetus omnino abolita sit & mortua, non conveniunt Theo-

logi. Probabilius tamen est, id factum non fuisse nisi in morte Christi, postquam nempe in cruce pronuntiavit Joan. 10. v. 30. *Consummatum est*; id est, perfecta & ad finem adducta sunt omnia, quæ ad implendam Patris voluntatem, ad homines redimendos, ad legis & sacerdotii veteris, figurarumque omnium complementum erant necessaria.

35. At quamvis legales cæremoniæ temporales tantum fuerint, certum est, præcepta moralia, quæ legem naturalem renovant, ut dixi, quæque novo fœdere sunt confirmata, nullum unquam finem esse habitura. Quamobrem cum hujusmodi præcepta non tantum in novo Testamento, quod Christi sanguine signatum est, sed etiam in veteri multis modis proposita sint, & inculcata, nihil melius aut utilius suaderi potest fidelibus saltem literatis, quam ut in divinis tum veteris, tum novi Testamenti libris legendis ac meditandis assidue ac diligenter versentur. Nam præterquam quod ad docendum accommodatæ & scitu dignissimæ sint sacrorum Bibliorum historiæ, quibus mundi creatio, primorum parentum lapsus, hominum propagatio, electio populi Judaici, ejusdem liberatio, victoriæ de infidelibus divinitus reportatæ, lex constituta, & innumera potentiæ Divinæ miracula commemorantur; præter vaticinia Prophetarum de Christo venturo, de ipsius morte & Resurrectione, de Ecclesia
ab

ab ipso constituenda ; quæ omnia in novo Testamento completa novimus , & quibus utriusque Testamenti consensio apprimè demonstratur : præter hæc , inquam , omnia , quæ a Christianis accurate sciri expedit , accedunt divina documenta ad morum sanctionem comparata , in sacris paginis ubique sparsa , præsertimque in libris , ut vocant *sapientialibus* tradita , quæ si quis legere & animo imprimere studuerit , nihil habebit amplius ad salutarem morum scientiam desiderandum.

36. Quoniam vero utile est sacrorum librorum seriem memoriæ præsentem habere , ut facilius cum opus est , adeantur , eos hoc loco breviter enumerare non pigebit , prout referuntur in Concilio Trid. Sess. 4. in Decreto de Scripturis.

Igitur in veteri Testamento statim occurrit *Pentateuchus* , sive volumen quintuplex Moyſis , cujus primus liber inscribitur , *Genesis* , id est generatio , quia primam mundi creationem refert. Secundus est *Exodus* , sive exitus , quia exitum filiorum Israel ex *Ægypto* commemorat. Tertius dicitur *Leviticus* , quo Levitarum officia & munia describuntur. Quartus liber est *Numerorum* , quia varias populi Hebræi numerationes recenset. Quintus denique dicitur *Deuteronomium* seu secunda lex , quia legis repetitionem & inculcationem continet.

Pentateuchum excipit liber *Josue*, qui Historiam Josue successoris Moysis complectitur; tum liber *Judicum*; Judices post Moysen & Josue fuerunt populi Judaici duces. Liber *Ruth*; quatuor libri *Regum*, qui Reges post Judices populum rexerunt: duo *Paralipomenon*, id est derelictorum, suppleant quæ in *Regum* libris erant derelicta, seu prætermissa. Accedunt *Esdra* liber primus, & liber secundus, qui *Nebemias* etiam vocatur. Postea veniunt *Tobias*, *Judith*, *Esther*, *Job*, *Psalter. David*. 150. Psalm. constans: sequuntur libri *Sapientiales*, qui Salomoni communiter tribuuntur, scilicet *Parabolæ* seu *Proverbia*; *Ecclesiastes* seu concionator; *canticum canticorum*: *Sapientia*, & *Ecclesiasticus* a Jesu filio Sirach compositus. His cohærent majores Prophetæ, nimirum *Esaïas* sive *Isaïas*, *Jeremias* cum *Baruch*, *Ezechiel*, *Daniel*: tum duodecim Prophetæ minores, videlicet *Osee*, *Joel*, *Amos*, *Abdias*, *Jonas*, *Micheas*, *Nahum*, *Habacuc*, *Sophonias*, *Aggeus*, *Zacharias*, & *Malachias*. Opus concludunt duo libri *Machabæorum*. Vocantur autem Machabæi a præcipuo sacrorum bellorum duce Juda Machabæo, ut ait S. Hieronymus. Ad horum recordationem non inutiles videntur sequentes versus.

Genesis, Exo, Levi, Numerorum, Deuteronomi,
Tum Josue, Judi, Ruth, Regum, Paralip,
Esdra,
Tobias,

*Tobias, Judith, Esther, Job, Psalteriumque,
 Proverb, Ecclesiast, Cantic, Sapi, Ecclesiastic.
 Esai, Jeremi, Baruch, Ezech, Danielque,
 Ose, Joel, Amos, Abdias, Jona, Michæas,
 Atque Nahum, atque Habacuc, Sopbon, Agge,
 Zachariasque,
 Atque Malachias, binique libri Machabei.*

37. In novo autem Testamento primum locum habet *Tetrateuchus*, seu quatuor voluminum liber, continens quatuor Evangelia, scilicet secundum Matthæum, secundum Marcum, secundum Lucam, secundum Joannem. Deinde Actus Apostolorum a Beato Luca Evangelista conscripti. Tum quatuordecim Epistolæ Beati Pauli Apostoli. Postea septem Epistolæ Catholicæ, scilicet non ad unum duntaxat hominem aut populum, sed ad omnes Christi fideles directæ; quarum una Divi Jacobi, duæ sancti Petri, tres Beati Joannis Evangelistæ, & una Divi Judæ, seu Thaddæi. Postremus librorum sacrorum est *Apocalypsis* ejusdem sancti Joannis Evangelistæ, quam scripsit in Insula *Pathmos*, in quam ab Imperatore Domitiano propter Christi fidem fuerat relegatus.

Hæc ut memoriæ facilius hærent, versiculis pariter fuerunt inclusa: quorum secundo numerus & ordo Epistolarum D. Pauli declaratur. Nam vocula monosyllaba *Rō*, significat unicam esse Epistolam ad Roma-

nos : dum vocula dissyllaba *Cori* , duas ad Corinthios exprimit , &c.

*Matthæi, Marci, Lucæ, Joannis, & Acta,
Ro, Cori, Gal, e, Phi, Col; Theſſa, Timo, Ti,
Phil, Heb.*

*Jacobi una. Duæ sunt Petri, tresque Joannis,
Jude una: extremum est Apocalypſis opus.*

Atque hæc quidem de Lege Divina, deque veteris & novi Testamenti libris.

S. V.

De Legibus humanis.

38. **S**I ratio ita vigeret in nobis, ut motibus corporeis minime turbaretur, nullis opus esset humanis legibus, quæ pœnas contra delinquentes, & a lege naturali aut divina recedentes decernerent : omnes ad ea, quibus tenemur attenti, constanter adhærentes bono, malum averſantes, erga nos ipsos æquitatem servantes, erga alios benévoli, officia nostra solo virtutis seu ordinis amore impleremus. Sed hominum mentes variis affectibus agitæ, variis erroribus implicite, a recta Regiaque virtutis ac simplicitatis via deflectunt, obliquos calles sectantur, ambages quærunt, cumque sui ipsorum plus æquo sint amantes, in alios injuste se gerunt, ipsorum fortunæ invident, dolent de præclare factis, lætantur de adversis ; perfidi, obtrectatores, rapaces, fœdifragi, parati semper

per ad nocendum, nunquam ad vere beneficiendum. Quocirca necessariae fuerunt Leges humanae, quae propositis poenis legem naturalem ac divinam sustinerent, errantes corrigerent, rebelles comprimerent, omnes in officio continerent. Nam sublato poenarum metu, vel remittente eorum, qui aliis praepositi sunt, perpetuo nisu, leges sanctissimae in contemptum veniunt: ab ignavis negliguntur; ab improbis infringuntur.

Leges igitur humanae ab iis qui legitimam potestatem habent, in hunc finem sunt conditae, ut lex naturalis, qua certis officiis erga Deum, erga nos ipsos & alios tenemur, majorem habeat vim; nec impune ab injustis hominibus aut omittatur, aut violetur.

Duplicis autem generis illae leges: scilicet vel Ecclesiasticae vel Civiles.

De legibus Ecclesiasticis.

39. **L** Ex Ecclesiastica est ea, quae a Legislatoribus Ecclesiasticis, quatenus hoc nomine populis sunt praepositi constituitur. Haec autem potestas Ecclesiae, hoc est, sacris Conciliis, summo Pontifici, & Episcopis, qui nempe sunt Apostolorum successores, fuit concessa: iisque obedientiam debet quilibet fidelis, propter ipsius Christi mandatum, qui sic Apostolos alloquitur Luc. 10. v. 16. *Qui vos audit me audit, & qui vos spernit, me spernit.*

diffiteor, pœnam hanc incestuoso Corinthio fuisse ab Apostolo impositam, quod is contra Divinam, non vero contra humanam legem peccasset; sed certum est multa sancita esse ab Apostolis, quæ nec naturali nec Divino jure continebantur. Nam in primo omnium Concilio, scilicet Hierosolymitano Act. Apost. cap. 1. lata est lex, qua cautum est, quod lege Divina minime præcipiebatur, ut a sanguine & suffocatis carnibus abstinerent gentiles ad fidem conversi. Eaque lex tamdiu stetit in Ecclesia, quamdiu constitere rationes, quæ ad illam condendam Apostolos moverant, ut videri potest apud S. Augustinum lib. 32. contra Faustum cap. 13. Idem D. Paulus 1. ad Timoth. cap. 3. v. 2. Vetat bigamos ad Episcopatum promoveri: quod tamen in lege divina scriptum non invenitur. Multa denique eorum exempla in Canonibus, qui dicuntur Apostolorum, in Conciliis, in constitutionibus Pontificiis leguntur sapienter constituta, de quibus altum est in legibus divinis silentium.

40. Distinguenda sunt autem maxime, quæ ab Ecclesia circa fidem definita sunt, ab iis quæ circa disciplinam tantum sunt constituta. Nam prioris generis sanctiones, quibus non conducunt quidem novi fidei articuli, sed qui sunt a Deo revelati tanquam ad fidem pertinentes, declarantur, et nulli mutationi sunt obnoxia; sive sunt *irre-*
forma-

formabiles, ut loquitur Tertullianus lib. de virginibus velandis cap. i. sed decreta posterioris generis, cessantibus causis prioribus, accedentibus novis, reformationem identidem patiuntur. Quamdiu vero vim obtinent, iis quemlibet fidelem subditum esse oportet, alioquin spirituales poenas incurrit. Nam lex Ecclesiastica spiritualibus duntaxat poenis, scilicet vel excommunicatione, vel dejectione a gradu, vel aliis similibus in contumaces animadvertit. Hinc lex Ecclesiastica dicitur spiritualis: & quamvis externos duntaxat actus præcipere videatur, tamen ad internos pertinet. Nam cum v. g. præcipit, ut certis diebus ab esu carniū abstineant fideles, quæ abstinencia est tantum extrinseca, præcipit consequenter, ut id fiat propter Dei gloriam, quod lege naturali & divina est imperatum: alioqui non omnino servaretur lex Ecclesiastica. Similiter cum præcipit, ut quilibet fidelis rebus sacris intersit diebus dominicis ac festis, non externum duntaxat fidelis actum petit; sed etiam internum, quonempe debita pietate, & animi reverentia huic Christianæ Religionis muneri satisfaciat. Hinc Apostolus solícite servos admonet ad Ephesios cap. 6. v. 6. ut obediant dominis, *ex animo cum bona voluntate*. Quanto magis Deo obtemperandum est ex animo! quocirca S. Augustinus in Psal. 118. Serm. 17. *Quando autem bonum opus quod lex imperat, sit*
timore

timore pœnæ, non delevatione justitiæ, cum Deus metuitur, non amatur, serviliter fit, non liberaliter. Et lib. de spiritu & litera cap. 14. Mandatum si fit timore pœnæ, non amore justitiæ, serviliter fit, non liberaliter: ideo nec fit. Non enim fructus est bonus, qui de charitatis radice non surgit.

41. Cum autem leges Ecclesiasticæ partim ex Scripturis Sacris, partim ex Conciliis, partim etiam ex sanctorum Patrum sententiis ac Pontificum constitutionibus sint desumptæ: varias earum collectiones variis temporibus dederunt scriptores tum Græci, tum Latini, ante compositum Juris Canonici sive Pontificii Systema, quale nunc in Ecclesia Romana receptum est. Et in vetustioribus quidem Collectionibus Canones ad sua quique Concilia suosque Pontifices relati, eadem serie positi legebantur, qua in Synodis ipsis, & Epistolis Pontificiis extabant. Ex quo fiebat, ut quæ de eadem re fuerant constituta, diversis locis essent quærenda; nec facile ab unoquoque reperiri, ac inter se conferri possent. Unde utilius postea visum est, diversas de unaquaque re constitutiones, materiarum habita ratione, ad certa capita redigi: quod suo quisque modo diversis temporibus præstiterunt Ferrandus Carthaginensis Diaconus circa exordia Justiniani Imperatoris; Cresconius Episcopus Africanus septimo seculo; Regino Abbas Prumiensis

ensis in ditione Electoris Trevirensis sæculo decimo ; Burchardus Wormatiensis in Germania Episcopus , circa annum 1020. Ivo denique Carnotensis in Gallia Præsul circa annum 1100.

42. His omnibus successit Corpus Juris Canonici, seu Pontificii, quod nunc in Scholis Catholicis explicatur ; quodque tribus voluminibus, & sex Collectionibus continetur.

Primum volumen priscorum Canonum collectionem, & consequenter jus antiquum complectitur , quo per undecim sæcula usa est Ecclesia. Hæc collectio ab auctore Gratiano inscripta est *Concordantia discordantium Canonum*, quod ipsi non tantum sacros Canones colligendi, verum etiam quæ in iis pugnare videbantur, auxilio disciplinæ scholasticæ, in qua versatissimus erat, conciliandi esset animus. Vulgo tamen dicitur *Decretum Gratiani*, id est, Decretorum Ecclesiæ compilatio facta a Gratiano circa annum 1151. sub Eugenio III. Pontifice Romano. Fuit autem Gratianus Italus, patria Clusinus, sive Clusio Etruriæ oppido oriundus, professione Monachus Benedictinus, e Cœnobio Sancti Felicis Bononiensis.

43. Dividitur *Decretum* illud Gratiani in tres partes. Prima illius pars centum & una distinctionibus constat, quarum quælibet suos habet Canones.

In

In primis viginti distinctionibus agitur de Jure ipso, & variis Juris speciebus; de Jure naturali & positivo; de Jure Divino & humano; de Jure Civili & Ecclesiastico; de partibus, ex quibus jus Ecclesiasticum confurgit, scilicet de Conciliorum canonibus, de patrum sententiis, de Pontificum Decretis. In sequentibus distinctionibus exponuntur ea, quæ ad personas Ecclesiasticas spectant; ubi agitur de iis, qui in Clero constituti sunt ordinibus, & gradibus; de primatu Ecclesiæ Romanæ; de eo, quem aliæ Patriarchales Ecclesiæ inter se observant loco; de Clericorum ordinationibus; de ordinationum impedimentis; de virtutibus Clericorum propriis; de vitiis, a quibus potissimum debent abhorre; denique de universa Hierarchia, diversisque Jurisdictionis Ecclesiasticæ gradibus.

Secunda pars decreti triginta & sex causas complectitur, quæ sic appellatæ sunt, quod in earum qualibet, veluti lis quædam dijudicanda proponatur. Singulæ causæ dividuntur in quæstiones & Canones, ut quod in judicium venit, accuratius per partes expendatur. In causa trigesima tertia quæst. 3. includitur tractatus de *Pœnitentia*, septem distinctionibus comprehensus.

Tota igitur hæc secunda pars Decreti est de Judiciis Ecclesiasticis, de quibus eruditos esse expedit eos omnes, qui de scientia

tia morali consulentibus debent ex officio respondere.

Prima causa, quæ continet septem quæstiones, agit de *Simonia*, Ecclesiasticorum criminum gravissimo, quo ad imitationem *Simonis Magi* Act. Apost. cap. 8. v. 18. aliquid spirituale, vel spirituali annexum venditur vel emitur. Sequentes causæ usque ad decimam sextam criminalia judicia exequuntur; in iisque agitur de accusationibus, de testibus, de modo judicandi Episcopos, de ordinationis vitiis, de Jurisdictione Episcoporum in Clericos; ubi de excommunicatione; de bonis & peculio Clericorum; de decimis & funeribus; de usuris &c.

Postea transit Gratianus ad Monachos a causa decima sexta ad vigesimam primam, agitque de Jure Patronatus, de Statu Monachorum & Monasteriorum &c. causa vigesima prima est de vita & honestate Clericorum. Quæ deinceps sunt causæ, communia Clericorum, & Laicorum crimina persequuntur. Itaque causa vigesima secunda est de crimine falsi & perjurio. Causa vigesima quarta de hæresi. Causa vigesima quinta de Privilegiis Ecclesiæ non violandis. Causa vigesima septima ad finem usque agitur de judiciis, quæ ad matrimonia pertinent, inserto, ut jam monuimus, causæ 33. quæst. 4. tractatu de *Pœnitentia* in septem distinctiones diviso.

Tertia

Tertia pars decreti inscribitur de *Consecratione*, ac quinque distinctiones habet, quarum prima est de consecratione Ecclesiarum, & missarum celebratione. Secunda de Eucharistia. Tertia de Festis, quæ per annum celebrantur. Quarta de Baptismo. Quinta de Confirmatione & jejunio.

Existimant nonnulli hoc Gratiani decretum Eugenii III. mandato in lucem prodiiisse, vel saltem a Gregorio XIII. fuisse confirmatum, cum Juris Canonici Corpus edictraverit. Sed verisimilius est, ipsum esse privati hominis opus, videlicet Gratiani. Itaque non aliam habet Auctoritatem, quam quæ ipsis scriptoribus, ex quibus collectum est, competit. Enimvero mandatum Eugenii III. nullibi extat; Apostolicum vero Gregorii XIII. mandatum pertinet tantum ad emendatiorem Corporis Canonici editionem, non ad ejus confirmationem. Cum enim Juris Canonici Corpus, & præsertim *Decretum* innumeris scateret erroribus, convocati sunt viri docti ad eos emendandos, iique vulgo *Correctores Romani* nominantur. Nihil igitur aliud præcepit Gregorius XIII. nisi ut Corpus Juris Canonici sic emendatum in posterum ederetur, ut colligere licet ex monitione ad Lectorem Decreto Gratiani præmissa.

44. Secundum Juris Canonici Volumen comprehendit quinque libros *Decretalium*

Gregorii IX. sive Collectionem Epistolarum Pontificiarum, quibus aliquid decernitur; earum maxime quæ ab anno Christi 1150. ad annum 1230. emissæ sunt, adjectis Conciliorum præsertim generalium Lateranensium tertii & quarti, necnon quibusdam priorum synodorum Decretis, tum etiam sententiis Patrum a Gratiano prætermisiss. Hanc collectionem digessit Raymundus de Pennafort, Barcinonensis, ex ordine Prædicatorum, Gregorii IX. Capellanus & Pœnitentiarius, eamque tum in scholis, tum in iudiciis vim legis obtinere voluit idem Pontifex Epistola, quam operi præfixit ad Doctores & Scholares Bononiæ commorantes an. 1230.

Extabant iis temporibus quinque Decretalium collectiones, quæ *veteres* dicuntur, quarum quatuor priores Antonii Augustini Tarraconensis Archiepiscopi, quintam vero Innocentii Cironii Juris utriusque Professoris, Canonici ac Cancellarii Ecclesiæ & Academiæ Tolosanae curis & laboribus debemus.

Ex iis quinque antiquis collectionibus, & quibusdam Gregorii IX. Epistolis prodiit hæc Gregoriana compilatio, in qua Raymundus non retulit antiquas Decretales integras, sed plerumque earum duntaxat initium, cum ea parte, qua definitio propositæ quæstionis continetur, addita illa voce, & *infra*, quæ denotat

notat recisa fuisse ea, quæ superflua, vel certe minus necessaria videbantur: ideoque *pars decisa* seu resecta dicitur quæ in plerisque editionibus ad calcem Capituli subiecta est. Ea de causa ut plenior facti notitia habeatur, ad veteres quinque collectiones est recurrendum.

45. Ordo servatus in Decretalibus Gregorii IX. hic est. Primus liber continens titulos 43. initio ducto a doctrina de summa Trinitate, atque expositis variis juris speciebus agit de judiciis, sive Prælati Ecclesiæ & Personis Ecclesiasticis, earumque ordinatione. Secundus qui tit. 50. complectitur, agit de causis disceptandis in genere ac de servando ordine judiciario in rebus civilibus. Tertius tit. 50. constans est de rebus Ecclesiasticis. Quartus cui insunt tituli 21. est de Matrimonio: in eoque fere includuntur causæ Laicorum Ecclesiasticæ, quæ extra crimen sunt in Episcopali foro disceptandæ. Quintus denique titulos 41. complectens in criminalibus judiciis & criminibus, ac Censuris Ecclesiasticis consistit. Quæ omnia exprimuntur hoc versiculo:

Judex, Judicium, Clerus, Sponsalia, Crimen.

46. Tertium Juris Pontificii volumen includit quatuor reliquas collectiones nimirum *sextum* librum Decretalium, Clementinas, Extravagantes Joannis XXII. & Extravagantes communes.

Sextum Decretalium librum Guilielmi præsertim Archiepiscopi Ebrodunensis, aliorumque eruditorum opera concinnatum, edidit Bonifacius VIII. an. 1298. Dictus est *sextus* quod quinque libris Gregorii IX. esset additus. Constat autem tum emissis a Gregorio IX. post ejus compilationem, tum etiam subsequentium Pontificum, & ipsius Bonifacii Epistolis, ac præterea duorum Generalium Conciliorum Lugdunensium Decretis. Hic liber in quinque minores libros divisus est eadem titulorum serie dispositos, qua Gregoriana collectio. Idem pariter ordo in sequentibus collectionibus est observatus.

Quartam collectionem ex Concilii Vienneſis celebrati anno 1311. Decretis, atque ex quibusdam suis Epistolis composuit Clemens V. Gallus ex Aquitannia oriundus: quam tamen non ipse, sed Joannes XXII. etiam Aquitanus sub *Clementinarum* appellatione edidit.

Quinta collectio continet constitutiones *Extravagantes* ejusdem Joannis XXII. quæ sunt num. 20.

Sexta & ultima Collectio complectitur *extravagantes communes* alorum Pontificum. Hæ tum Joannis XXII. tum sequentium Pontificum Decretales Epistolæ vulgo *extravagantes* nominatæ sunt, quod *extra* juris Canonici corpus vagarentur, nec in eo essent inclu-

inclusæ. Jam autem in ipsum sunt relatæ. Sed cum a Doctoribus privatis collectæ fuerint, vim & robur non habent, nisi fides iis ex scriniis Apostolicis astruatur.

His omnibus addi possunt libri 4. Institutionum Juris Canonici a Joanne Paulo Lancelotto Juris Consulto Perusino conscripti: quibus nulla pariter auctoritas publica est attributa.

47. Hisce collectionibus Canonicis multum derogatur per consuetudines receptas, & Privilegia specialia quorundam Regnorum & Provinciarum; cujusmodi sunt Concordata Germaniæ inter Nicolaum V. Pontificem & Fridericum III. Imperatorem anno 1447. sancita. Item *Immunitates* seu *Liber-tates* Ecclesiæ Gallicanæ, atque Concordata Galliæ inter Leonem X. Pontificem Romanum, & Franciscum I. Galliarum Regem anno 1515. inita.

Debet quidem unusquisque jus in ea, quam inhabitat regione, receptum observare: sed Jus Canonicum Romanum ubique a Catholicis magno loco habendum est: quia licet vim legis ubique non obtineat, est tamen communis quædam morum regula, quæ multorum præceptorum sanctitate per universam Ecclesiam toto orbe diffusam magnopere commendatur. Quoniam autem speciali modo allegantur loca ex Jure Canonico Romano petita, hunc modum

in Tyronum gratiam breviter libet exponere.

48. Ex prima parte Decreti sic proferuntur Canones. *Can. Presbyter. dist. 32.* id est Canone qui incipit ab hoc vocabulo, *Presbyter*, qui Canon, reperitur *dist. 32.*

Ex secunda parte sic allegantur. *Can. quoniam : 12. quest. 1.* id est Canone, *quoniam.* *Causa 12. quest. 1.*

Ex tertia parte. *Can. nemo 9. dist. 1. de consecratione.* Adduntur hæc vocabula *de consecratione* ut intelligatur proferri Canon ex tertia parte Decreti, quæ quinque tantum habet distinctiones, & quæ inscribitur *de consecratione.*

Decretalium Gregorii IX. sic loca laudantur. *Cap. solicite 2. extra, de restitutione spoliatorum.* Id est Capitulo *solicite* secundo, quod est *extra* Decretum Gratiani nempe in Decretalibus Gregorii IX. titulo *de restitutione spoliatorum.* Qui titulus est 13. libri secundi.

Cæterarum compellationum loca citantur hoc modo. *Cap. discretionis de decimis in 6.* id est Capitulo *discretionis*, titulo *de decimis*, in *sexto libro* decretalium; hicque titulus est 13. lib. 3. hujus libri sexti. Item *Cap. unico de homicidio in Clementinis: vel Clementina, si furiosus, de homicidio voluntario vel casuali.* Similiter *Cap. execrabilis, de præbendis & dignitatibus, in extravag. Joan. XXII. & Cap. super*

*super Cathedram , de sepulturis in extravag.
Commun.*

De Consuetudine.

49. **P**Ræter has *leges seu Constitutiones* Canonicas, quæ scriptum Ecclesiæ Romanæ jus fere continent, quæque plus minusve per universum orbem Christianum observantur, peculiare in singulis Ecclesiis occurrunt consuetudines, non scriptæ, quæ cum nec legi naturali aut divinæ derogent, nec bonis moribus contrariæ sint, a locorum incolis, imo ab iis, qui per hæc loca transeunt, ne ulla detur indigenis offensio, sunt custodiendæ. Id sapienter monet S. Augustinus Epist. 54. ad Januarium. *Quod neque contra fidem, neque contra bonos mores esse convincitur, indifferenter est habendum, & propter eorum inter quos vivitur, societatem servandum est* *mater mea Mediolanum me consecuta invenit Ecclesiam Sabbatho non jejunantem: ceperat perturbari, & fluctuare quid ageret* *propter ipsam consului de hac re beatissimæ memoriæ virum Ambrosium: respondit mihi* *cum Romam venio, jejunio Sabbatho: cum hic sum, non jejunio. Sic etiam tu, ad quam forte Ecclesiam veneris, ejus morem serva, si cuiquam non vis esse scandalo, nec quemquam tibi. Hoc cum matri renuntiassẽ, libenter amplexa est. Ego vero de hac sententia etiam*

atque etiam cogitans ita semper habui tanquam eam cœlesti oraculo acceperim.

Igitur consuetudo pro lege tenenda est, quoties nec veritati, nec justitiæ aut æquitati est contraria. Est enim, ut habetur *Can. consuetudo* 5. dist. 1. *Jus quoddam moribus institutum, quod pro lege suscipitur, cum deficit lex.* Quod quidem duntaxat de ea intelligitur consuetudine, quæ neque Divino Juri, neque Canonicis contradicit institutis. Si enim iis repugnet, impedire non debet, quominus veritas prævaleat & vincat. Nam consuetudo si-
ne veritate vetustas erroris est. Ita loquitur D. Cyprianus Ep. 74. ad Pompejum, relata *Can. 8. distinct. 8.* Unde Tertullianus lib. de velandis virginibus Cap. 1. *Dominus noster Christus veritatem se, non consuetudinem cognominavit; & ipse Christus Matth. cap. 23. v. 3. de Scribis & Pharisæis loquens hic ait. Secundum opera . . . eorum nolite facere.* Quibus verbis significat non exemplo tantum & consuetudine esse vivendum; si-
ve ut loquitur lex *Nemo 13. Cod. de sententiis & interlocutionibus, non exemplis sed legibus judicandum.* Et lex *sed licet 12. ff. de officio præsidis, non tam spectandum, quid factum sit, quam quid fieri debeat.*

De legibus Civilibus.

50. **L** Ex Civilis dicitur, quæ lata est a Legislatore Civili, nempe a Principe, vel a
Repu-

Republica ; eaque illos omnes obligat, qui Principi vel Reipublicæ sunt subiecti. Neque enim patitur ordo, ut qui sunt inferiores, superioribus non obediant in iis, quæ ad commune societatis bonum ab ipsis sunt constituta.

Quocirca qui aliis præsumunt, animadvertendi ius habent in eos qui leges suas contemnunt. Ita enim statuit Apostolus ad Romanos. Cap. 13. v. 1. *Omnis anima potestatibus sublimioribus subdita sit : non est enim potestas nisi a Deo ordinata. Itaque, qui resistit potestati, Dei ordinationi resistit. Et ut ostendat eos graviter peccare, qui legitimæ potestati ea, qua par est ratione, morem non gerunt, hæc addit : Qui autem resistunt, ipsi sibi damnationem acquirunt . . . ideo necessitate subditi estote non solum propter iram, sed etiam propter conscientiam.*

§ 1. Ex quibus verbis intelligere licet, legem civilem, externam quidem esse politicam, & temporalem, quoad objectum, seu res imperatas : sed obligationem, quæ ex ea nascitur, internam esse, spirituales, & ad animum pertinentem ; nec illius observationem salva conscientia posse contemni ; sed ea quemque teneri, sive Clericus sit, sive Laicus. Item peregrinus, dum alicubi moratur, fit pars saltem transiens & temporaria societatis eorum hominum, apud quos vivit ; & consequenter legibus & usibus, seu consue-

consuetudinibus illius loci, nempe quatenus nec naturali nec legi divinæ repugnant, sese debet submittere. Unde illud tritum:

Dum fueris Romæ, Romano vivito more.

Nulla quidem fuit unquam gens tam barbara, quin aliquas sibi proprias leges habuerit, ut ex veterum historiarum monumentis accipimus.

Primo enim ante hac vidimus præcepta civilia a Deo ipso fuisse Judæis dictata. Deinde novimus apud vetustiores populos, maxime vero apud Græcos, scripto traditas & digestas fuisse leges civiles, quales sunt leges Solonis, Licurgi, & aliorum, quæ omnes a lege naturali manant; imo quæ forte magna ex parte a lege Mosaica, cujus copiam fecerant Judæi, fuerunt petitiæ. Verum majus cæteris studium in hac parte posuerunt Romani; artemque populos non tantum armis subigendi, sed etiam justis legibus continendi, cæteris diligentius excoluerunt.

52. Nam præter Romuli aliorumque Regum Romanorum leges, quæ stante Regia potestate obtinebant, placuit post Reges exactos certum constitui jus in Republica, quo civium discordiæ componerentur. In hanc rem missi sunt anno circiter 300. ab urbe condita tres Legati Athenas, & in alias Græcorum civitates, qui leges ab his populis servatas describerent, & Romam referrent. His vero post triennium reversis adjuncti fuere septem

semprem viri prudentes, qui una cum ipsis earum legum delectum haberent. Atque ita decem viri legibus scribendis creati, per quos leges in decem tabulas digestæ: quibus paulo post, propter multarum rerum defectum, additæ sunt aliæ duæ tabulæ: adeo ut omnis publici privatique juris fons ex duodecim illis tabulis scaturiret.

His tabulis accesserunt *leges*, quæ ab universo populo; *plebiscita*, quæ a plebe, *Senatusconsulta*, quæ a Senatu fiebant. Accesserunt item *edicta* Prætorum, ex quibus prodiit jus, quod *honorarium* dicebatur, quod magnus esset Prætoribus honos in Republica. Cumque hæc edicta in unum corpus fuissent collecta, corpus illud nominatum fuit *edictum perpetuum*.

53. Mutata Reipublicæ facie, & delato ad unum hominem Imperio, variæ prodierunt Imperatorum constitutiones, quæ per quingentos circiter annos, scilicet ab Augusto ad Justinianum mirum in modum excreverunt. Magnæ quoque Authoritatis fuerunt *Responsa prudentum*: nam non tantum illorum Consilio jus dicebant Imperatores; sed eorum quoque nonnullis publicam de jure respondendi facultatem concesserunt.

Ex his Imperatorum, ab Adriano ad Constantinum constitutionibus compositi sunt duo codices tempore Diocletiani, alter a Gregorio, alter ab Hermogene viris privatis.

Terti-

Tertium codicem dedit Imperator Theodosius Junior, octo prudentium virorum laboribus usus, in quo Imperatorum a Constantino ad se ipsum constitutiones inclusit.

§4. Tandem Imperator Justinianus summam manum Jurisprudentiæ Romanæ imposuit. Is enim Anno Christi 528. cum *Imperatoriam Majestatem non solum armis decoratam, verum etiam legibus vellet esse armatam*, illustres viros delegit, quibus *maximum illud & ad Reipublicæ sustentationem respiciens opus* commisit, ut ex tribus legum codicibus *Gregoriano, Hermogeniano, & Theodosiano*, amputata prolixitate, alium Justiniani nomine inscribendum componerent. Horum igitur excellentium virorum opera Codicem Justinianum perfecit; & datâ hanc in rem constitutione confirmavit anno 529.

Deinde innumeras pene veterum leges unico complexus est opere, in quinquaginta libros diviso, quod *Digestorum seu Pandectarum* nomine donatum est.

Postea Juris Civilis Epitomen in quatuor libros distributam edidit in gratiam adolescentium Jurisprudentiæ Studiosorum, quam Epitomen *Institutionum Juris Civilis* nomine insignivit.

Sed cum nonnulla in Codice vel omissa vel non satis accurate pertractata deprehenderet, ipsum in multis emendari, & primæ ejus editioni secundam accuratiorem succedere

dere voluit : hicque est *repetita prælectionis Codex*, quem jam in *Corpore Juris Civilis* legimus.

Additæ sunt *Novellæ*, seu novæ Constitutiones 168. Adeo ut *integrum Juris Civilis* ut vocant *Corpus*, quatuor constet *Collectionibus*, videlicet quatuor *Institutionum libris*, quinquaginta libris *Digestorum* seu *Pandectarum*, duodecim libris *Codicis*, & *Novellis* 168. ex quibus *Novellis* excerptæ sunt breves sententiæ, quæ in recognoscendo *Codice* variis illius locis insertæ sunt, eæque *Authenticæ* dicuntur, quod *Authoritate Imperatoria* fulciantur *Novellæ*.

Jam cum quinquaginta *Digestorum* seu *Pandectarum* libri una cum *Glossis* unico volumine comprehendi non possent, in tria divisi sunt volumina a librariis qui primum volumen *Digestum vetus* nominarunt, quoniam prius editum est : Secundum, *Infortiatum* quia fortiolem ac pleniorlem legum cognitionem suppeditat; Tertium denique *Digestum novum*, seu postremo editum nuncuparunt.

§5. Singuli *Pandectarum* & *Codicis* libri in titulos, tituli in leges, & leges in Paragraphos distribuuntur: Cum ergo allegatur lex aliqua *Digestorum*, seu *Pandectarum*; nomen *Digestorum* significatur per litteram majusculam D. *Pandectarum* vero per Græcum, π cum accentu circumflexo, in cujus locum
Libra-

Librarii duplex ff. substituant. Exempli gratia; si quis allegare velit Paragraphum tertium legis primæ tituli primi Digestorum, seu Pandectarum, qui titulus est de Justitia & Jure, sic dicet. *Jus naturale est, quod natura omnia animalia docuit*, ex l. 1. Parag. 3. D. seu ff. de Justitia & Jure; id est, lege prima, Paragrapho tertio, Digestis, seu Pandectis, titulo de Justitia & Jure.

In Codice autem L. Nemo 2. Cod. de sacrosanctis Ecclesiis: id est, Lege, quæ incipit ab hoc vocabulo, *nemo*, quæ lex est secunda, in Codice, titulo de sacrosanctis Ecclesiis. Hic titulus est secundus libri 2. Si agatur de Authentica, dicetur Authent. *Casta*. Cod. de sacrosanctis Ecclesiis &c. *Novellæ* propriis nominibus & numeris allegantur, & Novellarum capita indicantur. Institutiones quoque Juris Civilis per titulos & Paragraphos laudari solent. Hæc nota §. est Græcum depravatum, & Paragraphum significat.

Primo Paragrapho præmittitur *Principium*, quod sic allegatur *in Pr.* id est, in *Principio*. similiter *in f.* id est, *in fine*, *in sum.* id est, in *summa*, quæ nempe legi aut Paragrapho præfixa est. Item: *arg.* id est, argumento, scilicet ex aliqua lege deducto. *h. t.* id est, *hoc titulo*. *gl.* id est, *Glossa*. *j. g.* id est, *juncta glossa*, scilicet cum notis, &c.

56. Quamvis Jus civile Romanorum tanta arte, & opera à Justiniano, tum ex optimis quibusque Juris consultorum responsis, & observationibus; tum etiam ex sanctissimis imperatorum constitutionibus compositum fuerit, non tamen statim a subsequentibus Imperatoribus est approbatum. Sed ipsius auctoritas paulatim crevit, prout magis apud homines innotuit: tandemque apud cunctas fere nationes, vel ex toto, vel ex parte, capit observari. Nunc magnum habet pondus in tota fere Europa, ubi *jus simpliciter nominatur.*

Nam etiamsi nulla fere sint Europæ Regna, nullæ Provinciæ, quæ peculiare non habeant usus & consuetudines; in iis tamen *jus scriptum*, id est, Jus Romanum pro regula est, quotiescunque *jus*, ut vocant, *consuetudinarium* deficit, nam jus Romanum vera & genuina continet æquitatis ac justitiæ naturalis principia: nec aliunde melius jurisprudentiæ præcepta & definitiones, quam ex Jure Romano repetuntur. Quamobrem cum iis aliquatenus informatos esse oporteat scientiæ moralis studiosos, nihil ab instituto nostro abhorrens me facturum puto, si selectas quasdam ex Institutionibus Justiniani notiones cum ea, quam tracto, scientia magis conjunctas hic proponam.

§ VI.

Selectæ juris notiones ex Imperatoris Justiniani Institutionibus desumptæ, cum variis observationibus ad scientiam morum spectantibus.

57. **I**Nstitutiones juris Civilis Romani sunt. Veluti jurisprudentiæ Romanæ elementa, a quibus hujusce studii sumendum est exordium.

Inscribuntur *Divi Justiniani Sacratissimi Imperatoris Institutiones*. Etenim solebant Romani *Divos* & *Sacratissimos* appellare suos Imperatores. Cur autem id facerent, nulla justa ratione, sed sola pudenda, & impia adulatione movebantur. Nos vero cum de jure Romano agentes, sic eos nominamus, auctore Deo id faciamus, qui de ministris suis sic ait, Psalm. 81. v. 6. *Ego dixi dii estis*. Eoque sensu testimonium illud allegat Christus Dominus Joan. cap. 10 v. 31. Itaque possumus *Divi Justiniani Institutiones* cum veteribus dicere, earumque synopsin exhibere.

In quatuor *libros* dividuntur, quorum singuli variis constant *titulis*: rursusque tituli *principio* ac *paragraphis* dirimuntur.

EX LIBRO PRIMO.

58. **L**iber primus tradita justitiæ & juris prudentiæ definitione, positisque diversis
Juris

juris speciebus, de *personis* agit quarum varias divisiones recenset,

Ad Tit. I.

De justitia & jure.

59. **J**USTITIA est *constans & perpetua voluntas*
jus suum cuique tribuendi.

Dicitur *constans*, & *perpetua voluntas*; quibus verbis habitus voluntatis assignatur: nam voluntas constans & perpetua non est sine habitu. Additur *jus suum cuique tribuendi*: quia justitiæ objectum est, jus cuique reddendum.

Jurisprudentia est *juris notitia*, Aliquando tamen *jus* sumitur pro ipsa Arte, seu scientia juris: quo sensu definitur *ars boni & aequi*.

Præcepta juris sunt tria, honeste vivere; alterum non lædere, suum Cuique tribuere.

Jus vel publicum est, vel privatum. Publicum dicitur, quod ad statum Reipublicæ vel ad principem primario spectat: cujusmodi est jus sacrum, quo nititur religio; jus belli & pacis. In Germania quæ pertinent ad Electionem Imperatoris sunt juris publici. In Gallia lex Salica, qua foeminae a sceptro excluduntur, est quoque juris publici.

Privatum jus dicitur, quod ad singulorum utilitatem pertinet, de quo solo agit

Justinianus ; illudque collectum esse dicit ex jure naturali, gentium, & civili.

Ad Tit. II.

De jure naturali, gentium & civili.

60. **J**US naturale hoc titulo definitur, quod *natura omnia animalia docuit*: sive quod hominibus & belluis commune est: Quamquam bellux ut rationis, sic juris expertes merito habentur. Sed, si quod bellux instinctu naturali, id homines ratione faciunt, jure naturali facere dicuntur. Cujus exemplum vulgo afferunt maris & sceminæ Conjunctionem, prolis educationem, &c.

Jus gentium est, quo gentes humane utuntur, ut loquitur Ulpianus leg. 1. ff. de justitia & Jure, illudque vel primarium, vel secundarium est.

Primarium dicitur; quod ratio naturalis inter omnes homines constituit: ad quod pertinet religio, quam quisque habet erga Deum; amor erga Patriam & parentes &c. hocque jus revera est jus naturale, quatenus hominibus solis convenit, & ita nominatur ab Imperatore Justiniano lib. 2. instit. tit. 1. parag. 11. *Secundarium* est, quod usu exigente & humanis necessitatibus constitutum est. Quo jure omnes pene contractus sunt introducti, ut emptio, venditio, locatio, condutio,

trio, societas, depositum, mutuum, & alii innumerabiles :

Jus Civile est, quod quisque populus liber sibi ipse constituit : idque vel *scriptum* est, vel *non scriptum*, seu *consuetudinarium*.

Ad Tit. III.

De jure personarum.

6r. **D**E personis agere incipit Justinianus hoc titulo, primamque personarum divisionem hanc esse dicit. Quod omnes homines aut *liberi* sint aut *servi*.

Homo liber est, *qui alieno dominio non sub-jacet* ; sive qui omnia pro libitu facere potest, quæ legibus communibus non prohibentur.

Servus est, *qui alterius dominio subjicitur*. Servi autem ex eo nominati sunt, quod Imperatores *servare* captivos, eosque vendere, non vero occidere solerent. Unde etiam *mancipiorum* nomen ipsis datum est, quod ab hostibus *manu* caperentur, non vero occiderentur.

Præter captivitatem alius duplex erat modus, quo fiebant servi nempe *nativitate*, nam omnes ex ancillis nati pariter fiebant servi : & *jure Civili*, nam liber homo, qui major viginti annis ad pretium participandum sese ve-

nundari partiebatur, amittebat libertatem & fiebat servus.

In servorum conditione nulla est differentia; liberi tamen vel sunt ingenui, vel sunt libertini.

Ingenuus, ut modo dictum est, vocatur, qui statim ut natus est, liber est: sive qui ex matre libera nascitur: nam hoc casu *partus sequitur ventrem* seu conditionem matris.

Libertinus dicitur, qui ex servitute manumissus est. Manumissio autem, quæ est *de manu missio* sive datio libertatis multis modis fiebat; iisque vel solemnibus, vel minus solemnibus.

Modi solemnnes erant tres; scilicet vindicta, census, & testamentum.

Vindicta fiebat manumissio apud Magistratum. Vindicta autem erat virgula, qua manumittendi in capite pulsabantur a Præ-tore, sic dicta a Vindicio servo qui cum nobilium adolescentium conjurationem contra Rempublicam patefecisset, libertate donatus est. Ut scribit T. Livius lib. 2. cap. 5.

Censu fiebat manumissio, cum Dominus servum producebat in campum Martium, ut ibi censum id est, bona inter reliquos cives profiteretur: cui manumittendi modo successit is, quo manumittebantur servi in Ecclesia coram fidelium cætu, donec omnino sublata est servitus inter Christianos.

Testamento denique fiebat manumissio,
um

cum quis servum suum testamento liberum esse jubebat.

Minus solemnes manumittendi modi erant item tres, scilicet *inter amicos*, cum nempe quis presentibus amicis servum manumittebat : *per mensam*, cum ipsum convivio admittebat : *per Epistolam*, quando aliis in locis agenti servo missis literis concedebat, ut liber viveret.

Ab Tit. VIII.

De his, qui sui, vel alieni Juris sunt

Secunda personarum divisio est, in eos : qui sunt sui Juris, quique dicuntur *Patres familias* sive puberes sint, sive impuberes & in eos, qui sunt sub potestate dominica, ut *servi*, de quibus dictum est, (N. 61.) vel sub potestate patria. ut *filii familias*.

Ad Tit. IX.

De patria potestate.

63. **P**atria potestas est jus, quod habet Pater Jure Romano in liberos tum ex justis nuptiis procreatos, tum in legitimatos ; tum etiam in adoptatos. Qui sint filii ex legitimis nuptiis procreati, satis notum est : si extra legitimas nuptias nascentur, dicuntur *naturales*, non legitimi, quia leges eos non

agnoscunt: sed per subsequens matrimonium possunt legitimari. Adoptivi denique apud Romanos dicebantur, qui per adoptionem tantum, non natura erant liberi.

Duplex erat adoptionis species: altera dicebatur *arrogatio*, qua patres-familias, id est, qui erant sui juris, & extra patriam potestatem, sive essent puberes, sive impuberes; altera *adoptio* specificè, qua filii familias, qui nempe non erant sui juris, in potestatem patris adoptivi transibant.

Summa autem erat patris potestas in liberos, lege XII. tab. (N. 52. supra §. II.) Ideoque scribit hic Justinianus, *nullos esse homines, qui talem habebant in liberos potestatem, qualem habebant cives Romani*. Sic enim lex XII. tab. præcipit. *In liberos suprema patrum auctoritas esto. Venundare, occidere liceto. Si pater filium ter venundedit, filius a patre liber esto.*

Itaque cum pater filium alicui vendiderat, non idcirco hic filius sui juris efficiebatur, sed in patris potestatem recidebat, qui eum rursus ac tertio poterat vendere. Verum post tertiam venditionem, si filius manumittebatur, fiebat sui juris & paterfamilias:

Hinc factum est, ut *emancipationes* liberorum veteri jure Romano per tres imaginarias venditiones, & totidem manumissiones fierent. Quippe pater naturalis adibat, Præ-

torem

torem cum aliquo sibi amico, cui maxime confidebat, quique idcirco pater *fiduciarius* appellabatur. Huic vendebat seu mancipabat filium, certam habens fiduciam, fore, ut filius ab eo libertatem reciperet, Igitur pater *fiduciarius* coram Prætorē, & quinque testibus ac *libripēde*, sic vocato, quod libram, seu stateram ferret cum duobus nummis aureis, filium emebat a patre naturali, dabatque ei in pretii similitudinem unum vel duos nummos, quos ferebat libripens, atque ita filius in potestatem illius transibat. Ipse vero statim eum manumittebat. Manumissus vero in patris naturalis potestatem recidens, rursus ab eo mancipabatur, & a patre *fiduciario* manumittebatur; idemque tertio fiebat, ut tandem post tertiam mancipationem & manumissionem filius e patria potestate dimitteretur.

64. Verum hæc solennitates postea sublatae sunt, iisque successit 1. emancipatio *Anastasiana*, quæ fiebat ex rescriptione principis, ut constituerat Imperator Anastasius lege 5. Cod. de emancipationibus: deinde *Justiniana*, quæ fiebat coram Magistratu, prout statuit justinianus leg. 6. Cod. eodem titulo.

Ex his intelligitur, Emancipationem in jure Romano esse actum, quo pater emanu id est, ex potestate & dominio filium etiam impuberem, & tutore indigentem dimittebat. Sed apud nos Emancipatio est actus, quo minor 25 annis, altero vel utroque pa-

De Nuptiis.

66. **N**uptiæ, sive matrimonium est *viri & mulieris conjunctio, individuum vitæ consuetudinem continens.* Hæc conjunctio est animorum potius quam corporum. Nam matrimonium consensus facit, non concubitus.

Ad legitimas nuptias Jure Civili-Romano requiruntur quatuor.

Primo ut contrahentes sint Cives Romani. Nam olim nec peregrini, quales erant, qui jus Latii tantum habebant; nec servi justas apud eos nuptias contrahebant. Jure tamen Canonico omnes homines, tam Cives, quam peregrini, tam liberi quam servi justas nuptias contrahunt: quoniam apud Deum non est discrimen inter liberum & servum, ex Epist. ad Gal. c. 3. v. 28.

Secundo requiritur ut masculi sint puberes, & foemina viri potentes: sive, ut illi compleverint annum decimum quartum, hæ vero annum duodecimum.

Tertio, ut habeant consensum parentum, in quorum potestate sunt: *nam hoc fieri debere, & civilis & naturalis ratio suadet.* Jus tamen Canonicum hunc parentum consensum non desiderat, ut videri potest apud Lancelottum Lib. 2. Instit. Juris Canonici Tit. XI. §. 1. cui consentaneum est Concil. Trident.

Trident. Sess. 24. Cap. 1. de Reform. matrimonii.

Quarto, denique requiritur, ut contrahentes abstineant a vetitis & nefariis nuptiis: quales sunt inter personas, quæ vel affinitate vel cognatione conjunguntur.

67. Cognatio sive consanguinitas est vinculum personarum ex eodem stipite & sanguine descendendum.

Affinitas vero est necessitudo per matrimonium contracta inter conjugem, & alterius conjugis cognatos.

Dux sunt consanguinitatis *Lineæ*, scilicet *recta* & *obliqua* seu collateralis.

Linea recta est ea, in qua alter alterum genuit; eaque vel est ascendendum, in qua numerando a filio ascendimus ad patrem, ad avum, ad proavum, abavum, atavum, tritavum &c. vel *descendentium*, in qua descendimus a patre ad filium, ad nepotem, ad pronepotem, abnepotem, atnepotem; trinepotem &c.

Obliqua linea est eorum, qui a latere veniunt.

In *recta linea* v. g. inter patrem; filiam, neptem &c prohibentur nuptiæ in infinitum, prohibentur item in *linea collateralis* inter personas quarum aliquæ parentum loco sunt, respectu aliarum; ut, non potest quis *amitam* seu *materteram*, vel *magnam amitam*, & *magnam materteram* uxorem ducere,

re, quia parentum loco habentur. Eadem ratione patruus fratris sui filiam, aut neptem uxorem ducere non potest.

In aliis personis, quæ sunt in linea collaterali, distingui debet gradus, seu distantia unius personæ ab alia.

68. Diverſo modo numerantur iſti gradus
Jure Civili & Jure Canonico.

In Jure Civili, *quot ſunt generationes, tot ſunt gradus*: nam utrinque numerantur generationes, aſcendendo ab una perſona genita ad Communem ſtipitem; & deſcendendo a communi ſtipite ad alteram perſonam genitam. Verbi gratia, ſi Titius genuit Mævium & Sempronium; hi duo, nempe Mævius & Sempronius, qui fratres ſunt, dicuntur eſſe in ſecundo gradu. Siquidem Mævius genitus eſt a Titio communi utriusque parente, en unum gradum: Titius genuit Sempronium, en alterum gradum. Eaque ratione filius Mævii & filia Sempronii ſunt in quarto gradu. Nam filius Mævii genitus eſt a Mævio; en unum gradum: Mævius a Titio communi parente; en ſecundum. Deinde Titius genuit Sempronium; en tertium: & Sempronius filiam ſuam genuit, en quartum gradum.

In Jure Canonico numerantur tantum generationes ex una parte, deſcendendo a Communi parente ad perſonam genitam, vel aſcendendo a perſona genita ad ſtipitem communem

munem. Unde fratres & sorores secundum jus Canonicum, quod ubique ea in re sequitur Ecclesia Catholica, sunt in primo gradu; fratrum & sororum liberi in secundo &c. Quocirca in exemplo allato, Titius genuit Mævium & Sempronium: deinde Mævius filium habuit, & Sempronius filiam: si fiat ascensus ex una parte, puta a filio Mævii ad Titium communem parentem, vel descensus a Titio ad filium Mævii, aut ex altera parte ad filiam Sempronii, occurrent tantum duæ generationes, & proinde duo gradus.

Iraque Jure Civil consobrini, id est, fratrum vel sororum liberi, utpote in quarto gradu, nuptias contrahere possunt.

Sed Jure Canonico non tantum consobrini non possunt nuptias contrahere, sed neque eorum filii & filiae: neque nepotes & neptes: quia consobrinorum nepotes & neptes sunt tantum in quarto gradu secundum Jus Canonicum, quo quidem jure prohibentur nuptiae in linea Collaterali usque ad quartum gradum inclusive, id est, incluso eo gradu intra prohibitionem.

69. Hic quæritur, quid Juris sit respectu personarum Collateralium, quarum una est tantum in tertio gradu a Communi stipite, v. g. est tantum vel pronepos vel proneptis; altera vero ex altera parte est in quinto gradu. Cui quæstioni respondetur; hanc esse regulam generalem ut personæ collaterales in

in eo inter se dicantur gradu constitutæ, in quo est persona remotior : v. g. in specie proposita, ubi una persona distat tribus gradibus, altera quinque a stipite communi, hæ duæ personæ inter se dicuntur esse in quinto gradu : & proinde matrimonio licite conjunguntur.

70, Quod diximus de cognatione, id etiam de affinitate statuendum. V. g. si Titius Cajam duxerit, non potest ea mortua conjungi cum Cajæ cognatis intra quartum gradum *inclusive*. Ubi notandum, etiam si affinitas morte unius conjugum dissolvatur Jure civili, ut constat §. *socrum* 7. *Institut. de nuptiis* : eam tamen remanere Jure Canonico : cui juri nihil addidit Tridentina synodus, nisi quod affinitatem, quæ ex fornicatione oritur, ad secundum duntaxat gradum porrexit, sess. 24. cap. 4. *de reformatione matrimonii*.

Liberi, qui nascuntur ex fornicatione dicuntur *naturales* sive spurii, non *legitimi*, quia leges eos non agnoscunt ; possunt tamen per subsequens matrimonium Legitimari, seu fieri legitimi.

71. Est & alia species affinitatis inter Christianos, quæ *spiritualis* dicitur, qualis intercedit inter personam, quæ baptizavit & eam quæ baptizata est, illiusque parentes. Patrius quoque & matrina, qui de sacro fonte personam suceperunt, contrahunt affinitatem spirituales, non quidem inter se, sed
cum

cum persona suscepta, illiusque parentibus, quæ affinitas matrimonium impedit.

Ad Tit. XIII.

De Tutelis.

72. **P**ersonæ sui juris dicuntur, quæ nec patris, nec herili potestati sunt subjectæ. Ex autem vel sunt Tutores, vel Curatores, vel neutro genere tenentur.

Tutela definitur hoc titulo, *vis & potestas in capite libero ad tuendum eum, qui per ætatem se defendere nequit, Jure Civili data aut permissa.* Dicitur vis & potestas *in capite libero*: dici etiam posset *in caput liberum*, id est, potestas in persona liberâ ad aliam personam liberam, quæ per ætatem defendere se non potest, tuendam. In hoc quippe tutela a curatione discrepat, quod Tutor primario datur personæ, deinde rebus, Curator vero solis rebus datur, non personæ.

Additur *Jure Civili data aut permissa*, quia triplex est tutelæ species in Jure Romano. Primo quidem est *testamentaria*, cum v. g. pater testamento tutorem dat liberis adhuc impuberibus, & proinde infirmis, ac Tutore indigentibus. Deinde *legitima*, quæ deficiente testamentaria, agnatis defertur, lege XII. tabul. Agnati autem dicuntur, qui per virilis sexus personas conjuncti sunt: cognati vero, qui

qui per fœminei sexus personas conjunguntur. Tutela denique *Dativa* est ea, quam *juxta deficiente testamentaria ac legitima* pro arbitrio constituit.

Itaque tutela legitima *datur* seu defertur lege XII. tab. testamentaria *permittitur*.

Auctoritas Tutoris est approbatio ejus, quod cum pupillo geritur; qua quidem opus non est, ut pupillus conditionem suam meliorem faciat: sed cum periculum est, ne conditionem suam faciat deteriore, omnino est necessaria.

Ad Tit. XXII.

De Curatoribus.

73. **C**UM Tutor personæ detur propter infirmam ætatem, solis impuberibus datur: ideoque adveniente pubertate tutela finitur jure Romano. Tum qui prius dicebantur *pupilli* & sub tutela constituti, dicuntur *minores*, iisque dantur curatores, qui ipsorum res tueantur, donec annum vigesimum quintum compleverint, quo tempore fiunt *maiores*, & plenum habent rerum suarum dominium.

Hoc viginti quinque annorum spatium in quibusdam locis restringitur. Per rescriptum autem supremi Principis ubique huic tempori derogari potest.

P. Andr. Gordon Phil. P. I.

Cc

Non.

Nonnunquam ipsis etiam majoribus dantur Curatores propter animi vel corporis vitium v. g. mente captis, prodigis, mutis, surdis &c.

Ad Tit. XXV.

De excusationibus Tutorum vel Curatorum.

74. **A** tutela & cura excusantur primo, qui quinque liberos habent vivos. Secundo pauperes. Tertio, qui sunt infirmæ valetudinis. Quarto Professores liberalium artium &c.

Clericos quoque ab onere tutelæ immunes fecit Justinianus lege *generaliter* § 2. Cod. de *Episcopis & Clericis*. Non tamen interdicta est Clericis pupillorum & orphanorum tutela vel curatio, dummodo sola Charitatis ratione, non ulla lucri cupiditate moveantur, ut constat ex Can; *pervenit* 26. dist. 87. & Can. *decrevit*. 1. dist. 88.

EX LIBRO SECUNDO.

HActenus de personis, nunc de rebus agendum,

Ad

Ad Tit. I.

De rerum divisione & acquirendo earum dominio.

75. **R**es omnes vel sunt in patrimonio seu dominio singulorum, vel sunt extra singulorum patrimonium.

Extra singulorum patrimonium sunt res communes, res publicæ, res Universitatis, res nullius.

Res communes dicuntur, quarum proprietas nullius est, usus vero Jure naturali, sive Jure gentium est omnium; ut sunt aer, aqua profluens, mare, littus maris, feræ, bestiæ, pisces &c.

Res vocantur publicæ, quarum proprietas est alicujus populi, usus tamen jure gentium omnibus communis est; ut sunt flumen, ripa, qua flumen continetur, portus &c.

Res Universitatis sunt eæ, quarum proprietas est Universitatis aut Collegii alicujus, usus vero omnium, qui sunt ex ea Universitate aut Collegio, ut sunt Theatra, stadia, balnea, &c.

Res nullius sunt res Divini juris, quæ nempe regulariter alicujus fieri non possunt, eæque vel sacræ sunt, vel religiosæ, vel sanctæ.

Res sacræ dicuntur, quæ rite per Pontifices Deo sunt consecratæ, ut ædes sacræ. Al-

taria, & vasa usui divino dicata, &c. quæ quidem Jure Canonico non licet alienare, nisi ob necessitatem & utilitatem Ecclesiæ, nempe ad dissolvendum æs alienum, quo premitur Ecclesia: ad captivos ex infidelium potestate redimendos, ad pauperes tempore famis alendos. Vide Tit. Decretat. *de rebus Ecclesiæ alienandis vel non*, qui est decimus tertius libri tertii.

Religiosa res apud Romanos Jure Civili dicebatur locus, in quem quis mortuum intulerat, sive propria duntaxat voluntate, si suus esset locus; sive volente aut consentiente Domino, si locus esset alterius. Jure Canonico religiosus non fit locus, nisi ab Episcopo, vel a sacerdote, quem Episcopus delegaverit, rite fuerit consecratus: hujusmodi sunt cæmeteria, seu conditoria, in quibus defunctorum corpora tumulantur.

Res sanctæ sunt eæ, quæ sanctione aliqua adversus hominum injurias sunt munitæ; ut sunt muri, portæ civitatis, & leges.

76. In patrimonio singulorum sunt res, quarum dominium est acquisitum.

Dominium est facultas de re disponendi, nisi lex aut conventio impediat, ut dicitur inferius ad Tit. 8.

Modi acquirendi Dominii Jure Gentium sex statui possunt: scilicet occupatio, accessio, specificatio, confusio, fructuum ex aliena re perceptio, traditio.

Primus

Primus igitur modus acquirendi domini Jure Gentium est *occupatio*, qua res quæ nullius sunt primo occupanti cedunt.

Ad occupationem pertinent acquisitio animalium ferorum, non vero mansuetorum; acquisitio rerum in bello partarum, inventio, acquisitio rei pro derelicto habitæ.

Itaque feræ bestię, volucres, & pisces, simul atque venatione, aucupio, piscatione in manus alicujus venerunt, Jure gentium illius esse incipiunt. Quidquid autem eorum ceperis, si tuam evaserit custodiam, tuum esse definit, & rursus occupantis fit. Illud quæsitum est, an, si fera bestia ita vulnerata sit, ut capi possit, statim tua esse intelligatur: & placuit non aliter tuam esse, quam si eam ceperis; *quod multa accidere soleant, ut eam non capias.*

Apium quoque fera natura est. Itaque apes, quæ in tua arbore confederint, non magis tuæ intelliguntur esse; quam volucres, quæ in arbore tua nidum fecerint. Examen quoque, quod ex alveo tuo evolaverit, eo usque intelligitur esse tuum, donec in conspectu tuo est, nec difficilis persecutio ejus est; alioquin occupantis fit. Pavonum item & columbarum & cervorum fera est natura; & postquam abierunt, eo usque tantum tua esse intelliguntur, donec *animum revertendi* habeant, id est, donec revertendi consuetudinem non deseruerint. Gallinarum autem

& anserum non est fera natura. Ideoque licet ea animalia ab aliquo turbata conspectum tuum effugerint, tua esse intelliguntur; & qui lucrandi animo ea detinet, furtum committere intelligitur.

Jam in bello acquirimus Jure gentium non tantum res hostium, sed & ipsos hostes, qui quod manu capiuntur, non occiduntur, captivi nominantur.

Inventione pariter acquiruntur jure naturali ex res, quæ nunquam cujusquam fuerunt, ut sunt lapilli & gemmæ, quæ in littore maris inveniuntur.

Thesaurus autem, si ab aliquo inveniatur in loco, cujus ipse dominium habet, totus est inventoris. Idem statuendum, si inveniatur in loco sacro vel religioso, dummodo id fiat fortuito, non data opera. Sed si in solo alterius, vel in publico, aut fiscali loco inveniatur, idque fortuito casu, dimidium Domino soli, vel civitati, vel fisco, seu Principi conceditur Jure Civili Romano hoc titulo, paragrapho 39. Definitur Thesaurus a Jurisconsulto Paulo leg. *nunquam* 31. ff. de acquirendo rerum dominio, *vetus quedam depositio pecuniæ, cujus non extat memoria, ut jam dominum non habeat.* Tum addit: *sic enim sit ejus, qui invenerit, quod non alterius sit.* Alioquin si quis aliquid vel lucri causa, vel metus vel custodie condiderit sub terra, non est Thesaurus, cujus etiam furtum sit. Huc pertinet

Scavo-

Scævolæ responsum leg. 67. ff. de rei vindicatione. *A tutore pupilli domum mercatus ad ejus refectiorem fabrum induxit. Is pecuniam invenit. Queritur, ad quem pertineat. Respondi, si non Thesauri fuerunt, sed pecunia forte perditæ, vel per errorem ab eo, ad quem pertinebat, non ablata, nihilominus ejus eam esse, cujus fuerat. Vide Constitutionum Leonis Imperatoris Cod. lib. 10. tit. 15. ubi Thesauros definit, Conditæ ab ignotis dominis tempore vetustiori mobilia; ac Thesauri inventionem beneficium Dei appellat.*

Acquisitio rerum pro derelicto habitatum fit, cum Dominus eas res abjicit eo animo, ut eas nolit in numero rerum suarum habere, unde primi occupantis fiunt.

77. Secundus acquirendi modus jure naturali, seu gentium dicitur *accessio*, per quam nempe is fit Dominus accessorii, qui Dominus est rei principalis.

Ad accessionem naturalem referuntur *secutura*, *alluvio*, *insula in flumine nata*, *alvei mutatio*.

Igitur, quæ ex animalibus dominio tuo subjectis nascuntur, jure naturali tibi acquiruntur.

Item quod per alluvionem agro tuo flumen adjecit, eodem jure tibi acquiritur. Est autem *alluvio* incrementum latens, ut intelligi non possit, quantum quoque temporis momento adjiciatur.

Insula in medio mari nata dicitur esse primi occupantis. Si nata sit in medio flumine, dividitur inter eos, qui ex utraque parte fluminis prope ripam prædia possident.

Si flumen mutaverit alveum suum, vetus alveus acquiritur iis, qui prædia habent vicina, pro modo latitudinis cujusque prædii.

Ad accessionem artificialem referuntur inædificatio, intextura, implantatio, satio, scriptura, pictura.

Quod spectat ad ædificationem, *omne quod solo inædificatur, solo cedit*: id est, dominus soli est dominus ædium in eo ædificatarum. Si quis autem sciens ex aliena materia in solo suo ædificaverit, datur in eum actio, quæ vocatur *de tigno juncto*, non quidem ut materia ipsa restituatur, quia lex XII. tabul, *tignum* alienum, quod quis rei suæ junxit eximi prohibuit, ne ædificia diruerentur: sed ut damnetur reus in duplum. Si tamen bona fide ex aliena materia, putans esse suam, ædificaverit, non in duplum, sed in simplex damnabitur. *Tigni* appellatione in lege XII. tabul. omne genus materiæ, ex qua ædificia Constant, significatur ex leg. 62. ff. *de verborum significatione*.

Per *intexturam* purpura aliena vestimento tuo intexta, accessionis vice tibi cedit. Item per *implantationem*, planta cum radices egit, fit ejus cujus est solum: idem dicendum tum de semine, quod agro, in quo satum est; tum de

de litteris, quæ, licet aureæ sint, Chartæ cedunt. Pictura tamen non cedit tabulæ, sed tabula picturæ, propter picturæ pretium.

78. Tertius acquirendi modus Jure naturali dicitur *specificatio*, per quam nempe si quis bona fide ex aliena materia, vel partim ex sua, partim ex aliena, speciem fecerit, fit ejus Dominus, si modo ea species ad priorem rudemque materiam reverti non possit. Ut si quis bona fide ex uvis alienis, vel partim ex suis, partim ex alienis vinum fecerit, quod non potest in materiam priorem reverti, ipse fit vini Dominus; soluto tamen materiæ pretio priori Domino. Sed si res in priorem materiam reverti possit, ut si vas ex auro alieno factum sit, quod nempe reverti potest in priorem rudemque materiam, Dominus materiæ est Dominus speciei: eoque casu videtur habenda ratio laboris artificis secundum viri prudentis arbitrium, propter bonam ipsius fidem.

79. Quartus acquirendi modus jure naturali est *confusio* vel *commixtio*, per quam duorum dominorum materiæ, vel ipsorum voluntate, vel fortuito confusæ aut commixtæ, sunt amborum communes. *Confusio* de rebus liquidis dicitur, ut de vino: *Commixtio* vero de aridis, ut de tritico.

80. Quintus modus est fructuum ex aliena re perceptio. Ut si quis a non Domino, quem dominum esse crediderit, bona fide

fundum emerit, naturali ratione placuit fructus, quos percepit, ejus esse pro cultura, & cura. Aliter se res habet, si quis fuerit malæ fidei possessor; siue si alienum fundum sciens possederit; nam fructus cum fundo debet restituere: siue ii fructus sint *naturales*, qui nempe sine cultu & cultura hominis crescunt, ut mala, pyra, &c. siue *industriales*, qui culturam hominis desiderant, ut frumenta, uvæ &c. siue sint adhuc pendentes in radice vel arbore; siue collecti & extantes; siue collecti & consumpti. Is vero, ad quem usus fructus fundi pertinet, non aliter fructuum dominus efficitur, quam si ipsos percepit; & ideo licet maturis fructibus, nondum tamen perceptis decesserit, ad hæredes ejus non pertinent, sed domino proprietatis acquiruntur.

§1. Sextus denique acquirendi modus jure naturali est *traditio*. Nihil enim tam conveniens est naturali æquitati, quam voluntatem Domini volentis rem suam in alium transferre, ratam haberi. *Traditio* proprie est rei mobilis, nempe libri, equi, &c. sed ipsi æquivalet *quasitraditio*, quæ est rerum immobilium, ut fundi, ædium, &c. imo & in rebus mobilibus locum habere potest *quasitraditio*, quæ fit vel per *fictionem brevis manus*, vel per *symbolum*.

Fictio brevis manus dicitur, cum actus, qui intervenire debebat, occultatur. Veluti si rem,

si rem, quam tibi quis commodaverit, vel locaverit, postea tibi vendiderit: quamvis eam non accipiat, ut tibi tradat: eo tamen ipso quod patitur tuam esse, statim tibi acquiritur illius proprietates, perinde ac si eam accepisset, tibi que deinde tradidisset.

Per symbolum quoque fit quasi traditio: ut si quis merces in horreo depositas venderit, sola traditione clavium horrei transfert proprietatem mercium ad emptorem.

Ad Tit. II.

De rebus corporalibus, & incorporalibus.

82. **A**Ltera est rerum divisio in res corporales, quæ nempe tangi possunt; siue mobiles sint, ut equus, aurum, &c. siue immobiles, ut domus, fundus, &c. & in res incorporales, quæ tangi non possunt, ac in iure consistunt, ut hæreditas, usus fructus, obligationes quoquo modo contractæ. Eodem numero sunt jura prædiorum urbanorum, & rusticorum: quæ etiam *servitutes* vocantur. Etenim præter servitutem, qua persona personæ ad nutum servit, de qua superius actum est (N. 61.) alterius hic meminit Jurisconsultus, quæ dicitur esse jus, quo res aliena nobis aut nostræ rei servit: unde vel realis est, quando rei nostræ; vel est *personalis*, quando nobis servit.

Ad

Ad Tit. III.

*De servitutibus prædiorum rusticorum
& urbanorum.*

83. **S**ervitus realis seu prædialis est vel urbana vel rustica.

Urbana dicitur, quam prædium sive rusticum sive urbanum debet prædio urbano.

Rustica, quam prædium sive rusticum sive urbanum debet prædio rustico.

Urbanum prædium vocatur, quod hominis habitationis causa constructum est, sive sit in urbe, sive ruri.

Rusticum est, quod ad usum rusticum est comparatum; sive etiam ruri sit, sive in urbe.

Rusticæ servitutes sunt *iter*, quo quis per alterius vicini fundum aut prædium sive rusticum sive urbanum sine jumento vel vehiculo; *actus*, quo homo cum jumento vel vehiculo jus habet eundi; *via*, quæ est jus, quo quis per alterius fundum ire, agere, vehere, & trahere potest; *aquæ ductus* sive jus aquæ ducendæ per fundum alienum &c.

Urbanæ servitutes sunt jus tigni in vicini parietem immittendi; jus stillicidii, quo vicinus pati cogitur, ut aqua pluvialis e prædio meo in suum guttatim cadat: jus fluminis, quo aqua mei prædii, per tubos seu canales collecta, in prædium vicinum decidit;

LA

jus

jus altius non tollendi, quo vicinus prohibetur altius extollere ædificium, ne prospectui meo officiat, &c.

Ad Tit. IV.

De usu fructu.

84. **S**ervitutes personales sunt ususfructus; usus, & habitatio.

Usus fructus est *jus alienis rebus utendi, fruendi, salva rerum substantia.*

Dicitur *jus utendi, fruendi*, ut distinguatur ususfructus a nudo usu. Nam utimur rebus alienis ad necessitatem tantum; fruimur vero etiam ad commoditatem & voluptatem, salva rerum substantia: quia cum usufructuarius non sit Dominus rei, cavere debet, ne ipsa deterior evadat.

Ad Tit. V.

De usu & habitatione.

85. **U**sus est *jus rebus alienis utendi, non fruendi*: unde minus est in usu, quam in usufructu.

Habitatio est *jus alienas ædes habitandi*; quod jus ad alios transferri non potest.

Hæ omnes servitutes personales multis modis, sed præsertim, morte naturali vel civili

vili personæ finiuntur. Quid sit mors civilis, dictum est antea.

Ad Tit. VI.

De Usucapionibus & longi temporis præscriptionibus.

86. **V**idimus hætenus modos acquirendi jure naturali; nunc dicendum de modis acquirendi jure civili. Ex iis alius est universalis, ut hæreditatis aditio; alius particularis, ut usucapio, ut donatio, legatum &c.

Usucapio est modus acquirendi Jure Civili, quo quis rem alienam bona fide, justo titulo, & legitimo seu *præscripto per leges* tempore possessionis, suam efficit: unde etiam præscriptio nominatur.

Ad usucapionem, seu longi temporis præscriptionem requisita sunt quinque.

Primo, bona fides, quam quidem initio tantum usucapionis desiderat jus civile; sed Jus Canonicum per totum tempus. Unde malæ fidei possessor non usucapit.

Secundo, Justus titulus, quales sunt emptio, donatio, legatum, &c.

Tertio, ut res non sit vitiosa: cujusmodi sunt res sacra, res furtiva, vel vi possessa &c. quæ non possunt usucapi.

Quarto, ut possessio sit continuata non per

per litis contestationem, aut alio modo interrupta.

Quinto denique requiritur tempus legitimum, seu per leges *præscriptum*, scilicet triennium pro rebus mobilibus; decennium inter præsentem, & vicennium inter absentes pro rebus immobilibus. Bona Ecclesiastica non præscribuntur, nisi 40. annorum spatio.

Ad Tit. VII.

De Donationibus.

37. **D**ONATIO est mera liberalitas, quæ nullo Jure cogente in aliquem exercetur: eaque fit vel mortis Causa, vel inter vivos.

Donatio mortis causa fit propter mortis suspensionem; & similis est legato; unde ipsa, cessante mortis periculo, vel etiam poenitentia donatoris, aut si præmoriatur donatarius, revocatur.

Donatio inter vivos fit sine ulla mortis cogitatione; quæ, si quingentos solidos excedat, debet insinuari, id est, in acta publica referri. Non autem revocatur, nisi vel donatori superveniant liberi, vel insigniter ingratum sit donatarius.

Tertia est donationis species, quæ propter nuptias dicitur, quam maritus uxori facit ad remunerationem dotis. Huic simile est, quod Imperatores Justiniano posteriores
dixere

dixere *Hypobolon*, id est incrementum dotis, vel quod mortuo marito uxori superstiti red-
ditur supra dotem.

Ad Tit. VIII.

Quibus alienare licet vel non.

38. **Q**ui rei dominium acquisivit, potest
eam alienare; id est, potest domi-
nium ejus in alium transferre. Maritus ta-
men, qui Dominus est prædii dotalis, non
potest illud sine uxoris consensu alienare.
Item *Minores*, quamvis sint rerum suarum
domini, eas sine Tutorum auctoritate aliena-
re nequeunt. *Quanto tempore*, inquit Apo-
stolus ad Galatas cap. 4. v. 1. & 2. *heres par-
vulus est, nihil differt à servo, cum sit dominus
omnium: sed sub tutoribus & actoribus est, us-
que ad præfinitum tempus à patre.* Vertunt
aliqui *tutoribus & curatoribus* idque non ma-
le, sed potest retineri vulgata versio *sub tuto-
ribus & actoribus.*

Dicitur actor, quem tutor vel curator ad
agendum quasi procuratorem, auctore præ-
tore Constituit, *Institut. de curatoribus §. ul-
timo.* E contrario creditor, qui dominus
non est pignoris, potest illud alienare, si de-
bitum ipsi non solvatur.

Ad

Ad Tit. IX.

Per quas personas cuique acquiritur.

89. **A**cquiritur nobis dominium non tantum per nos ipsos, sed etiam per servos nostros & liberos, qui sunt in nostra potestate; imo per procuratorem. Servi tamen & filii *Peculium* habent jure Romano, id est, *pusillam pecuniam a rationibus dominicis & paternis separatam*. *Peculium* servorum unius est rationis. At *peculium* liberorum est quadruplicis generis; scilicet *profectitium*, quod ex re, vel occasione patris; *adventitium*, quod vel donatione, vel successione matris; *castrense*, quod in militia; *quasi castrense*, quod in foro vel officio publico acquiritur. *Pater* habet proprietatem & usumfructum *peculii* *profectitii*, solum usum *adventitii*, nihil vero in *castrensi* vel *quasi castrensi*.

Ad Tit. X.

De Testamentis ordinandis.

90. **H**æreditas est modus acquirendi domini universalis. Est enim *successio in universum jus, quod defunctus habuit*. Ea autem vel *testamento* defertur, vel ab *intestato*.

Testamentum est *voluntatis nostre iusta sententia de eo, quod quis post mortem suam fieri velit*.

P. Andr. Gordon Phil. P. I.

D d Dici-

Dicitur *iusta sententia*, id est legibus consentanea. Deinde *nostræ voluntatis*: quæ verba a testamenti factione excludunt filiosfamilias & servos, qui sunt in potestate patria & herili, nec propriam habent voluntatem; item mente captos, prodigos &c. Additur de eo quod quis post mortem suam fieri velit: quia ut testamentum valeat, mors necesse est intercedat testatoris, ut ait Apostolus ad Hebræos cap. 9. v. 16, nam quamdiu vivit testator, mutare potest voluntatem. *Ambulatoria enim est voluntas defuncti usque ad vitæ supremum exitum.* l. 4. ff. de adimendis vel transferendis legatis.

Testamentum Jure Romano, vel solenne est, vel nuncupativum.

Testamentum solenne in scriptis fit coram septem testibus, civibus Romanis, puberibus, subscribentibus & consignantibus. Aliud enim est *subscribere*, aliud est *signare*: illud calamo, hoc annulo, seu sigillo perficitur. *Subsignare tamen pro subscribere sumitur* leg. 39. ff. de verborum significatione.

Testamentum nuncupativum fit viva voce testatoris, heredem suum coram septem testibus nuncupantis. Vide legem, hac *constitissima* 21. cod. de testamentis. Testamentum militare, quod nempe a milite, stipendia merente in expeditionibus militibus conficiebatur, ab omnibus juris solennitatibus erat immune.

— 19. l. 1. de Testa-

Testamentum *holographum*, seu quod totum manu testatoris conscriptum est & subscriptum, multis in locis nullos testes desiderat. Fieri etiam potest coram notariis publicis. Nonnunquam excipitur a pastore seu rectore Ecclesiæ parochialis coram duobus testibus, ubi deficiunt notarii, ut patet ex Jure Canonico cap. *cum esset* 10. extra de testamentis.

Ad Tit. XII.

Quibus non est permixsum facere testamentum.

91. **T**estamentum facere possunt omnes, qui non prohibentur. Prohibentur autem servi, filii-familias, mente capti, &c. ut modo dictum N. 90.

De Clericis ita statuit Alexander III. cap. *quia nos extra, de testamentis.* Clerici de his, quæ paternæ successionis vel cognationis intuitu, aut de artificio sunt adepti, seu dono consanguineorum aut amicorum, non habito respectu ad Ecclesiam, pervenerunt ad ipsos, libere disponere valeant. De his tamen, quæ consideratione Ecclesiæ perceperunt, nullum de jure possunt facere testamentum. Moribus tamen nostris receptum est, ut de hujusmodi bonis, quæ ab Ecclesia perceperunt, testari valeant, sed eorum est omnem curam adhibere, ut ea bona in pios usus cedant; alioqui graviter peccant.

Ad Tit. XIII.

De exhæredatione liberorum.

92. **P**ossunt parentes liberos exhæredare
justis de causis, quæ vulgò numeran-
tur quatuordecim:

Bis septem causis exheres filius esto.

Si patrem feriat : si maledicat ei.

Carcere conclusum si negligat : aut furiosum,

Criminis accuset, vel parat insidias.

*Si dederit damnum grave : si nec ab hoste
redemit ;*

Testarive vetet : se societve malis.

Si mimos sequitur ; vitietque cubile paternum:

Non orthodoxus : filia si meretrix.

Ad Tit. XIV.

De hæredibus instituendis.

93. **H**æredis institutio est designatio succes-
soris in universum jus, quod defunctus
habuit. leg. 24. ff. de verborum significatione.
Possunt autem Jure Romano institui hære-
des vel liberi vel servi : vel unus, vel plures.
Si plures sint, inter illos dividenda est hære-
ditas. Ideoque in hæreditate, ut in asse, duo-
decim distinguuntur partes ; quæ unciæ vo-
cantur. Unde dicitur hæres ex asse, qui hæ-
res est ex toto, hæres ex semisse, qui dimidiam
tantum

tantum hæreditatis partem habet, &c. *Uncia* igitur est pars hæreditatis duodecima. *Sextans*, seu sexta pars hæreditatis continet duas uncias. *Quadrans* seu quarta pars continet tres. *Triens* seu tertia pars continet quatuor. *Quincunx*, quinque. *Semis*, sex. *Septunx*, septem. *Bes*, (quasi bis, id est, bis triens) octo habet uncias. *Dodrans* (cui deest quadrans) novem. *Dextans* (quasi deest sextans) decem. *Deunx* (cui deest uncia) undecim. *As* duodecim uncias complectitur.

Si duo instituti essent hæredes, alter ex semisse, alter ex quadrante: quoniam superesset quarta pars, ipsa hæredibus illis *accresceret*, sive *jure accrescendi* accederet pro rata cujusque portione: quia jus non patitur, ut quis pro parte testatus, pro parte intestatus decedat. L. 7. ff. *de regulis Juris*. E diverso, si quatuor essent hæredes scripti, unus ex semisse, & tres ex tertiis portionibus hæreditatis: cum plus scriptum esset, quam in hæreditate contineretur; tacite singulis pro rata parte decrederet.

Ad Tit. XV.

De substitutionibus.

94. **S**UBSTITUTIO est *hæredis institutio in locum prioris deficientis*, eaque duplex est, scilicet vel *vulgaris*, vel *pupillaris*.

Vulgaris fit a quocunque testatore cui-

cunque hæredi instituto, puta hoc modo. Titius hæres esto: si Titius hæres non erit, Mævius hæres esto.

Pupillaris fit a solo patre liberis suis im-
puberibus, qui vel hæredes non sunt; vel si
hæredes sunt, intra pubertatis annos moriun-
tur: veluti si quis dicat hoc modo. Titius
filius meus hæres mihi esto. Ac si filius
meus hæres mihi non erit; siue hæres erit, &
prius moriatur, quam in suam tutelam vene-
rit, tunc Sejus hæres esto.

Ad pupillarem substitutionem accedit
quasi pupillaris substitutio, quæ etiam exem-
plaris dicitur: quæque ab utriusque sexus
parente fit liberis tam puberibus quam im-
puberibus, etiam emancipatis, qui sunt fu-
riosi, mente-capti, prodigi, &c.

Ad Tit. XVII.

Quibus modis testamenta infirmentur.

95. **I**Nfirmatur testamentum vel dum rum-
pitur, vel dum fit irritum, vel dum re-
scinditur. Rumpitur testamentum, vel agna-
tione sui hæredis; vel posteriori testamento,
dummodo jure perfectum sit, nec quidquam
in eo desideretur.

Irritum fit testamentum, si nullus hæres
existat.

Rescinditur per querelam inofficiosi testa-
menti, Ad

Ad Tit. XVIII.

De inofficioso testamento.

96. **I**nofficiosum dicitur testamentum, quo contra pietatis officium parentes sine Causa filios suos exheredant. Quo Casu liberis datur querela inofficiosi testamenti, seu actio in rem adversus hæredem scriptum in testamento inofficioso, ut testamentum rescindatur.

Cessat hæc querela, si exheredato relicta sit portio legitima. Est autem hæc legitima portio antiquo Jure Romano quarta pars ejus portionis, quam quis habuisset ab intestato: sed jure novo est triens, si liberi sint quatuor vel pauciores; sin vero sint plures, legitima est semis. Authent. Novissima, Cod. hoc tit.

*Quatuor aut infra dant natis Jura trientem.
Semissem vero dant natis quinque vel ultra.*

Ad Tit. XIX.

De Hæredum qualitate & differentia.

97. **H**Æres dicitur necessarius Jure Romano, qui velit nolit, adire debet hæreditatem. Tales erant servi: nam hæredes instituebantur a dominis, qui non erant solvendo, ut ipsorum potius quam defuncti nomine a creditoribus distraheretur hære-

Legare aliquid ab aliquo, id est legare aliquid, ab alio nempe ab hærede præstandum, ut fundum, villam &c.

Vetat lex *falcidia*, quam tulit Falcidius Tribunus plebis, ne quis ultra dodrantem hæreditatis legare possit: ut saltem quarta pars hæreditatis hæredi, vel hæredibus salva remaneat, quæ quarta *falcidia* nominatur.

Ad Tit. XXIII.

De fideicommissariis hæreditatibus.

99. **S**I quis nec hæres, nec legatarius per leges esse valeat, huic non aliter quam per fideicommissum relinqui potest: quatenus nempe quod relinquitur, fidei committitur ejus, cui relinquitur, ut id alteri restituat.

Ad Tit. XXV.

De Codicillis.

100. **C**odicilli Jure Romano sunt *testati vel intestati voluntas minus solennis*. Apud nos nihil aliud fere sunt, nisi appendix ad testamentum, per quam nonnulla vel suppleantur, vel demuntur, vel quacunque ratione mutantur.

vum, & nepotes ex altero filio defuncto: nepotes patrem suum mortuum *representabunt*, & omnes simul æquam cum patruo suo hæreditatis portionem habebunt: quia proximiores in linea descendentis nunquam excludunt remotiores alterius lineæ descendentis.

Si nulli sint descendentes, ascendentibus tribuitur hæreditas, ita ut proximior remotiorem semper excludat, dicta Novella, cap. 2.

Deficientibus ascendentibus admittuntur collaterales, & primo quidem fratres germani *in capita*. Cum his vocantur fratrum germanorum defunctorum liberi *in stirpes*: qui ipsi, si soli sint, hæreditatem quoque dividunt in capita. eadem Novell. cap. 3.

Post fratres germanos eorumque liberos veniunt fratres uno parente conjuncti; itemque liberi fratrum præmortuorum, qui uno parente conjuncti erant. Si nec fratres, nec fratrum liberi adsint, reliqui agnati & cognati vocantur: & ex iis, qui pares sunt gradu pariter admittuntur, at proximior remotiorem excludit *ibid.*

Deficientibus & his succedit conjux conjugi leg. 1. Cod. *unde vir & uxor*: cujus defectu fiscus hæreditatem vacantem occupat.

Variant consuetudines in diversis regnis & provinciis circa successiones ab intestato.

Ad

Ad Tit. XIV.

De Obligationibus.

102. **O**bligatio est juris vinculum, quo astringimur ad aliquid præstandum, estque vel naturalis, vel civilis.

Obligatio naturalis est, *quæ sola equitatis ratione sustinetur*: e. g. naturali obligatione teneor ei opem ferre, cujus auxilium sensi: sed ille nullam in me habet actionem, quæ me ad par sibi referendum adigat.

Civilis obligatio est *juris vinculum, quo necessitate astringimur alicujus rei solvende secundum nostræ civitatis jura*, & ea parit actionem.

Obligatio civilis oritur ex contractu, vel quasi contractu: vel ex maleficio seu delicto, aut quasi ex maleficio seu delicto.

Contractus est species conventionis. *Conventio autem est duorum vel plurium in eandem rem placitum seu consensus*. Dicitur item pactio vel pactum, vel conventum: nisi malis dicere pactionem aut conventionem esse actum paciscentium, pactum vero aut conventum esse id, quod ex pactione vel conventionem resultat.

Conventio igitur seu pactum est veluti genus, quod in species distribuitur. Nam conventio, si nec nomen habet speciale. a Ju-
re

re Civili, nec causam; ea generale conventionis aut pacti nomen retinet; & obligationem tantum parit naturalem, id est, ex fide data, & æquitate naturali ortam, quæ licet non sit efficax ad producendam actionem, non tamen apud virum probum minoris esse debet roboris, quam obligatio civilis. Quod si conventio nomen habeat *vel* causam, contractus appellatur, & obligationem ad agendum efficacem producit.

Quare contractus est *conventio quæ nomen habet, vel causam*: unde alius est *nominatus*, alius *innominatus*.

Contractus *innominatus* est ille, qui causam tantum habet, non vero nomen speciale. Causa autem est datio vel factum. Hujusmodi contractus ad quatuor capita reducitur, scilicet, *do ut des: do, ut facias: facio ut des: facio ut facias*.

Contractus *nominatus* dicitur, qui nomen proprium habet a Jure Civili: cujusmodi sunt ex leg. XII. tab. *mutuum, commodatum, depositum, pignus, emptio, venditio, locatio, conductio, societas & mandatum*. Cum enim horum contractuum usus sit frequentissimus, nec sine iis humana societas consistere possit, his nomen proprium ac vim tribuit Jus Civile, ut obligationem, & actionem civilem parerent.

Dicendum nunc de obligationibus, quæ nascuntur ex contractu; postea de iis agendum

dum erit, quæ ex quasi contractu; itemque ex delicto & quasi delicto oriuntur.

Contractus autem fiunt quatuor modis, nempe vel re, vel verbis, vel literis, vel consensu.

Ad Tit. XV.

Quibus modus re contrahitur obligatio.

103. **R**E perficiuntur contractus, in quibus rei interventio necessaria est: suntque mutuum, commodatum, depositum, pignus.

Mutuum est contractus, qui re perficitur, quo rei nostræ dominium in alium transferimus ea lege, ut eadem non in specie sed in genere reddatur, ut loquuntur Jurisconsulti: id est juxta modum loquendi Philosophorum, ut eadem non numero sed specie reddatur, e. g. tritici vel olei mensuram tibi mutuo dedi, non ut eandem numero, sed ut eandem tantum specie mihi redderes. Unde mutuum in iis proprie rebus consistit, quæ pondere, numero & mensura constant; quæ ipso usu consumuntur, sive quarum usus est ipsa rerum consumptio, & quarum una alterius vice fungipoteft. Hujusmodi sunt triticum, vinum, oleum &c. pecunia quidem numerata directe, ac per se ipsam non consumitur; sed tamen consumitur indirecte, & quatenus datur in pretium earum rerum, quæ ipso usu consumuntur.

Ille,

Ille, qui mutuo dat, *creditor*, qui vero mutuum accipit, *debitor* seu *mutuatarius* dicitur.

Mutuum gratuitum esse debet, id est nihil percipi potest præter rem ipsam, aut Valorem rei, quæ mutuo data est, quæque vel *caput* vel *fors capitalis*, vel cum agitur de pecunia, *summa capitalis*, aut *principalis* appellatur. Nam mutuum semper quandam indigentia speciem arguit in eo, cui datur & ex officio charitatis aut humanitatis procedit. Non enim v. g. triticum aut vinum, aut pecuniam mutuo damus ei, cui supersunt, sed ei tantum, qui quomodocunque iis opus habet. Quocirca peccant contra jus naturale, qui aliquid ex mutuo propter ipsum mutuum exigunt, cum ipsi ex aliorum indigentia quæstum faciant. Idque ita visum est ipsis ethnicis, quos minime latuit notissimum illud juris naturalis præceptum:

Quod tibi non optas fieri, ne feceris ulli.

Quod vero Ethnici contra jus naturale esse statuerunt, id legi Divinæ advertari constat multis scripturæ sacre testimoniis. Exod. 22. v. 25. *Si pecuniam mutuum dederis populo meo pauperi, qui habitat tecum, non urgebis eum quasi exactor, nec usuris opprimes.* Levit. 25. v. 36. *Ne accipias usuras ab eo, nec amplius quam dedisti.* Psalmo 41, inter cæteras viri probi dotes, hæc recensetur, v. 5. *qui pecuniam suam non dedit ad usuram.* Psal. 54, v. 12.

Id

Id in iusto tribuitur & non defecit de plateis
ejus usura & dolus. Ezechielis cap. 18. v. 11.
Iusto necessarium esse dicitur, ut usuram &
superabundantiam non acceperit. Et cap. 22.
v. 12. increpat Deus civitatem sanguinum
his verbis, *usuram & superabundantiam acce-*
pisti, & avaro proximos tuos calumniabaris.

Equidem sicut ad duritiam cordis, libellus
repupii Judæis permittebatur ne videlicet
uxores occiderent; ita, ne fratres opprime-
rent, fœnus apud exteros exercere sineban-
tur. Cum autem Christiani cæteros homi-
nes habere debeant ut fratres, non iis licet
fœnore quemquam gravare, sed auscultan-
dum illud Christi documentum. Luc. 6. v.
35. *Mutuum date nihil inde sperantes, id est,*
sine spe percipiendæ usuræ, quæ est lucrum
ex mutuo vi ipsius mutui præter sortem capita-
lem collectum.

Quamvis autem ex mutuo nihil percipere
liceat vi mutui præter sortem ipsam capita-
lem: licet tamen vel propter lucrum cessans,
vel propter damnum emergens.

Primo enim si quis damnum aliquod pro-
pter mutuum datum patiatur; v. g. si refice-
re non potuerit ædificium, quod ruinam
minabatur, quodque ideo fuerit collapsum;
vel si debitum solvere nequiverit ac senten-
tia judicis non tantum in summam, quam
debebat, sed etiam in impendia fuerit damna-
tus, potest acceptum detrimentum, acci-
piendo

piendo quidpiam ultra sortem principalem, refarcire.

Secundo, dum quis habebat occasionem paratam pecuniæ suæ utiliter collocandæ, v. g. in negotiatione justa, vel in fundi acquisitione aut alio quocunque modo: lucrum illud cessans justa est causa aliquid ultra sortem principalem ex mutuo percipiendi.

Tertio quamvis nummus ex sua natura sit *sterilis*, nec per se nummum pariat: in manibus tamen periti negotiatoris fecundum evadere, & saltem *indirecte* consumi potest, v. g. cum ad comparanda sive alimentaria, sive indumenta impenditur; sic enim saltem *indirecte* alios nummos in variis hominum commerciis producere potest; huncque illius usum pretio æstimari posse Juris-Consultis Romanis, aliisque visum est. Quocirca qui pecuniam dat mutuam, semper aliquid ultra summam capitalem exigere potest, dummodo modum non excedat.

104. Commodatum est contractus, quo res gratis utenda datur ad certum tempus, ad certum finem, aut modum, ea lege, ut finito secundum tempus & modum præstitutum rei usu, eadem ipsa reddatur.

Commodatarius præstat dolum & culpam etiam levissimam: id est, tenetur erga commodantem de dolo & culpa etiam levissima, adeo ut damnum, quod commodato-

accidit, debeat refarcire. Non tamen tene-
tur de casu fortuito, id est de vi maiore, cui
humana imbecillitas resistere non potest.

Dolus est omnis calliditas, fallacia, ma-
chinatio, ad circumveniendum, fallendum,
vel decipiendum alterum adhibita: *lege 2. ff.
de dolo malo. §. 2.*

Culpa hic nihil aliud est, quam negligen-
tia; quæ triplex est, nimirum *lata*, *levis*, &
levissima. Committitur culpa *lata*, cum non
adhibetur ea diligentia, quam vel negligens
paterfamilias adhiberet. Fit autem culpa
levis, cum ea non adhibetur diligentia, quam
diligens Paterfamilias; fit *levissima* cum
non adhibetur ea, quam diligentissimus Pa-
terfamilias adhiberet.

Commodato affine est *precarium*, quod
quotiescunque libuerit, non expectato certo
tempore, repeti potest.

105. Depositum est *contractus*, quo *res ali-*
qua gratis custodienda traditur & accipitur ea
lege, ut repetenti eadem restituatur. Est tamen
casus, inquit S. Thomas 2. 2. quæst. 57. art.
2. ad 1. in quo depositum non est reddend-
um, ne homo perversam voluntatem ha-
bens, male eo utatur: ut si furiosus, vel ho-
stis reipublicæ arma deposita reposcat. De-
positum *miserabile* nominatur, quod naufra-
gii, incendii, tumultus causa deponitur.
Sequestratio, vero dicitur, cum duo vel
plures rem litigiosam apud tertium depo-
nunt,

nunt, ea lege ut ipse finita lite rem victori restituat.

Is apud quem res aliqua deposita est, seu *depositarius*, tenetur actione depositi, ut rem restituat. Sed ex eo solo tenetur, si quid doli commiserit: nam culpæ nomine, id est, desidie ac negligentie, non tenetur. Itaque securus est, qui parum diligenter custoditam rem furto amiserit; quia qui negligenti amico rem custodiendam tradidit, non ei, sed suæ facilitati id imputare debet.

106. *Pignus est contractus re perfectus, quo res in securitatem crediti ea lege creditori traditur, ut eadem soluto debito restituatur.* In hoc autem differt pignus ab *hypotheca*, quod pignoris appellatione ea proprie res contineri dicatur, quæ simul etiam traditur creditori, maxime si res *mobilis* sit, ut vestis, liber, &c. At quæ sine traditione, nuda conventionione tenetur, quæque est *immobilis*, ut ager, aut fundus, proprie *hypotheca* appellatione contineri dicitur. Vide Instit. lib. 4. tit. 6. §. 7.

Si quis mala fide rem alienam, vel alicui jam pignoratam alii obliget, vel in pignore dando pro auro æs subiciat, aut alio modo fallat, *stellionatus* crimen committit. *Stellio* a quo *stellionatus* dicitur est animal simile lacertæ, quo, si credimus Plinio hist. natu: lib. 30. cap. 10. *Nullum fraudulentius homini invidet.* Nomen habet a similitudine stella-

rum, quoniam ejus corium est varium, & veluti stellulis respersum.

Ad Tit. XVI.

De verborum obligationibus.

107. **V**erbis olim fiebant contractus, qui *stipulationes* dicebantur, deducto nomine a *stipulor*, id est, *firmiter*, ut ait Justinianus, hoc tit. in princip. *stipulum* autem fortasse a *stipite* descendit, ut annotat idem.

Stipulatio igitur est *solemnis verborum conceptio*, qua quis interrogatus daturum facturumve se id, de quo est interrogatus, respondet. Nam stipulari nihil aliud est, quam ab alio petere ut aliquid nobis promittat. Fiebant autem stipulationes hoc modo *spondes? spondeo. Promittis? promitto. Dabis? dabo*. Nostri moribus hujusmodi stipulationes non tantum nudis verbis inter contrahentes fiunt; sed etiam scripto apud notarium publicum consignantur. Neque tantum per nos ipsos; sed etiam per procuratores stipulari possumus.

Stipulatio fit quavis lingua, dummodo cognita sit interrogatio & responsio. In eam deducuntur res omnes, quæ sunt in commercio: item facta possibilis, & honesta; propria, non aliena.

Ad

Ad Tit. XXI.

De Fidejussoribus.

108. **P**RO eo qui promittit, solent alii obligari, qui *fidejussores* appellantur. Atque ita *fidejussio* est verborum obligatio, qua quis alienam obligationem in fidem suam suscipit, ita ut debitor principalis maneat obligatus.

Fidejussor non tantum ipse obligatur, sed etiam heredem relinquit obligatum. Fidejubere possunt omnes, qui se possunt obligare. Vetat Senatus Consultum *Vellejanum*, quod auctore Vellejo Consule latum est, ne mulieres alienam obligationem in se suscipiant. Si plures sint fidejussores, quotquot erunt numero, singuli in *solidum* tenentur. Itaque liberum est creditori, a quo velit solidum debitum petere. Sed ex Epist. Imp. Adriani compellitur creditor a singulis, qui modo solvendo sunt litis contestatæ tempore, partes petere: quod vocatur *beneficium divisionis*. Præterea ex Novell. 4. Justin. cap. 1. fidejussores habent *beneficium ordinis* seu *excussionis*, quo creditor prius debet convenire principalem debitorem & ejus facultates excutere, quam ad fidejussorem veniat. Denique habent *beneficium cedendarum actionum*, authent. *præsente codd*, hoc Tit. quo beneficio

neficio unus ex fidejussoribus, qui totum solvere paratus est, a creditore petit, ut sibi actiones suas cedat adversus confidejssores, & rerum principales.

Ad Tit. XXIV.

De emptione & venditione.

109. **E**Xposui contractus, qui fiunt vel re, vel verbis : supersunt ii, qui solo consensu perficiuntur, scilicet ad quorum substantiam non pertinent verba, nec rei traditio : suntque emptio-venditio, locatio-conductio, societas, mandatum.

Emptio-venditio est *contractus solo consensu perfectus, quo emptori rem a venditore pro certo pretio habere licet.* Quippe certum esse debet pretium, & in pecunia numerata consistere : nam si res pro re detur, non est emptio-venditio, sed est *permutatio*. Ab eo contractu cum sit bonæ fidei, abesse debet omnis dolus, per quem emptor inducatur ad emendum, qui alias non esset empturus.

Cum emptio-venditio contracta est, hoc est cum de pretio inter contrahentes convenit, sive id cum scripto, sive sine scripto, sive cum *arrha*, sive sine *arrha* factum sit, periculum rei venditæ, tamen si emptori nondum sit tradita, ad emptorem pertinet, nisi dolus venditoris interverferit, vel in se custodiam
ejus

eius rei usque ad traditionem, suscepit. Unde si fundus vi fluminis, vel totus, vel aliqua ex parte ablatus sit, emptoris damnum est, cui necesse est, licet rem non fuerit nactus, pretium solvere. Sed si post empti-
nem fundo aliquid per alluvionem accesserit, ad emptoris commodum pertinet: nam & commodum ejus esse debet, *cujus periculum est.*

Loca sacra vel religiosa frustra quis sciens emerit Jure Civili Romano. Sed grande nefas est inter Christianos res spirituales aut spiritualibus annexas, nempe dona Spiritus sancti, sacros ordines, aut beneficia iis annexa vendere vel emere. Hæc enim est *simonia* seu crimen *Simonis* Magi, qui Act. Apost. cap. 8. v. 19. obtulit pecuniam Apostolis, ut ejusdem ac ipsi potestatis fieret particeps: in quem sanctus Petrus ignita hæc verba contorsit: *Pecunia tua tecum sit in perditionem: quoniam donum Dei existimasti pecunia possideri.*

Pluribus aliis modis in emptione & venditione contra justitiam peccant. Sunt enim qui vel merces depravatas, vel diminutas vendunt; vel qui in vendendo justum pretium longe excedunt. Quidam ex aliena miseria quæstum captantes nihili fere æstimant, quod a nonnullis necessitate pressis comparant, licet hoc ipsum magno pretio aliis vendant.

Notissimus est contractus, cui nomen *Mohatra* apud Hispanos, quo enormis continetur usura. In hoc consistit, quod quis pecuniæ indigens, obstricta duntaxat fide, non numerata pecunia, merces a mercatore carissime emit, quas statim vili pretio, sed præsentente pecunia eidem mercatori cedit. Hanc negotiationem suis probabilitatibus fulciebant laxioris Ethicæ Doctores : at Innocentius XI. illam omnino reprobavit, & damnavit decreto dato die 2. Martii An. 1679.

Ad Tit. XXV.

De Locatione · conductione.

110. **L**ocatio-conductio est contractus, quo res utenda datur vel facienda promittitur certa mercede constituta. Locatur dicitur, qui dat aliquid utendum vel faciendum; Conductor vero, qui aliquid utendum vel faciendum suscipit.

Locationi · conductioni affinis est *Emphyteusis*, qua dominus prædium suum, vel ad perpetuum ea lege utendum concedit, ut *Emphyteuta* ipsum cultius reddat, certumque *Canonem*, id est, exiguum pretium in recognitionem domini annuatim præstet.

Ad Tit. XXVI.

De societate.

III. **S**Ocietas est contractus inter duos aut plures vel ad certum tempus, vel quoad voluerint, initus, de communicando lucro & damno alicujus negotiationis, vel omnium bonorum. Sic autem dividi debent lucrum & damnum ut singulos contrahentes pro rata portione respiciant.

Injuste initur societas a nonnullis, qui aliorum detrimento monopolia exercent. Fit autem monopolium, vel cum unus solus, vel cum aliqui inter se aliquod genus mercaturæ universum comparant, ut illud suo arbitrio vendant, eique pretium quod libuerit imponant. Tales erant Dardanarii a Dardano mago sic dicti, quo genere hominum nihil fraudulentius est, nihil iniquius in annonæ mercium quarumlibet oneranda; ideoque variis constitutionibus eorum fraudes, calliditates, & stellionatus coërcentur.

Ad Tit. XXVII.

De Mandato.

II. **M**andatum est contractus, quo quis alterius negotia gratis gerenda suscipit.

scipit, idque vel solius mandantis causa, vel causa mandantis & alterius; vel sua & mandantis causa &c. Quocunque modo illud fiat, debet mandatarius mandati fines diligenter custodire, & mandatum susceptum quam primum explere. Liberum quidem est mandatario, mandatum non suscipere; susceptum tamen, dummodo contra bonos mores non sit, perficere debet. Mandatum enim susceptum negligere ideo *turpis est culpa* ait Tullius in oratione pro Sexto Roscio, *quod duas res sanctissimas violet, amicitiam & fidem. Nam neque mandat quisquam fere nisi amico: neque credit, nisi ei, quem fidelem putat. Perditissimi est igitur hominis, simul & amicitiam dissolvere, & fallere eum, qui laesus non esset, nisi credidisset.*

Atque hæc sunt omnes contractuum species, de quibus in institutionibus agit Justinianus. Ex iis autem quidam sunt Juris gentium, sive Jure gentium introducti; scilicet mutuum, commodatum, depositum, pignus, emptio-venditio, locatio-conductio, societas, mandatum: alii Juris Civilis, ut stipulationes omnes.

Deinde alii sunt *bonæ fidei*, ex quibus nimirum simplici quadam ratione boni & æqui, absque ulla subtilitatis disputatione præstanda sunt etiam ea, quæ non fuerunt nominatim a contrahentibus dicta: alii sunt *stricti Juris*, qui nempe angustis finibus conclusi

clusi nihil admittunt, nisi id, cujus facta est mentio. Bonæ fidei sunt commodatum, depositum, pignus, emptio-venditio, locatio conductio, societas, mandatum: stricti juris sunt, mutuum & stipulatio.

Præterea sunt, qui ex una tantum parte obligant, ut mutuum, alii ex utraque parte, qui idcirco synallagmata vocantur, ut commodatum, depositum &c.

Cum ex una tantum parte obligant, uni duntaxat contrahentium competit actio adversus alterum, v. g. in mutuo datur tantum actio ei, qui mutuum dedit adversus eum, qui accepit, ut damnetur rem mutuo datam in genere restituere.

Cessat hæc actio, si quis pecuniam mutuo dederit filiofamilias. Nam Senatusconsulto Macedoniano, de quo agitur Inst. lib. 4. Tit. 7. §. 7. cautum est, ne quis filiofamilias mutuam det pecuniam; aut si dederit, denegatur ipsi actio, etiam post mortem patris, ut sciant, qui pessimo exemplo adolescentium luxurium alunt, nullum sibi a jure expectandum esse subsidium.

Huic Senatusconsulto locum dedit Macedo quidam adolescens perditus, qui, cum ære alieno premeretur, patris mortem deproperavit.

Si utrinque contractus obligent, utrique contrahentium datur actio, uni quidem *directa*, alteri vero *contraria*: v. g. datur commodanti

modanti actio directa adversus commodatarium, ut rem commodatam restituat, commodatario vero contraria adversus commodantem, ut servetur indemnis. Idem dicendum de deponente & depositario; de mandante & mandatario.

Ad Tit. XXVIII.

De obligationibus quæ ex quasi-contractu nascuntur.

113. **N**ON tantum ex contractu nascitur obligatio, sed etiam ex quasi-contractu, v. g. si absentis & ignorantis, negotia sine mandato gesserim, quasi cum eo contraxisse videor: unde sequitur actio *negotiorum gestorum* directa & contraria: *directa* quidem quæ datur domino, cujus negotia gesta sunt, adversus negotiorum gestorem, ut eorum rationem reddat; *contraria* vero, quæ negotiorum gestori competit adversus eum, cujus negotia gessit, ut ab eo recipiat impensas necessarias & utiles in rem ejus factas. Simili modo tutor cum pupillo, cujus tutelam administravit, quasi contraxisse intelligitur. Unde pupillo tutelæ actio directa in tutorem, & tutori contraria in pupillum datur. Item si res sit multorum communis sine societate prius inita, puta si ea res illis donata sit, vel legata, veluti inter se contraxisse videntur, hincque oritur actio, quæ *Communi*
divi-

dividendo dicitur, per quam unus adversus alterum petit, ut res communis dividatur. Eadem est ratio hæreditatis Communis, quæ inter plures *erciscunda*, seu dividenda est: nam singulis hæredibus adversus cohæredes datur actio *familiæ erciscundæ* ad divisionem rerum hæreditariarum. Hæres quoque ex quasi contractu legatariis obligatur: & is, cui indebitum solutum est, quasi contractu debere videtur. Tollitur obligatio multis modis: sed præsertim solutione debiti, vel novatione, id est, prioris debiti in aliam obligationem sive naturalem sive civilem transfusione sive translatione. Vide hujus libri Tit. 30.

EX LIBRO QUARTO.

Ad Tit. I.

De obligationibus quæ ex delicto nascuntur,

114. **O**bligationes ex delicto natæ dicuntur, quæ vel ex furto, vel ex rapina, vel ex injuria, vel ex damno oriuntur.

5. Furtum est *ablatio rei alienæ clam & injuste facta*. Talis ablatio non tantum admittitur respectu proprietarii seu domini, cui res ipsa auferitur; sed etiam respectu ejus, qui usum tantum rei habet, vel respectu possessoris bonæ fidei. Pœna furti manifesti Jure Romano quadruplum est; non manifesti duplum. Rapi-

Rapina, de qua sequenti titulo agitur est violenta rei alienæ ablatio, contra quam datur actio, quæ dicitur *vi bonorum raptorum*.

Ad Tit. III.

De Lege Aquilia.

115. **L**egem Aquiliam tulit C. Aquilius Gallus Tribunus plebis; unde plebiscitum appellari posset. Tria sunt hujus capita.

Primum est hujusmodi: si quis alienum hominem, vel alienam quadrupedem injuria occiderit, quanti eo anno quadrupes futura est, tantum domino dare damnetur.

Is autem *injuria occidere* dicitur, qui nullo Jure occidit. Itaque qui latronem insidiatorem occiderit, actione injuriarum non tenetur, utique si aliter periculum effugere non potest.

Is quoque hac lege non tenetur, qui casu occidit, si modo culpa nulla inveniatur. v. g. *Si quis dum jaculis ludit vel exercitatur, trans-euntem servum tuum occiderit.* Nam si id a milite in eo campo, ubi solitum est exercitari, admissum est; nulla culpa ejus intelligitur. Si alius tale quid admiserit, culpa reus est. Item si putator ex arbore dejecto ramo servum tuum trans-euntem occiderit. Si prope viam publicam, aut vicinalem id factum est, neque proclamavit, ut casus

casus evitari posset, culpæ reus est: sed si proclamavit, nec ille curavit præcavere, extra culpam est; putator æque extra culpam esse intelligitur. si seorsum a via forte, vel in medio fundi cedebat, licet non proclamavit: quia in eo loco nulli extraneo jus fuerat versandi.

Imperitia quoque culpæ annumeratur: veluti si medicus ideo servum tuum occiderit, quia male eum secuerit aut perperam ei medicamentum dederit. Ubi medici nomen etiam pro chirurgis usurpatur. Nam olim medici medicamenta præscribebant, & conficiebant, & curabant vulnera, & cucurbitas admovebant.

Secundum caput legis Aquiliæ, quia jam suo tempore desierat esse in usu, non edisserit Justinianus.

Tertio hujus legis capite de omni alio damno cavetur. Ut si quis vel servum, vel pecudem alterius vulneraverit; vel vinum ipsius corruperit, aut aliquid fregerit; is qui damnum dedit, tantum domino dare tenetur, quanti ea res valuerit infra triginta dies retro computandos.

Ad Tit. IV.

De Injuriis.

116. **I**njuria dicitur omne quod non jure fit. Specialiter sumitur pro contumelia quæ

quæ a *contemnendo* dicta est, secundum Justinianum hoc tit. quia per eam alicujus dignitas vel existimatio ab alio per contemptum, & malam voluntatem læditur.

Fit autem Injuria vel re, vel verbis, vel scriptis. Re quidem, ut cum quis alterum pulsat, aut verberat, aut ejus vestimenta scindit, aut domum vi ingreditur, aut matrem-familias vel virginem frequenter affectatur &c. Verbis fit Injuria, cum convicium alteri datur, vel cum calumniose ejus fama læditur &c. scriptura cum libellus famosus in aliquem editur &c.

Patitur autem quis Injuriam non solum per semetipsum, sed etiam per uxorem, per liberos, per servos, per eos omnes, quibus vel consanguinitate vel affinitate est conjunctus.

Pœna injuriarum ex Lege XII. tab. propter membrum ruptum erat talio: sed Jure novo pœna est arbitraria; & gravius vel mitius punitur injuriam inferens, prout major vel minor fuerit injuria, quæ æstimatur ex causa, persona, loco, tempore, quantitate, qualitate, & eventu. Aliquando palinodiam tantum recantare cogitur reus & veniam flexis genibus a Deo, a Judice, & a parte læsa petere.

Ad Tit. V.

*De obligationibus quæ ex quasi-deli-
cto nascuntur.*

117. **V**ocatur *quasi delictum*, quod non ex dolo & intentione agentis, ut delictum; sed ex ignorantia vel imprudentia, & plerumque propter factum alterius committitur. Hujus quatuor proferuntur exempla hoc titulo.

Primum cum Judex per imprudentiam male Judicando *litem suam facit*, id est, cum ejus, quem male absolvit, causam in se suscipere, & contra ipsius adversarium defendere cogitur. Ut autem ignorantia in Judice vituperabilis est, ita & in Rectore Ecclesiæ, in Confessario, in Notario &c. Nam omnes in ea quam elegerunt, professione debent esse eruditi.

Secundum est de *dejectis & effusis*: cum nempe ex alicujus ædibus aliquid dejectum vel effusum est, quod alteri nocuerit, quasi ex maleficio, seu delicto obligatus intelligitur.

Tertium, quando quid positum vel suspensum est, qua vulgo iter fit, quod nocere possit.

Quartum, si furtum factum sit, vel damnum datum in navi, caupona, vel stabulo ab iis, quorum opera utitur, qui navim, cau-
P. Andr. Gordon Phil. P. I. Ff ponam

ponam vel stabulum exercet, ex quasi delicto censetur obligatus.

Imo si *quadrupes*, nempe equus, vel bos pauperiem fecisse dicatur tenetur dominus. Est autem *pauperies* hoc loco, *damnum sine injuria facientis datum*. Vide titulum 9. hujus lib. 4.

Ad Tit. VI.

De actionibus.

118. **C**UM Jus versetur circa personas, circa res, circa actiones; tandem explicandum superest tertium Juris objectum, quod in actionibus consistit.

Actio est *Jus persequendi in Judicio quod sibi debetur*.

Dicitur *Jus*, id est, remedium Juris, deinde *persequendi in Judicio* id est, in legitima Causæ disceptatione ex parte actoris & rei, coram Judice litis finiendæ gratia. Nam in omni Judicio requiruntur, *Actor*, qui reum convenit, seu vocat in Jus; *Reus*, qui convenitur seu in Jus vocatur; & *Judex*, qui de causa cognoscit. Convenitur autem reus ante suum Judicem: nam actor rei forum sequitur ex leg. 2. Cod. de Jurisdic. omni. judic. & de fore competent. Denique est *jus persequendi quod sibi debetur*, id est, id omne, quod suum est.

Actio

Actio est vel in rem, vel in personam, vel mixta.

Actio in rem quæ etiam dicitur *vindicatio* est ea qua rem nostram petimus ab eo, qui illam possidet, quique nullo Jure nobis est obligatus : & hæc actio semper adversus eum est, qui rem possidet.

Actio in personam quæ etiam dicitur *condictio*, est, qua in eum agimus, qui ad faciendum aliquid vel dandum nobis est obligatus sive ex contractu, aut quasi contractu, sive ex delicto; aut quasi delicto.

Actio mixta dicitur quæ partim est in rem partim in personam qualis est actio familiæ eriscundæ inter cohæredes : actio finium regundorum, &c. vide alias actionum divisiones hoc titulo.

Ad Tit. XIII.

De Exceptionibus.

119. **A**ctioni opponitur *exceptio* quæ est actionis jure competentis exclusio, v.g. exceptio *doli mali* opponitur ab eo, qui dolum passus est, adversus eum, qui dolum commisit, ut actio ejus reddatur inutilis. Exceptio quod *metus causa*, opponitur ab eo, qui metu gravi ad aliquid dandum, vel faciendum vel promittendum compulsus est, adversus eum qui metum intulit. Exceptio

rei judicate opponitur ab eo, qui sententia Judicis est absolutus, adversus eum, qui non obstante absolutoria sententia de eadem re, ex eadem causa in eundem agit.

Ad Tit. XIV.

De Replicationibus.

120. **R**eplicatio est actoris responsio, per quam exceptionem solvit, adversus quam iterum datur reo duplicatio & actori triplicatio &c.

In his aliquando agitur de rei proprietate, aliquando de possessione tantum. Si de possessione agatur, intervenit prævia sententia, quæ in Jure Romano *interdictum*, quasi *inter duos dictum* appellatur: per quam sententiam quis vel restituitur in possessionem rei, unde vi expulsus est; vel prohibetur actor reum turbare in rei sive mobilis sive immobilis possessione, hinc nata sunt *interdicta* duo; scilicet *uti possidetis* & *utrubi*. At enim prætor Romanus *uti possidetis* rem immobilem, quo minus ita possideatis vim fieri veto. Vel, *utrubi*, seu apud utrumvis ex contententibus res mobilis invenietur, ibi remaneat donec lis finita sit. Vide tit. 15. hujus lib. 4. & leg. 1. ff. *uti possidetis*.

Ad Tit. XVI.

De Pœna temere litigantium.

121. **M**Ultis modis coercentur improbi litigatores, qui temere & sine probabili causa litigant. Primo enim pœna pecuniaria mulctantur, præter litis expensas. Secundo, notantur infamia, qua honestorum virorum numero excluduntur &c. Neque id immerito, præsertim apud Christianos, quos optandum esset ad Judicum tribunal nunquam comparere, ut morem gererent Christi, verbis Matth. cap. 5. v. 39. *Ego autem dico vobis, non resistere malo: sed si quis te percusserit in dextram maxillam tuam, præbe illi & alteram: & ei qui vult tecum Judicio contendere, & tunicam tuam tollere, dimitte ei & pallium.* Quam magistri doctrinam repetit fidelis ipsius Interpres ac Magister D. Paulus Epist. 1. ad Corinth. cap. 6. v. 7. *Fam quidem omnino delictum &c. (id est defectus) in vobis, quod Judicia habetis inter vos. Quare non magis injuriam accipitis? quare non magis fraudem patimini? Ex quo sequitur, si Judicio nonnunquam contendamus justa nos ad id necessitate adigi oportere sine qua Divini Legialatoris nostri monitis non satis essemus obediētes. Deinde bonam fidem, æquum animum, & Justitiæ amorem causarum no-*
ftrarum
Ff 3

strarum disceptationibus servamus necesse est: alioquin incideremus in temere litigantium improbitatem, quæ si legibus humanis reprimatur, multo magis Divino Judicio est castiganda.

Sed abhorrendum omnino a litibus; ac si jam motæ sint, si prævideantur movendæ, ad *transactionis* remedium, si fieri possit confugiendum est, & de Jure non nihil remittendum potius, quam litigandi insaniz indulgendum.

Transactio autem est conventio, qua a lite mota vel movenda aliquo dato, retento vel promisso receditur.

Titulus 17. est de officio Judicis de quo postea.

Ad Tit. XVIII.

De publicis Judiciis.

322. **J**UDICIUM, est legitima causæ disceptatio ex parte Actoris & Rei coram Judice litis finiendæ gratia. Dividitur in *Civile*, quod nempe ex causa civili, & in *criminale*, quod ex causa criminali oritur. Hoc postremum vel *privatum* est, vel *publicum*. In privatis Judiciis ii tantum accusant, quorum privatim interest. In publicis, quæ proprie crimina vocantur, cuivis ex populo licitum est accusare.

Publi-

Publicorum Judiciorum quædam dicuntur capitalia, quædam non capitalia.

Capitalia vocantur, quæ ultimo supplicio afficiunt homines, vel etiam aquæ & ignis interdictione vel deportatione, vel metallo: qualia censentur hoc titulo crimina læsæ Majestatis, adulterii, homicidii, veneficii, parricidii, falsi, de vi publica & peculatus. Non capitalia infamiam cum damno pecuniario irrogant, cujusmodi numerantur crimina plagii, ambitus, repetundarum, de annona, de residuis.

Crimen læsæ Majestatis est, cum quis adversus principem & statum reipublicæ quid molitur. Et quidem si hostili animo id faciat, v. g. si arma cum hostibus sumat, vocatur *perduellis*, & ejus crimen *perduellio*: si citra hostilem animum, ut si falsam mone- tam cudat, dicitur simpliciter crimen læsæ Majestatis. Hujus pœna est capitalis.

Adulterium est alieni thori violatio. Huic adjunguntur, tum incestus, quo consanguinea vel affinis; tum *stuprum* quo virgo vel vidua honeste vivens corrumpitur; tum etiam nefanda & abominabilis libido. Hæc crimina variis pœnis pro ratione personarum & circumstantiarum coercentur.

Homicidium admittitur ab eo, qui hominem dolo malo occidit, vel cujus dolo malo factum est ut occideretur.

Veneficium est, cum quis vel venenis, vel

magicis artibus homines occidit. **Homicidii & veneficii pœna est capitalis.**

Parricidium appellatur, cum quis vel parentum vel liberorum fata properaverit. Parricidæ pœna singularis hoc loco statuitur ab Imperatore Justiniano. Is enim, inquit, *neque gladio, neque ignibus, neque ulli alii solenni pœnæ subjiciatur, sed insutus culcæo cum cane & gallo gallinaceo, & vipera & simia; & inter eas feræ angustias comprehensus (secundum quod regionis qualitas tulerit) vel in vicinum mare, vel in amnem projiciatur, ut omnium elementorum usu vivus carere incipiat, & ei cœlum superstiti & terra mortuo auferatur.* Hoc quidem parricidii supplicium moribus confirmatum non est, sed ipsum tamen oportet esse gravissimum.

Falsi crimen commissum dicitur, vel verbo, ut cum quis falsum testimonium tulit: vel facto, ut cum mensuram, aut pondus, aut monetam adulteravit; vel testamentum, vel aliud instrumentum aut contractum falsum pro vero supposuit. Hujus pœna varia est pro falsitatis varietate.

Vis publica est ea, quæ armis fit; privata, quæ sine armis. Illa punitur deportatione; hæc tertiæ partis bonorum ademptione. Sed capitalis pœna statuitur in eum, qui vel virginem vel viduam honestam per vim rapuerit, sicut etiam in eos, qui raptui opem dederunt.

Pecu-

Peculatus est furtum pecuniæ ad rem publicam vel ad fiscum pertinentis. *Sacrilegium* est furtum vel pecuniæ vel alterius rei sacræ.

Plagium est liberi hominis vel alieni servi dolosa suppressio.

Ambitus crimine tenetur, qui honores vel magistratus corruptis suffragiis ambit.

Repetundarum crimen est, cum Magistratus provinciarum ipsos Provinciales pecuniis & facultatibus spoliarent. Hujus criminis poena est quadruplum ablata pecuniæ.

In Legem de *annona* incidunt, qui faciunt ut carior sit annona, sive monopolium instituendo, sive avertendo naves onerarias &c. hi *annonam flagellare* dicuntur.

Lex de *residuis* contra eos lata est, qui pecuniam, quæ ipsis ad certum usum credita erat, lucrandi animo retinent, ac in suos usus convertunt. Poena hujus criminis fuit, ut qui eo teneretur, tertia parte amplius quam debebant, mulctaretur.

C P U T IV.

De virtutibus, vitiis & peccatis.

HUc usque de actuum humanorum regulis: nunc de illorum principiis agendum. Duplicis autem generis principia actuum humanorum distinguuntur, con-

Ef 5

genita

genita scilicet, & *acquisita* : illa nobis a natura concessa sunt, videlicet *intellectus* & *voluntas*, de quibus in metaphysica : hæc studio & repetitis actibus comparantur, suntque habitus boni & mali, seu *virtutes* & *vitia*, de quibus hic agendum tum generatim tum speciatim.

§. I.

Quid, & quotuplex sit virtus.

N. I.

Virtus generatim sumpta est nihil aliud, quam *bene operandi promptitudo*; quemadmodum vitium recte dicitur *perversa facilitas ad male operandum*.

Virtutes vel sunt supernaturales & infusæ, vel sunt naturales & acquisitæ.

De virtutibus infusis.

2. **V**irtutes infusæ dicuntur, quas Deus nobis *infundit sine nobis*: cujusmodi sunt virtutes, quæ *Theologicae* nominantur, scilicet fides, spes & charitas, quæ Deum directe & immediate respiciunt. His quodam affinitatis vinculo conjunguntur gratia habitualis & sanctificans, donum perseverantiæ, seu gratia perseverandi in bono usque in vitæ finem, dona spiritus sancti, &c.

Fides.

Fides.

3. **F**ides est virtus Theologica, quæ versatur circa Deum ut verum, seu veracem. Vel, est virtus divinitus infusa, per quam mens creata firmiter assentitur iis omnibus tanquam veris, quæ Deus revelavit, etiamsi intelligentiam nostram superent. Unde subiectum fidei Deus est; ratio vero, qua Deus a fide spectatur, exprimi solet his vocabulis, *quatenus Deus est prima veritas*: hoc est, quatenus nec fallere potest, nec falli; & consequenter voluntatis nostræ assensum, ac intelligentiæ subjectionem meretur in iis omnibus, quæ credenda proponit. Ex quo patet, naturalem notitiam Dei, imo & nostræ mentis, esse fidei præviam. Etenim nisi sciremus Deum esse summe verum, & summe potentem; mentem vero nostram in suis conceptionibus admodum limitatam, non facile nos ad assentiendum mysteriis subjiceremus. Quæ autem nobis credenda sunt, ea verbo sive scripto sive tradito continentur, & ab Ecclesia Catholica, quæ est *columna & firmamentum veritatis* 1. ad Timoth. 3. v. 15. proponuntur. Atque ita quæ nos aliquando clare visuros speramus, ea per fidem in mente nostra consistunt, & veluti præsentia fiunt. Ude Apostolus ad Hebr. cap. 11. v. 1. *Est autem, inquit, fides sperandarum substantia rerum, argumentum non apparentium.* Græce est

est *hypostasis*, id est, fundamentum & basis rerum, quas speramus : quia nempe dat illis subsistentiam in mente nostra, perinde ac si præsentes essent, cum tamen sint tantum futuro tempore apparituræ. Ideoque est *argumentum* seu convictio, aut demonstratio rerum, quæ non apparent, quatenus illas menti nostræ præsentes reddit, adeo ut illas jam cernere nobis videamur.

Spes.

4. **S**pes est virtus Theologica, quæ versatur circa summum bonum, prout absens, & certa cum fiducia aliquando obtinendum, seu possidendum. Vel, est virtus divinitus infusa, per quam certa cum fiducia nostræ salutis & æternæ vitæ bona expectantur. Subjectum illius, non secus ac fidei, est Deus: ratio, cur Deus per spem attingitur, his verbis exprimitur, *quatenus Deus certa cum fiducia futuro tempore est obtinendus*, seu possidendus. Itaque spes desiderium includit absentis boni, ac citra illud desiderium nulla foret spes.

Charitas.

5. **C**haritas est virtus Theologica, qua Deus supra omnia, & propter se, sive propter summam suam bonitatem diligitur, cætera
vero

vero propter Deum. Hic enim est ordo amoris, ut summum bonum propter se, cætera propter ipsum diligantur. Qui ordo cum sua pulchritudine nos moveat, nec aliud sit propter nisi Deus, nihil quoque aliud est charitas, quam supernaturalis amor ordinis, quo Deus propter se, quia summe bonus est, amatur; cætera vero propter ipsum. Quæ quidem definitione patet, subjectum Charitatis esse Deum ipsum: rationem, vero, ob quam Deus charitate attingitur, sic exprimi, *quatenus Deus est summe bonus*, sive quatenus est summum bonum, in quo nobis quiescendum est, & ad quod cætera sunt referenda.

Igitur Dei bonitas est ratio, quæ nos ad eum amandum movet: bonitas quidem absoluta, primario, & remote: bonitas vero relativa, secundario, & proxime. Nam, ut ait sanctus Thomas 2. 2. quæst. 26. art. 13. ad 3. si Deus esset tantum bonus absolute, & in se ipso; non vero comparate, & respectu nostri, voluntatem nostram minime ad suum amorem excitaret. Nam sine illicio quodam non excitatur voluntas ad amandum: quemadmodum sine luminis impressione non fit visio.

Quamobrem Deus a nobis propter se absolute non diligitur eo sensu, quod spectetur duntaxat prout in se est perfectus; removendo convenientiam, quam habet cum natura nostra, per quam nos ad se allicit. Nam

eo modo a nobis æltimari quidem posset Deus, & magno loco haberi, non tamen videretur posse amari. Etenim ad amorem requiri videtur convenientia quædam objecti amati cum eo, qui amat, per quam is, qui amat allicitur : & ad amandum excitatur. Est autem respectus, seu relatio inter movens & motum, alliciens, & allectum : Proindeque Deus a nobis diligi non videtur, nisi spectetur *relative* seu comparate ad nos, nempe quatenus nos ad se allicit ; & certa quadam suavitate, saltem in imo, ut ita loquar, mentis nostræ fundo, quod in tormentis experiebantur Martyres, nos perfundit.

6. Distinguitur tamen actus charitatis ab actu spei : siquidem aliud est *motivum* unius, aliud alterius. Motivum actus charitatis, seu objectum illius formale est Deus, prout summe bonus, hoc est, prout summa sua bonitate nos ad se alliciens, ut nempe ipsum rebus omnibus anteponamus, & omnia ad ipsius gloriam, quia id ordo postulat, referamus. Motivum vero actus spei est idem Deus, prout aliquando a nobis possidendus. Aliud autem est summum bonum, tanquam nobis conveniens, maximeque nos alliciens, ac sibi quodammodo conjungens, amare ; aliud possessionem illius tanquam quid absens & arduum adepturos esse nos sperare, ut docet idem S. Thomas 2. 2. quæst. 27. art. 6. ad 3. Nam v. g. si pauper quidam di-

viris

vitis alicujus ædes ingrediatur, in quibus laquearia auro splendentia, pretiosam supellectilem, numerosissimam familiam, lautissimam mensam videat, poterit iis rebus, tanquam sibi gratissimis ac convenientissimis affici, & ad earum amorem excitari, etiamsi non speret illas se adepturum: non tamen ab hujusmodi amore spem omnem excludi necesse est: siquidem & amor, & spes in eodem vitæ statu maxime quoad habitum una possunt conjungi. At amplius quiddam est in charitate & spe naturali quoad præsentis vitæ statum; etenim non tantum charitas excludit a nobis spem naturalem; sed cum ea necessario conjungenda est in hac vita, ut docet Apostolus I. ad Corinth. cap. 13. v. 13. *Nunc autem manent fides, spes, charitas; quia si verum Deum amamus, ad ipsum anhelare nos oportet, & spe beatitudinis ad bene agendum nos excitare. Præcipuum quippe charitatis studium secundum S. Thomam. 2. 2. quæst. 24. art. 9. Est, ut homo ad hoc principaliter intendat, ut Deo inhereat, & eo fruatur: & hoc pertinet ad perfectos, qui cupiunt dissolvi, & esse cum Christo.*

Unde Concil. Trident. Sess. 6. cap. 11. sic loquitur: *Constat, eos Orthodoxæ Religionis doctrine adversari, qui dicunt justum in omni bono opere saltem venialiter peccare, aut quod intolerabilius est, penas æternas mereri: atque etiam eos, qui statuunt in omnibus operibus ju-*
stos

stos peccare, si in illis suam ipsorum socordiam excitando, & sese ad currendum in stadio cohortando, cum hoc, ut imprimis glorificetur Deus, mercedem quoque intuentur eternam; cum scriptum sit: inclinavi cor meum ad faciendas justificationes tuas propter retributionem; & de Mose dicat Apostolus, quod respiciebat in remunerationem. Et cap. 16. postquam allegavit hæc Apostoli verba ad Hebræos cap. 10. v. 25. Nolite amittere confidentiam vestram, quæ magnam habet remunerationem; Sic prosequitur: Atque ideo bene operantibus usque in finem, & in Deo sperantibus proponenda est vita eterna, & tanquam gratia filiis Dei per Christum Jesum misericorditer promissa; & tanquam merces ex ipsius Dei promissione bonis ipsorum operibus & meritis fideliter reddenda.

Gratia habitualis.

7. **G**ratia generatim dicitur omne donum, quod gratuito datur; unde quod Deus nos creaverit, quod multis tum animi tum corporis dotibus nos ornaverit, naturalis est gratia, quam admittebat Pelagius.

Gratia vero proprie apud scriptores sacros sumitur pro dono supernaturali, sive externo, sive interno, creatura rationali gratis concesso, ad æternam ipsius salutem ordinato. Quare alia dicitur gratia externa, quæ mentem creatam extrinsecus tantum movet, cujus-

cujusmodi sunt Verbi Incarnatio, & Passio, institutio Sacramentorum, prædicatio Evangelii, miraculorum patratio, &c. alia *interna*, quæ mentem intrinsecus afficit: quæ rursus duplex est, scilicet *actualis*, & *habitualis*.

8. Gratiā interior actualis est *inspiratio dilectionis*, ut *cognita sancto amore faciamus*, ut ex S. Augustino definitur. Eaque vel est *excitans* duntaxat; vel est per se *efficax*.

9. Gratiā habitualis est donum divinum supernaturale menti nostræ infusum, tanquam bona quædam qualitas permanenter ipsi inhærens, eamque reddens sanctam, Deo gratam, & ad æternæ vitæ participationem bene comparatam. Etenim quamvis gratia actualis *efficienter* producere possit sanctitatem seu justitiam in mente creata; non tamen ipsa mens redditur permanenter iusta ac sancta, nisi per gratiam habitualement, quæ idcirco vocari solet gratia *sanctificans*, seu *justificans*, qualem in parvulis sacer baptis- mus operatur; qualem etiam obtinent quicumque reliqua Christi sacramenta in Ecclesia Catholica digne suscipiunt.

10. Præter hanc gratiam habitualement, quæ non secus ac gratia actualis, dicitur *gratum faciens*, quæque *gratis* datur, aliæ sunt gratiæ, quæ specialiter dicuntur *gratis datae*, quæ nempe non ad ejus, cui insunt, sanctitatem, sed ad proximi salutem divinitus sunt ordinatæ, cujusmodi sunt ex Apost. 1. ad Corinth.

P. Andr. Gordon Phil. P. I.

G g

cap.

cap. 12. v. 8. & sequentibus, *sermo sapientiæ*, ad explicanda iis, qui jam provecti sunt, sublimiora fidei nostræ mysteria, ut sanctæ Trinitatis, Incarnationis Verbi, Prædestinationis Sanctorum, &c. *sermo scientiæ*, ad exponendam incipientibus, & rudibus, familiari quadam ratione, Doctrinam Christianam: *Fides*, sive excellens intelligentia rerum fidei & fiducia impetrandi miracula: *gratia sanctorum*, sive curatio morborum: *operatio virtutum*, sive miraculorum patratio: *prophetia*, seu donum prædicandi futura, & scripturas præsertim propheticas explicandi: *discretio spirituum*, sive cogitationum & sermonum, ad pervidendum, utrum ex Deo sint an ex malo dæmone: *genera linguarum*, sive donum loquendi variis linguis: *interpretatio sermonum*, scilicet obscuriorum scripturæ sacræ, &c. Vide sanctum Thomam 1. 2. quæstione 109. ad finem.

Dona Spiritus sancti.

11. **D**ona Spiritus sancti sunt habitus supernaturales cum charitate infusi animæ, ut instinctum divinum prompte sequatur. Septem recensentur Isaïæ cap. 11. v. 2. scilicet donum *sapientiæ*, quo divina æternæque contemplamur; donum *intellectus*, quo fidei & scripturæ mysteria penetramus; donum *scientiæ*, quo temporalia ad salutem condu-

conducentia cognoscimus; donum *consilii*, quo prudenter statuimus, quid factu sit optimum in rebus ad salutem nostram pertinentibus; donum *fortitudinis*, quo contra ad-versa omnia mentem in bono confirmamus; donum *pietatis*, quo Deo adhæremus; donum *timoris*, quo Dei offensam averſamur. Hæc dona in sacris pentecostes solemniis a Deo flagitant fideles his verbis: Da tuis fidelibus in te confidentibus sacrum septenarium.

*Fructus spiritus, Beatitudines Evangelicæ,
Consilia Evangelica.*

12. **H**Is addi possunt fructus spiritus, qui ab Apost. ad Galat. cap. 5. v. 22. & octo beatitudines Evangelicæ, quæ a Christo Domino referuntur Matth. cap. 5. v. 3. & sequentibus; ac demum consilia Evangelica.

Fructus igitur spiritus sunt *Charitas*, quæ est omnium bonorum actuum radix; *gaudium*, quod oritur ex conscientia bona, & ab omnibus perturbationum motibus libera; *pax* seu tranquillitas mentis; *patientia*, seu lenitas animi in malis constanter tolerandis; *benignitas*, seu morum facilitas ac suavitas in convictu & conversatione; *bonitas*, qua quis ad benefaciendum semper est paratus; *longanimitas*, quæ a patientia non multum di-

scrapat; *mansuetudo*, qua quis ita tractabilis est, ut fere *manu* videatur *assuetus*; *fides*, seu fidelitas & veracitas in promissis; *modestia*, qua omnes hominis motus exteriores reguntur, ut sermo, risus, incessus, gestus, vestitus, &c. *continentia*, qua omnes vitiorum illecebræ remouentur; *castitas*, quæ a continentia in eo differre dicitur, quod continentia sit castitas pugnans, castitas vero sit continentia in pace collocata.

13. Ocho Beatitudines sic enumerantur a Christo, loco laudato. Beati *pauperes spiritu*, id est, pauperes affectu, seu animo & voluntate, qui nempe divitiarum amore non possidentur. Beati *mites*; beati qui *lugent*; qui *esuriunt & sitiunt Iustitiam*; beati *misericordes*; beati *mundo corde*; beati *pacifici*; & qui *persecutionem* patiuntur propter Iustitiam: horum quippe omnium magna futura est in cœlis remuneratio.

14. Præcipua denique consilia Evangelica, quæ inspirante spiritu sancto concipiuntur, & implentur, sunt *castitas perpetua*, *paupertas voluntaria*, & *obedientia integra*. Quoniam, inquit D. Joannes Epist. 1. Cap. 2. v. 16. *omne quod est in mundo, concupiscentia carnis est, & concupiscentia oculorum, & superbia vitæ*: id est, amor voluptatum carnis, amor divitiarum, amor potestatis & bonorum: quibus utique castitate, paupertate & obedientia frœnum injicitur.

Donum

Donum perseverantiæ.

15. **D**Onum perseverantiæ est speciale auxilium divinum, quo justus in gratia ad ultimum vitæ spiritum perseverat: de quo legi potest liber eximius S. Augustini, cui titulus *de dono perseverantiæ*.

De virtutibus acquisitis.

16. **V**irtutes naturales & acquisitæ sunt, quæ repetitis actibus comparantur, eæque vel *intellectuales* dicuntur, vel *morales*. De intellectualibus dictum est supra in Logica pag. 104. nunc de moralibus breviter dicendum.

Virtutes morales dicuntur, quæ voluntatem ad bonum morale inclinant, eæque sunt huic Ethices parti subjecta materies: non tamen solæ virtutes acquisitæ morales, sed virtutes etiam infusæ voluntatem ad bonum morale, hoc est, ad id, quod ordinatissimum est, inclinant.

17. In omni autem virtute seu habitu bono duæ spectandæ sunt partes, altera superior, quæ regit & imperat, altera inferior, quæ obtemperat, & famulatur.

Pars superior virtutis est, ea mentis affectio seu dispositio, quæ honestam mediocritatem ubique sectatur, inspecta persona agente, loco, tempore & omnibus circum-

stantiis; non enim eadem singulos decent, neque eadem eundem hominem semper decent. Nam v. g. mediocris cœna respectu principis, haberi potest lautior respectu privati. Ac inter privatos, qui ditior est, dicitur liberalis & lautus, si cum amicis splendidius identidem epuletur; cum tamen alius, cui res foret angustior, prodigus haberetur, ac male sanus si eum vellet imitari. Quin etiam idem homo in diverso conditionis genere, vel diversa ætate aut diverso fortunæ ac dignitatis gradu collocatus diversam prorsus tenere debet vivendi rationem.

Pars inferior & famulans virtutis est operandi facilitas, quæ tota in corporeis affectionibus, nempe in impressis cerebro vestigiis, in spirituum animalium determinatione, ac reliquis dispositionibus corporeis posita est, quæque proinde est corporea.

Porro cum virtus recte dicatur habitualis amor ordinis, atque ordo diversimode spectetur; hinc fit ut multiplex virtutis species distinguatur. Nam ab objecto *formali* seu modo, quo servatur ordo in objecto *materiali*, speciem suam quælibet virtus desumit. Quamobrem celebris est virtutum moralium divisio in principes seu *cardinales*, quibus nempe tanquam *cardinibus* subnixæ tota humana vita vertitur; & in *adjunctas* seu comites, quæ a Cardinalibus profluunt, aut ad eas referuntur.

18. Cardinales vulgo quatuor numerantur, scilicet *prudencia, Justitia, fortitudo, & temperantia*. Cujus numeri rationem affert S. Thomas 1. 2. quæst. 61. art. 2. sed auctoritate facilius quam ratione comprobatur. Multa enim tum apud sacros tum apud profanos scriptores reperiuntur testimonia, quibus quaternarius ille virtutum præcipuarum numerus astringitur. Primo enim Sapiens Sapientia cap. 8. v. 7. de sapientia loquens hæc habet: *Sobrietatem enim, id est, temperantiam, & prudentiam docet, & justitiam & virtutem, id est fortitudinem, quibus utilius nihil est in vita hominibus.*

Huic succinit S. Ambrosius in caput sextum Evangelii secundum Lucam his verbis: *Scimus virtutes esse quatuor cardinales, temperantiam justitiam, prudentiam, fortitudinem.* Item S. Augustinus in Psal. 83. v. 8. *Virtutes, inquit, agenda vitæ nostræ quatuor describuntur a multis, & in scriptura inveniuntur.*

Virtutes, quæ comites dicuntur in triplici differentia sunt positæ secundum S. Thom. 2. 2. quæst. 48. art. unico. Alii enim virtuti cardinali tanquam species subjiciuntur, & ideo *partes subjæctivæ* virtutis cardinalis vocantur: aliæ, sine quibus virtus cardinalis integra esse non potest, ut corpus humanum sine artubus seu membris non potest esse integrum, *partes illius integrantes*, seu integrales appellantur: aliæ denique instar poten-

tiarum seu facultatum ipsis virtutibus cardinalibus subserviunt, & earum *partes potentiales* nominantur.

Hæ vero virtutes sive principes sive adjunctæ, sic inter se connexæ sunt, ut nulla prorsus absque cæterarum comitatu in statu perfecto obtineri queat. Etenim virtus perfecta est *constans ac firmus ordinis amor*, quo quis id quod rectum est, & rationi consentaneum, in quavis materia prosequitur. Atqui amor ille constans, firmus & habitualis omnes plane virtutes includit, sive potius est una eademque virtus, quæ ut perfecta sit, perpetuam requirit voluntatem id semper in in omni materia prosequendi, quod justum rectumque reperitur: neque enim quisquam v. g. perfecte justus est si careat fortitudine, vel temperantia, vel liberalitate, id est si careat amore ordinis vel in materia temperantiæ, vel in materia liberalitatis, vel in materia fortitudinis: quippe Judex intemperans voluptatibus tentari, avarus pecunia corrumpti, timidus minis terreri potest, ne jus reddat. Item fortitudinem in statu perfecto nullus obtinet sine temperantia & cæteris virtutibus. Neque enim Alexander ipse Magnus Macedonum Rex data occasione fortiter se gessit, quoties vehemens intemperantiæ affectus ipsum invasit, ut ex eo liquet, quod Thaidis pellicis incantamentis fractus, & vino madidus Regiam Persarum urbem
flammis

flammis tradidit, quam antea meliori consilio servatam voluerat. Ergo una virtus esse non potest in aliquo perfecta, quin cæterarum consortio sit stipata.

19. Dico, eam non posse esse sine cæteris perfectam, tametsi imperfecta esse possit. Triplex enim vulgo virtutis status distingui solet, scilicet status imperfectus, status medius & robustior; ac demum status perfectus, quem heroicum nominant.

Status imperfectus virtutis dicitur is, in quo quis affectuum motibus agitur, sed iis tamen, quamquam ægre resistit: & hic status est *incipientium*, in quibus scilicet virtus nondum est confirmata: cui virtutis statui opponitur status *infirmittatis*, in quo quis nondum est vitio corruptus, & omnino perversus, concupiscentiæ tamen, quamvis repugnans succumbit.

Status medius virtutis dicitur, in quo quis ita confirmatus est in bono, ut tentetur quidem a concupiscentia sua, sed minus vehementer, & ei facilius ob longam assuetudinem resistat, hicque status est *proficientium*, cui opponitur status *perversitatis* sive malitiæ, in quo quis ita vitio mancipatus est, ut ei fere non resistat.

Status demum *perfectiõis* sive status virtutis *heroicus*, qui scilicet virtutis culmen attingit, ille est, quo sedati sunt affectus, aut ita fracti, ut virtutem commovere non possint:

qui status est *perfectorum*, cui opponitur status *feritatis*, quo quis sic infra sortem communem etiam improborum deprimitur, ut in *belluam* quodammodo degeneret, ac vulgo dicitur *status indurationis, obcecationis, & pharaonicus*. In utroque autem statu, medio scilicet, & perfecto, sed maxime in perfecto & heroico virtutes omnes sive primarias & cardinales, sive adjunctas & comites inter se connexas esse dicimus, non item in statu imperfecto.

Jam autem de virtutibus seorsim ita dicendum, ut singulis virtutibus cardinalibus suæ comites, sive ut loquitur sanctus Thomas, suæ partes potentiales, & integrantes adjungantur.

§. II.

De virtutibus moralibus speciatim & primo de prudentia.

20. **P**rudencia est virtus moralis, qua voluntas dirigitur circa res agendas.

Tres prudentiæ partes potentiales, seu tria munia recenseri solent, nempe *bene consultare*, *recte judicare*, & quod judicatum est, *ad praxin reducere*.

Partes integrantes numerantur octo, nempe *memoria, intelligentia, providentia, ratio, docilitas, solertia*, (cui adjungenda est sagacitas) *circumspectio, cautio*.

Ad

Ad prudentiam igitur perfectam necessaria est primo *memoria*, id est, rerum præteritarum recordatio. Secundo *intelligentia*, sive præsentium notitia. Tertia *providentia*, seu futurorum præscientia. Quarto *ratio*, id est, illius, quod agendum est, ex præteritis, præsentibus, & futuris colligendi facilitas. Quinto *docilitas* seu bonus affectus mentis ad aliorum monita & concilia excipienda comparata. Sexto *sagacitas* & *solertia*, id est, facilis excogitatio & applicatio mediorum ad finem ducentium; sagacitas enim invenit; solertia vero feliciter exequitur. Septimo requiritur *circumspectio*, seu attenta omnium circumstantiarum consideratio. Octavo denique necessaria est *cautio*, seu cura & sollicitudo vitandi omnia incommoda, quæ susceptum negotium turbare possunt.

Species prudentiæ sunt, *prudentia* per quam quis regit se ipsum, & *prudentia* per quam regit multitudinem, inquit S. Thomas 2. 2. quæst. 48. articulo unico. Rursusque prudentia, qua multitudo regitur, in alias species distribuitur. Nam vel est *æconomica*, qua regitur familia, vel *politica*, qua civitas gubernatur.

Vitia prudentiæ opposita.

21. **V**itia prudentiæ opposita eam lædunt vel excessu, vel defectu.

Pruden-

Prudentiæ per excessum opponuntur 1. *prudencia carnis*, quæ in implendis naturæ corruptæ desideriis studiosius versatur. 2. Nimia bonorum temporalium *solicitudo*, quæ ex immoderato habendi amore vel amittendi timore exoritur. 3. *Astusia* seu *calliditas*, aut *versutia*, quæ dicitur excogitatio mediorum, seu rationum perversarum ad obtinendum finem, maximeque ad alios decipiendos conducentium. Cum *astutia* in dictis tantum versatur, a nonnullis *dolus* dicitur: si factis se prodatur, *fraudis* nomen habet. Quamquam *dolus* & *fraus* promiscue sæpius usurpentur.

Per defectum vero *prudentiæ* adversatur *imprudencia*, quæ sæpius ex ignorantia profluit: eaque generatim dici potest *prudentiæ carentia*. Neque vero una est specie, sed multiplex; nempe *præcipitatio*, *inconsideratio*, *inconstantia*, *negligentia*.

Præcipitatio dicitur vitium, quo quis opus aliquod citra sufficientem deliberationem aggreditur. *Inconsideratio* vitium est, quo citra debitam attentionem de mediis fertur iudicium. *Inconstantia* est sententiæ mutatio ob nullam, vel exiguam causam. *Negligentia* denique est omissio diligentia in rei constitutæ executione urgenda.

De Justitia.

22. **J**ustitiæ nomen latius quandoque sumitur, scilicet pro sanctitate, seu virtutum omnium complexione, ut in sacris literis frequentissime accipitur: v. g. Matth. cap. 1. v. 19. Joseph dicitur *Justus*, id est, sanctitate excellens. Et cap. 5. v. 6. Beati qui esuriunt & sitiunt justitiam &c.

Hæc prima justitiæ species vulgo *justitia generalis* appellatur, vel etiam *justitia legalis*, quæ nempe *legem omnem* comprehendit, aliasque omnes in se virtutes complectitur, ut docet Aristoteles libro 5. Ethicorum cap. 3. ubi hunc Theognidis versum refert.

Justitia in sese virtutes continet omnes.

23. Verum altera est justitiæ species, quæ *particularis*, vel *specialis* dicitur, de qua hic agimus, quæ secunda est inter virtutes cardinales, qua nempe suum cuique jus redditur; quæque definitur ab Imperatore Justiniano initio Institutionum Juris Civilis, *constans & perpetua voluntas jus suum cuique tribuendi*, ut antea declaravimus.

Jus vero est id, quod *justum & æquum* est, sive quod inter extrema vitiosa est medium. Quamobrem, qui de re aliqua contendunt, ii ad Judicem tanquam ad *divisorem*, seu *partitorem*, *διαιτην* ut apud Græcos vocatur, confugiunt, qui rem illam inter ipsos ex æquo dispescit, &, quid cujusque sit, definit.

Ex

Ex quo inferre licet *Talionem*, sive *reciproci pœnam*, ut loquitur lex 3. cod. Theodosiano *de exhibendis reis*, non fuisse jus proprie dictum sed tantum damni illati *vindictam*. Neque enim damnum homini resarcitur, cui dens confractus est, dum ei, a quo injuriam accepit, dens pariter confringitur; sed tantum reo pœna infligitur. Quocirca hæc *Talionis* pœna, cujus scriptura sacra meminit. Exodi cap. 21. v. 24. quamque Lex duodecim Tabularum apud Romanos introducebat, paulatim in desuetudinem abiit. Cæperunt quippe postea Prætores Romani *permittere ei, qui injuriam passus erat, illam æstimare*, ut Judex a Prætore datus vel *tanti reum condemnaret, quanti injuriam passus æstimaverat, vel minoris prout & visum esset*, ut legitur libro 4. Institutionum Juris Civilis tit. 4. §. 7.

24. *Justitia specialis*, quæ est secunda inter virtutes cardinales, in *commutativam*, & *distributivam* tanquam in species dividitur.

Commutativa est ea, quæ in commutationibus bonorum, in contractibus & conventis æqualitatem servat.

Distributiva dicitur, quæ præmia & pœnas pro meritis & conditione personarum distribuit: eaque ubi pœnas reo pro delicti ratione irrogat, *vindex* aut *vindicativa* vocatur.

Utraque æqualitatem quamdam statuit: sed in justitia distributiva servatur *proportio*
geome-

geometrica, in commutativa vero *proportio arithmetica*. Cum enim *justitia distributiva* circa munera, aut pœnas distribuendas versetur, ea non meriti tantum & præmii vel pœnæ rationem habet, sed personas quoque inter se comparat hoc modo. Ut se habet persona ad personam, vel meritum ad meritum: sic pœna ad pœnam, & præmium ad præmium: Adeoque quantum dux, v. g. militem gregarium antecedit, tanto majorem, quam ille, ex aliquo præclare facto mercedem meretur.

At *justitia commutativa* perfectam æqualitatem exigit, nec personarum aut aliarum circumstantiarum rationem habet. Adeoque quantum valet res, quæ in commutationem, vel in contractum conducta est, tantum valere debet id quod permutationis vel pretii loco redditur, sine ullo respectu ad eos, qui permutant, vel quocunque modo contrahunt: sive, quod idem est, quantum una res alteram excedit, tantum illius pretium superet pretium alterius.

Si quis igitur vel proportionem *Geometricam* in *justitia distributiva*, vel proportionem *Arithmeticam* in *justitia commutativa* servare omiserit, tum jus ipsum lædit, & legem, qua jus illud constituitur violat, nisi forte casus aliquis inciderit, ubi a rigore legis recedendum æquitas naturalis suadet. Et enim cum lex generalis singulares casus prævidere

videre nequeat, ea nonnunquam æquitate naturali temperanda est: atque ut Celsus loquitur lege 18. ff. de legibus, Senatusconsultis, & longa consuetudine: *Benignius leges interpretandæ sunt, quo voluntas earum conservetur*: Alioqui *summum jus, ut vulgo ajunt, summa injuria*.

25. Quæritur hic, utrum volenti fieri possit injuria?

Respondeo cum distinctione. Nam si injuria sumatur pro omni eo, quod non jure fit, ut definit lex prima ff. de injuriis, id est, pro eo omni, quod jus violat, & aliquem vel in propria persona, vel in familia, aut fortuna lædit, utique potest aliquis pati injuriam volens: v. g. pati potest se vexari propter justitiam, vel damno aliquo affici propter concordiam: quin etiam potest maritus stupore aliquo vel avaritia in uxoris adulterium consentire. Sed si injuria sumatur pro contumelia, vel pro facto quo quis revera offenditur, certe *volenti non fit injuria*, quia nemo volens offenditur, cum nemo id, quod malum est, quatenus tale amare possit. Unde regula 27. Juris Canonici in sexto sic habet: *Scienti & consentienti non fit injuria, neque dolus*.

Dux sunt ex S. Thoma 2. 2. quæst. 79. art. 1. Justitiæ partes integrantes scilicet *declinare a malo, & facere bonum*: quoniam ad perfectum justitiæ actum requiruntur. Sed quamvis

vis id verum sit, æquius tamen hæ partes ad justitiam legalem, seu ad virtutem generatim, quam ad justitiam stricte sumptam, quæ secunda est ex cardinalibus, videntur referendæ, cum sine illis nullus virtutis actus perfectus esse possit. Neque omnino ab hac opinione dissentit S. Thomas.

26. Partes potentiales justitiæ numerat octo S. Thomas 2. 2. q. 80. a. 1. scilicet *religionem, pietatem, observantiam, veritatem, gratiam, vindicationem, liberalitatem, & amicitiam*, quibus addunt *affabilitatem*; his enim velut organis actus suos exercet justitia.

Religio dicitur virtus moralis exhibens Deo cultum debitum, in agnitionem supremæ ipsius potestatis & excellentiæ. Cultus ille tum interior, *devotione* nimirum & *oratione* Deo exhibetur; tum exterior, scilicet *adoratione, sacrificio & voto*; &c. de quibus consule S. Thomam loco laudato. Sed meminisse hic oportet, cultum nostrum, ut Deo sit acceptus, exhiberi debere per Dominum JESUM Christum: non enim est aliud nomen, propter quod hominibus liceat ad Deum accedere; nec alia Religio præter Christianam, in qua salus obtineri valeat.

Pietas secundum Tullium virtus est, quæ officium erga patriam, aut parentes, aut alios sanguine conjunctos servamus. Nam pietas ea complectitur officia, quæ debemus patriæ, parentibus, & aliis, quorum meritis

paria referre non possumus. Sumitur etiam *pietas* apud Christianos pro *devotione*, id est, pro fervore affectus circa ea, quæ sunt cultus divini.

Observantia ex eodem Tullio est justitiæ pars, per quam homines ætate ac sapientia, aut honore, aut aliqua dignitate antecedentes reveremur, ac colimus.

Veritas, ut ait idem Cicero, sive ut loquuntur alii, *veracitas*, est virtus moralis, qua damus operam, ne quid a nobis enuntietur aliter quam sit, vel fuerit, vel futurum sit.

Gratia, sive ut loquuntur, *gratitudo*, dicitur, quæ amicitiarum & officiorum alterius memoriam, & remunerandi voluntatem continet.

Vindicatio secundum Tullium est virtus, per quam vim & contumeliam defendendo aut ulciscendo propulsamus a nobis, & a nostris, qui nobis chari esse debent, & per quam peccata punimus. Sed etiam si ab injuriâ & se & suos prohibere quis possit, observandum tamen cum sancto Thoma 2. 2. quæst. 108. art. 1. *vindicationem* non esse licitam, nisi iis solis, qui aliis præsunt, idque ad emendationem peccantis, vel saltem ad cohibitionem ejus, & quietem aliorum, & ad justitiæ conservationem, ac Dei honorem. Privato enim vindictam de altero sumere, quantumvis hoc jus naturæ esse, tum hic, tum alibi tueatur Cicero, non licet, ut constat ex
Aposto-

Apostolo ad Romanos cap. 12. v. 19. *Non vosmetipsos defendentes charissimi, sed date locum iræ; scriptum est enim: mihi vindicta; ego retribuam, dicit Dominus.* Cui præiverat sapiens Proverb. 20. v. 22. his verbis: *Ne dicas: reddam malum: exspecta Dominum, & liberabit te.*

Liberalitas est virtus, quæ circa pecunias dandas & accipiendas mediocritatem tuetur. Differre dicitur a *beneficentia*, quod hæc in quorumcunque bonorum, illa in pecuniæ tantum largitione consistat.

Affabilitas dicitur virtus, qua quis in convivio, & vitæ consuetudine facilem se, ut decet, exhibere studet. Huic opponitur *morositas*, seu asperitas in congressu & conversatione.

Amicitia est mutua benevolentia in aliquo bono fundata, scilicet vel in bono utili, vel jucundo, vel honesto: ea tamen sola, quæ in bono honesto fundatur, veræ ac solidæ amicitiae, quæ justitiæ pars est, qua nempe amorem pro amore reddimus, appellationem meretur. Etenim cum amorem pro amore secundum justitiæ leges reddimus, amicos non tantum nostri, sed illorum etiam gratia diligimus. Qui vero solam utilitatem in amicitia considerant, ii vere non sunt aliorum amici, sed suis duntaxat commodis student. Qui autem propriam delectationem unice intuentur, quoniam suaviter affi-

ciuntur amicorum præsentia, sic iis frui volunt, ut nulla ipsis momenta libera relinquunt, quo vel sibi, vel aliis amicis vacent. Hoc autem non est amicos diligere, sed voluptati tantum propriæ servire, & alios oblectationis suæ causa in servitutem velle redigere. Non ergo sola utilitas, non sola delectatio spectanda est in amicitia, quamvis utraque in ea possit adesse; sed primum in ipsa locum sibi vendicet honestas necesse est, per quam nempe amicitia fit pars justitiæ, & ad virtutis naturam evehitur.

Harum quidem cæterarumque virtutum notionem aliquam haurire possumus ex Aristotele, Cicerone, aliisque autoribus profanis. Si tamen eas omnes, ac præcipue Religionem accurate cognoscere, debitumque iis finem præstituire velimus, non ex alibi quam in scripturis sacris tum veteris tum præcipue novi Testamenti, & scriptorum Ecclesiasticorum libris sunt quærendæ. Ethnorum quippe virtutes ut plurimum erant splendida vitia, quæ vanam hominum existimationem aucupabantur, & gloriam, quæ soli Deo debetur, creaturis tribuebant.

27. Justitiæ generatim opponitur *injustitia*, sed ea diverso modo justitiam violare potest, nempe vel *excessu* vel *defectu*: etiamsi utrobique *injustitia*, nomen retineat.

Primo igitur *justitia distributiva* per excessum vel defectum lædi potest, sive de præmiis

miis sive de pœnis distribuendis agatur. Nam si princeps tenui cuidam & modicæ virtutis viro plus gloriæ, vel honoris vel mercedis tribuat, quam deceat, *excessu* peccat: si minus, defectu. Simili modo cum reo plus infligitur pœnarum, quam par sit, *excessus* est in materia *justitiæ vindicis*, & crudelitas dicitur: si minus puniatur, est *defectus*, aut *nimia indulgentia*.

Secundo, in materia *justitiæ commutativæ* locum habet *excessus* & *defectus*: v. g. cum carius aliquid emitur & venditur: vel cum in mutuo ratione mutui præter sortem principalem aliquid datur aut accipitur, *excessu* læditur justitia: si minus solvatur vel reddatur, quam emptum aut mutuo acceptum fuerit, defectu a justitia receditur. Unde contra justitiam non tantum *defectu* ut fatentur omnes, sed etiam *excessu* peccari potest ratione materiæ, sive objecti, ut vocant, materialis.

Non tamen omnis excessus in materia justitiæ semper est vitium: Nam v. g. homoditissimus, qui urgente necessitate aliquid mutuo accepit a minus divite, potest ei gratificatione plus reddere, quam ab ipso accepit.

De fortitudine.

28. **F**ORTITUDO est virtus moderatrix audaciæ & timoris in periculis adeundis, quando

¶ *Ubi ratio præcipit; aut in adversis rebus sustinendis.* Quippe materia fortitudini subiecta, vel, sunt pericula adeunda, cum ratio seu ordo illud exigit, v. g. in bello justo pro Religionis, Patriæ, aut Principis defensione; vel sunt res adversæ, quæ ubi ingruunt, aut repellendæ sunt, aut constanti animo sustinendæ.

Quare duo sunt in fortitudine actus oppositi: nimirum *aggredi* seu periculum adire, cum decet; & *sustinere*, seu res quaslibet adversas constanter tolerare. Utrumque actum recta ratio, sive amor ordinis moderetur, necesse est. Nam neque præcipiti audacia quidquam tentandum: sed medio quodam loco inter audaciam & timorem constitutum esse virum fortem oportet.

29. Species fortitudinis assignantur nullæ, partes autem *integrantes* sive *potentiales* recensentur quatuor, videlicet *fiducia*, *magnanimitas*, *patientia*, & *perseverantia*.

Fiducia est pars fortitudinis, qua confidit animus posse se res difficillimas, ubi & quando decet, suscipere & tolerare. Quod si res arduæ vulgares non sint, & actibus non vulgaribus adoriendæ, aut perpetiendæ, exurgit magnanimitas, quæ non tam re quam nomine a fortitudine discrepat.

Patientia est virtus, quæ animus in malis tolerandis obfirmatur. *Perseverantia* vero est stabilis ac firma permanſio in ratione rei bene

bene considerata, sive de aggressione agatur, sive de defensione, aut perpeffione.

Quærunť hoc loco, an sese occidere sit actus fortitudinis?

Respondent quotquot sunt sanæ mentis homines contra Stoicos, nullatenus esse viri fortis seipsum occidere sed dementis & ignavi, qui vel inanis gloriæ, aut fortunæ jacturam, vel breve aliquod incommodum patienter tolerare non potest.

Eadem est ratio duelli; seu singularis certaminis auctoritate privata ad eluendam levissimam quandoque injuriam suscepti. Quis enim eorum impotentiam animi non miretur, qui propter rem nihili vitam, famam, æternamque salutem animæ in apertum discrimen adducunt. Quasi vero deferenda sit vita aut alteri eripienda, ne umbratilis offensa inulta remaneat.

Vix opus est vitia fortitudini opposita recensere, cum in ipsius definitione contineantur; nam ipsi per excessum *temeritas* vel *audacia præceps*: per defectum vero *timor* aut *ignavia* opponitur.

De Temperantia.

30. **T**emperantia est *virtus cardinalis*, quæ corporeas voluptates in gustu potissimum & tactu positas moderatur. Dicitur in gustu potissimum & tactu; nam voluptates, quæ

aliis sensibus percipiuntur, ut *visu* ex pictura, *auditu* ex musica, *olfactu* ex odoribus, secundario tantum ad temperantiam referuntur. Hinc Aristoteles in problematis Sect. 18. quæst. 7. observat *intemperantie* nomen iis tantum vitiis tribui solere, quæ nobis cum belluis sunt communia: nam belluæ *visu*, *auditu*, & *olfactu* parum delectari videntur, sed magis *gustu* & *tactu*. Hac de causa homines qui gustui & tactui plus æquo indulgent, tanquam belluæ vulgo habentur, qualis ille fuit Philoxenus, qui gruis collum sibi a natura concessum voluisset, quo diutius esculenta & poculenta sapere potuisset.

Frequenter tamen temperantiæ nomen latius sumitur, nempe pro ea moderatione animi, quæ ad omnes vitæ partes pertinet.

31. Temperantiæ species ex S. Thoma 2. 2. quæst. 143. art. 1. sunt *abstinentia*, *sobrietas*, *castitas* & *pudicitia*.

Abstinentia in cibo, *sobrietas* in potu moderando versatur. *Castitas* a voluptatibus illicitis, *pudicitia* ab omni aspectu & tactu impudico abstinet. Castitatis porro tres sunt gradus, *virginalis*, *conjugalis*, & *viduitatis*, de quo legi potest S. Augustinus in libris *de sancta virginitate*, *de bono conjugali*, *de bono viduitatis*.

Pudicitia a pudore dicta est; Pudor autem est perturbatio animi de iis, quæ dedecus inferre videntur. Mos erat antiquis

Roma-

Romanis longe pulcherrimus, quo magna eorum integritas relucet. Cum enim venderent ancillas virgines, cavere solebant, ut salvus iis esset pudor, nec prostituerentur: alioqui libertæ fierent. Hinc emerſit pactum *immiſſionis* ſeu *injectionis manuum*, quo poterat venditor manus injicere, & abducere libertam, ſi ab emptore fuerat prostituta. leg. *Mulierem*, Cod. *Si mancipium ita venierit. ne prostituatur.* Enimvero in virtutibus, præſertim ſœminæ, pudicitia regina eſt, imo in adoleſcentibus eſt fere inſtar omnium virtutum.

32. Vix certus eſt ac definitus potentia-
lium partium numerus. Primo loco ponitur *continentia*, quæ concupiſcentiæ motibus ad intemperantiam provocantibus reſiſtit. 2. *Humilitas*, quæ hominem, ad ſui vilitatem ingenuè profitendam inclinât. 3. *Manſuetudo*, quæ iram moderatur ut *clementia* vindictam. 4. *Modestia*, quæ internos externosque animi motus intra debitum modum continet. 5. ſequitur *ſtudioſitas*, quæ ſciendi deſiderium intra legitimos fines cohibet. 6. *Eutrapelia*, ſeu *urbanitas*, quæ in ludis & jocis modum ſtatuit. 7. *Parcitas*, quæ corporis cultum & munditiem tam in veſtibus, quam in ſupelleſtili honeſte moderatur. Vide S. Thomam 2. 2. quæſt. 143. art. 1.

Vitia temperantiæ opposita.

33. **A**lia excessu a temperantiâ recedunt, alia defectu: sed eorum plurima propriis nominibus sunt destituta. Primo igitur temperantiæ per excessum opponitur *intemperantia*, qua quis voluptatibus gustus & tactus præter modum se tradit; per defectum vero *stupor*, sive, ut loquitur S. Thomas *insensibilitas*, qua delectationes corporeæ etiam ad naturæ conservationem divinitus ordinatæ contra rationem prætermittuntur. Secundo, abstinentiæ gula, sobrietati crapula, castitati luxuria, Pudicitæ, impudicitia opponitur. Quarto continentæ incontinentia, humilitati superbia, mansuetudini iracundia, modestiæ immodestia, studiositati curiositas, eutrapeliæ scurrilitas, parcitati luxus repugnat. Haftenus de virtutibus & vitiis.

§. III.

De peccatis.

34. **A**ctus virtutis generatim proprio nomine non designatur, sed actus vitii *peccatum* dicitur: de quo quidem pauca hoc loco saltem ea, quæ a Philosophis ignorari non decet, subjienda sunt.

Est autem peccatum generatim *aversio ab incommutabili bono seu Deo, & inordinata conversio*

versio ad bonum commutabile seu creaturas: idque duplicis est generis, nempe originale, & actuale.

Peccatum originale est labes originalis ex primi parentis delicto in nos derivata, per quam omnes filii iræ nascimur. Non enim est distinctio, inquit Apostolus ad Romanos 3. omnes enim peccaverunt & egent gloria Dei. Et Cap. 5. v. 12. Propterea sicut per unum hominem peccatum in mundum intravit, & per peccatum mors: & ita in omnes homines mors pertransiit, in quo omnes peccaverunt.

Peccatum actuale ex S. Augustino est factum vel dictum vel concupitum (addi potest vel omissum) contra æternam legem, hujusmodi peccatum rursus duplex est, scilicet commissionis & omissionis.

35. Peccatum omissionis illud dicitur, quod præcepto affirmanti seu aliquid faciendum imperanti repugnat, ut si qui omittunt carnem suam crucifigere cum vitiis & concupiscentiis, violant hoc Christi præceptum Matth. 4. v. 17. *pœnitentiam agite.*

Peccatum commissionis præcepto neganti, seu aliquid facere prohibenti adversatur. Et est proprie factum, vel dictum, vel concupitum contra æternam legem. Etenim cogitatione verbo & opere peccata committimus: cogitatione quidem v. g. concupiscendo ea, quæ sunt alterius &c. verbo, ut mendacio, convictio &c. opere, ut homicidio, adulterio, &c.

Unde

Unde peccatum commissionis in peccatum cordis, oris, & operis quandoque distribuitur: idque ab homine vel in Deum committitur, ut idololatria, & blasphemia; vel in proximum, ut furtum & homicidium; vel denique in se ipsum, ut gula &c.

Omnia autem peccata non sunt æqualia ut videbatur Stoicis, sed alia aliis sunt graviora, sive objectum, sive finis aut circumstantiæ spectentur: idque prout magis vel minus a recta ratione aut æterna lege recedunt. Unde aliud dicitur peccatum *lethale*, aliud *veniale*: illud mortem animæ infert, hoc non item: sive quia natura sua leve est ac venia dignum, ut verbum otiosum; sive quia ipsius objectum admodum exiguum est, ut furtum nucis, aut pomi; sive denique, quia fit sine pleno libertatis usu, ut in motibus primo-primis. Imo ex lethalibus peccatis alia aliis graviora sunt: sic majora sunt peccata in Deum, quam in proximum.

136. Septem a Divo Gregorio lib. 31. Moral. cap. 31. assignantur capita, ad quæ peccata prorsus omnia referantur: Unde vocantur *peccata capitalia*, non quod semper lethalia sint; siquidem admitti possunt in materia levi, vel sine pleno voluntatis consensu: sed quod aliorum fontes esse credantur. (Quamquam ea ex aliis fortasse descendunt, nempe ex concupiscentia carnis seu amore voluptatum; & *superbia vitæ*) sunt autem

autem *superbia, avaritia, luxuria, invidia, gula, ira, acedia.*

Superbia dicitur inordinatus amor propriæ excellentiæ.

Avaritia immoderatus divitiarum appetitus.

Luxuria flagitiosa corporearum voluptatum prosecutio.

Invidia est tristitia de Proximi bono, quasi excellentiam nostram minuente concepta.

Gula intemperantia in cibo & potu.

Ira furor brevis est, animum ad vindictam accendens, & re ipsa impellens.

Acedia denique sive *incuria* est torpor animi, opera bona sed laboriosa inchoare, & inchoata perficere, fugientis.

37. Sex numerantur Peccata in spiritum sanctum, quorum tanta est malitia, ut non sit iis *neque in hoc seculo, neque in futuro*, nisi ægre admodum concedenda venia, ut auctor est Christus Dominus Matth. cap. 12. v. 32. sunt autem *presumptio de misericordia Dei*, vel de impunitate peccati; *desperatio de propria salute*; *agnitæ veritatis impugnatio*, *fraternæ charitatis invidentia*, seu dolor ex bonis illius operibus conceptus; *obstinatio animi in malo*, & *impænitentia finalis*, de quibus vide S. Thomam 2. 2. quæst. 14. arr. 2.

38. Quatuor item dicuntur peccata in cœlum clamantia, quæ nempe cœlestem vindictam exigere videntur; scilicet homicidium
volunt.

voluntarium, peccatum Sodomorum, in quod tam sancte invehitur D. Paulus ad Rom. cap. i. v. 16. 17. oppressio pauperum, viduarum, & pupillorum, ac demum merces operariorum defraudata.

39. Denique *opera carnis*, quæ nempe homines secundum carnem viventes, & a spiritualibus Dei filiis degenerantes admittunt, sic enumerantur ab Apostolo ad Galat. cap. 5. v. 19. *Manifesta sunt autem opera carnis, quæ sunt fornicatio, immunditia, impudicitia, luxuria, idolorum servitus, veneficia, inimicitia, contentiones, emulationes, iræ, rixæ, dissensiones, sectæ, invidia, homicidia, ebrietates, commensationes, & his similia.* Fornicationis nomen a fornice ductum est, in quo nempe stant prostibula, scorta : unde etiam scortatio vocatur; *Immunditia* seu molities dicitur, qua se molles contra naturam contaminant; *Impudicitia*, in gestibus, osculis & tactibus impudicis consistit. *Luxuria* est quævis lascivia, seu libido petulantior, *idolorum servitus* est, qua gentiles mutaverunt gloriam incorruptibilis Dei in similitudinem imaginis corruptibilis hominis, & volucrum, & quadrupedum, & serpentium, ut loquitur Apostolus ad Rom. cap. i. v. 23. *Veneficia* comprehendunt omne genus potionum aut toxicorum, quibus necantur homines. *Inimicitia* sunt, quibus occulta odia continentur. *Contentiones* sunt lites externæ, altercationes, & pugna verborum, *Emulationis*

tionis nomen aliquando in bonam, aliquando in malam partem sumitur. Si sumatur in bonam partem, dicitur zelus, & est nifus quidam vel ftudium feu defiderium in amore & cultu Dei proficiendi, vel bona aliorum exempla imitandi. Hocque fenfu ufurpatur ab Apoftolo Epift. 1. ad Corinth. cap. 11. v. 31. his verbis, *emulamini autem charismata meliora*: fi vero in malam partem sumatur, ut hic sumitur, fignificat invidiam feu livorem; hoc eft, pravam animi affectionem, qua quis dolet alium efle confeutum id, quod ipfe cupiebat obtinere. *Ira* sunt acres excandefcentiæ cum vindictæ defiderio conjunctæ. *Rixæ* sunt jurgia; *difffenfiones* sunt diffidia, ut cum dicunt aliqui *Ego quidem fum Pauli: ego autem Apollo; ego vero Cephe*; *feftæ* feu hærefes fiunt, cum quis mavult fuam opinionem in materia religionis retinere, quam Ecclefiam & Majorum traditionem fequi. *Invidia* quid fint, modo fuit expositum. *Homicidia* sunt hominum cædes. *Ebrietates* fignificant immoderationem in vino aut aliis potionibus, quæ vario modo conficiuntur; *Commeflationes*, immoderationem in cibis. Ii porro qui talia agunt, *regnum Dei non confequentur*, inquit hic Apoftolus. Nec ii folum, qui talia agunt, a regno Dei excludentur; fed etiam qui confentiunt facientibus.

40. Etenim præter peccata propria, quæ
per

per nos ipsos patramus, alienorum quoque peccatorum sumus nonnunquam participes: idque novem modis potest accidere; scilicet consilio, iussione, consensu, irritatione, laudatione, seu adulatione, reticentia, indulgentia, rei alienæ participatione, & prava facti alieni defensione, quæ omnia explicationem non desiderant.

41. Cæterum gravissima omnium peccata esse videntur, quæ præceptis Decalogi ex adverso sunt opposita, ut idololatria, quæ primo præcepto directe adversantur, blasphemia, quæ secundo, homicidium, quod quinto; luxuria, quæ sexto, furtum quod septimo; &c.

42. Unde primis Ecclesiæ temporibus, scilicet tertio Christi seculo, instituta est *publica pœnitentia* pro his peccatis, utpote quibus Divina Majestas lædi, & proximi amor maxime violari videbatur. Id discimus ex Epistola præsertim tertia Canonica S. Basilii Cæsareæ cappadociæ Archiepiscopi ad Amphilo-
 lochium Iconii Episcopum. Cum autem essent quatuor *pœnitentium* ordines; scilicet, *descentes*, qui stabant foris extra Ecclesiam, ubi cum gemitu sese fidelium precibus commendabant; *audientes*, qui intra oratorii vestibulum, ad audiendum sacrum sermonem admittebantur; *prostrati*, qui una cum fidelibus orabant, non tamen erecti, ut fideles, sed in terram dejecti; ac tandem *Consistentes*, qui cum fidelibus sacrificio intererant, sed
 illius

illius non erant participes. Certum constituerat Ecclesia numerum annorum, quos in diversis illis ordinibus traducebant poenitentes: puta duo anni erant constituti pro furto, septem pro fornicatione, undecim pro perjurio, quindecim pro adulterio, viginti pro homicidio. Igitur qui voluntarium homicidium patrabat; quatuor annos inter *defectus*; deinde quinque inter *auditores*; tum septem inter *prostratos*, & tandem 4. inter *consistentes* agebat. Expleto demum poenitentiae tempore ab Episcopo solenniter absoluebatur feria quinta majoris hebdomadae, quae dicitur dies coenae Domini. Idem in aliis servata proportionem est intelligendum.

43. Sed cum abnegatio Religionis Christianae, & ad idola defectio divinitatem ipsam impetat, ad eluendum crimen integram vitam in lacrymis & duris poenitentiae laboribus transigendam judicavit Ecclesia. Non enim satis est non amplius peccare: nam ut ait S. Augustinus lib. 1. de nuptiis & concupiscentia, cap. 26. *si a peccando desistere hoc esset non habere peccata, sufficeret ut hoc nos moneret scriptura, (Eccl. cap. 21. v. 21.) filii peccasti non adjicias iterum, non autem sufficit, sed addidit; & de pristinis deprecare ut tibi remittantur. Manent ergo, nisi remittantur, sed quomodo manent si praeterita sunt, nisi quia praeterierunt actu, manent reatu!*

44. Interdum tamen propter poenitentium
P. Andr. Gordon Phil. P. I. I i fervo-

fervorem; justis de causis relaxabantur pœnæ, & dabatur indulgentia unius, duorum vel plurium annorum, ut intelligitur ex Epistolis præsertim 14. 15. & 51. S. Cypriani. Verum hæc indulgentia non concedebatur nisi causa cognita, & iis qui dignos pœnitentiæ fructus fecerant: idque exemplo S. Pauli, qui incesto Corinthio, post certissima contriti & ad Deum conversi animi argumenta condonavit. Epist. 2. ad Corinth. cap. 2.

Quamobrem hallucinantur, qui putant, indulgentias Ecclesiæ Peccatoribus in malo perseverantibus, nec salutis suæ curam habentibus concedi.

CAPUT V.

De variis vitæ officiis.

EX principiis hætenus constitutis generales deduci possunt regulæ, quibus actus humanos in quolibet vitæ genere sic instituere liceat, ut in finem omnibus hominibus propositum recte collineent. Singulas igitur hominum conditiones kustrare nihil attinet, cum his omnibus communia sint eadem morum præcepta: sed tamen præcipua hominum officia saltem generatim attingere libet, quoniam ea Philosophis penitus ignota esse nefas est. Ipsa autem vel sunt hominis

erga Deum & erga se ipsum; vel hominis erga alios homines, sive comparate ad familiam, sive comparate ad civitatem, seu ad Rempublicam: quamobrem primo dicendum de hominis tum erga Deum, tum erga se ipsum officiis. Secundo, de officiis hominis erga familiam. Tertio, de hominis officiis erga Civitatem seu Rempublicam.

§. I.

De hominis tum erga Deum tum erga seipsum officiis.

N. I.

CUM homo ad imaginem Dei sit conditus, se ipsum recte cognoscere nequit, quin expressam quandam in se Creatoris imaginem percipiat. Unde aliquo tum in Deum, tum in se ipsum officio teneri se statim intelligit: quod utrumque quale sit, breviter est aperiendum.

De officiis hominis erga Deum.

NON alia ratione videtur ad imaginem Dei formatus homo, non alio fine procreatus, nisi ut Deum cognoscat & amet; suoque in eum obsequio & cultu ad illius fruitionem, qua sola beatus esse potest, perveniat. Hinc illi Deus animum immortalis intelligentiæ, religionis, ac felicitatis

æternæ capacem inspiravit, qui, etiam si universa hæc mundi aspectabilis compages dissolvatur & corruat, naturæ tamen suæ conditione integer & incorruptus est permanens.

3: Quantas igitur æterno Creatori gratias agere debeat, ex sui ipsius consideratione intelligit: cum divino duntaxat beneficio tam excellentem, tam nobilem naturam fuerit sortitus.

Primum igitur persuasum esse debet, Deum esse rerum omnium principem & finem, illius vim & potentiam per omnes universi partes manare, illius sapientiam in rerum gubernatione attingere a fine usque ad finem fortiter, & disponere omnia suaviter, ut quæcunque fiunt, quam ordinatissimo modo, & propter ipsum fiant: in eo nos vivere, ac stare; adeo ut nunquam satis a nobis coli & diligi possit, & semper minus colatur ac diligatur quam par sit. Quocirca in creaturarum amore torpere; in iis aliter quam transeundo hærrere, hominibus, præsertimque Christianis prorsus indignum esse rati, ad ipsum per Christum Mediatorem omnia opera nostra, omnia cogitata, tanquam ad eum, cui omnia debemus, & a quo cuncta accipimus, referemus.

Secundo, quoniam *figura hujus mundi præterit*, ac *unum nobis necessarium est*, nempe Dei legem adimplere; eam legem omni studio exqui-

exquirere nos oportet, eam meditari, & a Divinis illius Præceptis, quantum infirmitas nostra patitur, ne latum quidem unguem recedere.

Tertio. Nec interior tantum, verum etiam exterior cultus, qui aliis exemplo præluceat, votis scilicet & orationibus in communi fidelium cœtu supremo Numini per Christum verum Deum & hominem est exhibendus. At omnino danda opera, ut corde puro hæc laudum & orationum sacrificia offerantur. Nam quemadmodum *oblatio justi inpinguat altare*, ut loquitur scriptura Ecclesiastici 35. v. 8. & odor suavitatis est in conspectu altissimi: Sic *homo jejunit in peccatis suis* ex eod. lib. cap. 34. v. 31. frustra igitur a Deo profanus & impius obtinere tentat, quod vir justus, sanctus, & impollutus certo consequitur; quippe cultus nostri mensura Deus est, atque ut ipse omnis sanctitatis & innocentiae fons est perpetuus, sic ut ipsi placeamus ad illius sanctitatem mores nostros & vitam instituere debemus.

Quarto. Quod spectat ad orationem, quidpiam a Deo postulamus, videndum serio, quid; & a quo petamus. Non enim Deus ob res nihili, multo minus ob res illicitas, aut injustas compellendus est; sed sola Divina, aut ad Divinam fruitionem nos promoventia sunt flagitanda.

Id igitur potissimum a Deo petere nos æ-

quum est, quod & nobismet ipsis & aliis prodesse possit, animum videlicet ad Divina mandata exequenda paratum, & voluntatem ad benefaciendum iis, quibuscum vivimus, propensissimam.

Quinto. Sed Dei beneficia ab unoquoque non sine grato animo propriæ vilitatis sibi conscio, summæque Dei in se milericordiæ memori sunt excipienda. Hinc non tantum corde & intimo affectu, sed ore pariter & lingua ipsius laudes semper sunt celebrandæ: illudque Prophetæ Regis perpetuo tenendum Psalm. 70. v. 8. *Repleatur os meum laude, ut cantem gloriam tuam, tota die magnitudinem tuam.* Idque sic animis nostris infixum esse debet, ut singulis fere momentis summam Dei in nos beneficentiam recolere, summum illius dominium agnoscere, ac venerari meminerimus. Tot enim nominibus & nos & quæcunque possidemus, ipsi debemus, ut nihil quod penes nos est, ab eo generali debito excipiat. *Quid enim habes, inquit Apost. 1. ad Corinth. 4. v. 7. Quod non accepisti? si autem accepisti, quid gloriaris, quasi non acceperis?*

Sexto. Ea autem est perfectissima gratias Deo agendi ratio, si nos Divinæ ipsius ordinationi ita subiciamus, ut in adversis æquum semper animum, parem quoque tranquillitatem servemus. Non enim minus diligit Deus, quos adversis tentat, quam quos bonis cumu-

cumulat : imo utilissimum plerumque est ,
incommodis & ærumnis conflictari, ut mens,
quæ rebus secundis suæ infirmitatis oblita
torperet, fortius erigatur, & ad eum, a quo
auxilium omne expectare debet, confugiat,
ipsiusque opem imploret. Quare sapiens
Proverb. 3. v. 11. *Disciplinam Domini, inquit,*
fili mi, ne abjicias, nec deficias, cum ab eo corri-
peris : quem enim diligit Dominus, corripit ; &
quasi Pater in filio complacet sibi.

4. Sed ut breviter rem omnem conficia-
mus, hæc est officiorum nostrorum in Deum
summa, ut nihil nos ab illius dilectione &
mandatorum executione dimoveat, ut in
quocunque vitæ statu, ad eum, tanquam com-
munem omnium Parentem vota nostra di-
rigamus, spemque omnem in ipso colloce-
mus. Ita enim nos gerere debemus, ut hæc
Apostoli verba ad Rom. 8. v. 35. usurpare
nobis liceat : *Quis ergo nos separabit a chari-*
tate Christi ? tribulatio, an angustia, an fames,
an nuditas, an periculum, an persecutio, an gla-
dus ? ut postea cum ipso concludamus in
hunc modum neque mors, neque vita, neque
angeli, neque principatus, neque virtutes, neque
instantia, neque futura, neque fortitudo, neque
altitudo, neque profundam, neque creatura alia
poterit nos separare a Charitate Dei, quæ est in
Christo Jesu Domino nostro.

De officiis hominis erga seipsum.

✠ **A**B amore Dei ad dilectionem proximi transeundem : nemo autem cuiquam propior est, aut magis conjunctus, quam ipse sibi; hinc vulgo dicitur *bene ordinata charitas, qua quis a seipso incipit*. Quod tamen non sic intelligendum venit, ac si quis propriam utilitatem temporalem alienis commodis deberet præferre; hic enim est τῆς φιλαυτίας non vero charitatis effectus. Sed sententia significat, in iis, quæ ad æternam salutem spectant, exigi a nobis, ut bene agere studeamus, priusquam hoc ipsum ab aliis requiramus, sive ut exemplo Christi Domini prius incipiamus facere, quam docere. Quocirca præcipuum hominis officium erga seipsum est, ut sui ipsius, hoc est, æternæ suæ salutis curam habeat.

6. Ut autem se diligit homo dilectione illa vere utili & iusta, abjicere debet *omnem immunditiam & abundantiam malitiæ, & immaculatum se custodire ab hoc seculo*, ut admonet Ap. Jacobus ep. Cath. cap. i. v. 21. & 27. Unde necesse est, ut omnes corporis atque animi facultates & affectus summo studio moderetur : nam cum nemo nascatur sine vitiis, quibus non tantum retardatur ab operibus bonis, sed etiam in mala propellitur, ad ea coercenda & subigenda omni studio debet incumbere.

Ac

Ac primo quod ad corpus attinet, id necessariis, non superfluis alimentis pascendum est, ne vel id labore deficiat, vel in rectorem suum, nempe animum insolentius efferatur. Non quid gula suggerat, sed quid natura requirat attendendum.

Secundo. Nec otio frangendum corpus, nec molliter curandum: sed labore & exercitatione ipsius vires fovendæ & corroborandæ sunt. Nullam enim foedior pestis mollitiæ atque desidii, quæ non tantum corpus inficit, sed ipsam quoque mentem velut contagio polluit, & in omne vitiorum genus præcipitat, juxta illud:

Otia si tollas, periere cupidinis arcus.

Contemptæque jacent, & sine luce faces.

Id igitur tuto pronuntiare licet, hominem nihil agendo id addiscere, ut male agat; & desidiosum, ac inertem in vetita quæque, maxime vero in obscæna quadam veluti necessitate prolabi: qua quidem sic emollitur, ut animum virilem postea resumere vix possit. Hinc & rebus gerendis, & disciplinis addiscendis, & bello, & negotiationi ineptus factus vitam infamem cum impurissimorum hominum colluvie sub tecto transigere cogitur, donec eam cum obscura & ignominiosa morte commutet.

Tertio sensibus omnibus, ut cum scriptura loquar, *ponenda est custodia*; nam quæ per

aures & oculos species subeunt, ex alta sapius in imaginationis sede vestigia relinquunt, quibus animi affectus mirum in modum excitantur: quos postea pro lubitu compescere naturæ viribus non est concessum; unde affectus animi non male militum turmis in obsessam civitatem, qua patet aditus, irruentibus æquiparantur: nam ex nisi in vallo & aggere sustineantur, ac repellantur, vix deinceps ab arce, si eam occupaverint, expelli poterunt. Quamobrem juvenibus præcipue hæc ineumbit cura, ut se ab omnibus pravis congressibus servant immunes; cum enim in ipsis vigeant affectus, ac sanguis fortius ebulliat, repente ex visis & auditis inflammanantur, & ad medullas usque morbus penetrat. Unde Juvenalis Satyra 14.

*Nil dictu factum, visuque hæc limina tangat
Intra que puer est.*

Quarto. Omnem proinde operam & studium impendere quilibet tenetur, ut vitiis omnibus viam occludat. Sed mentem præterea virtutibus ac disciplinis ornatam esse oportet, ut iis adjuta & se, & corpus, quod ipsius imperio subjicitur facilius regere ac moderari possit. Spectanda tamen est cujusvis hominis conditio; neque eadem diversos decent. Aliud est studium hominis negotiatoris, aliud caufidici vel Judicis; aliud agricolæ & fabri; iis tamen omnibus
aurea

aurea illa mediocritas, quæ tantopere in virtute commendatur, est tenenda. Feliciores sunt ii, quos Providentia divina ad liberarium disciplinarum studium destinavit: iis quippe longe facilius est, non quæ sui tantum, verum etiam quæ aliorum sunt officii, perspicere, penitusque explorare. Sed vicissim si quod mente complexi sunt, factis exequi neglexerint, gravius iudicium sustinebunt. Nam ut testatur salvator Luc. cap. 12. v. 47. *Ille servas, qui cognovit voluntatem Domini sui, & non preparavit, & non fecit secundum voluntatem ejus, vapulabit multis: qui autem non cognovit, & fecit digna plagis, vapulabit paucis. Omni autem, cui multum datum est, multum quæretur ab eo, & cui commendaverunt multum, plus petent ab eo.*

Quinto. Singula cujuscunque hominis officia erga se ipsum figillatim describi non possunt, cum ratione diversarum personarum illa omnino constet esse diversa. Id generatim præcipi potest, servandam esse ubique mediocritatem, sive in iudicio, quod de seipso fert quilibet; sive in motibus & gestibus externis; sive in mensa & ferculis.

Itaque neque splendidius, neque sordidius vivendum: sed cujusque natales, fortunam, & facultates spectare necesse est, ut in ædibus, in suppellectili, & externo corporis cultu modus constituatur.

Auream

Auream quisquis mediocritatem.

Diligit, tutus caret obsoleti.

Sordibus tecti, caret invidenda

Sobrius aula.

Neque vero alij invidendum, quod lautio-
riorem, elegantio-remque victum magnifice
colat: sua sunt enim cuique vitæ generi ad-
iuncta commoda, & incommoda. Unde
sapienter monet Apostolus 1. ad Corinthios
cap. 7. v. 20. ut unusquisque in qua vocatione
vocatus est, in ea permaneat, alterius sortem
non appetat.

7. Igitur prudentissime se gerunt, quicun-
que suo studio vocationem suam perqui-
runt; quique eam sectantur, in eaque per-
manent. Sed illud vitæ genus deligere,
quod nobis congruat, operis certe divini esse
videtur, non humani. Difficultatem auget,
quod infirma adhuc ætate delectus ille con-
ditionis habendus sit.

Quamobrem in eo negotio, si unquam
alias cœleste auxilium implorandum, ut
quid nobis conveniat, quid Deo placeat, ex-
ploratum habere possimus. Deinde advo-
candi in auxilium amici, non quilibet, sed
quibus inest aktior sensus, & longo rerum
usu confirmata prudentia.

Verum ea lätius patet materies, quam ut
intra unius capitis angustias tota contineat-
ur. In summa meminisse oportet, nullo
quemquam in seipsum majori officio teneri,
quam

quam ut sibi convenientissimam vitæ transigendæ rationem procuret, in eaque ita se gerat, ut omnes ipsius motus, actus & cogitationes in eum, a quo & cujus gratia creatus est, tanquam in bonorum ultimum & summum ferantur ac desinant.

§. II.

De hominis officiis erga familiam.

MOralia tantum hominis officia erga familiam explicamus; Quæ quidem officia vel sunt conjugum inter se, vel parentum & liberorum, vel Dominorum & servorum, quæ omnia distinctis paragraphis considerabimus.

De officiis conjugum.

Prima maximeque naturalis societas est ea, quæ *conjugium* vocatur, cujus præcipuus finis & scopus est humani generis propagatio, & liberorum educatio. Qui finis ut melius & facilius obtineatur, vir unus unam tantum debet habere uxorem, & uxor una virum unum: primo quia ab initio masculum & foeminam, Adamum & Evam creavit Deus, & conjunxit: Secundo, quia summa debet esse conjugum concordia, mutusque amor: qui amor facile distraheretur, & dissolveretur, si aut vir unus plures habe-

haberet uxores, aut uxor una plures viros. Hinc enim jurgia & querelæ frequenter exurgerent.

Ad incrementum tamen generis humani permisit olim Deus in veteri Testamento, ut vir unus plures simul haberet uxores, sed nunquam, ut una uxor plures simul haberet maritos.

Conjugalem igitur societatem inter virum unum, & uxorem unam vigere oportet; quæ ut arctior sit & firmior, non tantum amore mutuo conjungi, sed mutuo honore firmari debet, ita tamen ut uxor marito sit subdita; nam ab eo decus omne accipit. *Mulieres honore maritorum erigimus*, inquit Imperatores Valentinianus, Theodosius, & Arcadius lege ultima Cod. de incolis, & genere nobilitamus. . . . *sin autem minoris ordinis virum postea sortitæ fuerint, priori dignitate privata posterioris mariti sequentur conditionem.*

Non tamen viro despoticum sed politicum duntaxat in uxorem competit imperium: ex quo fit ut eam tanquam sociam non vero tanquam ancillam habere debeat. Neque enim uxor ex capite aut pedibus virieducta est, sed ex latere, ut neque primatum sibi vindicet, nec ancillæ loco habeatur. Unde postquam Apostolus ad Ephesios 5. v. 22. hæc mulieribus præceptum tulit: *Mulieres viris suis subditæ sint sicut Domino, quoniam vir*
caput

caput est mulieris. Statim ad viros sermonem convertit: Viri diligite uxores vestras, qui suam uxorem diligit se ipsum diligit.

Cum igitur uxor sit viri Consors, non famula, maritus uxorem male habere, aut cum ea durius agere non debet: quamvis ipsi jus quoddam sit animadversionis in uxorem, cum sit mulieris caput, ut modo ex Apostolo fuit observatum. Quare S. Augustinus Sermone 152. de verbis Apostoli sic scribit: *Si in una domo litem inter se habeant, vir & uxor, ad hoc debet laborare vir ut domet uxorem: Domata uxor subjugetur viro: subjugata uxore viro fiat pax in domo.*

Quo vero facilius uxorem vir instituere & ad suum modum componere, ac fingere possit, auctor est Aristoteles, ut quis virginem ducat, utpote magis docilem, juxta Hesiodi carmen:

Ut mores doceas pulchros, tibi virgo sit uxor.

Ut autem ætate provectior eligi non debet, sic nec junior: sed ejus ætatis, quæ rebus gerendis sit idonea, rei familiaris curam cum laude habeat. Illud præcipuum est, ut bonis moribus sit ornata, nec tam forma, quæ cito transiit, aut divitiæ quærendæ, quam virtus, & ingenium. Unde id Plauti: *Dummodo morata recte veniat, dotata est satis.*

Similiter viri probitas, industria & doctrina magis spectari debent, quam fortuna.

Quam-

Quamquam, fortunæ bona, saltem quæ iustinendis matrimonii oneribus sufficiant, non sunt omnino negligenda. Sed cum vel sola avaritia, vel solus stultus amor matrimonia conciliat, ea dissensionibus, jurgiis & rixis plena esse quis miretur.

Cæterum *domus & divitiæ dantur a parentibus, a Domino autem proprie uxor prudens.* Ut habetur Proverb. 19. v. 14. Quamobrem hoc negotium, si quod aliud, Divinæ bonitati est commendandum, tanquam *periculose plenum opus alicui.*

Quamdiu autem vivit uxor, non potest vir eam dimittere, aut aliam ducere, ut patet ex Matth. cap. 5. v. 22. vicissim propter indissolubile matrimonii vinculum, quamdiu vivit vir, ab eo discedere non potest uxor, ut ait Apostolus 1. ad Corinthios cap. 7. v. 39. *Mulier, inquit, alligata est legi, quanto tempore vir ejus vivit: quod si dormierit vir ejus, liberata est, cui vult nubat, tantum in Domino.* Olim tamen apud Romanos luctui agendo præfiniti erant mulieri decem menses, intra quos, si pareret qui, *quæve ex ea nasceretur* in defuncti viri familia esset. Postea vero propter auctoritatem summi viri Hippocratis, qui tardius aliquando partum contigisse ait, institutum est, ut mulieres viro-
rum mortem per annum lugerent, quem ideo *annus luctus* nominarunt, quo tempore alteri nubere prohibebantur. Quod si quæ
hanc

hanc legem neglexissent, infames dicebantur
lege 1. Cod. *de secundis nuptiis*.

Jure tamen Canonico intra annum luctus
ad secundas nuptias convolare sinuntur :
quod tamen aliquando, litibus materiam
præbuit. Hinc fit, ut honestiores fœminæ
integrum saltem luctus annum prioris mari-
ti memoriæ tribuant, priusquam ad alia vo-
ta se conferant : imo quandoque in vidui-
tate remanent, liberorum, si quos forte pe-
pererint, ac patri superstites fuerint, educa-
tioni vacant : quæ secunda est societas, de
cujus officiis nunc dicendum.

De officiis parentum & liberorum.

9. **S**ecunda hominum societas est parentum
& liberorum, quæ ut stare possit, mu-
tua sunt eorum inter se officia. Non enim
fatis est liberos a parentibus fuisse procrea-
tos : sed ab iis etiam accipere debent, quæ
vitam consequuntur, scilicet victum & edu-
cationem ; ut vicissim liberi honorem dent
parentibus, amorem, auxilium.

Primo igitur ut parentum in liberos offi-
cia perstringamus, & a nutritione ordia-
mur. Matres admonet Plutarchus lib. *de libe-
ris educandis*, ut infantes proprio lacte nutri-
ant, non alienis uberibus alendos amendant ;
hac enim prava consuetudine officium ma-
tris, quo nihil in natura dulcius, *dimidiatum*,

ne dicam, exprobratum videtur. Deinde corpus infantis benigne ingenitis primordiis inchoatum, degeneri lactis alieni alimento corrumpitur, ut ait Phavorinus, non secus ac videas arbo-rem lætam & nitentem in locum alium transpositam deterioris terræ succo deperisse. Nec sane tantam lactis copiam eo tempore matribus natura subministrat, nisi ut ipsæ infantes nutrant.

Secundo parentes præcipue debent liberis bonam educationem, seu institutionem, sine qua belluinam potius, quam humanam vitam essent acturi.

Ante omnia vero supremi Numinis notitiam cultum & amorem verbo & exemplo debent eis inspirare. Unde advertit Plutarchus loco allegato, Platonem recte nutricibus præcipere, ut a recitandis ridiculis fabulis abstineant, ne puerorum qui illas audiunt, *animi a principio stoliditate & pravitate occupentur*; nihil enim sinceræ Dei notioni ac religioni magis officit, quam hujusmodi aniles fabulæ a nutricibus frequenter decantatæ, quibus multa sæpe Divinæ Majestati repugnantia vel moribus noxia, vel rationi contraria memorantur.

Satiùs profecto est, nec difficilius exempla pietatis aut fortitudinis aut aliarum virtutum pueris proponere, sive ex sacris, sive ex profanis auctoribus repetantur, sed in primis cavere debent parentes, ne facta verbis dissen-
tiant,

tiant, pravisque suis moribus liberos in imitationem sui pertrahant.

Ei autem disciplinæ tradendi sunt liberi, quæ cujusque indoli ac forti convenientissima videtur: eaque nec severior esse debet, nec laxior. Quare ludis nonnunquam indulgere possunt, sed honestis, idque moderate: a comediis autem & tragædiis, quibus mores ipsorum corrumpi, aut affectus in malam partem torqueri possent, omnino sunt avocandi.

Verum si parentes aliquibus erga liberos officiis teneantur, multo magis liberos oportet esse gratos in parentes, quibus par referre nunquam possunt. Etenim quidquid habent liberi, ne excepta quidem bene agendi & parentibus opitulandi facultate illud omne a parentibus aut certe parentum opera a Deo acceperunt. Quare amorem iis, & obsequium, & honorem, & reverentiam, & tutamentum præstare debent, non tantum lege naturali & divina, *Exod. cap. 20. v. 12. Honora patrem tuum & matrem tuam, ut sis longævus super terram, quam Dominus Deus tuus dabit tibi*: sed etiam Christi Domini exemplo, qui ut habetur *Luc. 2. v. 51. Descendit cum eis, & venit Nazareth; & erat subditus illis.*

De officiis dominorum & servorum.

10. **Q**Uoniam in familia multa sunt officia, quæ parentibus aut liberis non satis

conveniunt; ideo requiruntur servi aut famuli, qui ea possint adimplere: adeoque necessaria est dominorum & servorum societas, ut res familiaris rite administretur.

Hæc autem societas duobus continetur, scilicet *imperio Domini*, qui disponit ac præcipit ea quæ agenda sunt, & *obsequio servi* aut *famuli*, qui ea quæ sunt ab hero imperata, exequitur. Neque ulla fere societas hominum sine duobus hisce muneribus constare posse videtur; cum in omni societate requiratur ordo, qui est *parium* & *disparium*; & consequenter alios imperare oporteat, alios obedire.

11. Duplex autem distinguitur servitutis species. Primo quidem sumitur servitus pro ea hominis conditione, qua etiam invitus & coactus ad nutum servit alteri, in cuius dominio est positus. cap. IV. præced. § IV. N. 61. Altera servitutis species de qua potissimum hic agimus, *famulatus* dicitur, qua quis ita servit alteri ut tamen non sit in illius dominio: quales sunt apud nos famuli seu domestici, qui operam suam aliis locant, sui tamen juris semper remanent. Atque hæc servitutis species omnino naturalis est; nam societas perfecta, ad quam natura homines finxit, consistere nequit sine ordine, qui parium est & disparium, superiorum & inferiorum.

12. Multa vero sunt, quæ hujusmodi famulis præstare tenentur domini: & imprimis observandum illud Apostoli præceptum ad Goloss.

Coloss. 4. v. 1. *Domini, quod justum est & æquum, servis præstate. Æquum autem est, ut ipsis victus præstetur, & merces pacta reddatur. Deinde in operis, quæ ab his exiguntur, non secus ac in pœnis, quibus castigantur; modus est adhibendus. Igitur non est in eos nimis sæviendum, nec promissa merces iis deneganda; quod peccatum in cælum clamare dicitur, Deutr. 24. v. 5. Denique ipsorum etiam moribus ac salutis invigilandum juxta præceptum ejusdem Apost. 1. ad Timoth. 5. v. 8. Si quis autem suorum & maxime domesticorum curam non habet, fidem negavit & est infideli deterior.*

Sed tam Dominorum in servos, quam servorum in Dominos officia breviter comprehenduntur ad Ephes. 7. v. 5. & seqq. *Servi, obedite Dominis carnalibus cum timore & tremore, in simplicitate cordis vestri, sicut Christo: non ad oculum servientes, quasi hominibus placentes: sed ut servi Christi, facientes voluntatem Dei ex animo, cum bona voluntate servientes sicut Domino, & non hominibus: scientes, quoniam unusquisque quodcunque fecerit bonum, hoc recipiet a Domino sive servus, sive liber. Et vos Domini eadem facite illis, remittentes minas: scientes quia & illorum, & vester dominus est in cælis; & personarum acceptio non est apud eum. Atque hæ sunt præcipuæ hominum societates, præcipuaque earum officia.*

§. III.

De variis hominum officiis erga Rempublicam.

13. **T**Res fere distingui possunt Reipublicæ regendæ rationes, ad quas regimen omne revocatur.

Primo enim si summa potestas in unum tantum collata sit, tunc regimen *Monarchicum* est, & qui præest, dicitur *Monarcha*; hic quidem, si suo in subditos imperio mederate utatur, Imperator nominatur, vel Rex, vel Dux; vel alio quovis nomine, quod Principi conveniat. Si vero in subditos inhumanius grassetur, Tyrannus nuncupatur.

Secundo, si a paucis Respublica administretur, *Aristocratia* dicitur, id est optimatum & honoratiorum imperium.

Tertio, si a Consilio quodam, in quo quilibet e populo jus habet suffragii, Respublica gubernetur, *Democratia* seu plebeja auctoritas nominatur.

Iis adjungi potest mixta quædam ex Monarchia, Aristocratia, & Democratia Reipublicæ administratio, ubi Rex quidem præest, sed qui solus sine Senatus auctoritate, populi que consensu nihil magni momenti agere potest.

Quæcunque sit forma imperii, in qua quis vel natus, vel casu, aut consilio est constitutus; multiplices semper tùm erga Rempublicam,

cam, tum erga singulos cives officio tenetur: quod Ethicæ est præscribere. Cum tamen argumentum illud latissime pateat, hic tantum paucis tractabitur, ut adolescentibus innotescat, quo pacto præcepta moralia ad omnes vitæ conditiones pertineant: quod distinctis titulis est præstandum, incipiendo a Sacerdotibus, quibus incumbit religionis cura; siquidem in omni Republica bene ordinata prima semper & præcipua est cura Religionis.

De officio Sacerdotis & Ecclesiasticorum.

14. **T**antam supremæ Majestatis, suæ reverentiam omnibus hominibus naturaliter impressit Deus, ut omnes naturali quadam propensione ad ejus cultum vel institutendum vel promovendum incitentur. Sed hominum mentes post primi parentis peccatum variis erroribus involutæ, variis quoque sese superstitionibus misere implicuere. Unum tamen semper servavit sibi Deus populum, nempe Judaicum, cui peculiari misericordia pluribus sese manifestavit argumentis, cui suam legem, suas caeremonias, sui colendi ritum per servum suum Moysen tradidit; in quo denique verum Messiam generis humani Redemptorem a se promissum, a Prophetis prænuntiatum, a Patriarchis desideratum, Christum Jesum verum Deum & hominem nasci, secundum carnem voluit. Itaque Deus coeli & terræ apud Hebræos & ante legem, &

sub lege veros semper habuit adoratores. Sed postquam filium suum unigenitum misit in orbem terrarum, qui abrogatis legis Judaicæ figuris novam & excellentiorem attulit legem, Deumque in spiritu & veritate docuit adorare; tum æterni luminis splendor Evangelii prædicatione plenius & uberius nobis effulsit, Deique notitia ejusque colendi ratio clarius & distinctius fuit tradita.

Quocirca verus Dei cultus a Christo Domino, Religionis Christianæ fundatore, & Ecclesiæ capite fuit institutus; veraque deinceps Religio in Ecclesia Catholica coli cœpta sub uno summo Sacerdote atque Pontifice Christi Vicario, communi orbis Christiani parente, & Reipublicæ Christianæ generali provisoro, sine quo nihil jure in Ecclesia universali constituitur, ut constat ex tota distinctione 17. primæ partis decreti Gratiani.

Hæc porro Ecclesiæ Catholicæ Apostolicæ & Romanæ unitas Hæreseos pravitate identidem fuit fauciata. Et tamen Principis etiam sæcularis, aut eorum, qui Reipublicæ præsunt imprimis est Religionis unitatem tueri; res enim nulla magis diffociat atque disjungit civium animos a mutua societate, pace, & amicitia quibus inter cives conciliandis summopere semper studendum est, quam Religionis diversitas; ubi præsertim nullum in Ecclesia visibile caput, seu ut vocant, *Unitatis Centrum*, nulla auctoritas in fidei rebus definiendis agnoscitur.

Ut

Ut igitur hæc unitas Religionis inter Christianos servetur illæsa, necesse est, sub generali Christi Vicario, Pontifice Romano, unicum in singulis civitatibus vel provinciis præesse cæteris Sacerdotem, sive Episcopum, qui pro variis officiis ad rem divinam peragendam necessariis, varios sibi subiectos ministros habere debeat, quibus ipse singulis munera dividat, ut res divina convenienti cultu & honore fiat, totaque multitudo in ea, quæ rebus sacris debetur, reverentia contineatur.

Igitur non sibi ipsi, sed populis constituitur Sacerdos, ut sit veluti quidam mediator, aut internuncius Deum inter & homines, ut optime S. Augustinus Serm. 45. de pastoribus: *In eo quod Christiani sumus, inquit, attenditur utilitas nostra: in eo quod præpositi, non nisi vestra.* Et Apostolus ad Hebræos cap. 15. v. 1. *Omnis namque pontifex ex hominibus assumptus, pro hominibus constituitur in his, quæ sunt ad Deum: nec quisquam sumit sibi honorem, sed qui vocatur a Deo tanquam Aaron.*

Difficile quidem est, Sacerdotis officia paucis verbis definire, quæ integris libris eleganter a S. Joanne Chrysostomo describuntur; nihilominus ex Act. Apost. cap. 6. v. 4. & aliis locis constat, duo esse præcipua Sacerdotis Christiani munera, scilicet *orationi vacare, & ministerio verbi*, id est, Deum orare, seu Deum per preces & sacrificia reddere propitium, & populo sanctum Evangelium annunciare.

Ut vero duplici illo, quo erga populum tenetur, officio defungatur, duabus quoque eximiiis dotibus instructum eum esse oportet; virtute nimirum, & scientia: ut tam verbo, quam exemplo cæteris possit præesse.

De officio Principis & Optimatum.

15. Inter varias regiminum formas primum Monarchia debere locum communis est opinio, siue pax & concordia populorum, siue gubernandi ratio spectetur. Quippe ubi unicus est rerum moderator velut pater optimus in familia; ibi nullus fere dissidii aut factionibus locus est: omnes in officio continentur ab uno; cui cum eadem sit voluntas, non multiplex, ut accidit, cum plures eidem administrationi præficiuntur, æquali rectoque semper tenore aguntur omnia; quemadmodum universus orbis ab omnipotente Deo constanti semper modo movetur ac regitur.

Præcipere autem qualis esse debeat Princeps pulchrum quidem, sed onerosum, ac prope superbum est, inquit Plinius Junior. Epist. lib. 3. nihil igitur hoc loco ex proprio proferetur ingenio; sed solum ex Auctoribus sacris & profanis, qui bonorum Principum vitam, mores, & præclare facta scriptis consignarunt. In sacris enim tum veteris tum novi Testamenti scripturis Principum officia a Deo ipso dictata clarissime continentur.

Primo igitur bonus Princeps necessariam sibi

sibi ad regendum populum sapientiam a Deo postulabit; quemadmodum fecisse Salomonem Regem sapientissimum æque ac felicissimum constat ex lib. 3. Regum.

Secundo, præcipua boni Principis, præsertim inter Christianos, cura esse debet, ut tum sibi, tum populis suis divina lex, qua continentur singulorum officia sive erga Deum, sive erga proximum innotescat, & acuratissime fervetur.

Cum autem Princeps per se ipsum populum erudire non possit, nec solus cultum divinum procurare; utitur ministerio sacerdotum, quos idcirco quantum in se est, probos eligit, & in sacra doctrina apprime institutos.

Tertio, ad Principem quoque pertinet iustas ponere leges, quibus fervetur pax inter subditos, & jus suum cuique tribuatur. Quoniam vero solus Princeps superesse judicandi muneri non potest, idcirco iudices constituit, viros probos, & legum peritos exemplo Moysis Exod. 18. v. 13. & sequentibus.

At cum suprema sit Principis potestas, nec cuiquam nisi soli Deo subijciatur, minime potest ad obtemperandum legibus per vim adigi; hoc enim est jus Regis, ut non ab hominibus sed a solo Deo corripri possit. Quocirca David Psal. 50. v. 6. sic Deum alloquitur: *Tibi soli peccavi.* Attamen ut Imperatoribus Theodosio & Valentiniano visum est *digna vox est maiestate regnantis; legibus alligatum seu principem*

pem profiteri. Lege 4. Cod. de legibus & constitut. princip. Sola igitur recta ratio & æquitas naturalis, vel Dei timor, non vis humana principem movet, ut intra iustitiæ fines se contineat, nemini damnum inferat, neque in persona, neque in bonis, nam alioqui Deum vindicem experietur, qui Ezechielis cap. 46. v. 18. hanc legem dicit. *Non accipiet princeps de hereditate populi per violentiam, & de possessione eorum, sed de possessione sua hereditatem dabit filiis suis, ut non dispergatur populus meus unusquisque a possessione sua.* Nota est vindicta, quam sumpsit Deus de Achab Rege Israel, qui ut vineam Naboth occuparet, vitam ei Jezabelis uxoris suæ impulsu eripuit, ex lib. 3. Regum cap. 12. & 22.

Quarto qualis est pater in familia, talis est Rex in regno quod ex multis familiis constat: nec ullum bono principi gratius esse potest nomen, quam patris patriæ. Dicuntur etiam Reges ab Homero populorum pastores, quemadmodum enim pater familiam, & pastor gregem, ita princeps populum protegit, ac tuetur. Qua in re exercitu indiget seu ducibus & militibus, quibus stipendia populi sumptibus persolvi æquum est.

Quinto. Verum inter tot & tam multiplices curas, quæ solum circumstant, sive ut interius foveatur ordo pax & tranquillitas inter cives, sive ut bella foris arceantur, unius hominis vires fatiscunt, nisi adiumento aliquo

quo sublevetur. Igitur principi opus est consiliariis & ministris, qui inter optimates primum tenent locum. Nam *dissipantur cogitationes, ubi non est consilium: ubi vero sunt plures consilarii confirmantur.* Proverb. cap. 15. v. 22. sed quam certum est, principi necessarium esse consilium, tam consiliorum delectus est difficilis. Quamobrem ad delectum consiliorum, ministrorumque habendum attentione summa, summaque prudentia opus est; neque enim fas est omnino nisi sapientibus viris ac ætate & experientia, varioque rerum usu in omni negotiorum genere consummatis atque perfectis, imprimisque probitate conspicuis committere eas partes, quæ sunt in Republica præcipuæ; eoque magis quod princeps nullo possit illustriori argumento suam alicui subdito existimationem demonstrare, quam si ipsum in partem consilii vocet.

Quare consilarii principis regnique administri, sive in consilio, seu consistorio una cum Imperatore aut Rege de rebus ad publicam administrationem spectantibus agant; sive ad alios principes legati sint, sive provinciis præfecti; sive exercitibus ducendis præpositi, munus suum sic implere debent, ut semper Dei honori, principis gloriæ, patriæ splendori, & populorum saluti consulant.

Quod si qui forte ex comitibus, vel amicis Principis ipsum circumveniendo quidpiam
injuste

injuste in detrimentum populi aut privatorum impetraverint, illius interest, ut primum id resciverit, severe in eos animadvertere, ne pravum exemplum ad aliquid simile tentandum alios pertrahat.

Itaque si consiliarios ejusmodi nanciscatur Princeps, prudentes nimirum & bonos publicique magis, quam privati commodi amantes, nihil unquam sive pace sive bello suscipiet, quod ad summum ipsius decus & gloriam, populorumque felicitatem non conducatur.

16. Quærunt hoc loco, an liceat bellum inter Christianos gerere?

Respondeo licere Christianis bellum justum gerere: scilicet vel pro læsi Principis dignitate tuenda, aut asserenda; vel pro publica libertate; vel pro patriæ ac Religionis defensione. Hæ quippe, & si quæ sint similes causæ, dummodo veræ sint, & sapientibus probatæ, justam belli gerendi materiam præbent.

Nam legimus in scripturis sacris imperata esse a Deo bella, Deutron. cap. 7. v. 1. 2. Abraham ipse credentium pater bellum gessit adversus reges, qui Lot fratrem suum, seu potius fratris filium, cum omni substantia abduxerant, eumque reduxit, Gen. cap. 14. Nota sunt bella Josue, Gedeonis, Davidis, Machabæorum, & alia, quæ aut jubente, aut certe favente Deo, suscepta ac gesta esse minime est dubitandum.

Enim

Enim vero si bellum per se foret malum, mala quoque esset professio militaris, quod dici nequit, cum militaris professio nullatenus Christianæ religionis sanctitati sit contraria. Ergo bellum per se non est malum, nec proinde Christianis interdictum.

17. Dices, (Non sunt facienda mala ut inde eveniant bona; sed bellum sine gravibus malis geri non potest: ergo bellum non est gerendum; licet inde bonum aliquod expectetur.

Respondeo non sunt facienda mala moralia, ut inde eveniant bona sive physica sive moralia; possunt tamen fieri mala physica, ut inde oriantur bona physica aut moralia. Sæpe enim aliquos defectus physicos pati necesse est, ut commune bonum procuretur: sic latrones suppliciis sunt tradendi, ut publica conservetur securitas; sic membra quædam corporis sunt rescindenda, ne totum pereat.

Sed, inquires, bellum inter flagella Dei vulgo recensetur, ac bellatores multa solent perpetrare mala: ergo bellum est illicitum.

Resp. Licet bellum sit rêvera flagellum sive instrumentum, quo Deus utitur ad puniendos homines; hoc instrumentum potest esse bonum. Neque enim ideo censeri debet malum, quod multa a bellatoribus perpetrarentur mala; nam & mercatores multa perpetrant mala, non secus ac iudices, imo &

sacerdotes & quodlibet hominum genus. Quis tamen ideo vel mercaturam malam, vel iudicis officium, vel sacerdotium malum dicere audeat.

Instabis. Omnes qui gladium acceperint, gladio peribunt, teste Christo Domino Matth. 26. v. 52. Ergo vetat Christus Dominus bellum geri.

Resp. *Ille tantum accipit gladium ex S. August. lib. 22. contra Faustum cap. 70. qui nulla superiore, ac legitima potestate vel iubente vel concedente in sanguinem alicujus armatur.* Princeps autem aut Respublica superiorem illam ac legitimam habet potestatem. Proindeque ubi sapienti prudentum virorum consilio iusta judicata est belligerandi causa potest Princeps aut Respublica bellum gerere, eique milites in ea causa debent parere.

18. Quærunt præterea an bellum ex utraque parte possit esse justum? Resp. bellum ex utraque parte, intima animi persuasione, ac validis rationibus supremo Reipublicæ consilio diligenter & bona fide ponderatis videri posse justum. Idque ad bellum iuste gerendum sufficit. Nam in his rebus sola ratio & conscientia ducuntur homines ad agendum. Unde si rationem & conscientiam pro viribus excutiant, nihilque se, rationi ac iustitiæ contrarium agere in suadendo bello, intima conscientia persuasum habeant, in bellum consentire possunt: idque ex utraque parte atque etiam inter Christi fideles, Quam-

Quamvis porro malum per se dici nequeat bellum; ei tamen pax omnino est præferenda; nam Deus Principes pacificos bellatoribus anteponebat, ut intelligitur ex lib. 1. Paralip. cap. 22. v. 8. & 9.

De officio Magistratum & Judicum.

19. **E**A plerumque est hominum indoles, ut, cum suis rebus plus æquo studeant, aliena sibi attribuant, nec restituant ablata: Hinc magistratu aut judice in Republica opus est, qui jus dicat civibus, alterum ab altero non lædi sinat, & statutas a Principe aut Republica leges observandas curet.

Officium Judicis summatim continetur lib. 4. institut. tit. 17. Ubi secundum leges, constitutiones, & mores nulla habita personarum ratione judicandum esse dicitur. Quod non tantum a Judicibus sed & a Magistratibus omnino est observandum.

Deinde talem sententiam in singulis causis ferre tenetur, qualis est cujusque actionis natura, ut exemplis ibidem declaratur.

Quod si altius officium Judicis repetere velimus, nempe ex cap. 18. Exod. v. 21. & cap. 1. Deuteron. v. 16. & sequentibus, discemus eos duntaxat constituendos esse Judices, qui Deum timeant, in quibus sit veritas, & qui odio habeant avaritiam: *Quod justum est, inquit illis Moyses, judicate, sive civis sit ille, cujus causam judicatis, sive peregrinus.* Nulla

erit distantia personarum: ita parvum audietis, ut magnum; nec accipietis cujusquam personam, quia Dei judicium est.

20. Legibus igitur accurate informatus esse debet Judex, ut illas in omni judicio diligenter custodiat. Quod siquid ipsi, interdum occurrat difficilius, ad Deum confugiet, ut ab ipso erudiatur.

Judex præprimis abstinere debet ab accipiendis muneribus; *Quia munera excæcant oculos sapientum, & mutant verba justorum* Deutron. 16. v. 19. In judiciis autem ferendis quandoque potentioribus resistendum esse præcipit sapiens Eccles. 7. v. 6. *Noli querere fieri Judex: nisi valeas virtute irrumpere iniquitates: ne forte extimescas faciem potentis.* Hoc est, neque vis, neque favor potentis, te deterreat ab officio. Sed nec licet in partem oppositam peccare, nec in gratiam pauperis a justitia recedere. *Pauperis quoque non misereberis in judicio,* inquit Deus Exod. 22. v. 3. Nam extra judicium in pauperes calamitosos conjiciendi sunt oculi, & eorum miseriæ subveniendum; in judicio vero sola causa, seu res de qua agitur spectanda est, non persona: ut præcipit Deus Levit. 19. v. 15. *Non facies, quod injustum est, nec injuste judicabis. Non consideres personam pauperis, nec honores vultus potentis. Juste judica proximo tuo.*

Audiendi sunt igitur contententes, sive actor & reus, qualescunque fuerint, nobiles vel

vel plebei, divites aut egentes. Ponderanda, quæ utrinque allegant: nec quemquam inauditum condemnari patitur ratio. Hinc Seneca in Medea,

*Qui statuit aliquid parte inaudita altera,
Æquum licet statuerit; haud æquus fuit.*

21. Utraque parte audita Judex judicabit secundum allegata & rite probata; & juxta hæc tenetur ferre sententiam sive in causa Civili, ubi duntaxat de bonis civium, sive in criminali, ubi etiam de capite & vita res agitur.

Quod si judex certo sciat, aliquem esse innocentem, qui secundum allegata & probata in causa capitali condemnandus esset; debet judex a ferenda sententia penitus abstinere juxta quod præcipit scriptura Exod. cap. 23, *Non suscipies vocem mendacii non sequeris turbam ad faciendum malum: nec in judicio plurimorum acquiesces sententiæ, ut a vero devies.*

22. Dices, Judex sequi debet scientiam publicam, non privatam; ergo in proposita causæ specie non debet a judicando abstinere.

Resp. Judex sequi debet scientiam publicam ut judicet; non vero ut abstineat a judicando. Equidem, si sententiam ferat Judex, cum personam publicam gerat, scientiam publicam sequi debet: siquidem ea est judiciorum forma, quam lex positiva præscribit. Sed cum de innocente damnando agitur, quidvis potius pati tenetur, quam capitalem in eum sententiam ferre, quoniam id vetat lex naturalis.

Instabis. Licet judicare secundum legem positivam, quæ in ore duorum aut trium testium stare omne verbum asserit; ergo Judex non poterit a ferenda sententia abstinere.

Resp. Licet Judici judicare secundum legem positivam, nisi obstat lex naturalis.

Urgebis. Dux exercitus abstinere non debet ab expugnatione urbis aut arcis, quamvis multos in ea innocentes esse noverit; ergo Judex non tenetur abstinere a condemnando reo, etiamsi illum innocentem noverit.

Resp. Vitiosam esse paritatem. Nam Ducis officium est in bello justo urbem expugnare, quocunque modo id fiat; ac si multi in ea innocentes cadant, id omnino est præter intentionem expugnatoris, qui injuriam publicam auctoritate publica in bello juste suscepto ulciscitur aut repellit. Judicis vero officium est, jus suum cuique reddere, & proinde innocentem, quantum in ipso est, illæsum dimittere.

De privatorum officiis.

23. **P**RIVATOS appellamus, qui nullo munere publico inter cives funguntur, sed qui sibi vivunt, suisque duntaxat rebus dant operam; non tamen ab omnibus in patriam & concives officiis immunes putandi sunt, sed communibus civitatis & Reipublicæ legibus in concives obstringuntur, ut vicissim ab iis mutua reposcere possunt humanitatis & societatis officia.

Cives

Cives autem non sunt omnes, qui in aliqua tantum civitate degunt, sed ii soli, qui omnibus civitatis juribus gaudent; quique jus illud vel nativitate ipsa, vel Principis beneficio, aut alio quovis modo sunt consecuti.

Vir privatus, five inter honoratiores cives, qui nempe honestas colunt & exercent artes, five inter viliores operas recenseatur, pluribus erga concives suos tenetur officiis.

Primo quidem supremo Principi five Ecclesiastico, five Sæculari, Sacerdotibus, cæterisque viris Ecclesiasticis, Magistratibus, & omnibus in dignitate aliqua constitutis personis honorem ac reverentiam exhibere, eademque iis, qui sibi subditi sunt, nempe liberis & famulis, debet inspirare. Id enim præcipit Apostolus cap. laudato v. 7. *Reddite ergo omnibus debita: cui tributum, tributum; cui veltigal, veltigal: cui timorem, timorem: cui honorem, honorem, nemini quidquam debeatis, nisi ut invicem diligatis: qui enim diligit proximum, legem implevit.*

Secundo summus esse debet illius in Principem, patriam & civitatem amor, ita ut nulli rei pareat, ut principis & patriæ incolumitatem servet. Quamobrem in bello justo non tantum subsidia Principi ex facultatibus suis suppeditare, sed propriam, si necessitas postulet, personam debet offerre.

Tertio adeo non debet ulli factioni vel seditioni contra Principem & Patriam suppetias ferre, ut nullum ipsi majus piaculum videri

debeat, quam hinc ab obedientia legitimi Principis, quovis prætextu aut colore subtrahat. Meminisse enim oportet Apostolici præcepti ad Romanos 13. v. 2. *Qui resistit potestati, Dei ordinationi resistit.* Unde etiamsi crudelis foret Princeps, ac veræ Religionis hostis capitalis, nunquam in eum rebellare liceret: sed sic retinenda foret Religio, ut nec quidquam contra Deum admitteretur, nec a Principe fieret defectio; idque primorum Christianorum exemplo, qui omnia potius mala patiebantur, quam ut vel Deum offenderent, vel debitam Principi fidem violarent.

Quarto igitur, ut legem impleat, ipsum in concives suos, maxime vero in consanguineos, propinquos, socios, vicinos benevolum esse decet.

Quinto, quod in hominum societate ferre præcipuum est, bonam fidem a quovis in promissis & conventionibus servari aliis oportet, idque non tantum amicis, sed etiam hostibus & inimicis. Ut constat ex Ezechielis cap. 17. v. 15. ubi Propheta de Sedecia Rege, qui pejeraverat Regi Nabuchodonosor, sic pronuntiat: *qui dissolvit pactum nunquid effugiet.*

Cum vero fides etiam hostibus servanda dicitur, non tamen ea lex pactum pro capite pretium prædonibus deferendum jubet. Sunt enim latrones communes generis humani hostes, quibus cum nulla est societas: nullum proinde jus societatis.

Sexto denique non satis est ad Christianæ legis complementum, ut opera justitiæ, cujusmodi sunt, quæ ex pactis conventis bona fide descendunt, erga proximum exerceantur; sed præterea præstanda sunt opera misericordiæ propter Deum, qui cum sit communis omnium parens, mutuam inter omnes homines, fraternamque dilectionem vult intercedere.

24. Itaque cum tria sint bonorum operum genera, scilicet, oratio, jejunium, & eleemosyna: ut legimus Tob. c. 12. v. 8. *Bona est oratio, cum jejunio & eleemosyna*: oportet ut ea tum ad nostram, tum ad aliorum utilitatem exerceamus. Oratio dicitur elevatio mentis in Deum, per quam vel mala deprecamur, vel bona nobis aliisque petimus, vel Deo benedicimus. Jejunium est abstinencia a cibo & potu, secundum modum & tempus ab Ecclesia præscriptum Jejunium spirituale est abstinencia a peccatis, ut docet S. Augustinus, Tractatu 17. in Joannis Evangelium, num. 4. his verbis: *Jejunium autem magnum & generale est abstinere ab iniquitatibus & illicitis voluptatibus seculi*. Denique Eleemosyna seu misericordia est beneficium, quo alterius miseriæ propter Deum subvenimus. Duplicis sunt generis illius opera, nempe *spiritualia & corporalia*. Septem numerantur opera misericordiæ corporalia scilicet, *esurientes pascere; potum dare sitientibus, operire nudos, redimere captivos, ægros invisere, peregrinos hospitio excipere: mortuos*

mortuos sepelire. Totidem sunt opera misericordiae spiritualia : nimirum, ignorantes docere, errantes corrigere, dubitantibus consilium dare, pro salute proximi Deum orare, consolari mæstos, ferre patienter injurias, offensas remittere.

Hæc & alia præstabit, quisquis novissima hominis animo præsentia frequenter est habiturus, scilicet *mortem, judicium infernum, & cœlestem gloriam.* Quorum quidem consideratio tanti est momenti ad vitandum peccatum, ut ad eam expresse nos excitet sapiens Ecclesiastici cap. 7. v. 40. aurea illa sententia: *In omnibus operibus tuis memorare novissima tua, & in æternum non peccabis: Quæ scientia Moralis claudenda.*

**Ut in omnibus glorificetur
DEUS.**





Elenchus Capitum & §§.

Tomi I.

Philosophiæ Proæmium & operris Præ-
fatio. - - - (o)

Logicæ Proæmium. - - - pag. I.

Logicæ. caput I.

De iis quæ pertinent ad primam Mentis
operationem.

§I. De Universalitate, particularitate, & sin-
gularitate Idearum. - 4.

§II. De claritate & distinctione Idearum,
deque Prædicamentis in genere & de post-
prædicamentis. - 9.

§III. De Idearum signis, sive Terminis Logica-
libus, eorumque divisione. 21.

§IV. De Terminorum proprietatibus. - 28.

§V. De Modo sciendi, ubi & de Metodo. 35.

Ca-

INDEX

Caput II.

De iis quæ pertinent ad secundam Mentis operationem.

§I. De Natura Judicii & Propositionis.	-	44.
§II. De Divisione Propositionis.	-	47.
§III. De Proprietatibus Propositionis.		51.

Caput III.

De iis quæ pertinent ad Tertiam Mentis operationem.

§I. De Argumentatione generatim, & plerisque illius speciebus.	-	-	56.
§II. De Natura & Divisione syllogismi.			61.
§III. De syllogismi Figuris & Modis.			70.
§IV. De principiis & Regulis syllogismi.			75.
§V. De syllogismi Reductione.	-		80.
§VI. De Inventione Medii.	-	-	83.

Caput IV.

De Modo Disputandi, illiusque per varias quæstiones in Logica controversas exercitio.

§I. De Modo disputandi.	-	-	85.
§II. De definitione Terminum Logicalis. pro ad-discenda praxi disputandi.	-		94.
§III. De objecto Logica.	-	-	97.
§IV. De			

INDEX

§IV. De Natura Logica.	-	-	103.
§V. De Utilitate & necessitate logica.			110.
§VI. De Universali.	-	-	113.
§VII. De substantia.	-	-	122.

Metaphysicæ Proæmium.	-	127.
-----------------------	---	------

Caput I.

Ontologiam exhibens.

§I. De Ente & modo entis, atque attributis utrique communibus.	-	-	128.
§II. De Attributis soli enti seu substantiæ propriis, & præcipue de Causis.	-	-	135.
§III. De Causis.	-	-	138.

Caput II.

Pneumatologiam exhibens.

§I. De DEO, cujus existentia triplici argumento Metaphysico, Physico & morali probatur.	-	-	146.
§II. De Attributis Dei.	-	-	153.
§III. De scientia Dei.	-	-	155.
§IV. De voluntate Dei.	-	-	166.
§V. De omnipotentia Dei.	-	-	169.
§VI. De Deo Creatore.	-	-	170.
§VII. De Deo Conservatore.	-	-	171.
§VIII. De			

INDEX

§VIII. De Deo Providente.	-	172.
§IX. De Deo Movente, & concurrente		174.
§X. De Angelis.	-	193.
§XI. De Mente Humana.	-	200.
§XII. De Immortalitate Animæ.	-	205.
Sult. De humano intellectu & voluntate.		211.

Ethicæ five Philosophiæ Moralis	
Proæmium.	- 213.
Discurfus Præliminaris De Natura	
Philosophiæ Moralis.	- 215.

Philosophiæ Moralis

Caput I.

De summo Hominis Bono, five de ultimo actuum humanorum fine.

§I. De Bono generatim.	-	220.
§II. De Fine.	-	232.
§III. De Beatitudine Naturali.	-	236.
§IV. De Beatitudine supernaturali.	-	246.
§V. Satisfit quibusdam questionibus cum tradita doctrina de Beatitudine connexis.		256.

Ca-

INDEX

Caput II.

De Actibus Humanis.

- §I. Quid, & Quotuplex sit Actus Humanus. 273.
§II. An actus omnis humanus sit Voluntarius. 278.
§III. An omnis Actus humanus sit liber. 292.
§IV. De Bonitate & Malitia actuum humanorum. 308.

Caput III.

De Regulis actuum Humanorum.

- §I. De actuum Humanorum regulis in genere. 326.
§II. De lege Naturali & Æterna. - 331.
§III. De Conscientia. - 341.
§IV. De lege Divina. - 346.
§V. De legibus humanis. - 362.
§VI. Selectæ Juris Notiones ex Imperatoris Iustiniani Institutionibus desumptæ, cum variis observationibus ad scientiam Morum spectantibus. - ad p. 386. ad p. 455.

Caput IV.

De Virtutibus, Vitiis & Peccatis.

- §I. Quid & Quotuplex sit virtus. - 456.
§II. De

INDEX

<i>§II. De Virtutibus moralibus speciatim, & primo de Prudentia.</i>	- - -	472.
<i>§III. De Peccatis,</i>	- - -	488.

Caput V.

De Variis vitæ Officiis.

<i>§I. De Hominis tum erga Deum, tum erga seipsum officiis.</i>	- - -	497.
<i>§II. De Hominis officiis erga familiam.</i>		507.
<i>§III. De variis hominum officiis erga Rem- publicam,</i>	- - - e	516.

F I N I S.



INDEX

Elenchus Tractatum Tomi II.

Præfatio. - - - (o)

Elementa Arithmetica. - - - pag. 1.

Elementa Geometriae. - - - 48.

Elementa Trigonometriae. - - - 115.

Elementa Mechanica. - - - 130.

Elementa Hydrostatica. - - - 154.

Elementa Aerometriae. - - - 169.

Elementa Hydraulica. - - - 185.

Elementa Optica. - - - 197.

Elementa Perspectiva. - - - 214.

Elementa Catoptrica. - - - 231.

Elementa Dioptrica. - - - 243.

Elementa Astronomiae, cujus

Pars I. De Mundo instar sphaerae considerato.

258.

Pars II. De iis Phenomenis quae ab Astrorum

motu proprio dependent. - - - 302.

Elementa Geographiae. - - - 322.

Elementa Gnomonica. - - - 367.

Elementa Pyrotechniae. - - - 378.

Elementa Architecturae civilis. - - - 401.

Elementa Architecturae Militaris. - - - 478.

F I N I S.







005606053

